

МИХАИЛ ШОЛОХОВ

АСАРЛАР
ТҮПЛАМИ
САККИЗ ТОМЛИК



ТИНЧ ДОН

ТҮРТ КИТОБЛИ
РОМАН



ЎзССР ДАӘЛДАТ БАДИЙ АДАБИЁТ НАШРИЁТИ
Тошкент — 1961

МИХАИЛ ШОЛОХОВ

АСАРЛАР
ТҮПЛАМИ

3

ТОМ

ТИНЧ ДОН

ИККИНЧИ КИТОВ

ж

ЎзССР ДАВЛАТ БАДИЙ АДАБИЕТ НАШРИЕТИ
Тошкент - 1961

*МИРКАРИМ ОСИМОВ
таржимаси*

P
Ш76

„Тинч Дон“ романининг иккинчи китобида 1917 йилнинг охири ва 1918 йил бошларнда рўй берган воқиалар юксак маҳорат билан тасвирланади. Ёзувчи бу воқиаларда қатнашган турли табақа вакилларининг ҳамда Дон казакларидан чиққан революционерларниң ёрқин образларини яратган.

Шолохов М.

Асарлар тўплами. 8 томлик. Т. 3. Т., Ўзбадийнашр. 1961.
Т. 3. Тинч Дон. 4 китобли роман. К. 2 (М. Осимов
тарж.) 1961. 459 бет.

Шолохов М. Собрание сочинений. Т. 3.

P2

ТҮРТИНЧИ ҚИСМ

/

Бир минг тўқиз юз ўн олтинчи йил. Октябрь ойи. Кечаси. Шамол эсиб, ёмғир ёғмоқда. Ўрмонзор. Зирк дарахти қоплаган ботқоқлик ёқасидаги окоплар. Олдинда сим тикан тўсиқлар. Окоплар ичи соvuқ, лойгарчилик. Кузатувчининг намиққан тўсиғи гира-шира йилтиллайди. Ертўлаларда онда-сонда чироқлар милтиллааб ёнмоқда. Офицерлар турадиган ертўлалардан бирининг эшиги олдида чорпахилдан келган бир офицер бир лаҳзагина тўхталди; ҳўл панжалари билан шинелининг тугмаларини тез-тез ечди, ёқасининг сувини қоқди, лойга қоришган бир тутам похолга наридан-бери этигини артди-да, эшикни итариб, энгашганича ертўла ичига кирди.

Кичкинагина керосин лампадан тушиб турган сарғиши шуъла ертўлага кирган кишининг юзини ярқиратиб кўсатди. Тахта каравотда тужуркасининг олдини очиб ётган офицер ўрнидан турди-да, пахмайган, оқ аралаш сочини қўли билан тараб, эснади.

— Ёмғир ёғяптими?

— Ҳа, ёғяпти,— деди келган меҳмон.— Шундай деб шинелини ва жиққа ҳўл фуражкасини кираверишдаги михга осиб қўйди.— Бу ер иссиқ экан, димиқиб кетибди.

— Биз ҳалигина печга ўт ёқувдик. Шуниси хункки, ердан сув сизиб чиқяпти. Жин ургур ёмғир тинкамизни қуритяпти. Ҳўш, сиз бунга нима дейсиз, Бунчук?

Бунчук қўлларини ишқалаб энгашди-да, печка ёнига чўнқайиб ўтири.

— Ерга похол тўшама солинг. Бизнинг ертўламиз ажойиб: яланг оёқ юриш мумкин. Листницкий қаёқда?

— Ухлаяпти.

— Анча бўлдими?

— Окопларни айланиб қайтгач, ухлагани ётди.

— Уйғотсак бўлар дейман?

— Майли, уйғотинг. Шахмат ўйнаймиз.

Бунчук кўрсаткич бармоғи билан қалин, ўсиқ қошларидан ёмғир сувини сидириб ташлаб, бошини кўтартмасдан:

— Евгений Николаевич!— деб секин чақирди.

— Данг қотиб қопти,— деди уф тортиб, сочига оқ оралаган офицер.

— Евгений Николаевич!

— Ҳа?— деб Листницкий тирсагига тираниб бошини кўтарди.

— Шахмат ўйнаймизми?

Листницкий каравотдан оёғини осилтириб, қизғиш, дўумбоққина кафти билан юмшоқ кўкрагини анчагача ишқалаб ўтири.

Ўйин тугай деганда бешинчи сотня офицерлари — ясовул Калников билан юзбоши Чубовлар келиб қолишли.

— Янгилик!— деди бўсағадан туриб Калников.— Миш-мишларга қараганда полкимизни жўнатишармиш.

— Қаёқдан эшитдинг?— деб сўради мўйсафида-намо ясовул ёрдамчиси Меркулов, ишонқирамагандай мийифида кулиб.

— Ишонмаяпсанми, Петя тоға?

— Ростини айтсам, ишонмаяпман.

— Батарея командири телефон орқали хабар қилди. У қаёқдан билган дейсанми? Ахир у кечагина дивизия штабидан келди-ку!

— Бир ҳаммомлашсак чакки бўлмасди-да.

Чубов маза қилаётгандай кулиб, гўё орқасига ҳаммом супургиси билан ураётгандай ҳаракат қилди. Меркулов кулиб юборди.

— Ертўламизгá қозон қурса бас, сувдан кўпи йўқ.

— Жудаям зах босиб кетибди-да, оғайнилар,— деб ғўнгиллади Қалмиков ёғоч деворларга ва билчиллаган ерга қараб.

— Шундай ёнгинамиз ботқоқ.

— Худди онангизнинг қорнида ётгандай ботқоқда ётганингизга шукур қилинглар,— деб гапга аралашиди Бунчук.— Ялангликдагилар ҳужумга ўтган, биз эсак бу ерда бир ҳафтада бир обоймадан ўқ сарфлаймиз, холос.

— Бу ерда сасиб-чириб ўтиргандан кўра, ҳужумга ўтганам яхшироқ.

— Петя тоға, казакларни ҳужумда нобуд қилиш учун сақлаётганлари йўқ. Сен содда муғомбирлик қиляпсан.

— Бўйласа, сенингча нима учун сақлаётибдилар?

— Ҳукумат эски одати бўйича, керак пайтда казакларга таянади.

— Сағсата сотяпсан!— деб қўл силтади Қалмиков.

— Нега сағсата бўлсин?

— Ҳа-да.

— Қўйсанг-чи, Қалмиков! Ҳақиқатни рад этиб бўлмайди.

— Қанақа ҳақиқат...

— Бу ҳаммага маълум нарса-ку, ахир. Нега ўзингни билмасликка оляпсан?

— Диққат, жаноб офицерлар!— деб қичқирди Чубов ва артистона таъзим қилиб Бунчукни кўрсатиб:— Хорунжий Бунчук ҳозир социал-демократлар таъбириномасидан ривоят келтиради,— дэди.

— Кунимиз майнавозчиликка қолдими?— деди Бунчук мийигида кулиб, Чубов билан кўз уриштириб.— Гапираверинг, билганингизча. Мен сизга айтсам, биз ўтган йилнинг ярмидан бери уруш деган нарсани кўрганимиз йўқ. Позицион уруш бошлангандан бери казак полкларини пана жойларга тикиширишган, то пайти келгунга қадар ковакда сақлашади.

— Кейин-чи?— деб сўради Листницкий шахматни йиғишириб қўятуриб.

— Кейин, фронтда ғалаён чиққандан сўнг (бу муқаррар гап, уруш солдатларнинг жонига тегди, дезертирларнинг кўпаяётгани бунга шоҳиддир), исёнларни бостириш, тинчтиш учун казакларни ишга солишади. Ҳукумат казак қўшинларини палахмондаги тош сингари сақлайди. Керак вақтда ҳукумат бу тош билан революциянинг миясини пачақламоқчи бўлади.

— Опқочяпсан, азизим! Тахминларинг асоссиз. Аввало, воқиаларнинг боришини олдиндан айтиб бўлмайди. Келгусида исёнлар ва ҳоказолар чиқишини сен қайдан биласан? Иттифоқчилар немисларни тор-мор қилди, уруш ажойиб ғалаба билан тугади, деб фараз қилайлик, хўш, шунда сен казакларга қандай роль берасан?— деб эътиroz билдириди Листницкий.

Бунчук тиржайиб қўйди.

— Уруш тугайдиганга ўхшамайди, бунинг устига, яна ажойиб ғалаба билан...

— Урушни чўзиб юбордилар.

— Яна мундан ҳам чўзадилар ҳали.

— Ўзинг отпускадан қачон қайтдинг?— деб сўради Калников.

— Ўтган куни.

Бунчук лабларини чўччайтириб, оғзидан ҳалқа-ҳалқа тутун чиқарди-да, папирос қолдигини ташлаб юборди.

— Қаерларда бўлдинг?

— Петроградда.

— Хўш, қалай у ер? Пойтахт қайнаётган бўлса керак? Бир ҳафтагина бўлса ҳам, Петроградда туриш учун мен истаган нарсамни беришга тайёр бўлар эдим.

— Хурсанд бўладиган жойи йўқ,— деди салмоқлаб Бунчук.— Нон етишмайди. Ишчи районларда очлик, норозилик, бесаранжомлик...

— Биз бу урушдан омон чиқмасак керак, қандай деб ўйлайсизлар, жаноблар,— деди ва жавоб кутгандек ҳаммага бир-бир қараб чиқди Меркулов.

— Рус-япон уруши минг тўқиз юз бешинчи йил революциясининг келиб чиқишига сабаб бўлди,— бу уруш янги революция билан тугайди. Ёлғиз революция билангина эмас, балки гражданлар уруши билан ҳам.

Бунчукнинг гапига қулоқ солиб ўтирган Листниций хорунжийнинг гапини кесмоқчи бўлгандай ҳаракат қилиб қўйди. Кейин ўрнидан туриб, тумтайганча ертўла ичидаги ёқдан бу ёққа юрди. Сўнгра мункайиб ўтирган Бунчук томонга ишора қилиб заҳрини сочди:

— Ҳайронманки, офицерларимиз орасида мана шунаقا унсурлар бор. Таажжубки, унинг ватанга ва урушга муносабати ҳозирга довур менга равшан эмас... Бир куни суҳбат вақтида дудмол бир гап қилди, аммо унинг бу урушда бизнинг мағлуб бўлишимиз тарафдори эканини тушуниб олмоқ учун ўша гапи кифоя эди. Гапингни тўғри тушунибманми, Бунчук?

— Мен мағлубият тарафдориман.

— Нима сабабдан? Менимча, сенинг сиёсий маслагинг қандай бўлмасин, ўз ватанингга мағлубият тилашинг — бу миллатга хиёнатdir. Бу — ҳар қандай дуруст одам учун шармандаликdir!

— Эсингизда бордир, большевикларнинг Думадаги фракцияси ҳукуматга қарши ташвиқот қилиб мағлубиятга йўл очиб берган эди,— деб гапга аралашди Меркулов.

-- Сен, Бунчук, большевикларнинг фикрига қўшиласанми? — деб савол ташлади Листниций.

— Модомики, мен мағлубият тарафдори эканимни изҳор қиляпман — демак, уларнинг фикрларига қўшиламан ҳам. Ўз партия фракциямнинг фикрига қўшилмаслик — РСДРП аъзоси бўлган мен, большевик учун кулгили бўларди. Мени энг ҳайратда қолдирган нарса шуки, Евгений Николаевич, сенек зиёли одам — сиёсий кўр.

— Мен, аввало, подшога содиқ солдатман. «Социалист ўртоқлар»нинг нусхасини кўрсан зардам қайнайди.

Бунчук ичидаги: «Сен, аввало, бефаҳм каллаварам-

сан, сўнгра эса ўзига бино қўйган аҳмоқ бир офицерсан» деб, кулгидан ўзини тийди.

— Ҳаққос рост...

Меркулов худди узр айтгандек қилиб:

— Ҳарбий муҳитда аҳвол оғир эди. Бизлар сиёсатдан узоқда, бир чеккада туардик,— деди.

Ясовул Қалмиков салқи мўйловларини бураб, қийиқ ва ўткир кўзларини чақнатиб ўтиради. Чубов каравотда ётар ва сұхбатдошларининг гапларига қулоқ бериб, деворга қоқилган суратни томоша қиласди. Меркулов ишлаган бу сурат тамаки тутунидан сарғайиб кетганди. Суратдаги ярим яланғоч, соҳиб жамол хотин фаҳшона назар билан зориқандай ўзининг очиқ сийнасига кўз ташлаб, чап қўлининг икки бармоги билан буғдой ранг маммасини чимчилаб турар, синчалоғи сал кўтарилиганди. Киприклари қовоғи остига соя ташлаган, кўзларида илиқ табассум. Унинг андек кўтарилиганди елкаси сирғилиб тушай деган кўйлагини ушлаб туар, елка чуқурларида шуъла ўйнарди. Бу хотиннинг қоматида эркин нафосат ва чинакам гўзаллик бор эди, расмнинг қорамтири тузи тасвирга сифмайдиган даражада гўзал эдикি, Чубов беихтиёр жилмайиб қараб, маҳорат билан ишланган бу суратга маҳлиё бўлиб қолди. Гапирилаётган гапларни эшитиб турса-да, лекин миясига кирмас эди.

У суратдан кўзини узиб, ўринсиз бир луқма ташлади:

— Во ажабо!

Ҳолбуки Бунчук ўз гапини:

— ...Кўнгилларинг тўқ бўлсин, чоризм йўқ қилинади,— деб тамомлаган эди.

Листницкий тамаки ўрар экан заҳарханда қилиб, дам Бунчукка, дам Чубовга қарап эди.

— Бунчук!— деди Қалмиков.— Шошманг Листницкий!.. Эшиятисизми, Бунчук?.. Хўп, майли, айтайлик, бу уруш гражданлар урушига айланиб кетди ҳам... хўш, оқибати нима бўлади? Айтайлик, сизлар подшони йиқитдинглар... Сизнингча, қанақа усулли идора бўлиши лозим? Ҳокимият қанақа бўлади?

- Пролетариат ҳокимияти бўлади.
- Парламентми?
- Паст кетдингиз! — деб кулди Бунчук.
- Бўлмаса, нима?
- Ишчилар диктатураси бўлиши керак.
- Шунаقا денг!.. Зиёлилар билан деҳқонларнинг роли қандай бўлади?

— Деҳқонлар бизга эргашади, онгли зиёлиларнинг бир қисми ҳам, қолганлари эса... Қолганларни эса мана мундоқ қиласиз... — Бунчук қўлидаги қофозни тезлик билан ғижимлаб буради. Уни силкитиб, ғижиниб: — Мана мундоқ қиласиз, — деб қўйди.

— Жуда баланд парвоз қиляпсиз-ку... — деб миғифида кулди Листницкий.

— Баланд жойга қўнамиз ҳам-да, — деб гапини тамом қилди Бунчук.

— Қўнадиган жойингизга аввалроқ похол тўшаб қўйинг...

— Нима, номаъқулчилик қилиб, фронтга кўнгилли бўлиб келдингиз, ҳатто офицерлик мартабасигача етдингиз? Бу гапингиз қилган ишингизга зид-ку? Та-а-ж-жуб! Урушга қарши, хе-хе-хе... ўз... синфдошларини қиришга қарши бу киши... бирданига... хорунжий бўпқопти!

Калников этигининг қўнжига шапатилаб, хохолаб, бегараз кулди.

— Сиз, ўз пулемётчиларингиз билан қанча немис ишчисини қирдингиз? — деб сўради Листницкий.

Бунчук шинелининг ён чўнтагидан катта бир ўрам қофозни олиб, Листницкийга орқа ўгириб туриб, анчагача титкиланди. Сўнгра стол ёнига бориб, сарфайиб кетган эски газета саҳифасини дўмбоқ кафти билан текислади.

— Қанча немис ишчисини отганим — бу муаммол Кўнгилли бўлиб келишимнинг сабаби шуки, барibir, мени олишарди. Ўйлайманки, бу ерларда, окопларда олган билимим келгусида... Келажакда яраб қолар. Бунда шундай дейилган...

Шуни деб, у Лениннинг сўзларини ўқиди.

— «Ҳозирги замон қўшинини олайлик. Ташкилотнинг энг яхши намуналаридан бири. Бу ташкилот шунинг учун яхшики, у ихчам. Шу билан бирга, миллионлаб кишиларнинг иродасини бирлаштира олади. Бугун бу миллионлаб кишилар ўз уйларида, мамлакатнинг турли бурчакларида ўтирибдилар. Эртага мобилизация тўғрисида буйруқ бўлса, улар тайинланган жойга тўпланадилар. Бугун улар траншеяларда ётишибди, баъзан ойлаб ҳам ётадилар. Лекин эртасига ҳужумга ҳам ўтиб кетаверадилар. Бугун улар ўқдан ва шрапнеллардан яшириниб, мувжиза кўрсатадилар. Эртага улар очиқ жангда жасорат кўрсатадилар. Бугун уларнинг илфор отрядлари ер остига миналар кўмадилар, эртага улар учувчи-ларнинг ишораси билан ўнлаб чақиримларга сильжийдилар. Мана шуни ташкилот дейдилар. Бунда миллионлаб кишилар бир мақсад йўлида бир иродадан илҳомланиб, ўзгарган шароит ва кураш талабларига монанд қилиб, ўз муомала ва ҳаракатларининг шаклини, ўз жойларини ва иш усуllibарини, қурол-яроғларини ўзгартирадилар.

Ишчилар синфининг буржуазияга қарши курашига ҳам шу нарса тааллуқлидир. Бугунги кунда революцион ситуация мавжуд эмас...»

— «Ситуация» нима дегани? — деб гапни бўлди Ҷубов.

Бунчук шу топда уйқудан уйғонган одамдек қимирлаб қўйди ва берилган савонни англаб олмоқ учун бошмалдоғи билан дўнг пешонасини ишқалади.

— Мен «ситуация» деган сўзнинг маъносини сўраяпман.

— Тушунишга тушунаман-у, лекин уddaлаб ту-шунтиролмайман.— Бунчук болалардек маъсумона ва шўх кулди; бу кулги унинг тумтайган ялпоқ юзи-га мос тушмади.— Ситуация — бу вазият, шароит дегани бўлса керак. Шундай эмасми?

Листницкий бошини муҳмал қилиб ирғаб қўйди.

— У ёғини ўқи.

— «Бугунги кунда революцион ситуация мавжуд эмас. Омманни ғалаёнга келтириш, унинг фаолиятини кучайтириш учун шароит йўқ, бугун сенинг қўлингга сайлов бюллетени беришади, ол уни, турмага тушишдан қўрқиб, креслоларига ёпишиб олган одамларни парламентдаги иссиққина ўринларга ўтиргизиб қўйиш учун эмас, балки ўз душманларингни савалаш учун ундан фойдалана бил. Эртасига сайлов бюллетенини торгиб олиб, сенинг қўлингга яроғ-аслаҳа ва сўнгги техника билан ускуналанган ажойиб тезотар тўп берадилар, бу ажал вайронгарчилик қуролларини қўлингга ол, урушдан қўрқадиган кўнгилчан мижғовларнинг гапига қулоқ солма; дунёда шундай нарсалар кўпки, ишчилар синфини озод қилиш учун уларни ўт ва темир билан йўқотиш лозим бўлади, агар омма ўртасида ғазаб ва норозилик ўса, агар революцион ситуация мавжуд бўлса, янги ташкилотлар тузишга кириш ҳамда ўз ҳукуматинг ва ўз буржазиянгга қарши фойдали ажал, вайронагарчилик қуролларидан фойдаланиб, *ишга сол...*»

Бунчук ўқиб тугатиб бўлмасдан эшикни тақилатиб, бешинчи сотня вахмистри ертўлага кириб келди.

— Жаноб олийлари,— деб Калниковга мурожаат қилди у.— Полк штабидан ординарец келди.

Калников билан Чубов кийиниб чиқиб кетишиди. Меркулов ҳуштак чалиб сурат сола бошлади. Листниций мўйловларини чимдиб, бир нималарни ўйлаб, ертўлада у ёқдан бу ёққа юради. Бир оздан кейин хайрлашиб, Бунчук ҳам чиқиб кетди. У чап қўли билан ёқасини, ўнг қўли билан шинелининг этагини ушлаб билчиллаб ётган хандақ ичидан юриб кетди. Торгина хандақ ичидан шамол изғирди; муюлишларга урилиб, ғувиллаб айланарди. Қоронғиликда кетаётган Бунчук негадир тиржайиб кулди. У ёмғирдан зах босиб кетган, чиринди зирк баргларининг ҳиди анқиган ўз ертўласига етиб келди. Пулемёт командасининг бошлиғи уйқуда эди. Унинг қорача юзида уйқусизлик аломатлари кўринарди (учкеча тинмай қартабозлик қилган эди). Бунчук солдатлик вактидан қолган қопчиғини титкилаб, эшик ёни-

да анча-мунча қофозни ёқиб юборди, чалворининг чўнтағига икки банка консерва, бир неча сиқум тўппонча ўқи солиб чиқиб кетди. Бир лаҳза ланг очиқ қолган эшикдан шамол кириб, остона ёнида кўйдирилган қофозларнинг кулини учириб кетди, сасиб ёнаётган чироқни ўчириб қўйди.

Бунчук чиқиб кетганидан кейин Листницкий беш минутча индамай у ёқ-бу ёққа юриб, кейин стол ёнига келди. Меркулов бошини қийшайтириб сурат солмоқда эди. Қўлидаги учли қалами соя туширмоқда эди. Тўрт бурчак оқ қофоздан зўрма-зўраки кулиб турган Бунчукнинг чеҳраси қараб турарди, бу жилмайиш одатда унинг юзини ғалати қилиб кўрсатарди.

Меркулов сурат ушлаган қўлини силтаб:

— Важоҳатини қаранг-а,— деди-да, бошини кўтариб Листницкийга қаради.

— Хўш, қанақа?— деб сўради Листницкий.

— Қанақалигини худо билсин!— деб жавоб берди Меркулов саволнинг мағзини чақиб.— Жуда ғалати йигит, кўнглидагини энди очди, кўп нарса менга равшан бўлди, унинг кимлигини энди билиб олдим. Билсанг, унинг казаклар, хусусан, пулемётчилар орасида обрўси жуда катта. Сен буни пайқамаганинг?

Листницкий дудмал қилиб:

— Шундоф,— деб қўйди.

— Пулемётчиларнинг ҳаммаси большевик. Уларни шу ҳолга солган одам — Бунчук. Бугун ўз сирларини очиб ташлаганига ҳайрон қолдим. Нега? Қасдма-қасдликка, азбаройи худо! Фикрларига ҳеч биримизнинг қўшилмаслигимизни билади, лекин негадир юрагидаги бор гапни яширмай айтди-қўйди. Ҳолбуки, у қизиққонлардан эмас. Хавфли одам.

Бунчукнинг бу ғалати қилиғи тўғрисида гапирап экан, Меркулов суратни бир чеккага йиғишириб қўйиб, ечина бошлади. Жиққа ҳўл пайпоқларини печкага осиб, соатини буради, сўнгра папирос чекиб олиб ўрнига ётди. Кўп ўтмай ухлаб қолди. Листницкий чорак соат Меркулов ўтирган табуреткага жойлашиб олди-да, ингичка қилиб чиқарилган қалам-

нинг учини синдириб, суратнинг орқасига катта-катта қилиб ёза бошлади.

«Жаноб олийлари!

Илгари мен ўз шубҳаларимни сизга баён қилган эдим, бугун улар тамомила рост бўлиб чиқди. Бизнинг полк офицерлари билан суҳбатлашиб ўтираркан хорунжий Бунчук (мендан ташқари бешинчи сотня ясовули Калмиков, юзбоши Чубов, учинчи сотня ясовули ёрдамчиси Меркуловлар бор эди), ўз сиёсий маслагига мувофиқ, эҳтимол, партия раҳбарларининг топшириғига кўра, ўзи бажараётган вазифаларни гапириб берди, ростини айтсан, нима мақсадда бундай қилганини тушунолмадим. Ёнида ман қилинган бир ўрам қофоз ҳам бор эди. Чунончи, масалан, у ўз партиясининг Женевада нашр этиладиган органи — «Коммунист»дан парчалар ўқиб эшитирди. Хорунжий Бунчук, шубҳасиз, бизнинг полкимизда яширин иш олиб бормоқда (шу мақсадда полкка кўнгилли бўлиб келган бўлса ҳам ажаб эмас), пулемётчилар орасида ташвиқот юргизмоқда. Пулемётчилар бузилганлар. Бунчукнинг заарали таъсири полкнинг маънавий ҳолатида ҳам яққол кўрилмоқда — ҳарбий топшириқлардан бош тортиш каби ҳодисалар бўлди, бу тўғрида мен дивизия штабининг маҳсус бўлимига юборган эдим ва ҳоказо.

Хорунжий Бунчук яқиндагина отпускадан қайтиб келган (Петроградда бўлган экан), бузувчилик ва рақаларини жуда кўп келтирибдир; ҳозир энди зўр иштиёқ билан иш олиб боришга уринмоқда.

Юқоридагилардан якун чиқариб, қуйидаги хуло-сага келдим: а) хорунжий Бунчукнинг айби аниқланди (унинг суҳбатида ҳозир бўлган жаноб офицерлар онт ичиб, менинг гапларимни тасдиқлашлари мумкин); б) Бунчукнинг революцион фаолиятига хотима бериш учун дарҳол уни қамоққа олиб, ишини ҳарбий-дала судига топширмоқ зарур; в) дарҳол пулемёт командасини бирма-бир текширувдан ўтказиб, хавфли кимсаларни бартараф қилмоқ, қолгандарни ё фронт орқасига жўнатмоқ ёки полк орасига таратиб юбормоқ зарур.

Менинг ватанга ҳамда подшога бажонидил хизмат қилиш ниятида эканимни унутманг. Ушбу хатнинг иккинчи нусхасини Корпус махфий бўлимига юбораётирман.

Ясовул Евг. Листницкий.

20 октябрь 1916 йил. 7-участка».

Эртасига эрталаб Листницкий бу хатни чопар орқали дивизия штабига юбортирди. Окоп устига уйилган ҳўл тупроқнинг нари ёғидаги ботқоқлик устини туман қоплаб олган, паға-паға туманлар тиканли симга ўралиб қолгандек осилиб қолган. Хандақ ичи икки энлик лойӣ. Милтиқ отиш учун қилинган тешиклардан лойқа сув оқиб тушмоқда. Жиққа ҳўл, лойга беланганд шинель кийган казаклар қалқон устига котелокларини осиб, чой қайнатмоқдалар, милтиқларини деворга тираб қўйиб, чўққайиб ўтириб, тамаки чекмоқдалар.

— Қалқон устида олов ёқманг, деб неча бор айтилди! Нега сиз, абллаҳлар тушунмайсиз? — деб ўшқирди Листницкий тутаб ётган гулхан атрофида ўтирган бир гуруҳ казаклар ёнига келиб.

Казаклардан иккитаси истар-истамас ўрнидан турди, қолганлари шинелларининг барини қайтариб олиб, тамаки чекиб ўтиравердилар. Қулоғининг буришиб кетган солинчоғида кумуш исирға ликиллаб турган серсоқол, қорача казак котелок остига бир тутам чўпни итариб қўйиб, жавоб қилди:

— Қалқонсиз қайнатишнинг иложини топсак жон дердик-а, лекин жаноб олий, усиз қандай қилиб олов ёндириб бўлади? Қаранг, ҳамма ёқни сув босиб ётибди, сал кам тўрт энлик келади-я.

— Дарров қалқонни ол!

— Бундан чиқди, биз оч-наҳор ўтиарканмиз-да? Майли, майли... — деди юзи ялпоқ чўтирип казак тумтайиб, ёнига қараб.

— Мен сенга гапдонликни кўрсатиб қўяман... ол деяпман қалқонни! — Листницкий этигининг тумшуғи билан бир тепиб котелок остида ёниб турган чўпларни тўзитиб юборди.

Исиргали серсоқол казак ғижиниб зарда билан котелокдаги қайноқ сувни тўкиб ташлади-да:

— Чой ичишни бизга ким қўйибди, оғайнилар,— деб пўнгиллади.

Казаклар чурқ этмай хандақ ичидан кетаётган ясовулнинг орқасидан қараб қолдилар.

— Дилемизни сиёҳ қилди, абраҳ!

Казаклардан бири қайишли милтиқни кифтига илиб олиб, чўзиб:

— Э-э-эҳ! — деб хўрсинди.

Тўртингчи взвод участкасида Меркулов ҳарсиллаб Листницкийнинг орқасидан қувиб етиб олди. Унинг янги чарм тужуркаси ғижирлар, эфзидан махорка ҳиди гуркираб келиб турарди. У Листницкийни бир чеккага чақириб олиб, нафаси тиқилиб:

— Янгиликдан хабаринг борми? Бунчук шу ке-ча қочибли,— деди бидирлаб.

— Бунчук-а? Ни-ма-а?

— Қочибли. Англайapsанми? Пулемётчилар командасининг бошлиги Игнатьевичнинг гапига қараганда (у ахир Бунчук билан бир ертўлада турадик), у бизницидан чиққанидан кейин қайтиб келмаган эмиш. Демак, бизнинг ертўладан чиқа солиб, жуфтагини тўғрилабди... Ана, кўрдингми!

Листницкий пенснесини узоқ ишқалаб, кўзларини қисиб қўйди.

— Сен ташвишга тушиб қолдинг, дейман? — деди Меркулов унга синовчан назар ташлаб.

— Менми? Эсинг жойидами ўзи? Нега мен ташвишга тушай! Сен фақат тўсатдан гапириб, мени довдиратиб қўйдинг, холос.

II

Эртасига эрталаб вахмистр хижолат тортиб, Листницкий турган ертўлага кирди-да, иккиланиб туриб:

— Жаноб олий, бугун эрталаб казаклар окопдан манови қоғозларни топиб олибдилар,— деди.— Яхши иш бўлмади. Мен сизга шу хусусда хабар бергани келдим. Бошимизга бало бўлмасайди...

— Қанақа қоғозлар? — деб сўради Листницкий каравотдан туриб.

Вахмистр кафтида гижимлаб турган қоғозни узатди. Бир тахта қоғоз устида ёзув машинасида бо силган сўзлар жимиirlаб кўринниб турарди.

Листницкий бир зумда ўқиб чиқди:

Бутун дунё proletарлари, бирлашингиз!

УРТОҚ СОЛДАТЛАР!

Бу лаънати уруш икки йилдан бери давом этиб келмоқда. Икки йилдан буён сиз, бирвларнинг манфаатини ҳимоя қила-ман, деб траншеяларда жон олиб, жон бермоқдасиз. Икки йилдан буён барча миллат ишчилари ва деҳқонларининг қони тў-килмоқда. Бу хунрезлик натижасида юз минглаб одамлар нобуд бўлди, шикастланди, юз минглаб хотин — бева, болалар — етим қолди. Сиз нима учун урушяпсиз? Кимларнинг манфаатини ҳимоя этмоқдасиз? Чор ҳукумати янги ерларни урушиб олиш ва у ерларнинг халқларини асоратга солингтан Польша ва бошқа миллатлар сингари эзиш учун миллионлаб кишиларни уруш олови ичига ташлади. Жаҳон саноат эгалари ўз фабрика ва заводлари маҳсулотларини сотиш мумкин бўлган бозорларни тинчлик билан тақсимлаб ололмадилар, кўрадиган фойдаларини баҳам кўришин истамадилар,— улар энди бозорларни қурол кучи билан тақсимлаб олмоқдалар,— сиз, нодон халқ, уларнинг манфаатлари учун ўлум оғзига ўзингизни отмоқдасиз, ўзингиз сингари меҳнаткашларни ўлдирмоқдасиз.

Биродарларингизнинг қонини тўкишни бас қилинг! Эс-ҳушигизни ўфишириб олинг. меҳнаткашлар! Худди ўзингиз сингари алданган австриец ва немис солдати эмас, балки ўз подшоҳингиз, ўз фабрикантингиз ва помешчикларингиз сизларнинг душманларингиздир. Милтиқларингизни ўшаларга қаратингиз. Немис ва австриец солдатлари билан биродарлашинг. Сизларни худди ваҳший ҳайвонлар сингари бир-бирингиздан ажратиб турган тиканли сим тўсиқлар орқали бир-бирларингизга қўл ўзатинг. Сизлар — меҳнат аҳлларисиз, қон талашиб, қадоқ бўлиб кетган қўлларингиз ҳали тузалганича йўқ, талашадиган ҳеч нарсангиз йўқ. Битсин истибод ҳукумати! Битсин империалистик уруш! Яшасин бутун дунё меҳнаткашларининг бузилмас дўстлиги!

Сўнгги сатрларни ўқир экан, Листницкий бўғилиб кетди. Нафратга тўлиб, яқинлашиб келаётган фалокатнинг оғирлигини олдиндан сезиб: «Ана, бошланди!» деб ўйлади. Листницкий полк командирига телефон қилиб, бўлган ҳодиса тўғрисида хабар берди.

— Жаноб олий, нима қилишни буюрасиз?— деб сўради ниҳоят.

Телефон трубкасидан, гўё пащшанинг ғинғиллашига ўхшаш овозлар орасидан генералнинг кескин сўзлари эшитилди:

— Дарҳол ваҳмистр ва взвод офицерлари билан тинтуб қилинсин. Ҳамма, жумладан, офицерлар ҳам тинтилсан. Полк қачон алмаштирилади, деб шу буғуноқ дивизия штабидан сўрайман. Уларни шошираман. Агар тинтуб вақтида бирор нарса топсангиз, дарҳол маълум қилинг.

— Ўйлашимча, бу пулемётчиларнинг иши.

— Шундайми? Дарҳол Игнатьевичга, ўз казакларини тинтиш тўғрисида буйруқ бераман. Хайр, саломат бўлинг.

Листницкий ўз ертўласига взвод офицерларини тўплаб, уларга полк командирининг буйругини эшитирди.

— Расвогарлик! Нима, биз бир-биримизни тинтиймизми?— деб ачиғланди Меркулов.

— Бошлаб сизни тинтиймиз, Листницкий!— деб қичқирди ҳали мўйлови чиқмаган ёшгина юзбоши Раздорцев.

— Келинг, қуръя ташлаймиз.

— Алифбо тартиби билан.

— Жаноблар, ҳазилни бас қилинг!— деб уларнинг галини бўлди Листницкий қатъийлик билан.— Чол тушмагур, ошириб юборди: полкимизнинг офицерлари — Цезарнинг хотини сингари ҳар қандай шубҳадан юқори турадилар.¹ Орамизда фақат хорунжий Бунчук бор эди, у ҳам қочиб кетди, аммо казакларни текшириб кўриш керак. Вахмистрни чақиринг.

¹ Хотинининг хулқ-ҳаракати шубҳали эканини айтганларида Цезарь гўё: «Цезарнинг хотини — ҳар қандай шубҳадан юқори туради» деб жавоб қилган эмиш. Листницкий Цезарнинг мақол шаклига кириб қолган сўзларини такрорлади.

Ёши қайтиб қолгач, учинчи даражали Георгий крести олган казак-вахмистр кириб келди.

— Сотняда шубҳали казаклардан кимлар бор? Сенинг фикрингча, бу хитобномаларни ким ташланган бўлиши мумкин?— деб унга мурожаат қилди Листницкий.

— Бизда бунақангилар йўқ, жаноб олий,— деб дадил жавоб қилди вахмистр.

— Аммо бу хитобномалар бизнинг сотнямиз турган жойлардан топилади-ку. Бизнинг траншеяларда бегона кишилардан кимлар бўлган?

— Бегоналардан ҳеч ким бўлмаган. Бошқа сотнялардан ҳам ҳеч ким келмаган.

— Юринг, ҳаммасини бир бошдан титкиладимиз,— Меркулов қўл силтаб эшик томон қараб юрди.

Тинтуб бошланди. Казакларнинг юзларида турли-ча ифода кўринарди: баъзилари ҳайрон бўлиб қовоқ солишар, бошқалари эса, арзимаган буюмларини тинтаётган офицерларга қўрқа-писа қарашар, учинчилари мийиқларида кулишарди. Олифтанамо урядник-разведчик казак:

— Нима ахтаряпсизлар айтсангизлар-чи? Мабодо бирор нарса йўқолган бўлса, кўрган одам бордир,— деди.

Тинтуб ҳеч қандай натижа бермади. Фақат биринчи взводдаги бир казакнинг чўнтағидан ғижимланган хитобнома топиб олдилар.

Меркулов унинг чўнтағидан чиққан қофозни ерга улоқтириб, қўрқув аралаш:

— Ўқидингми?— деб сўради (унинг қўрқуви кишининг кулгисини қистатар эди).

Казак эса ерга тикилган қўзларини кўтармай:

— Тамаки ўраш учун ердан олган эдим,— деб кулди.

— Сен нега куляпсан?— деб қичқирди тутоқиб кетган Листницкий унинг олдига келиб; пенсне остидан унинг малла ранг калта киприклари пир-пирагани кўринди.

Казакнинг юзи бирдан жиддий тус олди.

— Кечиринг, жаноб олий! Хат ўқишин унча билмайман! Ҳижжалаб ўқийман. Бу қофозни ердан олга-

нимнинг сабаби шуки, тамаки бор-у, лекин ўрашга қоғоз йўқ.

Казак ўпкаланиб қаттиқ-қаттиқ гапирав, овозида ғазаб оҳанги эшитиларди.

Листницкий тупуриниб, унинг ёнидан нари кетди. Офицерлар унинг орқасидан эргашдилар.

Эртасига полкни позициядан олиб, фронтдан ўн чақирим орқадаги жойга жўнатдилар. Пулемётчилар командасидан икки кишини қамоқца олиб, ҳарбий-дала судига топширдилар, қолганларнинг бир қисмини запасдаги полкларга жўнатдилар, бир қисмини 2-нчи казак дивизиясидаги полкларга таратиб юбордилар. Полк бир неча кун дам олгандан кейин ўзини бир қадар тартибга солиб олди. Казаклар ювениб, тараниб, соқолларини яхшилаб қирдириб олдилар. Окопларда улар соқолларини жуда оддий, лекин жонларига азоб берадиган усул билан олдирадилар: соқолларини гугурт билан ёндиришар, тикандек мўйларини ўт куйдириб, териларига бориб етганда, юзларини аввалдан тайёрлаб, ҳўллаб қўйилган сочиқ билан артар эдилар. Соқол олишнинг бу тарзини «чўчқа куйдириш» деб атар эдилар.

Бирор взвод сартароши ўз мижозидан:

— Ҳўш, соқолингни «чўчқа куйдириш усулида» олиб қўйами? — деб сўрарди.

Полк энди дам олиб ётмоқда. Қазакларнинг кийим-бошлари башанг, ўзлари қувноқ бўлиб қолди, аммо Листницкий билан барча офицерлар билар эдиларки, бу қувноқлик — ноябрь ойидаги очиқ кунга ўхшар, бугун очиқ бўлса эртасига айниб қолиши мумкин эди. Позицияга бориш тўғрисида оғиз очилса, казакларнинг юзларидаги ифода бир зумда ўзгариб қолар, қовоқлари солиниб, афт-башаралари тумтайдиб кетарди. Уларнинг ўлгудай чарчаганликлари, тинка-мадорлари қуригани билиниб турарди, бу чарчаши маънавий беқарорлик тугдирарди. Листницкий, бу ҳолатда, киши бирор мўлжаллаган нарсасига жонжаҳди билан интилганда унинг қўрқинчли бўлишини яхши биларди.

1915 йилда унинг кўз олдида бир рота солдат жуда катта талафот бериб, бёш марта душман устига

ҳужум қилди, ҳар сафар «Яна ҳужумга ўтилсин» деб буйруқ олиб турди. Ротанинг қолган қисми ўз ихтиёри билан позицияни ташлаб, фронт орқасига жўнади. Листницкий, ўз сотнянгиз билан уларнинг олдини тўсинг, деган мазмунда буйруқ олди. Ўз казакларини сафга тизиб, чекиниши тўхтатишига уринганида, солдатлар ўқ ота бошладилар. Ротадан олтмиш чоғлиқ солдат қолган эди. Листницкий, улар жон-жаҳдлари билан казаклардан ўзларини ҳимоя қилганларини, қилич тушганда жон бериб, қаерда бўлмасин, барibir ўламиз-ку, дегандек тиккасига бостириб келаверганларини, ўлимга ўзларини урганларини кўрган эди. Бу ҳодиса даҳшатли бир аломат экани унинг хотирасида яхши сақланган эди, Листницкий ҳаяжонга тушиб, казакларнинг юзларини энди кўргандек, уларга тикилиб қарап: «Наҳотки, бир вақт келиб, булар ҳам шу қабилда орқага чекинадилар, ўлимни ҳам писанд қилмай бостириб келаверадилар»— деб ўйлар ва казакларнинг чарчаб-ҳориган, ғазабнок боқишлирига кўзи тушиб: «Ҳа, шундай қиласидилар» деган фикрга келар эди.

Кейинги вақтларда казаклар ўзгардилар. Ҳатто ашулалар ҳам янги бўлиб, улар уруш натижасида вужудга келган, умидсизлик билан тўлиб-тошган эди. Листницкий ўз сотняси жойлашган кенг завод омборхонаси ёнидан ўтар экан доим кишининг юрагини эзадиган, мунгли бир ашулани эшитарди. Бу ашулани ҳар доим тўрт киши бир бўлиб айтарди. Дўриллаган йўғон овозлар орасидан ингичка ва тиниқ бир овоз жаранглаб эшитиларди.

Эй жонажон, гўзал юртим
Сендан мангубудо бўлдим.
Саҳар чоғи боғимизда.
Булбул агар нола қилса
Эшитмайман. Жоним оцам,
Мен тўғримда ҳеч ема ғам
Қирқ йил қирғин бўлса агар,
Паймонаси тўлган ўлар.

Листницкий тўхтаб, қулоқ солар, содда, мунгли ашўла унга қаттиқ таъсир қиласиди. Тез-тез ураётган қалбининг аллақандай бир тори гаранг бўлиб, жўрчи

овозининг ёқимли майинлиги уни чертгандай бўларди. Листницкий омборхонадан сал нарироқдаги жойда туриб, куз оқшомининг фира-шира қоронилигига тикилар, кўзларига ёш келиб, қовоқларини қичитганини ҳис этарди.

Даштда ҳайдаб кетаман от,
Кўнглим сезиб турар, ҳайҳот!
Дилим сезар, бу ёш умрим
Хазон бўлар, ўламан бот.

Йўғон овозлар сўнгги сўзларни айтиб тамомласдан, жўрчи овоз улар устида янграп, бу овозлар учиб кетаётган кўкраги оқ базғалдоқ қушнинг қанотлари сингари дириллар, шошиб-пишиб ўз орқасидан парвоз қилишга чақирар, нола қиларди:

Қўрошин ўқ ҳуштак чалиб,
Кўкрагимга тегди шу он.
От бўйнига йиқилдим мен,
Ели бўлди қоп-қора қон.

Даъм олиш учун тўхтаган пайтларида Листницкий, фақат бир мартағина кишининг руҳини кўтарувчи, тетиклантирувчи қадимий бир казак ашуласини эшилди. У ўз одатича, кечқурунги сайдидан қайтиб, омборхона ёнидан ўтиб кетаётган эди. Ширакайф одамларнинг овозлари ва қаҳ-қаҳа садолари қулоғига чалинди. Листницкий Незвиска деган шаҳарчага озуқа келтириш учун борган капитенармус¹ у ердан самогон олиб келганини ва казакларни сийлаганини фаҳмлади. Жавдар ароғини ичиб олган казаклар алланарса устида баҳслашар, кулишарди. Сайдидан қайтиб келар экан. Листницкий узоқдан бақириб айтилаётган ашула садосини ва қулоқни биткизадиган, лекин усталик билан чалинаётган ҳуштак овозини эшилди:

Жангда бўлмаган йигит,
Кўркув нима билмайди.
Кундуз ивиб, тунда қақшаб
Кўзга уйқу келмайди.

¹ Каптенармус — ҳарбий қисмларда хўжалик ишларини бошқарувчи хизматчи

Ҳуштак овози титраб, оҳанги гоҳ пастлашиб, гоҳ баландлашиб эшитилар, ўттиз ҷоғлиқ кишининг овози янграб, уни босиб кетарди:

Жангда қўрқув, қайғу алам,
Тарк этмайди бизни бир дам.

Ёшлардан аллаким, шўх бир казак калта-калта қаттиқ ҳуштак чалар, тахта пол устида тепиниб ўйин тушарди. Ашула орасидан пошналарнинг тўқиллагани сал-пал эшитиларди:

Қора денгиз шовиллар,
Кемада машъал ёнар.
Машъални сўндирамиз,
Туркни бўғиб ўлдирамиз,
Минг яша, эй Дон казаги!

Листницкий беихтиёр кулиб, ашула оҳангига монанд қадам ташлашга уринарди. «Эҳтимол, пиёда аскарлар уйларини бунчалик қўйсамаслар,— деб ўйлади у. Аммо бу фикри ўзига ҳам маъқул тушмади.— Ажабо, пиёда аскарлар қисмидаги одамлар бошқачами? Турган гапки, окопларда ўтиравериш казакларнинг жонига теккан, улар ўз машғулот турларига мувофиқ доимий ҳаракатда бўлишга одатланганлар. Бу ерда эса икки йилдан бўён ҳужумга ўтиб бир иш чиқаза олмай, бир жойда қимир этмай ўтиришга тўғри келади. Армия, ҳар қачонгисидан ҳам заиф. Қаттиқ-қўйл одам лозим, катта бир ғалаба зарур, олға томон силжиш керак,— бу ҳаммани тетиклантириб қўярди. Аммо, тарихда шундай мисолларни кўриш мумкин: чўзилиб кетган урушларда энг матонатли ва интизомли қўшинлар ҳам маънавий жиҳатдан бузилганлар. Буни Суворов ҳам ўз ҳаётида кўрган... Аммо қаллар бардош бергусидирлар. Агар қайтиб кетсалар ҳам, энг кейин кетадилар. Ҳар қалай казаклар — қалонги-қасонги фабрика ишчилари ёки мужиклар ўмас, жанговар анъаналарига эга бўлган, бошқалардан ажралиб турадиган кичик бир миллатdir».

Аллаким уни фикридан қайтармоқчи бўлгандай ғомборхонадан туриб, «Калинушка» ашуласини дўриллаб айта бошлади. Бошқалар ҳам унга жўр бўлишди.

Листницкий уйига кетар экан, мунгли, ғамгин ашула-
ни эшилди:

Ёшгина бир офицер худога нола қилар,
Навқирон казак ўғлон унга келиб ялинар.
Айтар: «Офицер йигит,
Уйга кетай, рухсат эт!
Отам ёнига борай,
Онам ёнига борай,
Тўлин ойдек, жонажон
Ёрим олдига борай.

* * *

Фронтдан қочгандан кейин уч кун ўтгач, Бунчук кеч пайтида Фронт яқинидаги дўконлари кўп бўлган бир шаҳарчага кириб келди. Уйларда чироқлар ёқилган, замҳарирдан кўлоб сувларнинг усти юпқа муз билан қопланган, сийрак йўловчиларнинг қадам товушлари узоқдан эшитиларди. Бунчук ёритилган кўчаларни четлаб ўтиб, кимсасиз тор кўчалардан ола-зарак бўлиб борарди. Шаҳарчага кираверишда оз бўлмаса патрулга дуч келиб қолган эди, мана энди изидан бирор қувиб келаётгандай, шошиб-пишиб ўзини деворлар панасига олиб, ўнг қўлини ҳамма ёғи булғанганди, кир шинелининг чўнтағидан олмай борарди, кун бўйи Стодолдаги бир сомонхонада ётган эди.

Бу шаҳарчада корпуснинг базаси бўлиб, бу ерда қандайдир қисмлар туар, патрулга дуч келиб қолиш хавфи йўқ эмасди, шу сабабдан, Бунчук сертук панжаси билан шинелининг чўнтағидаги нагани чанглаб олган, наган дастаси қизиб кетган эди.

Шаҳарчанинг нариги бошига етиб боргач, Бунчук ҳувиллаган тор кўча бўйлаб узоқ юрди, дарвозаларга қараб, ҳар бир кулбанинг ташки кўринини синчковлаб кўздан кечирди. Орадаң йигирма минутча вақт ўтгач, муюлишдаги кўримсизгина уйча ёнига келиб, дераза қопқоғининг тирқишидан мўралаб қаради, сўнгра илжайиб, дадил қадам босиб, эшикдан ичкари кирди. Тиқиллаган овозни эшитиб, ёши қайтиб қолган, рўмол ўраган бир аёл эшикни очди.

— Борис Иванович сизникида квартирда турадими? — деб сўради Бунчук.

— Ҳа, қани, кира қолинг.

Бунчук якка кифт бўлиб, унинг ёнидан ўтди. Орқасидан эшик турмининг шарақлаб беркитилганини эшилди. Кичкинагина лампа ёритиб турган пастаккина хонадаги стол ёнида ёши анчага бориб қолган ҳарбий кийимдаги киши ўтиради. У кўзларини қисиб, ўрнидан турди да, хурсанд бўлса ҳам сиполикни қўлдан бермай, Бунчукка қўлини узатди.

— Қаердан?

— Фронтдан.

— Ҳўш?

— Ўзинг кўриб турибсан-ку,— деб жилмайди Бунчук ҳарбий кийимдаги кишининг солдатча камарига бармоғининг учини тегизиб, сўнгра ғўлдираб:— Бўш хона борми?— деб сўради.

— Ҳа, бор, мана бу ёқقا кир.

У Бунчукни боягидан ҳам кичикроқ бир хонага бошлаб кирди; чироқни ёқмасдан, уни стулга ўтирифиди-да, қўшни хонанинг эшигини ёпиб, дераза пардасини тортиб қўйди.

— Бутунлай келдингми?

— Ҳа, бутунлай.

— У ерда аҳвол қадай?

— Ҳамма нарса тахт-тайёр.

— Ишончли йигитларми?

— Ҳа, ишончли йигитлар.

— Сен олдин ечиниб ол, кейин гаплашсак яхши бўлар деб ўйлайман. Шинелингни бу ёқقا бер. Ювениш учун сенга сув келтираман.

Бунчук қўкариб кетган жомга сув қуйиб ювинар экан, ҳарбий кийимдаги киши калта қилиб қирқилган сочини силаб-силаб, ҳорғин овоз билан секин гапирди:

— Ҳозир улар биздан жуда кучлидирлар. Ишимизни ривожлантиришимиз, ўз таъсиrimизни кучайтиришимиз, урушнинг туб сабабларини ҳормай-толмай тушунтиришимиз зарур. Ишимиз ривож топади, сен бунга амин бўл. Улардан ажralиб кетганлар албатта бизга келиб қўшилади. Катта одам болага нисбатан албатта кучлидир, лекин бу одам қариб-чириган пайтда бола уни саранжомлаб қўяди. Ҳозирги

ҳолда жамиятнинг қариб-чириганини эмас, борган са-ри фалаж иллатига мубтало бўлаётганини кўриб ту-рибмиз.

Бунчук ювиниб бўлди, юзини дағал бўз сочиқ би-лан артар экан:

— Мен кетишим олдидан тавъя офицерларга ўз қарашларимни гапириб бердим. Билсанг, жуда кул-гили бўлди. Мендан кейин шубҳасиз, пулемётчилар-нинг энка-тинкасини чиқаришади, эҳтимол йигитлар-дан баъзилари судга тушишлари мумкин, аммо далил бўлмагандан кейин нима ҳам қила олишади? Умид қиласманки, уларни турли қисмларга таратиб юбори-шади. Бу эса бизга жуда қўл келади, майли, улар замин ҳозирлаб турсинлар... У ерда зап йигитлар бор-да! Метиндек йигитлар.

— Степандан бир хат олдим. Ҳарбий ишни биладиган бир йигит юбор, деб сўраган. Сен унинг қоши-га борасанми? Аммо, лекин ҳужжатларни қандай тўғрилаймиз? Қўлимиздан келармикин?

— Нима иш экан?— деб сўради Бунчук. У сочиқ-ни қозикқа илмоқчи бўлиб, бўйини чўзди.

— Йигитларга йўл-йўриқ кўрсатиш иши. Сен бўл-санг ҳалиям ўсмабсан-а?— деди уй эгаси кулиб.

— Нима ҳожат?— деб гап қайтарди Бунчук.— Хусусан ҳозирги аҳволим назарга олинса, кўзга таш-ланмаслигим учун зифирдек бўлишим керак эди.

Улар тонг отаргача суҳбатлашдилар. Орадан бир кун ўтгач, кийимини ўзгартирган, юз-кўзини бўяган, таниб бўлмайдиган ҳолга келган Бунчук 441-нчи Орш полкининг солдати Николай Ухватов номига ҳужжат олиб шаҳарчадан чиқди-да, станцияга қараб жўнади. Солдат Николай Ухватов кўкрагидан ярадор бўлгани учун қўшин сафидан бутунлай бўшатилган эди.

III

Махсус армия (бу армия ўн учинчи армия эди, аммо «13» рақами хосиятсиз рақам деб ҳисоблангани ва катта генераллар бидъатчи бўлганлари учун, бу армияга «Махсус» армия деб ном берганлар) ҳара-кат қилаётган райондаги Владимиро-Волинский ва

Ковель томонларида октябрнинг сўнгги кунларида ҳужумга тайёргарлик бошланган эди. Свинюха қишлоғининг яқинида қўмондонлик кенг ҳужум бошлашга қулагай бўлган плацдарм танлаб, душман позициясини тўпга тутди.

Бу жойга сон-саноқсиз артиллерия тўпланган эди. Турли калибрли юз минглаб снарядлар икки қатор немис окоплари ишғол қилган жойларни тўққиз кунча дабдала қилди. Отишма авжига чиққан биринчи кундәёқ немислар биринчи қатор окопларни ташлаб кетдилар, фақат кузатувчиларнигина қолдирдилар. Бир неча кундан кейин иккинчи қаторни ҳам бўшатиб, учинчи қаторга ўтдилар.

Учинчи кун деганда Туркистон корпусининг ўқчи қисмлари ҳужумга ўтдилар. Улар француза усуlda, яъни кетма-кет тўп-тўп бўлиб бостириб боравердилар. Рус окопларидан ўн олти тўп аскар ҳужум қилди. Ағдар-тўнтар бўлиб, ўралашиб кетган тиканли сим тўсиқларига кул ранг тусдаги одам тўлқинлари келиб урилар, чайқалар ва сийраклашарди. Немислар томонидан, куйиб қорайган зирк дараҳтларининг тўнкалари орқасидан, қумлоқ дўнгликлар ортидан тўплар тинмай гумбурлаб, кетма-кет ўт сочиб, ҳамма ёқни ларзага соларди:

Гум... Бўм... Пақ.. пук...

Гоҳо йироқда жойлашган тўпларнинг бараварига гумбурлаган овози теварак-атрофдаги узоқ жойларни таҳликага соларди:

Гум... Гум...

Немис пулемётлари жазаваси тутгандаи тарилларди:

Тарр... Тарр...

Эни бир чақирим келадиган, дабдаласи чиққан қумлоқ ерда тўп ўқлари ёрилиб, қора тупроқни осмонга совуруар, ҳужумга ўтганлар тирқираб кетиб, тўп ўқлари ўйган чуқурлардан ўрмалаб қочишарди.

Замбаракларнинг ёрилган ўқлари ерларни борган сари мижғилар, қиялаб келган шрапнеллар визиллаб ҳужумчилар устига ёғилар, пулемёт ўқлари уларни ерга қапиштириб қўяр, сим тўсиқларга йўлатмасдан саваларди. Ҳеч кимни яқин йўлатмади. Ўн олти тўп

аскардан сўнгги уч тўпигина етиб келди, аскарлар куйган қозиқлари жойидан чиқиб кетган, ўралашган тиканли сим тўсиқларига урилиб-урилиб, борган сари сийраклашиб, орқага чекиндилар...

Тўққиз мингдан ошиқ жон эгаси ўша куни Свинюха қишлоғи яқинидаги кўримсиз қумлоқ ерга жо бўлди.

Икки соатдан кейин ҳужум яна бошланди. Туркистон ўқчи корпусининг 2 ва 3-дивизия қисмлари ҳужумга ўтди. Чапроқдаги биринчи қатор окопларга 53-инчи пиёда аскарлар дивизияси ва 307-сибирь ўқчи бригадаси хандақлар орқали етиб келди, туркистон-никларнинг ўнг қанотида 3-инчи гренадёр дивизиясининг батальонлари борар эди.

Махсус армиянинг 3-инчи корпуси командири генерал-лейтенант Гаврилов армия штабидан Свинюха районига икки дивизия ташлаш тўғрисида буйруқ олди. 80-инчи дивизиянинг 320-инчи Чембарский, 319-инчи Бугулминский ва 318-инчи Черноярский полклари позициядан жўнатилди. Уларнинг ўрнига Латиш ўқчи аскарлари ва янги келган ополчение қисмлари қўйилди. Полкларни кечаси жўнатдилар, лекин шунга қарамасдан оқшом пайтида полклардан бири қарама-қарши томонга дабдаба билан юриш қилган ва фронт бўйлаб ўн икки чақирим босмасданоқ, орқага қайтиш тўғрисида буйруқ олган эди. Полклар бир томонга турли йўллар билан жўнаб кетдилар. 80-инчи дивизия маршрутидан сўлроқда эса 283-инчи Павлоград полки ва 71-инчи дивизиянинг 284-инчи венгр полки силжиб бормоқда эди. Уларнинг изидан Ураль казаклари полки ва 44-инчи пиёда казаклар полки борарди.

318-инчи Чернояр полки кўчирилгунча Стоход дарёси бўйида, Рудка-Меринский қўрғони яқинидаги Соқаль деган жойда туарди. Эрталаб, биринчи манзилдан кейин полкни ўрмон ичидаги ташландиқ ертўлаларга жойладилар ва тўрт кун французча ҳужум қилиш усулига ўргатдилар. Батальонлар ўрнига сафда ярим роталар юрди. Бомбамётчиклар сим тўсиқларини жуда тезлик билан кесишга ўргатилди, қўл гранаталари отиш машқини ҳам ўтди. Шундан сўнг полк яна йўлга тушди. Уч кун ўрмонлар ичидан, очиқ жойлар-

дан, тўп араваларининг ғилдираклари ўйган, хароба қишлоқчалардан ўтдилар. Шамол суриб келган пағапаға туман қарағайлар устгинасидан сузиб ўтар, ялангликларда сузар, зирк дарахтлари орасидан кўк ўт босган ботқоқликлар устида худди ўлакса излаган калхатдек айланарди. Осмондан тумандай ёмғир сепалаб ёғар, ҳўл бўлган одамлар ғазабнок йўл босардилар. Уч кундан кейин ҳужум райони яқинидаги Большой Порек ва Малий Порек қишлоқларида тўхтадилар. Ажал йўлига тушишларидан олдин бир кечакундуз дам оливолдилар.

Шу вақт 80-нчи дивизия штаби билан бирликда жанг майдонига яқин жойга алоҳида казак сотняси ҳам силжиб келди. Бу сотняга Татарск қишлоғидан келгаң учинчи разряддаги казакларни қўшиб юбордилар. Иккинчи взвод нуқул шу қишлоқлик казаклардан тузилган бўлиб, унда бир қўли чўлтоқ Алексей Шамилнинг Мартин ва Прохор деган икки укаси, Мохов буғ тегирмонининг собиқ машинисти Иван Алексеевич, чўтири Афонька Озеров, қишлоқнинг собиқ атамани Маницков, Шамилларнинг бир оёғи чўлоқ, кокилдор қўшниси Евлантий Калинин, бесўнақай, новча казак Боршчев, гирдиғум ва айиқ сифат Захар Королёв бутун сотнянинг қизиқчиси Гаврила Лиховидовлар бор эди. Гаврила ҳайвон сифат казак бўлиб, етмиш яшар кампир онаси ва кўримсиз, лекин бебош хотинининг калтакларига индамай чидаш берарди. Сотнянинг иккинчи взводида ва бошқа взводларда яна шу қишлоқлик кўп кицилар бор эди. Казакларнинг бир қисми дивизия штабида ординарец бўлиб хизмат қиласади, аммо иккинчи октябрда уларнинг ўрнига енгил кавалерия аскарлари қўйилди. Дивизия бошлиғи генерал Китченконинг буйруғига биноан алоҳида сотня позицияга жўнатилди.

З октябрь куни тонг отарда бу сотня Малий Порек қишлоғига кирди. 318-нчи Черноярск полкнинг биринчи батальони шу қишлоқдан жўнаб кетаётган эди. Ташландиқ, ярим хароба уйлардан югуриб чиқиб келаётган казаклар шу кўчада саф тортмоқда эдилар. Энг олдиндаги взводнинг ёнида қорачадан келган ёшгина бир офицер депсиниб турарди. У кар-

та соладиган ясси сумкасидан олган шоколадни очар (унинг қип-қизил ҳўл лабларининг зеҳи шоколадга бўйлган эди) колонна ёнида у ёқдан-бу ёққа юрар, кирланиб кетган, этагига лой тегиб қотиб қолган узун шинели икки оёғи орасида худди қўйнинг қўйруғидек салонглар эди. Казаклар кўчанинг чап томонида келмоқда эдилар. Иккинчи взвод сафида, ўнг томондан энг чеккада машинист Иван Алексеевич келарди. У ерга қарабоёқ босар, кўлоб сувлар устидан ҳатлаб ўтишга ҳаракат қиласарди. Қичкина бир солдат узоқдан туриб уни чақириб қолди, Иван Алексеевич бошини ўгириб, пиёда аскар сафларини кўздан кечира бошлади.

— Иван Алексеевич! Оғайнничалиш!..

Взвод сафидан бир солдат отилиб чиқиб, бедана юриш қилиб Иван Алексеевич томон чопиб келаверди. Йўл-йўлакай у винтовкасини орқасига суриб қўяр, лекин қайиши сирғилиб тушиб кетаверар, милтиқ қўндоғи сувдонга тегиб, тўқиллар эди.

— Танимадингми? Эсингдан чиқардингми?

Бутун юзини тикандек, кул ранг соқол босган солдатчанинг Валет әканини Иван Алексеевич аранг таниди...

— Қайси гўрдан келдинг, қўқил?

— Шундай... Аскарлик хизматидан.

— Қайси полкдасан?

— Уч юз ўн саккизинчи, Черноярск полкида. Уз оғайниларимни учратаман деб сирам... сирам хаёлимга келтирмаган эдим.

Иван Алексеевич ўзининг дағал кафтлари билан Валетнинг кирланиб кетган қўлини маҳкам қисиб олган, ҳаяжонланиб, хурсандлигидан кулар эди. Валет эса катта-катта қадам ташлаб кетаётган Иван Александровичдан орқада қолмаслик учун йўргалаб юрар, пастдан юқорига — дўстининг кўзларига тикиларди, бир-бирига яқин қаҳрли кўзлари мулойим, нам эди.

— Ҳужумга ўтмоқчимиз... Кўриб турибсан...

— Бизлар ҳам.

— Хўш, Иван Алексеевич, аҳволинг қалай?

— Э, сўраб нима қиласан!

— Мен ҳам шу ҳолдаман. Ўн тўртинчи йилдан бери бошим окопдан чиқмайди. Менда на уй-жой, на бола-чақа бор, бирорлар учун ўлимга кетяпман. Ўлганнинг кетидан шаҳид дегандек...

— Штокман ёдингдами? Зап одам эди-да. Осип Давидович! Шу топда бўлганда ҳамма нарсани бизга тушунтиради. Хўп одам эди-да, а?

— У ҳамма нарсанинг мағзини чақиб берарди-ю,— деб қичқирди Валет завқланиб, муштларини дўлайтириб. Унинг бир бурда юзи кулгидан бужмайиб кетди.— У ёдимда! Мен уни отамдан ҳам азиз кўрардим. Отамдан нима кўрибман... У тўғрида ҳеч нарса эшиг-мадингми? Дом-дарак йўқми?

— Сибирда,— деди хўрсиниб Иван Алексеевич.— Қамоқда ўтириби.

— Ростдан-а?— деб сўради лайлакдек шеригининг ёнида читтакка ўхшаб кўринган Валет иргишлаб, қулоғини диккайтириб.

— Турмада ўтириби. Эҳтимол, ўлган бўлса.

Валет, тоҳ орқасига ўгирилиб рота саф тортаётган ерга қарап, тоҳ Иван Алексеевичнинг бағбақасига, қуийи лабининг остидаги чуқурчасига кўз тикарди.

— Хайр!— деди у қўлини Иван Алексеевичнинг муздек кафтларидан чиқариб олиб.— Энди кўришол-масак керак.

Иван Алексеевич чап қўли билан фуражкасини олди-да, энгашиб Валетнинг қоқ суюк кифтларини қулоқлади. Гўё энди умрбод кўришмайдигандек ўпишиб хайрлашилар, Валет орқада қолиб кетди. У бирдан бўйини қисиб олди, солдатча кул ранг шинелининг ёқасидан қулоғининг қорайиб кетган қизгиш кемирчигигина диккайиб чиқиб турарди, у букчайиб олиб, тен-текис ерда қоқила-қоқила юриб кетди.

Иван Алексеевич қатордан чиқиб, титроқ овоз билан қичқирди:

— Эй биродари азиз! Илгари сен серзарда эдинг... эсингдами? Чайир эдинг... а?

Валет кўз ўшларидан қаримсиқ бўлиб кўринган юзини ўгириб олди, очиқ шинели ва кўйлагининг йиртиқ ёқасидан кўриниб турган қоқсуюк қорача кўкрагига муштлаб бақирди.

— Серзарда эдим, чайир эдим, мени эзғилаб ташлашди!.. Мулла минган эшакдек бўлиб қолдим!..

У яна бир нималар деб қичқирди, аммо бу вақтда казаклар сотняси нариги кўчага бурилиб кетди. Иван Алексеевич уни кўздан йўқотди.

Орқада қадам ташлаб келаётган Прохор Шамиль:

— Валет шекилли?— деб сўради.

— Зап одам-да,— деб жавоб қилди лаблари титраб кетган Иван Алексеевич елкасидаги қадрдон милтиғини кўтариб қўйиб.

Қишлоқдан чиқаверишда олдин битта-иккита, сўнгра эса ёпирилиб келаётган ярадорларга дуч келдилар. Оғир ярадорлар тушиб олган арава зўрга судралиб борарди. Арава тортаётган қирчанғи отларнинг қобирғалари саналиб қолган. Кетма-кет тушган қамчи зарбидан сағриси шилиниб кетган, терисига жун ёпишган, қизил-қизил доғ тушган териси остидан сувяклари чиқиб қолган. Тўрт фиддиракли араваларга қўшилган отлар ҳарсиллаб аравани аранг тортар, қўпиклаб кетган тумшуқлари лойга тегай-тегай дер эди. Баъзан биронта байтал тўхталиб қолар, ичга ботиб кетган, қобирғалари кўриниб турган биқинлари ҳансираганда кириб чиқиб туар, ориқлаганидан катта бўлиб кўринган бошларини пастга солиб туар эди. Қамчи зарбидан чор-ночор қадам ташлар, олдин бир томонга, кейин иккинчи томонга толпиниб, зўрға юриб кетарди. Ярадорлар араванинг ён панжараларини ушлаб боришарди.

Сотня командири кўзига иссиқроқ кўринган бир солдатдан:

— Қайси қисмдансизлар?— деб сўради.

— Туркистон корпусининг Учинчи дивизиясидан.

— Бугун ярадор бўлдингми?

Солдат жавоб қилмай, юзини тескари ўғирди. Казаклар сотняси эса йўлдан четга чиқиб, ярим чақиридни наридаги ўрмонга қараб йўл солди. Орқада эса 318-нчи Черноярск полкнинг роталари қишлоқдан чиқиб гурс-турс қадам ташлаб келмоқда эди. Узоқда, ёмғир ёғиб турган булатли осмонда немисларнинг аэростати қимир этмай, сарғиш доғ каби муаллақ эди.

— Казаклар, қаранглар, ғалати бир нарса осилиб турибди-я.

— Колбаса-ку.

— Баччағар немис, ўша ердан туриб, аскарларнинг ҳаракатини кузатаётир.

— Нима, у шундай баланд жойга бекорга чиққан деб ўйлайсанми?

— Вой-бўй, осмони фалакка чиқиб олибди-я!

— Сен яқин деб ўйловдингми? Үнга тўп отиб ҳам теккизиб бўлмайди.

Ўрмонда Черноярск полкининг биринчи ротаси казакларга етиб олди. Казаклар кечгача намиққан қарағайлар остига тиқилишиб турдилар, ёмғир суви ёқаларидан оқиб тушар, этлари увишарди, гулхан ёқиши ман қилинган, ёмғирда ўт ёндириш амри маҳол эди. Қош қорайиши олдидан уларни бомбадан сақла-ниш учун қазилган хандақقا туширдилар. Одам бўйи келадиган хандақ ичи чуқурлиги ярим қарич келадиган сув билан тўлган эди. Балчиқ ҳиди, чириган игна барглилар, хазон, хушбўй, ёқимли ёмғир ҳиди анқир эди. Қазаклар хандақ ичida шинелларининг этагини бир уриб, чўқайишиб, тамаки чекишар, маза-бемаза гапларни гаплашиб ўтиришарди. Йўлга чиқиш олди-дан берилган бир паёк маҳоркаларини бўлашиб олган иккинчи взвод казаклари муюлишда тўпланишиб, взвод уряднигини қуршаб олишганди. Урядник эса кимдир ташлаб кетган сим ғалтак устида ўтириб, ўтган душанба куни ўлдирилган генерал Копилев ҳа-қида ҳикоя қиласарди. Ўзи тинчлик вақтида ҳам ўша генерал бригадасида хизмат қилган экан. У ҳикояси-ни тамомлагани ҳам йўқ эдики, взвод офицери: «Сафга!» деб қичқириди. Қазаклар шошиб-лишиб папи-росларини қаттиқ тортиб, қўлларини куйдира-кўйдира сакраб ўринларидан турдилар ва хандақлардан яна қоронги қарағайзорга кириб кетдилар. Ҳазиллашиб, бир-бирларига далда бериб кетишар, аллаким ҳуштак чаларди.

Ўрмон ичида, ялангликда қатор ётган мурдаларга дуч келдилар. Ўликлар чалқанчасига ёнма-ён за турли ҳолатда, кўпинча шарманда ҳолда, даҳшатли вазиятда ётар эди. Шу ернинг ўзида милтиқ кўтарған

ва белига противогаз осиб олган бир солдат у ёқдан бу ёқقا юриб турарди. Уликларнинг ёнидаги ширач-дек лойда оёқ излари кўринар, арава фидираклари ўтларни босиб-янчиб кетган эди. Казаклар мурдалардан бир неча қадам нарироқда кетмоқда эдилар. Уликлардан бадбўй, кўнгил оздирувчи ҳид келарди. Сотня командири казакларни тўхтатиб, взвод офицерлари билан бирга бояги солдат олдига келди. Улар бир нарса устида гаплашдилар. Бу вақтда казаклар сафни бузиб, ўликлар тепасига келдилар-да, фураж-каларини ечиб, қўрқув аралаш ҳаяжон ва ҳаддан ташқари қизиқиш билан уларни томоша қила бошлидилар. Ҳар бир тирик махлук сирли мурдага шундай қизиқиш билан қарайди. Ўлдирилганларнинг ҳаммаси офицерлар эди. Казаклар санаб, уларнинг қирқ етти-та эканини билдилар. Офицернинг кўпчилиги ёшлар бўлиб, афтларидан 20—25 лар орасида эканликлари билиниб турарди, фақат энг четда ётгани штабс-капитан погонлиси ўрта ёшли эди. У сўнгги дамда додлаган бўлса керак, оғзи катта очилиб қолган, қора, хуш мўйловлари осилиб ётар, ажал ўз соясини ташлаб, оқартириб юборган юзи устидаги қайрилма қошлари чимирилиб қолган. Уликларнинг баъзилари лой сачраган чарм камзулда, қолганлари шинелда ётар эдилар. Икки-учтасининг фуражкаси йўқ эди. Казаклар, ўлгандан кейин ҳам қоматининг гўзаллиги билиниб турган бир поручикни узоқ томоша қилдилар. У чалқан-часига тушиб ётар, сўл қўлини кўкрагига маҳкам босиб, ён томонга ташлаган ўнг қўли наган дастасини чангallаб қолган эди. Афтидан, наганни қўлидан йириб олмоқчи бўлганлар, сарфайиб кетган қўли тирнالган, аммо пўлат эриб қўлига ёпишиб қолгандай, уни ажратиб ололмаганлар. Фуражкаси қийшайиб қолган жингалакmall сочли офицер гўё эркалангандай юзини ерга қўйган, кўкара бошлаган сариқ лаблари ҳайратлангандай мотамсаро бурилган эди. Унинг ўнг томонидаги ўлик мўк тушиб ётарди, белбоғи узилган шинели орқасига тўпланиб қолганди, қаҳва ранг шими ва пошнаси қийшайиб кетганди, калтагина хром этик кийган йўғон сёқлари очилиб қолган эди. Унинг фуражкаси йўқ, калласининг учини тўп ўқи учирив

кетган; ёнларидан ҳўл соchlари осилиб ётган мия сугининг косаси пушти ранг ёмғир суви билан тўлған. Унинг нари ёғида олди очиқ тужуркада, йиртиқ гимнастёркада юзи йўқ мурда ётар; қийшайган қуий жағи очиқ кўкраги устида ётар, териси куйиб, буришиб қолган торгина пешонаси оқариб кўринар, жағи билан пешонасининг ўртасида синган суяқ парчалари, қораматир қизил гўшт парчалари аралаш-қурашади. Нарироқда — пала-партиш уйиб қўйилган қўл-оёқлар, шинель парчалари, бош ўрнида дабдала бўлган оёқ, унинг нарёғида — лаблари дўрдоқ, юзининг бичими болаларнига ўхшаш бир ўспирин ётарди; кўкраги-ни пулемёт ўқлари чок-чок қилган, тўрт жойи тешилган шинелининг тешикларидан куйган жун толалари диккайиб турарди.

— Манави... бечора ўлиш олдидан кимни чақирган экан? Онасиними? — деди тишлари бир-бирига тегмай қолган Иван Алексеевич дудуқланиб, сўнгра шартта орқасига бурилиб, сўқир кишидек юриб кетди.

Казаклар чўқинишиб, орқаларига ўгирилиб қарамай жўнаб қолишли. Улар тор сўқмоқлардан кетар экан, кўрган нарсаларини тезроқ эсларидан чиқаришга уриниб, анча маҳалгача чурқ этмай боришли. Аллакимлар ташлаб кетганд қатор-қатор ертўлалар олдида сотняни тўхтатишли. Офицерлар Черноярск полки штабидан от чоптириб келган ординарец билан бирга ертўлалардан бирига киришли; шунда чўтири Афонька Озеров Иван Александровичнинг қўлидан ушлаб, шивирлади:

— Бояги ўспирин... энг кейингиси... бояқиши умрида хотин кишини бир марта бўлса-да, ўпмаган чиқар... Тилка-пора қилишибди, буни қара-я!

— Тутдек тўкибдиларми-а? — дэб гапга аралашди Захар Королев.

— Ҳа, ҳужумга киришган экан... Ўликларни қўриқлаб турган солдат айтди,— деди бирпас жим туриб Боршчев.

Казаклар бўшашиб туришарди. Ўрмон устини қоронғилиқ ўраб олган. Шамол булутларни ҳайдар, уларнинг ораси ёрилганда узоқдаги кўкимтирир юлдузлар чўф каби ялтираб кетарди.

Бу вақтда сотия офицерлари тўпланган ертўлада, командир ординарецга жавоб бериб юбориб, пакетни очди ва ёниб тамом бўлай деган шам ёруғида унинг мазмуни билан танишди-да, кейин ўқиб эшигидирди.

3 октябрь куни тонг отарда немислар заҳарловчи газ қўйиб, 256-нчи полкнинг уч батальонини заҳарладилар ва биринчи линия окопларимизни ишғол қиласидар. Сизларга иккичи линиядаги окоплар томон силжиб, 318-нчи Черноярск полкнинг биринчи батальони билан алоқа боғлаш, иккичи линияни ишғол қилиш ва шу билан бирга, шу кечасиёқ душманни биринчи линиядан суриси чиқаришни буораман. З-нчи гренадёр дивизияси иккичи батальоннинг икки ротаси ва Фанагория полкнинг батальони сизнинг ўнг қанотингизда ҳаракат этади.

Офицерлар рўй берган аҳволни муҳокама қилиб, биттадан папирос чекиб, ертўладан чиқдилар. Сотия йўлга тушди.

Қазаклар ертўлалар олдида дам олаётган маҳалда Черноярск полкнинг биринчи батальони улардан илгари йўлга чиқиб, Стоход дарёси устидаги кўприкка етиб борди. Кўприкни гренадёр полкларидан бирининг кучли пулемёт командаси қўриқлаб турарди. Фельдфебель батальон командирига вазиятни тушунтирди, батальон кўприкдан ўтиб, бўлиниб-бўлиниб кетди: икки рота ўнгга, бири чапга жўнади, сўнгги рота батальон командири билан бирга резервда қолди. Роталар ёйилиб кетди. Сийрак ўрмонзор ўйдим-чўнқир бўлиб кетган, солдатлар оёқлари билан ерни пайпаслаб қадам босади, баъзан улардан бирининг оёғи чуқурга тушиб кетиб овозини чиқармай сўқинади. Ўнг флангда, энг чеккадаги ротада келаётган охирги солдатдан олтинчиси Валет эди. «Шайланинглар!» деб команда берилгандан кейин милитиқни шай қилиб, уни олдинга чўзиб борар, штикнинг учи билан буталар ва қарағайларнинг таналарини тирнар эди. Сафнинг ёнидан секин гаплашиб иккита офицер ўтиб кетди. Ширадор йўғон овоз билан гапираётган рота командири:

— Менинг эски ярам очилиб кетди. Қуриб кетгур түнгак!... Биласизми, Иван Иванович, қоронгида оёғимни түнгакка уриб олдим, ярам очилиб кетди, мен юролмайман, қайтишга түғри келади.— Ширадор йўғон овозли рота командири бир лаҳза жимиб қолди, нарироққа боргандан кейин овози секинроқ эшитила бошлади.— Сиз биринчи яrim рота командирлигини ўз устингизга олинг, Боганов иккинчисини олади, мен эсам, гапимга ишонинг, юролмайман. Қайтишга мажбурман.

Праторшчик Беликов хириллаган ингичка овоз билан уни койиб берди.

— Таажжуб! Жанг бошланди дегунча сизнинг эски яраларингиз очилиб кетади.

— Овозингизни ўчиринг деяпман, праторшчик жаноблари,— деб ўшқирди рота командири.

— Қўйинг-е! Қайтиб кетсангиз, кетавермайсизми?

Валет бошқаларнинг ва ўзининг қадам товушига қулоқ солиб, орқада шипиллаб кетаётган кишининг оёқ товушини эшилди-ю, рота командирининг жўнаб қолаётганини пайқади. Орадан бир минут ўтгач, Беликов фельдфебель билан ротанинг сўл қанотига ўтар экан пўнғиллади:

— ...Муттаҳамлар, сезяптилар! Бирор жиддий иш чиқиб қолса борми ё касал бўлиб қоладилар ёки эски яралари очилади. Сен бўлсанг, яқиндагина келган офицер, яrim ротани бошлаб обор. Аблаҳлар! Мен бунақаларни... солдатлар...

Товушлар бирдан жимиб қолди. Валет эса жиққа ҳўл этигининг шалоплаган товушини, қулоғининг шинғиллаганини эшитарди, холос.

— Ҳой, ҳамқишлоқ!— деб хириллаб чақирди сўл томондан бирор.

— Хўш?

— Кетяпсанми?

Валет йиқилди, сувга тўлган чуқурчага кети билан сирғаниб тушиб кетаётib:

— Кет-япман.— деб жавоб қилди.

— Зим-зиё қоронғилик...— деган овоз эштилди чапдён.

Бир минутгача бир-бирларини кўрмасдан юриб бордилар, сўнгра Валетнинг қулоғи остида ўша хириллаган овоз:

— Ёнма-ён борайлик! Унчалик қўрқинчли бўлмайди,— деди.

Яна жимиб қолдилар, жиққа ҳўл этиклари билан билчиллаган ерни босиб кетавердилар. Камаяётган, юзини доғ босган ой булутлар орасидан шўнғиб чиқди-да, учиб бораётган сертўлқин булутлар орасидан товошибалиқдай тангачаларини йилтиратиб сузаб ўтиб, очиқ жойга чиқиб олди ва ер юзига хира нурини соча бошлади. Қарағайларнинг намли барглари йилтиллаб кетди, ёруғда уларнинг ҳиди ўткироқ, муздек ернинг нафаси димоққа урилгандек туюлди. Валет ёнидаги солдатга қаради. У эса бирдан тўхтаб, калтакдан бошини олиб қочгандай ҳаракат қилиб, оғзини очиб, бирдан:

— Қара!— деб юборди.

Улардан уч қадамча нарида, қарағай тагида бир киши оёқларини кериб турарди:

— О-дам,— деди минғирлаб Валет.

Валетнинг ёнида кетаётган солдат винтовкасини ўхталди:

— Қимсан?— деб бақирди у.— Қим бу? Отаман!..

Қарағай тагидаги одам чурқ этмади. Унинг боши кунгабоқарнинг қалпоғидек бир томонга қийшайган эди.

— Ухлаб қопти!— деб пиқиллаб кулди Валет ватитраб, зўрма-зўраки кулги билан ўзига далда бердида, олға қадам ташлади.

Улар қаққайиб турган киши олдига келдилар. Валет бўйини чўзиб унга тикилди. Ўртоғи милтифнинг қўндоғи билан ҳаракатсиз турган кул ранг кийимдаги кишини туртди.

— Ҳой, пензалик оғайни? Ухлаяпсанми? Ҳамшашар!..— деди у масхараомуз.— Ҳой тентак, нима қилиб турибсан?— Унинг бирдан тили тутилиб,— мурда экан!— деб орқага чекинди.

Валет тишини гичирлатиб бирдан ўзини орқага отди, шу онадаёқ унинг оёқлари турган ерга қарағай остидаги киши тагидан арраланган дараҳтдай қу-

лаб тушди. Улар мурдани ағдариб юзини осмонга қаратдилар. Газ билан заҳарланган, ўпкасига кириб олган ажалдан қочмоқчи бўлган бу солдат, 256-нчи пиёда полкнинг заҳарланган уч батальонидан бирида хизмат қилиб, қарағай остида охирги бошпанасини топган эди. Чарпахлдан келган бу барваста йигит бошини орқага ташлаб бемалол ётар, йиқилганда юзи балчиқча бўялган, газдан заҳарланган кўзлари оқиб тушган; шишиб кетган, ялтироқ қайроқ сингари йўғон тилини тишлаб қолган эди.

— Юр, кетайлик, худо хайрингни берсин! Майли, ётган жойида ётаверсин,— деб шивирлади Валетнинг ўртоғи унинг қўлидан тортиб.

Улар бу ердан кетишиди, аммо шу заҳоти иккинчи бир мурдага дуч келишиди. Ўликлар борган сари кўпроқ учрарди. Бир неча жойда заҳарланган одамлар тўпланиб ётарди, баъзилар чўққайиб ўтирган жойларида қотиб қолган, бошқалар, гўё ўтлаётгандай тўрт оёқлаб турар, иккинчи линиядаги окопларга олиб борадиган хандақнинг оғзида бир солдат икки букилиб ётар, азобга чидолмай тишлаб ташлаган қўлини оғзига тиққан эди.

Валет билан унга ёпишиб олган солдат илгарилаб кетган сафга чопиб етиб олдилар-да, ундан ўзиб кетиб, ёнма-ён кетавердилар. Улар илон изи бўлиб қоронфилик ичига кириб кетган окоп ичига сакраб тушдилар ва икковлари икки ёққа қараб кетдилар.

Валетнинг шериги:

— Ертўлаларни тимирскилаб чиқиши керак, балки қолган-қутган егулик нарса бордир,— деди иккиланиб.

— Юр, кетдик.

— Сен — ўнгга, мен — чапга. Бизниkilар етиб хелгунча ҳамма ёқни тимирскилаб қидириб чиқамиз.

Валет гугурт чақиб, биринчи ертўланинг ланг очиқ эшигидан кирди, шу заҳоти у ердан шиша пробкаси дай отилиб чиқди: ертўлада бир-бирига кўндаланг бўлиб икки ўлик ётарди. У уч ертўлага кириб, бекорга овора бўлиб чиқди, тўртинчинсининг эшигини бир тепиб очди, бегона бир тилда жаранглаган овозни эшитиб, йиқилиб тушаёди:

— Wer ist das?¹

Иситмаси чиқиб кетган Валет индамай лип этиб ўзини орқага олди.

— Das bist du Otto? Weshalb bist du so spät gekommen?² — деб сўради-ю, немис ертўладан чиқиб бир қадам ташлади, сўнгра елкасини қимирлатиб кифтига ташланган олди очиқ шинелини тўғрилаб қўйди.

— Қўлингни кўтар! Қўлингни! Таслим бўл!— деб хириллаб бақирди Валет, оёқларини букиб, милтифи-ни ўқталиб.

Ҳанг-манг бўлиб, тили калимага келмай қолган немис секин қўлини кўтарди ва ёни билан туриб, ўзига томон қаратилган найзанинг йилтиллаган ўт-кир тифига афрайиб қараб қолди. Шинели ёлкасидан тушиб кетди, бир томонига тугма қадалган кўкиш мундирининг чети кўтарилиб, қўлтифининг ости буришиб қолди, кўтарилиган ишчи қўллар қалтирас, бармоқлар кўзга кўринмаган пианино клавишларини ча-лаётгандай қимирлар эди. Валет ҳолатини ўзгартирмай турар, немиснинг бўйдор, фўлабир гавдасига, мундирининг мис тугмаларига, этигининг икки ёни тикилган калта қўнжига, пешонасига дол қўйган соя-вонсиз шапкасига кўз югуртиради. Кейин бирор устидаги хапқат шинелидан ушлаб қаттиқ тортгандай гандирақлаб кетди. Томоғидан — йўтал деса йўталга, ҳиқичноқ деса ҳиқичноқча ўхшамайдиган ғалати товуш чиқарди; немиснинг олдига қараб бир қадам ташлаб:

— Қоч!— деди дўриллаб.— Қоч, немис! Сенга ҳеч қандай адоватим йўқ. Отмайман.

Валет окоп деворига милтифини тираб, оёғининг учига босиб бўйини чўзди, немиснинг ўнг қўлидан ушлади. Унинг дадил ҳаракати асирни лол қилди; у ўзига етти ёт бегона бўлган товушнинг ғалати оҳа-нигига қулоқ солиб, қўлларини пастга туширди.

Валет йигирма йиллик меҳнатдан қавариб кетган, қадоқ босган қўлини дадил узатиб, немиснинг совуқ

¹ Ким бу (нем.).

² Otto, сенмисан? Нега мунча кёчиқдинг?

ва шалвиллаган панжасини қисди, сўнгра кафтини очиб кўрсатди; қадоқ босган ғадир-будир, сап-сариқ бир бурда кафтига ойнинг сарғиши тангалари тушиб турарди.

Валет худди совқотгандай дилдираб:

— Мен — ишчиман,— дерди.— Нега энди сени ўлдирай? Қоч!— шуни деб у ўнг қўли билан немиснинг ўнг елкасига секин туртиб, дараҳтларнинг учлари бир-бири билан чалмашиб кетган қора ўрмонни кўрсатди.— Қочсангчи, аҳмоқ, бўлмаса бизникилар келиб...

Немис Валетнинг узатилган қўлига қаради, олдинга энгашиб, бутун диққатини тўплаб, тушуниб бўлмайдиган сўзларнинг яширин маъносини фаҳмлаб олишга уринди. Шу зайлда бир-икки секунд ўтди. Унинг кўзлари Валетнинг кўзлари билан тўқнашди, кейин немиснинг кўзи бирдан чарақлаб кетди. У орқасига бир қадам ташлаб, қўлларини чўзди, Валетнинг қўлларини маҳкам қисиб силтади, ҳаяжонга келиб, юзлари кулгидан ёришиб кетди, энгашиб Валетнинг кўзларига қаради.

— Du entlässt mich?.. O, jetzt hab ish verstanden! Dubist ein russicher Arbliter? Sozial-Demokrat, wil ish? So? O! O! Das ist wie im Traum!.. Mien Bru der, wie kann ish vergessen? Ich finde keine Worte, Nur du bist lin wunder barer wagender Junge... Ich!

Ажойиб тилда гапирилган жўшқин сўзлардан Валет фақат савол шаклида берилган битта — «социал-демократ?» деган сўзни пайқади.

— Ҳа, мен — социал-демократман. Сен жўнаб қол... Хайр, биродар. Даст панжани чўз!— Қомати келишган бўйдор бавариялик билан ушоққина рус солдати сезгирлик билан бир-бирларининг гапларини англаб, кўзларини кўзларига тикиб қарадилар. Бавариялик шивирлаб гапирди:

— In cen Zukii nftigen Klassenkämpfer werden wir

! Сен мени қўйиб юборяпсан-а? Энди тушундим-а? Сен рус ишчисимисан? Мен сингари социал-демократмисан? А? У... худди тушимда кўраётгандек бўляпман.. Биродар, мен буни қандай унуга сламан? Сўз тоголмай қолдим... Аммо сен ажойиб, жасур йигит экансан... Мен.. (немисча).

in den sellen Schüt zengräßen. Werden wir in den sel-
len schüt zengraben sein, nicht werh, genosse¹— Шуни деб
у бўридек бир сакраб, окоп устидаги дўнгликка
сакраб чиқди.

Ўрмондан яқинлашиб келаётган цепнинг қадам
товушлари эшитилди. Энг олдинда чех разведкачи-
лари командаси ўз офицери билан келмоқда эди. Улар
ертўладан чиққан солдатни отиб ташлашларига оз қол-
ди, солдат ертўлага егулик нарса қидириб тушган эди.

Солдат милтиқнинг қоп-қора оғзи ўзи томон қа-
ратилганини кўрди-ю, капалаги учиб кетиб:

— Бегона эмасман! Кўзинг кўрми, оғзингга...

— Узимизга қарашли,— деб тақрорлади у бир
буханка нонни кўкрагига боладек маҳкам босиб.

Унтер-офицер Валетни таниб, окопдан сакраб
ўтди-да, унинг елкасига милтиғининг қўндоғи билан
ўхшатиб бир туртди:

— Абжагингни чиқараман! Оғзи-бурнингни қоп-
қора қон қиласман! Қаердайдинг?

Валет сувда бўккан нондай бўшашиб борар, ҳатто
елкасига туширилган зарба ҳам унга таъсир этма-
ганди. У гандираклаб кетди-да, ўзига хос бўлмаган
мулойимлик билан жавоб бериб, унтерни ҳайратда
қолдирди.

— Сал олдинроқ кетиб қолибман. Кўп зўравонлик
қиласверма.

— Сенам ҳадеб думингни ликиллатаверма! Дам
орқада қолиб кетади, дам олдин кетиб қолади. Қоид-
дани билмайсанми? Биринчи йил хизмат қилишинг-
ми?— Бир оз жим туриб:— Тамакидан борми?— деб
сўраб қолди.

— Кукун бўй кетган-да.

— Майли, бер.

Унтер тамакисини тутатиб, взводнинг охирги са-
фига бориб қўшилди.

Тонг отар чогида разведкачи чехлар немислар-
нинг кузатиш постига яқин бориб қолдилар. Немис-
лар бараварига ўқ узиб, тинчликни буздилар. Икки

¹ Қелажакләти синфи жангларда бизлар бир окопда бўла-
миз. Тўғрими, ўргоқ (*немисча*).

марта, орадан маълум вақт ўтгач, қарийб баравари-га ўқ уздилар. Окоплар устида қизил ракета ҳавони ёритди, ғала-ғовур эшитилди, ҳавода ракеталарнинг қизил шуъласи сўнмай туриб, немислар тўпга тута бошладилар.

Бум! Бум!— гумбурлаган овозлар кетидан яна икки марта замбарак товуши янгради: Бум! Бум!

Тўп ўқлари байни ҳавони пармалагандек, борган сари кучайиб, биринчи ярим рота солдатларининг бошлари тепасидан гувиллаб ўтди; бир оз сукутдан кейин узоқда, олд томондаги Стоход дарёсидан кечиб ўтиладиган жойда «пақ!.. пуқ!..» этиб ёрила бошлади.

Разведкачи чехлардан қирқ саржин орқароқда келаётган аскарлар бир йўла ўқ отилгандан кейин ер бағирлаб ётиб олдилар. Ракета қип-қизил шуъла сочиб ҳамма ёқни ёритди; унинг ёруғида Валет солдатларнинг буталар ва дараҳтлар орасида чумоли сингари ўрмалаб кетаётганларини, жонларини сақлаб қолиш учун билчиллаган ерга таппа ташлаб ётиб олганларини кўрди. Одамлар ҳар бир ўнқир-чўнқир жой атрофида ғимирлашар, ҳар бир дўнглик панасига биқинишар, ҳар бир чуқурчага бошларини тиқишаради. Шунга қарамай, пулемёт ўқлари ўрмонга байни май ёмғиридек шатир-шутур ёға бошлагач, аскарлар чидаш беролмадилар: бўйинларини елкалари ичига тортиб, қурт сингари ерга қапишиб, қўлларини ҳам, оёқларини ҳам буқмай, орқаларидан из қолдириб, балчиқда илондай судралиб кетдилар... Баъзилар сакраб ўринларидан туриб қочиб қоларди. Ёриладиган ўқлар ўрмондаги игна баргли шохларни синдириб, қарагайларни тилишлаб, заҳарли илондай вишиллаб ерга тушар, пақиллаб ёрилиб кетарди.

Иккинчи линиядаги окопларга қайтиб келганларида биринчи ярим рота ўн етти солдат йўқотган эди. Нарироқда алоҳида сотня казаклари қайтадан саф тортиб, биринчи ярим ротанинг ўнг томонида эҳтиётлик билан борган эдилар, соқчиларни ўлдириб, тўсатдан немисларни босишлари ҳам мумкин эди-ю, лекин разведкачи чехларга қараб бараварига ўқ отишганида ҳамма участкадаги немислар сергакланиб қолди-

лар. Улар пала-партиш ўқ узиб, икки казакни ўлдирдилар, биттасини ярадор қилдилар. Қазаклар ўлдирилган казаклар билан ярадорни ўзлари билан олиб қайтдилар, саф тортар эканлар гаплашишарди:

— Үликларимизни кўмиш керак.

— Бизсиз ҳам кўмишади.

— Шу топда тирикларнинг ғамини ейиш керак, үликларга кўп нарса керакмас.

Орадан ярим соат ўтгач, полк штабидан буйруқ олинди: «Артиллерия тайёргарлигидан кейин батальонга алоҳида казаклар сотняси билан бирликда душман устига ҳамла қилиб, уни биринчи линиядаги окоплардан сурib чиқаришни буюраман».

Кучсиз артиллерия тайёргарлиги кундуз соат ўн иккигача чўзилди. Казаклар ва солдатлар қоровул қўйиб, ертўлаларда дам олмоқда эдилар. Чоштгоҳда ҳужумга ўтдилар. Сўлроқда, асосий участкада, тўплар гумбурларди,— у ерда яна ҳужумга ўтган эдилар.

Ўнг қанотнинг энг чеккасида Забайкал казаклари, сўлроқда алоҳида казаклар сотняси билан бирга Черноярск полки, унинг нари ёғида — Фанагория гренаадёрлар полки, улардан нарида — Чембарский, Бугульминский, 208-нчи пиёда полклари, Павлоградский, Венгровский полклари ҳаракат этмоқда эдилар. 53-нчи дивизия полклари фронт марказида ҳужумга ўтган эдилар; 2-нчи Туркистон ўқчилар дивизияси сўл қанотни эгаллади. Ҳамма участкалардан сурон эшитилар,— руслар ҳамма ёқда ҳужум қилаётган эдилар.

Казаклар сотняси ораси очиқ-очиқ саф билан бормоқда эдилар. Уларнинг сўл қанотлари Черноярск полкининг ўнг қаноти билан туташган эди. Окоплар устидаги дўнгликлар кўзга чалиниши билан немислар шиддатли ўт очди. Казаклар сурон кўтармай, бир жойдан иккинчи жойга чопиб ўтар эдилар; ётиб олиб, винтовкаларининг ўқдонидаги ўқларни бўшатар, яна туриб чопар эдилар. Окоплардан эллик қадам берида бутунлай ётиб олиб, бошларини кўтармай ўқ уздилар. Немислар бутун линия бўйлаб окоплар олдига тўрсимон сим ўралган тўсиқлар чиқариб ташладилар. Афонька Озеров отган икки граната тўрга тегиб сак-

раб орқага қайтиб ёрилди. У бошини сал кўтариб, учинчи гранатани отмоқчи эди, аммо чап елкасидан пастроққа ўқ тегиб, думғазасидан тешиб чиқди. Афонъкага яқин ерда ётган Иван Алексеевич, у оёқларини типирлатиб кейин жимиб қолганини кўрди. Бир қўли чўлтоқ Алёшканинг укаси Прохор Шамилни ҳам ўлдирдилар. Учинчи ўқ собиқ атаман Маниковни қулатди, шу заҳоти бир ўқ келиб Шамилларнинг бир оёғи чўлоқ қўшниси, кокилдор Евлантий Калининг тегди.

Иккинчи взводдан ярим соат ичидаги саккиз одам нобуд бўлди. Сотня командири — ясовулни, икки взвод офицерини ўлдирдилар, шундан сўнг сотня командасиз эмаклаб орқага чекинди. Казаклар ўқ етмайдиган жойга келиб тўпландилар — уларнинг ярми ҳалок бўлган эди. Черноярчилар ҳам чекиндилар. Биринчи батальонда талафот бундан ҳам кўп эди, аммо шунга қарамай, полк штабидан буйруқ келди: «Дарҳол қайтадан ҳужумга ўтилсин, нима қилиб бўлса ҳам душманни биринчи линия окопларидан суреб чиқарилсин ва дастлабки позиция эгаллансин. Бутун линия бўйлаб олиб борилётган жанг ҳаракатларининг муваффақияти шунга боғлиқdir».

Сотня таралиб, сийрак саф тортиб яна ҳужум бошлади. Немислар шиддатли ўт очганларидан кейин окоплардан юз қадам бернида ерга ётиб олдилар. Яна қисмлар камая бошлади, эс-ҳушларини йўқотган сдамлар ерга бағирларини бериб, қимир этмай, бошларини кўтармай ётишар, уларни ўлим ваҳми босган эди.

Кечга томон Черноярск полкининг иккинчи ярми ротаси саросимага тушиб, тумтарақай қочди. «Қуршаб олибдилар!» деган ҳайқириқ казакларнинг қулоғига чалинди. Казаклар ўринларидан тура солиб, буталарни синдира-синдира, милтиқларини йўқотиб орқага қочдилар. Иван Алексеевич чопганича бехатарроқ жойга келиб, тўп ўқи синдириб кетган қарағай остига ўзини ташлади, зўрга нафасини ростлаб олди, шу он унга қараб келаётган Гаврило Лиховидовга қўзи тушди. Лиховидов маст одамдай оёқ ташлаб, кўзларини ерга тикиб келар, бир қўли билан ҳаводаги бир

нарсани ушламоқчи бўлар, иккинчи қўли билан юзи-
даги кўзга кўринмас ўргимчак инини сидириб олиб
ташлашга уринарди. На қўлида милтиғи, на ёнида
қиличи бор эди, тердан ҳўл бўлиб кетган қорамтири
малла текис соchlари осилиб қошига тушганди. У ўр-
мон ичидаги очиқ жойда гандираклаб юриб, Иван
Алексеевич олдига келди. Аланг-жалаңг, филай қўзла-
рини ерга тикиб, туриб қолди. Унинг тиззалири қалт-
қалт титрар, букилиб-букилиб кетар, Иван Алексе-
евичнинг назаридаги Лиховидов парвоз қилиш учун тиз
букаётгандай эди.

Иван Алексеевич бир нима дейиш учун:

— Ана... кўрдингми...— деб гап бошлаган эди,
Лиховидовнинг юзи тиরтишиб кетди.

— Тўхта!— деб бақирди у, сўнгра чўққайиб ўти-
риб олиб, панжаларини тарвақайлатиб, қўрқа-писа
атрофга кўз югуртирди.— Қулоқ сол. Мен ҳозир ашу-
ла айтаман. Бир парранда бойқушнинг олдига үчиб
келиб айтибди.

Менга айт-чи, бойқушим
Сендан ҳам катта ким бор?
Сендан улуғроқ ким бор?
Бургут подшо экан.
Калхат баковул экан,
Бўйтарги қуш — ясовул.
Кабутарлар — уралли,
Мусича — атаманли.
Майналар қалмоқ экан,
Зағчалар лўли экан,
Загизон тўра экан,
Ўрдак лиёда экан,
Фозлар молдаван экан.

— Шошма!— деди Иван Алексеевич докадек оқа-
риб.— Лиховидов, сенга нима бўлди а?.. Бетобми-
сан? А?

— Халақит берма!— деди Лиховидов қизариб.
Унинг бўзарган лаблари бемаъни илжайди, боягидай
даҳшатли куй билан ашула бошлади:

Фозлар молдаван экан,
Тугадоқ аҳмоқ экан,
Қурвақалар шўх экан,
Қарғалар тўпчи экан,

Қузғунлар ўқчи экан,
Балиқчи қуш — дуторчи.

Иван Алексеевич сапчиб ўридан турди:

— Юр, ўзимизникилар олдига борайлик, бўлмаса — немислар бизни тутиб олишади! Эшитяпсанми?

Лиховидов қўлини тортиб олиб, оғзидан илиқ тупугини сачратиб, шошиб-пишиб бақириб ашула айта бошлади.

Булбуллар чалади соз.
Қалдирғоч баландпарвоз
Қора қуш фақир экан.
Читтак ўлпончи экан,
Чумчуқ ўнбоши экан.

Бирдан овози ўчиб, кейин хириллаб мунгли овоз билан ашула айта бошлади. Унинг қаришиб қолган оғзидан ашула эмас, бўрининг увлашига ўхшаш овоз борган сари зўрайиб чиқарди. Ўткир сўйлоқ тишлари устида оппоқ тупуги кўпикланиб товланарди. Иван Алексеевич яқиндагина қалин ўртоғи бўлган Лиховидовнинг бежо қийиқ кўзларига, соchlари силлиқ қилиб тараалган бошига, оқ мумдан ясалгандек қулоқларига қўрқув аралаш қараб турарди. Лиховидов жон-жаҳди билан бўкириб ашула айтарди:

— Шон-шуҳратдан дарак берар янграб карнай
Орқамизда қолиб кетди улкан Дунай,
Турк сultonин енгдик, зафар қозондик биз,
Чумолидек қирлар ошиб жўнадик биз
Милтиқлардан ўқ узади Дон казаги.
Товуқ, курканг бўлса овлаб оламиз биз,
Ўғил-қизинг бўлса олиб кетамиз биз.

Иван Алексеевич сайхон ерда оёғини аранг судраб келаётган Мартин Шамилни кўриб:

— Мартин, ҳой Мартин, бу ёқقا кел,— деб чақирди.

Шамил милтиғиға таяниб унинг олдига келди.

Иван Алексеевич кўзи билан жинни бўлиб қолган ўртоғини кўрсатиб:

— Уни олиб бориб топширишга ёрдамлаш. Кўряпсанми?— деди.— Бўладигани бўп қопти. Миясини еб қўйибди.

Шамиль ич кўйлагийнг енгини узиб олиб ўқ тек-
кан сёғини боғлади; Лиховидовга қарамасдан унинг
бир қўлтиғига, Иван Алексеевич иккинчи қўлтиғига
кириб, жўнадилар.

Лиховидов энди пастроқ овоз билан:

Нўмолидек қирлар ошиб
жўнадик биз.

деб ҳониш қилди. Шамиль эса афтини буриштириб:
— Қўйсангчи ашулангни! Худо ҳақи, шовқинлама,
Эсингни еб қўйибсан, қўй!— деди.

Товуқ, курканг бўлса овлаб кетамиз биз.

Лиховидов казакларнинг қўлидан юлқиниб чи-
қишига ҳаракат қилар, ашула айтишдан тўхтамас,
аҳён-аҳёнда кафтлари билан икки чаккасидан қисар,
тишларини фирчиллатар, осилиб тушган қўйи жағини
қалтиратиб, жунун водийсидан эсган қайноқ шамол-
дан айнаган бошини бир ёқقا қийшайтиради.

IV

Стоходдан қирқ чақирим пастда жанглар бормоқ-
да. Икки ҳафта бўйи тўпларнинг гулдуроси тинмади,
кечалари узоқ мовий осмонда проҗектор нурлари-
нинг акси яллиғланиб турди, улар хира камалак тус-
да нур сочар, жим жима қилар, уруш алансини бу
ердан кузатиб турганларнинг юрагига аллақандай
ғулғула солар эди.

Ботқоқлик, хилват жойда ўн иккинчи казак полки
жойлашган эди. Кундузлари саёз окоплар ичиди
энгашиб чопган австрияликларни онда-сонда ўққа
тутишарди, кечалари эса ботқоқликка кирволиб ухла-
шар ёки карта ўйнашарди; ёлғиз пойлоқчиларгина
жанг кетаётган ердаги қизғиши алансини куза-
тиб туришарди.

Совуқ кечалардан бири, йироқдаги алансини акси
осмонни чарақлатганда Григорий Мелехов ертўладан
чиқиб, хандақ ичи билан юриб окоплар орқасидаги
пастак дўнглик устидаги кекса ўрмонзорга кўтарили-
ди. Григорий кенг, хушбўй ерга ётиб олди. Ертўла

ичи папирос тутунига тўлган, қўланса қора тутун қоплаб олган стол атрофида саккиз казак картабозлик қилмоқда. Тепалик устидаги ўрмонда эса номаълум бир қушнинг қанотидан ҳосил бўлган шамол сингари шабада еларди. Ушук урган ўт-ўланлардан кўнгилни оздирувчи ҳид анқир эди. Учларини тўп ўқлари каллаклаб кетган ўрмон устида зулмат қанот ёйган, Ҳулкар юлдузининг нури сўнмоқда, Етти қароқчи юлдузлар туркуми Сомон йўлидан чапроқда лайлак бўлиб тўнтарилиб тушган аравага ўхшаб ётарди. Фақат шимол ёқдагина Олтин Қозиқ юлдузи бир текис нур сочиб турмоқда.

Григорий кўзларини қисиб, Олтин Қозиқ юлдузига қаради, хира ва совуқ юлдузларнинг ўткир нуридан киприк осларида шу йўсин совуқ ёшлар тирқираб чиқди.

Шу тепалик устида ётар экан, негадир, Нижне-Яблоновск қишлоғидан Ягодноега — Аксинья олдига борган кечасини ўйлаб кетди; Аксинья эсига тушга, юраги туздек ачишиб кетди. Замонлар ўтиши билан унутилаёзган ниҳоясиз қоронғи ўллар, ёт кишиларнинг башаралари эсига тушди. Аксиньяни сўнгги марта кўргандек кўз олдига келтиromoқчи бўлганда юраги бирдан ўйнаб кетди. Уша вақтда унинг башарасига қамчи изи тушиб, кўкариб қолган эди. Аммо хотираси кучлилик қилиб, андек бир томонга қийшайган, кулиб турган ўқтам башарани кўз олдига келтирар эди. Ана у бошини буриб, чақнаб турган қора кўзлари билан ер остидан меҳр билан шўх назар ташлайди, беҳаё-суқтой лаблари аллақандай таърифдан ташқари ҳароратли пичирлайди, сўнгра аста нигоҳини олиб қочиб, тескари ўгирилади. Қорача бўйнига майин сочи тушиб турарди... Бу соchlарни у бир вақтлар ўпишни яхши кўрарди.

Григорий бир чўчиб тушди. Назарида Аксиньянинг хушбўй, маст этувчи соchlарининг бўйи бир лаҳза димоғига киргандай бўлди; шу он у букилиб, бурун катакларини каттароқ очди, аммо ҳайҳот! Уни ҳаяжонга солган ҳид — хазон ҳиди эди. Аксиньянинг чеҳраси кўзи ўнгидан лип этиб ғойиб бўлади. Григорий кўзларини юмади, Кафталарини ғадир-будур ерга

тірәб, күзләрини юммай қулаган қарағай орқасыда, осмөннинг бир чеккасида муаллақ туриб қолган Олтиң Қозиқ юлдузи худди зангори капалакдай жимжима қилиб туради.

Бир-бирига қовушмаган хотиралар Аксиньяниң сиймосини парда билан қоплаб олгандай бўлди. У Аксиньядан ажралишгандан кейин Татарск хуторида кечирган ҳафталарини эслади; кечалари ўша вақтда Наталья унга эркаланиб тинка-мадорини қуритган, гўё илгариги — ёшлигидаги совуқлигининг ҳиссасини чиқармоқчидай бўларди. Кундузлари эса уй ичидалилар унга парвона бўлиб, хушомадгўйлик қилишар; қишлоқдагилар, биринчи Георгий нишонини олган кишини ҳурмат билан қаршилашарди. Григорий ҳамма ерда, ҳатто онлода ҳам ҳамманинг ҳайратомуз ҳурмат назари билан қия боқишиларини кўрарди. Унинг бир вақтлар ўзсўзли хушчақчақ йигит бўлган ўша Григорий эканига гўё ишонмасдилар. У билан кексалар хўтор майдонида худди ўз тенгқурлариdek суҳбатлашар, унга дуч келганларида бошларидан шапкаларини олиб таъзим қиласар, хотин-халаж, қизлар эса шинелига йўл-йўл лентали крест осган Григорийниң андек букчайган қадди-қоматига суқланиб тикилардилар. Пантелей Прокофьевичниң ёнида черковга ёки машқ майдонига кетаётганида отасининг ғуурланганини кўрарди. Бу хушомадгўйлик, иззат-ҳурмат, завқланишларнинг аччиқ заҳари бир вақтлар Гаранжа унинг миясига сингдирган ҳақиқат уруғларини заҳарлаб хароб этди. Григорий фронтдан келганида бошқача эди, кетганида эса тамоман айниб қайтди. Она сути билан кирган ва бутун умр қон-қонига сингиб кетган казаклик феъл-автори инсоний ҳақиқатлардан ғолиб чиқди.

Қитдек ичиб олган Пантелей Прокофьевич хайрлашиш вақтида оқ оралаган тим қора сочини силар экан, ҳаяжонланиб:

— Билган эдим, Гришка, сендан яхши казак чиқишини кўпдан билган эдим,— деди.— Бир ёшга тўлганингда, қадимий казак одатига кўра, сени ҳовлига олиб чиқдим. Эсингдами, кампир? Сўнгра сени отга миндирдим. Сен тирмизак қўлчаларинг билан от-

нинг ёлига тармасиб олдинг. Ўша вақтдаёқ сендан маъно чиқишига ақлим етган эди, гапим тўғри чиқди.

Григорий фронтга кетганида софдил яхши казак эди. Қалбида урушнинг бемаънилигини билиб туриб, казаклик шуҳратини шараф билан ҳимоя қилди.

Бир минг тўққиз юз ўн бешинчи йил. Май ойи. Ольховчик қишлоғи яқинида кўм-кўк ўтлоқни топтаб, ўн учинчи немис пиёда темир полки ёпирилиб келарди. Пулемётлар чирқиллар, дарё ёқасида ётиб олган рус ротасининг оғир пулемёти тарилларди. Ўн иккинчи казак полки жангга кирган эди. Григорий ўз сотнисидаги казаклар билан энгашиб чопиб борар ва атрофга аланглаб, тикка келган лахча чўғ офтобни ва дарёнинг секин оқадиган ерида акс этган сариқ баркашдек аксини кўрарди. Дарёнинг нари ёғида, теракзор орқасида от етакловчилар яширган, рўпарда эса — бургут тамғали мис каска кийган nemislar... Шамол ўқларнинг сарғиш аччиқ тутунини чайқалтиради.

Григорий астойдил мўлжалга олиб, шошмасдан отар, ўқ узгандан кейин нишонни кўрсатувчи взвод командирининг командасига қулоқ соларди. У гимнастёркасининг енгига ўрмалаб чиққан хонқизини аста олиб ташлади. Сўнгра атакага ўтилди...

Григорий новча немис лейтенантини темир қопланган қўндоғи билан уриб йиқитди, уч немис солдатини асир олди, сўнгра бошларидан ошириб ўқ узиб, уларни дарё томонга қараб қочишга мажбур қилди.

Рава-Русская ёнида, 1915 йил июлида казак взводи билан бирликда казакларнинг австрияликлар томонидан босиб олинган батареясини қайтариб олди. Ўша ерда, жанг маҳалида душманнинг орқасига ўтида-да, қўл пулемётидан ўт очиб, ҳужум қилиб келаётган австрияликларни тумтарақай қочирди.

Баянецдан ўтгач, олиш-тувишда семиз бир австриялик офицерни асир олди, қўй сингари уни отга ўнгариб, чопиб кетаётганда, ичи ўтган офицернинг тарқатган бадбўй ҳидини ва қўрқанидан терлаб-пизишиб титраганини доим пайқаб борди.

Яйдоқ тела устида ётар экан, ашаддий душмани Степан Астаховга дуч келиб қолгани эсига тушди. Бу воқиа 12-нчи полкни фронтдан олиб, Шарқий Пруссияга ташлаган пайтларида рўй берган эди. Қазак отлари немисларнинг текис далаларини пайхон қиласар, казаклар немис уйларига ўт қўяр эдилар. Ўлар босиб ўтган йўлларда қора тутунлар буриқсан, қуйиб ёнган уйларнинг деворлари ва черепицали томлари куйиб тутаб ётарди. Столипин шаҳри ёнида полк 27-нчи Дон казак полки билан бирликда ҳужумга ўтди. Григорий ориқлаб кетган акасини, соқолини устара билан олдирган Степанин ва бошқа ҳамқишлоқ казакларни кўриб қолди. Жангда полклар мағлубиятга учраган эди. Немислар уларни қуршаб олганди. Қисиб келаётган душман ҳалқасини ёриб ўтиш учун ўн икки сотня бирин-кетин ҳужумга ўтганида, Григорий Степанинг ўқ тегиб ўлган қора тўриқ отидан сакраб, ўмбалоқ ошганига кўзи тушиб қолди. Кўнглига бирдан келган қатъий қарордан суюниб кетган Григорий жиловини тортиб, отини аранг тўхтатди. Сўнгги сотня казаклари сал бўлмаса Степанин босиб кетаёзди, казаклар ёнидан ўтиб кетганидан кейин унинг олдига от солдириб бориб:

— Узангидан ушлаб ол! — деб қичқирди.

Степан узангининг қайишини маҳкам чанглаб, Григорийнинг оти ёнида ярим чақиримча йўл босди.

— Секинроқ чоп, худо хайр бергур,— деб илтижо қилди у нафаси қисилиб.

Улар эсон-омон қуршовдан чиқиб олдилар. Сотни шошиб-пишиб интилаётган ўрмончага юз саржинча масофа қолган эди, ўқ Степанинг оёғига келиб тегди, қўли узангидан чиқиб кетиб, муккаси билан тушди. Шамол Григорийнинг фуражкасини учириб кетиб, сочи кўзларини беркитиб қолди. Григорий сочини орқага ташлаб атрофга аланглади. Степан оқсоқланиб бута остига етиб келди-да, казакча фуражкасини унинг устига улоқтириди ва ўтириб олиб шошганича қизил ҳошияли чалворини еча бошлади. Тела ён бағридан немислар тап-туп қилиб, югуришиб чиқмоқда эдилар. Григорий Степанинг тирик қолмоқ истагини пайқади, шунинг учун ўзини солдат

қилиб қўрсатиш мақсадида казакча чалворини ечаётган эди. У вақтда немислар казакларни асирилмасдилар... Григорий қалб амрига итоат этиб, отнинг бошини бурди-да, бута ёнига чопиб кетаётиб, иргиб отдан тушди-ю:

— Миниб ол,— деди.

Степанинг ялт этиб бир қараганини Григорий ҳеч унутмайди. У Степанинг эгарга ўтқазиб, узангини ушлаганича, терлаб-пишиган от ёнида чопиб кетди.

Ўқлар чийиллаб ҳавони ёриб ўтар, узоқдан уларнинг «тю» деган свози келарди.

Григорийнинг боши устидан ранги докадек оқариб кетган, Степанинг юзи атрофидан, ён-верларидан ўқларнинг ҳавони кесиб, зингиллаб ўтиши эшитилар, орқа томондан акация шохларининг қарсиллаб синганини эслагувчи ўқ овозлари келарди.

Урмонга кирганда Степан оғриқдан ижирғаниб эгардан тушди; тизгинни қўйиб юбориб, бир чеккага қараб оқсоқланиб кетди. Чап этигининг қўнжидан қон оқар, яраланган оёғини ҳар босганда этигининг кўчган таг чарми орасидан олча ранг қон сизиб чиқар эди. Степан шохлари тарвақайлаган эман дарахтининг танасига суюниб, бармоғи билан Григорийни имлаб чақирди, Григорий унинг олдига келди.

— Этигим қонга лиқ тўлди,— деди Степан.

Григорий индамай бошқа томонга қараб турарди.

— Гришка... шу сафар ҳужумга ўтганимизда... эшитяпсанми, Григорий,— деди Степан чўккан кўзлари билан Григорийнинг кўзларига қарамоқчи бўлиб.— Епирилиб кетаётганимизда орқангдан сенга уч марта ўқ уздим... Сени худо асраб қолди.

Улар кўз уриштириб қолдилар. Степанинг чуқур тушиб кетган кўзлари бигиздек тешиб ўтгудек бўлар эди. Степан маҳкам қисган тишлари орасидан гапириб:

— Сен мени ўлимдан қутқариб қолдинг... Раҳмат... Аксинья учун кечиролмайман. Ҳеч кўнглим йўқ. Мени ўз ҳолимга қўй, Григорий,— деди.

— Таъбинг,—деб жавоб қилди Григорий,

“Улар яна” аввалгидек бирбирләрига күшанды бўлиб ажралдилар... Шундан сўнг... май ойида полк Брусилов армиясининг қолған қисмлари билан Луцк ёнида фронтни ёриб ўтиб, душман орқасида ҳаракат этди, душманни савалади, баъзан эса ўзи ҳам зарба еди. Львов ёнида Григорий ҳеч кимдан сўрамай, сотняни эргаштириб атакага кирди, австрияликларнинг замбаракларини командаси билан қўлга туширди. Бир ойдан кейин тунда «тил» тутиб келиш учун Буг дарёсидан сузиб ўtdи. Постда турган соқчини гупиллатиб йиқитдй. Чорпахлдан келган забардаст немис устига миниб олган ярим яланғоч Григорийни анчагача гир айлантириб, тиричилаб, ўзини ҳеч боғлатгиси келмади.

Григорий мийигида кулиб, шу воқиани эслади. Яқингинада ва ўтмишда бўлган жанг майдонларида тентираб юрган кунлари оз бўлганми? Григорий казаклик шаънини қаттиқ сақлади, фидокорлик кўрсатиш учун пайт пойлади, таваккалчилик ва телбалик қилди, австрияликларнинг орасига бошқача кийиниб борди, қоен тўқмай чегара соқчиларини асир олди, мардэноворлик кўрсатди, урушнинг дастлабки кунларида қалбида бўлган раҳм-шафқат хисси абадий кўнглидан кўтарилиганини ҳис қилди. Юраги тошга айланди, шўр босган ердек қотиб қолди. Шўрхок ер сув сингдирмагандек, Григорийнинг ҳам юрагида раҳм-шафқатдан асар қолмади. Узгаларнинг ва ўзининг ҳаётига ўйинчоқдек қарайдиган бўлиб қолди; шу сабабдан ботир деган ном чиқариб, тўртта Георгий крести ва тўртта медаль олди. Аҳён-аҳёнда бўладиган парадларда кўп жангларнинг ўқдори тутуни билан чулғанган полк байроғи остида турди; аммо аввалгидек чеҳраси очилиб кулолмаслигини яхши биларди; кўзлари чўкиб кетганини, ёноқ суюклари туртиб чиқиб қолганини пайқарди; гўдакни ўпар экан, порлаб турган кўзларига тик қараш қийинлигини ҳам биларди; кўкраги тўла крестлар, офицерлик даражасига эришиш нақадар қимматга тушганини Григорий тушунарди.

Григорий ёнбошига шинелининг этагини қайриб,

чап қўли тирсагига таяниб, тепалик устида ётарди. Ўтмиш ҳодисалар хотирасида жонланарди, уруш тўғрисидаги яхлит ва лахтак хотиралар орасига болалик давридаги, қандайдир, узоқ бир ҳодиса мовий ип сингари чирмашиб кетарди. Григорий бир лаҳза болалик чоғини ўйлаб дам хурсанд, дам хафа бўлиб кетарди, кейин унинг хаёли яқиндагина бўлиб ўтган ҳодисалар устига кўчар эди. Австрияликлар окопида кимдир мандалинни боплаб чаларди. Шамол учирив келаётган тўлқинли товушлар Стоход дарёсидан ўтиб, одамларнинг қони кўп марта тўкилган ер устида майин янграп эди. Тик осмонда юлдузлар чўғдек ёнар, қоронғилик қуюқлашар, ботқоқлик устини тунги туман чулғар эди. Григорий устма-уст иккита цигарка чекди, винтовкасининг қайшини дағал силади, чап қўлининг панижасига таяниб, меҳрибон заминдан аста кўтарилиди-да, окоплар томони ўриб кетди.

Ертўлада ҳамон карта ўйнаб ўтиришарди. Григорий ўзини нар устига ташлади, аллақачон босиб ўтган, ўт босиб кетган хотиралар сўқмоғида яна адашиб-улоқиб юрмоқчи бўлди, лекин уйқу элтди; қандай ётган бўлса, ўша тахлитда, ноқулай вазиятда ухлаб қолди. Тушда гармсел қовжиратган поёнсиз даштларни, пушти ранг «ҳамишабаҳор» гуллар ўсиб ётган ерларни, зангори гулли жанбиллар орасидаги тақасиз отлар изини кўрди. Даشت бўм-бўш ва сув қўйгандек жимжит. Григорий қумлоқ, заранг ер устида юриб кетаётган эмиш, аммо қадам товуши эштилмас эмиш, шундан ваҳимага тушиб қўрқсан эмиш... Уйғониб, бошини кўтарди, ноқулай ётиб қолгани учун чаккасига қизил излар тушиб қолган эди. Григорий худди аллақандай хушбўй ўтнинг ҳиди бир лаҳза димоғига уриб, олазарак бўлиб қолган отдек анчагача тамшаниб турди. Шундан сўнг у туш кўрмай, данг қотиб ухлаб қолди.

Эртасига Григорий негадир кўнгли хира бўлиб уйғонди.

— Нега тумтайиб қолдинг, а? Станица тушингга кирдими?— деб сўради Кокилдор.

— Топдинг. Тушимда даштда юрганмишман.

Кўнглим шундай бузилдики... Қани энди уйга борсам. Подшога хизмат қилиш жонга тегди.

Кокилдор мийигида кулиб қўйди. У ертўлада доим Григорий билан бирга туарди, зўр ҳайвон ўзидан зўрроқ ҳайвонга сиполик қилганидай, у ҳам Григорийни шундай иззат қиласди; 1914 йилги дастлабки жанжалдан бери уларнинг орасида машмаша чиқмаган эди, Кокилдорнинг таъсири Григорийнинг характеристига ва руҳига ўтиб қолган эди. Уруш Кокилдорнинг фикрини анча ўзгартириб юборди. Шунинг учун ҳам у нуқул урушни инкор эта-диган бўлиб қолди. Подшо саройида мажлис қурган хоин генераллар ва немислар тўғрисида гапиргани-гапирган эди. Иттифоқо у шундай деб қолди: «Модомики, маликанинг ўзи немис наслидан экан, яхшилик кутмай қўя қол. Пайти келганда у бизни сариқ чақага сотиб юборади...»

Бир куни Григорий, унга Гаранжа ўргатиб кетган гапларни тушунтириб берган эди, Кокилдорга маъқул бўлмади.

У заҳарханда қилиб кулиб, яргоқ бошига шапатилаб туриб:

— Бу гаплар қуруқ сафсата, холос,— деди.— Шу тўғрида Мишка Кошевой ҳам четан девор устига чиқиб олган ҳўроздай қичқиради. Бу революциялардан ҳеч қандай маъни чиқмайди, тантиқлик, холос. Сен шуни билиб қўй, биз, казакларга бироннинг ҳукумати эмас, ўз ҳукуматимиз керак. Бизга Миколай Николаичдай¹ қаттиққўл подшо керак. Мужиклар билан йўлимиз бир эмас. Уларнинг касали бошқа — ерни тортиб олиш пайида, ишчилар эса маошим ошсин дэйди. Бизга нима қолади. Ерларимиз ошиб-тошиб ётибди, бундан бошқа нима керак? Ҳаммаси қуруқ гап. Подшоҳимиз ўзи расво, яширишнинг ҳожати йўқ. Оталари қаттиққўл эди, бунисининг бешинчи йил революциясидагидек ахир иш-

¹ Николай Николаевич (1856—1929) улуғ князь. Жаҳон уруши бошида рус армиясининг олий бош қўмондони бўлган. Гражданлар уруши вақтида чет әлга қочиб кетган. У ерда Врангель ва аксари монархистлар паноҳида рус тахтига «даъвогарлар»дан бири бўлган эди.

кали чиқади, чархпалак бўлиб, оёғи осмондан кела-ди, онасини кўради. Бу бизга қўл келмайди. Хўдо юзини тескари қўлсин, агар подшони таҳтдан тушир-салар, бизга ҳам навбат келади. Шунда эски адова-тлар қўзғалиб, ерларимизни мужикларга бўлиб бўришади. Қулоқни динг қилиб туриш керак.

— Сен доим бир томонлама ўйлайсан,— деди Григорий хўмрайиб.

— Бекор айтибсан-э! Ҳали она сутинг оғзингдан кетгани йўқ, хомсан, фўрсан. Ҳали шошма, таъзи-рингни берганларидан кейин кимнинг гапи тўғрили-гини билиб қоласан.

Одатда шу билан суҳбат узилар эди. Григорий жим қолар, Қокилдор эса гапни бошқа ёқقا буриб юборарди.

Уша куни бир воқиа Григорийни ноқулай аҳволга солиб қўйди. Уша куни туш пайтида ҳар вақтдаги-дек дала кухнаси тепаликнинг нари ёғидан чиқиб, келиб тўхтади. Казаклар бир-бирларидан олдинроқ бориш учун шошилиб кухна олдига тўпландилар. Учинчи взводга овқат келтириш учун Мишка Коше-вой борар эди. У узун ёғочга илинган, буғи чиқиб турган котелокларни ертўлага олиб кирав экан:

— Бу ўтакетган расвогарчилик! Нима, биз ит-мизми?— деб бақирди.

— Узи нима гап?— деб сўради Қокилдор.

— Бизни сасиган, қуртлаган гўшт билан боқяп-тилар!— деб қичқирди Кошевой жиғибийрони чиқиб.

У бошини бир силкитиб, чирмашиб ўсган етимак сингари тилла ранг кокилини орқага ташлаб, коте-локларни тахта сўри устига қўйди-да, Қокилдорга қўз қирини ташлаб:

— Ҳидлаб кўр, карам шўрвадан ниманинг ҳиди келади?— деди.

Қокилдор ўз котелоги устига энгашди-да, буруп катакларини кериб, афтини бужмайтирди. Кошевой ҳам беихтиёр унга тақлид қилиб, бурун катакларини кериб, рангпар юзини бўришитирди.

— Сасиган гўшт,— деди Қокилдор.

У жирканиб, котелогини бир чеккага сурис қўйди-да, Григорийга қаради.

Григорий ҳам иргиб сўридан турди ва шундоғ ҳам узун бўлган бурнини карам шўрва устига энгаштириб, кейин бошини орқага ташлади-да, олди-даги котелокни оёғи билан секин итариб тушириб юборди.

— Бу нима қилиқ? — деди Кокилдор мулојимлик билан.

— Нимага шундай қилғанимни пайқамадингми? Қара. Ё кўзинг кўрми? Бу нима? — деди Григорий оёғи остига тўкилган ювиндига ўхшаш шўрвани кўрсатиб.

— Ие-е!.. Қурт-ку!.. Вой онасини... Мен кўрмабман-а!.. Шуям овқат бўлди-ю. Бу шўрва эмас, угра. Угра ўрнига қурт солибдилар.

Ерда қип-қизил гўшт парчаси ёнида, шўрва ичида пишган ва шишиб кетган бўғин-бўғин оқ қуртлар чўзилишиб ётарди.

Кошевой негадир уларни:

— Бир, икки, уч, тўрт,—деб пичирлаб санаиди.

Бир лаҳза жимиб қолдилар. Григорий тишлари орасидан тупурди. Кошевой қилич яланғочлаб:

— Ҳозир карам шўрвани ҳисбга олиб, юзбоши олдига борамиз,—деди.

— Рост! Бу маъқул гап! — деб унинг гапини маъқуллади Кокилдор.

У шошиб-пишиб штикни бураб олиб қўйиб:

— Биз шўрвани кўтариб оборамиз, сен Гришка, орқамиздан юр, юзбошига рапорт берасан,— деди.

Кокилдор билан Мишка яланғочланган қиличларини елкаларига қўйиб, котелокларни штикка илиб жўнаб кетдилар. Григорий улар орқасидан юрди, ертўлалардан югуришиб чиққан кул ранг шинелли казаклар эгри-бугри траншеядан турна қатор тизилишиб бордилар

— Нима гап?

— Тревогами?

— Ё сулҳ тўғрисида бир гап борми?

— Нима деяпсан? Қанақа сулҳ? Сулҳмин-а? Но-тавон қўнгилга қўтирижомашов!

— Карам шўрвани ҳисб этдик!

Кокилдор билан Кошевой офицер ертўласи олдида тўхтадилар. Григорий энганишиб, чап қўли билан фуражкасини ушлаб, «тулки уясига» кирди.

Кокилдор орқасидан келиб туртиб юборган казакка ўғирилиб:

— Тиқилма, кўзингга қара,— деди жаҳл билан.

Юзбоши шинелининг тугмаларини солиб ичкаридан чиқди ва ҳайрон бўлиб, ертўладан энг кейин чиқсан Григорийга ташвишланиб қаради.

Командир казакларнинг бошлари устидан қараб:

— Нима гап, биродарлар?—деди.

Григорий унинг олдига ўтди, ҳамма жимиб қолгач:

— Маҳбусни олиб келдик, — деди.

— Қанақа маҳбус?

— Манави...— Григорий Кокилдорнинг оёғи осидаги бир котелок шўрвани кўрсатди. — Мана маҳбус. Бир ҳидлаб кўринг, казакларнингизни нима билан боқяптилар.

Унинг қошлари чимирилиб эгар бўлиб кетди, кейин титраб яна ўз ҳолига келди. Юзбоши Григорийнинг юзидаги ифодани диққат билан кўздан кечирди; кейин қовоғини солиб, котелока қаради.

— Қуртлаган гўшт билан боқишига ўтдилар! — деб қичқирди Кошевой зарда билан.

— Каптернамусни янгилаш керак!

— Аблаҳ.

— Семириб кетибди, чўчқа!

— Ўзига ҳамиша ҳўқиз буйрагидан шўрва писиртиради...

— Бизга бўлса қуртлаган гўшт беради,— дедилар олдиндаги казаклар.

Юзбоши,чувиллаган товушларнинг тинишини кутуб турди, сўнгра кескин овоз билан:

— Жим!—деди.— Товушингизни ўчиринг! Ҳамма гапни эшилдим. Каптернамусни бугун ҳайдаб, бошқасини тайнинлайман. Унинг ишларини текшириш учун комиссия белгилайман. Агар ярамас гўшт бўлса...

— Уни судга бериш керак!— деб бақиришди орқадагилар.

Юзбошининг товуши яна шовқин кўтарган оломон товуши ичида кўмилиб кетди.

Каптернамусни йўлга чиққанларидан кейин алмаштиришга тўғри келди. Фалаёнга келган казаклар «шўрвани ҳибсга олиб» уни юзбоши олдига олиб келганларидан кейин бир неча соат ўтгач, 12-нчи полк штаби позициядан жўнаб кетиш ва буйруққа илова қилинган маршрут бўйича поход тартиби билан Руминияга ҳаракат этиш тўғрисида буйруқ олди. Кечаси казакларнинг ўрнига Сибирь ўқчилари етиб келди. Ривинчи шаҳрида полк казаклари ўз отларини миниб олиб, шитоб билан Руминияга жўнаб кетдилар.

Кетма-кет мағлубиятга учраётган руминларга ёрдам учун йирик аскарий қисмлар юборилаётган эди. Бу нарса шундан маълум эдики, сафарнинг биринчи куни кечқурун маршрут жадвалига биноан тунаш лозим бўлган қишлоққа юборилган квартиерьлар¹ ҳеч квартира тополмай келарди: бу қишлоқни Руминия чегарасига қараб ҳаракат эттаётган пиёда аскарлар ва артиллерия ишғол қилган эди. Полк квартира олиш учун саккиз чақирим ортиқ йўл босишга мажбур бўлди.

Ун етти кун йўл юрдилар. Ем-хашак етишмаганидан отлар ориқлаб кетди. Уруш туфайли харобазорга айланган фронтга яқин ерларда ем-хашак йўқ; аҳоли Россия ичкарисига қараб қочган ёки ўрмонларда яшириниб ётарди; эшиклари ланг очиқ кулбаларнинг деворлари қорайиб кўринар, кимсасиз кўчаларда казаклар аҳён-аҳёнда энка-тинкаси чиққан биронта одамга дуч келар, у ҳам қуролли кишиларни кўриб, яширинишга ошиқарди. Тинмай йўл юриб чарчаган, совқотган ва ўзлари ҳамда отларининг қийналаётганидан ғазабланган казаклар уйларнинг похол билан ёпилган томларини очиб ташлашар; талон-торождан омон қолган қишлоқларда ем-хашак ўғирлашар, командирларнинг ҳар қандай дўқлари уларни ўзбошимча ўғирлик қилишдан тия олмас эди.

¹ Квартиерьер — сафарга чиққан ҳарбий қисмларга уйжой топиш учун юбориладиган ҳарбий хизматчилар. (Тарже).

Руминия чегарасига яқин бўлган тўқ бир қишлоқда Кокилдор бирорнинг омборидан бир пақир арна ўғирлади. Уй эгаси уни қўлга туширди, бироқ Кокилдор беозор, кекса бессарабияликни тутиб олиб урді ва арпани отига бериш учун олиб кетди. Взвод офицери отлар боғланган жойда унинг устидан чикиб қолди. Кокилдор тўрвани отнинг бошига илиб қўйиб, титроқ қўллари билан унинг ич-ичига кириб кетган биқинини силар, атрофида айланиб юрар ва худди одамнинг кўзига қарагандек, унинг кўзларига қаради.

— Урюпин! Арпани қайтариб бер, итваҷча! Сен абраҳни шу қилиғинг учун отиб ташлайдилар, ахир!..

Кокилдор офицерга хўмрайиб хўнук қарашиб қилди ва фуражкасини ерга бир уриб, полкка келгандан бери биринчи марта ғазаб билан бақирди:

— Судга беринг! Отиб ташланг! Шу ердаёқ жонимни олинг, лекин арпани қайтариб бермайман!.. Нима, отим очидан ўлсинми? А? Арпани бермайман! Бир донасини ҳам бермайман!

У гоҳ бошини чангаллар, гоҳ очкўзлик билан ем ёяётган отнинг ёлини ушлар, гоҳ қиличига ёпишарди...

Офицер отнинг қоқ суюқ бўлиб қолган думғазасига қараб индамай туради, сўнгра у бош ирғаб қўйиб:

— Нега совумаган отга ем беряпсан?—деди.

Унинг овозидан хижолат бўлгани сезилиб турарди.

Кокилдор тўрвадан тўкилган арпа донларини кафтига йигиштириб олиб, уларни тўрвага ташлар экан, шивирлаб:

— Йўғ-е, от совуган,—деди.

* * *

Ноябрнинг бошларидаёқ полк позицияда эди. Трансильвания тоғларида шамол ўйнар, тоғ ораларини совуқ туман босган, муз билан қопланган қарагайлардан хушбўй ҳидлар келар эди. Биринчи ёққан қор устидаги ваҳший ҳайвонларнинг изи кўзга чалинарди: урушдан чўчиб кетган бўрилар, буғулар,

ёввойиц тақалар.. ўзларининг уигурларини ташлаб, мамлақат ичкарисига қараб қочмоқда эдилар.

7 ноябрда 12-чи полк «320» номерли тепани ишғол қилиш учун ҳужумга ўтди. Бир кун илгари окопларда австрияликлар ётар эдилар, ҳужум куни эса яқиндагина француз фронтидан келтирилган саксонияликлар уларнинг ўринларини ишғол этдилар. Казаклар пиёда бўлиб сафга тизилиб, устига оз-моз қор ёқсан тошлоқ ёнбағирдан кетмоқда эдилар. Оёқ остидан музлаб қотиб қолган тош парчалари пастга тушиб турар, қор тўзони кўтарилар эди. Григорий Кокилдор билан ёнма-ён борар ва айбдор кишидек қаттиқ уялиб:

— Негадир бугун юрагим пўкиллаяпти... Гўё биринчи марта урушга кираётгандек,— деди кулимсираб.

— Йўғ-е,—деб ҳайрон қолди Кокилдор.

У ишқалаб тозаланган винтовкасининг қайишидан ушлаб борар, мўйловидан осилиб тушган сумалакларни яларди. Казаклар қинғир-қийшиқ саф билан ўт очмай тоққа тирмасиб чиқмоқда эдилар. Чўққидаги душман окопларида даҳшатли бир сукунат ҳукм сурарди. У ерда, қияликнинг нари ёғида, немис окопларида изғириндан юзи қизариб, кетган, бурунлари пўст ташлаган саксониялик бир офицер бутун гавдаси билан орқасига ўгирилиб, солдатларга кулиб туриб қаттиқ-қаттиқ галиради:

— Kameraden! Wir haben die Blaumäntel oft genug gerdroschen! Da Nollen wir's auch diesen einpf esern was es heisst mit uns'n Huhn chen zu rupfen! Ausharren! Senieset noch nischlo!

Казак бўлинмалари ёпирилиб борар, оёқлари остидан пастга тош арада тупроқ тўкиларди. Григорий сарғайиб кетган бошлигининг учини камарига қистириб, асабий ҳолда кулимсиради. Қоп-қора соқолига аллақачондан бери устара тегмаган, озиб кетган юzlари, чўмичдай бурни сарғайиб кўкариб

¹ Дўстлар! Биз кўк шинелларни неча марта лаб дўппослаганмиз! Келинг, буларга ҳам ўзимизнинг ким эканлигимизни кўрса, тиб қўяйлик. Сабр, қилин, туринг. Ҳозирча ўқ отманг! (Нем.)

кетган, қиғов босган қошлари остидан қоп-қора кўмирдай кўзлари йилт-йилт қилиб турарди. У ҳар вақтдагидек хотиржам эмасди. Кутилмаганда юрагига тушган фулғулани енгишга уриниб, четларини қор бостан окопларга кўзларини қисиб қараб, Қокилдорга дер эди:

— Товуш чиқаришмайди-я. Яқин келсин деяптилар. Юрагим орқамга тортиб кетяпти, менда уят ҳам қолмади... Ҳозир орқамга бурилиб, жуфтакни тўғриласам нима бўларкан-а?

— Нима деб вақиллаяпсан ўзинг?—деди Қокилдор жаҳл билан.—Бу, азизим, қимордек бир нарса, ўзингга ишонмасанг—бошингдан айриласан. Юзинг сарғайиб кетибди-я, Гришка... Ё сен бетобсан, ёинки... шу бугун ўқ еб ўласан. Қара! Кўряпсанми?

Қисқа шинелли, каскаси наизали бир немис окоплар устига чиқди-да, кўз юмиб очгунча яна тушиб кетди.

Григорийнинг сўл томонида кетаётган Еланская станицалик чиройли малла соч казак, дам ўнг қўлидаги қўлқопини ечар, дам кийиб олар эди. У тинмай шу ҳаракатни такрорлар, тиззаларини зўрга букиб, апил-тапил қадам ташлар ва жўрттага қаттиқ-қаттиқ йўталарди. «Гўё қоронги кечада битта ўзи кетяпти-ю... ўзинга далда бериш учун зўрма-зўраки йўталяпти» деб ўйлади Григорий. Бу казакнинг нарғида урядник Максаевнинг сепкил тошган башараси қўринар, унинг ёнида штикининг уни қайрилиб қолган милтигини маҳкам чанглаб олган Емельян Грошев борар эди. Григорий Емельяннинг бир неча кун илгари походда шу штик билан бир омборхонанинг қулфини очиб, руминнинг бир қоп жўхорисини ўғирлаганини эслади. Максаевнинг ёнгинасида Кошевой Мишка борарди. У ютоқиб тамаки чекар, тез-тез бурнини қоқиб, бармоқларини шинелининг чап этағига артарди.

— Сув ичгим кеп қолди,—деди Максаев.

— Емельян, оёғимни этигим сиқяпти. Юришга қўймаяпти,—деб зорланди Мишка Кошевой.

Грошев жаҳл билан унинг гапини бўлиб:

— Шу пайда этигингни гапирасанми? Ўзингга

ҳазир бўлсанг-чи, ҳозир немис пулемётидан ўқ ёғдиради, — деди.

Биринчи залпдан кейиноқ Григорий ўқ еб, «оҳ» деб йиқилди. У ярадор қўлини боғлаб олмоқчи бўлиб, бинт солинган сумкасига қўл чўзмоқчи эди, аммо тирсагидан тирқираб енги ичига қайноқ қок оқаётганини сезди-ю, мадори қуриб кетди. Ёнбошлаб олиб, оғирлашган бошини төш панасига яшириб, қуруқшаган тили билан момиқдай қорни ялади. У титраган лаблари билан сочилиб турган юмшоқ қорни илиб оғзига олар, ўқларнинг кескин визиллашини, ҳамма ёқни тутиб кетган милтиқ овозларини эшитиб титраб кетарди. Бошини сал кўтариб, ўз сотнясидаги казакларнинг пастга қараб қочиб тушаётгандарини, сирпаниб, йиқилиб, орқаларига ва осмонга қаратиб пала-партиш ўқ узаётгандарини кўрди. Ҳеч нарса билан изоҳ қилиб бўлмайдиган сабабсиз бир қўрқув уни сакраб туришга ва пастликка, полк ҳужум бошлаган кунгирадор қарағайзорга қараб қочишга мажбур қилди. Григорий ярадор бўлган взвод офицерини судраб олиб кетаётган Емельян Грошевдан ўзиб кетди. Грошев уни тикка ёнбағирдан чоптириб олиб тушаётган эди; юзбоши маст кишидек гандираклаб чопар ва баъзан Грошевнинг елкасига суюниб, лахта-лахта қора қон қусарди. Казак сотнялар ўрмонга қараб сел каби оқиб тушмоқда эдилар. Ўқ еб ўлган казакларнинг кул ранг мурдалари бўз ранг ёнбағирда қолиб кетди. Етаклаб олиб кетишининг имкони бўлмаган ярадорлар ўзлари судралиб тушмоқда эдилар. Уларнинг орқаларидан пулемётлар ўқ ёғдиради эди.

Сидирғасига кетма-кет отилаётган ўқларнинг овэзи эшитиларди: пақ-пақ-пақ!

Григорий Мишка Кошевойнинг қўлига суюниб ўрмонга кирди. Ўрмон ёқасидаги қияликка ўқлар тегиб сакраб кетарди. Немисларнинг чап қанотдаги окогларидан пулемёт тариллатиб ўт очди. Гўё янги қотган муз устига кучли қўл билан отилган тош сакраб-сакраб, тарақлаб кетаётгандага ўхшарди.

«Тақ-тақ-тарақ-тарақ...»

Кокилдор гўё севингандек:

— Ўқниям устимизга дўлдек ёғидирдилар да, деб шанғиллади.

Қаҳва ранг қарағай дарахтининг танасига суюниб туриб у окоплар устидан чопиб ўтаётган немисларга шошмай ўқ узарди.

— Аҳмоқларнинг адабини бериш керак! Адабини!— деб бўғилиб гапирди Кошевой Григорийдан, қўлинин тортиб олиб.— Қанжиқ ҳалқ! Итдан ҳам баттар! Қора қонига беланганидан кейингина нега бошига тушираётганларини англаб, кўзи очилади.

— Нима деяпсан ўзинг?— деб сўради Кокилдор кўзларини қисиб туриб.

— Ақлли одам ўзи тушуниб олади, аҳмоқ эса... аҳмоққа нима? Миясига муштимлаб урсанг ҳам тушунмайди.

— Қасам ичганинг эсингдами? Онт ичганимисан, ёки йўқ?— деб тирғилди Кокилдор.

Кошевой жавоб қилмай, тиз чўкиб олиб, титраган қўллари билан ердан бир ҳовуч қор олди ва йўталади, дилдираб очкўзлик билан уни юта бошлиди.

V

Татарск хуторининг ён томонидан олачалпоқ булатлар орасидан кузги офтоб мўралаб турарди. Осмонда аста эсган шамол булутларни ҳайдаб, ғарб томонга суриб борар, хутор устида, Дон дарёсининг тўқ зангори водийси устида, яйдоқ ўрмонзор тепасида шамол зўрайиб, сандиптоллар ва теракларни ерга эгар, Дон сувларини чайқалтирап, хазонларни кўчаларда чирпирак қилиб учирарди. Христоня уйиб қўйган буғдойпоя ғарамини шамол тўзитиб, устидаги пояларни учирарди, ингичка ходачани тушириб юборди, худди санчиққа илгандай бир боғча келадиган олтиндек буғдойпояни ҳовли устидан учирарди, кўчада чирпирак қилиб айлантириб, кейин кимсасиз йўлни тўлдириб сочиб ташлади-да, тўзғиган чўкиртакларни Степан Астаховнинг томига келтириб ташлади. Христонянинг хотини бош яланг ҳолда,

ҳовлига югуриб чиқдай, юбкасини тиззалари орасига қисиб олиб, шамолнинг ғарам устида қандай бебошлиқ қилаётганига қараб турди-да, кейин яна ичкарига қириб кетди.

Уч йил давом этган уруш хутор хўжалигига анча таъсир кўрсатди. Эркаклар қолмаган қўраларда омборлар ланг очилиб, ҳовлилар нураб қолган, астасекин вайрон бўлиб, хунук из қолдирган эди. Християнинг хотини тўққиз яшар ўғли билан рўзгор тебратиб қолди; Аникушканинг аёли рўзгорига ҳеч қарамай қўйди, тул хотиндек ўзига ҳадеб зеб бера бошлади: юзини қизартирас, пардоз-андоз қилас, каттароқ эркаклар топилмаганидан ўн тўрт яшар бојалар ва ундан каттароқларини уйига чорларди, чаплаб қорамой суртилган тахта дарвоза ва унда қолган шармисор излар бунинг аниқ шоҳиди эди. Степан Астаховнинг қўраси кимсасиз қолган, уй эгаси кетар олдида деразаларга тахта михлаб кетган, томларнинг баъзи жойлари ўпирилиб устида қариқиз ўтлар ўсиб чиқкан, эшикларнинг қулфлари занглаб қолтан, шўра босиб кетган ҳовлининг очиқ дарвозасидан адашган моллар иссиқдан, қор-ёмғирдан жонсақлаш учун ҳар вақт ўзини шу ерга уради. Иван Томилин хатасининг бир ён девори кўчага қулаб тушган, хатасини ерга кўмилган учи айри тиргович суюб туарар, бу манзара немис ва рус уйларини вайрон килган тўпчи Ивандан гўё тақдир қасд олаётгандек бўларди.

Хуторнинг бутун кўча-ю тор кўчалари худди ана шу зайлда эди. Хуторнинг оёқ томонида Гантелей Прокофьевичнинг қўраси аввалгича ўз тахлитини сақлаб бутунлигича турарди. Аммо қўранинг ҳамма жойи ҳам шундай эмасди. Омбор томи устидаги тўнука хўрор занглаб қулаб тушган, омбор қаққайиб қолган, синчиклаб қаралса, хўжаликда баъзи бир парокандаликларни пайқаш мумкин эди. Чолнинг қўли қисқалик қиласди. Экин-тикин камайиб кетди, бошқасини гапириб ўтираса ҳам бўлади. Аммо Мелеховларнинг оила аъзоси камаймади: фронтларда тентираб юрган Петр билан Григорийнинг ўрнига Наталья ўтган йил куз бошида эгизак

туғди, у бирданига ўғил ва қиз туғиб қайнатаси билан қайнанасининг кўнглини топди. Наталья ҳомиласи-ни оғир кўтарди. Баъзан дард қийнаганидан кун бўйи юролмас, ижирғаниб, оёғини судраб босар, аммо дардга чидарди, унинг қорайиб, ориқлаб кетган очиқ чеҳрасида дард асари ҳеч қачон акс этмасди. Оёғи жуда толиқсан маҳалларда чакка-ларини маржондек тер босарди; Ильинична шунда нима гаплигини билиб, бош чайқарди-ю:

— Ётсанг-чи, ер ютгур! Нега мунча ўзингни уринтирасан,— деб жеркиб берарди.

Сентябрнинг чарақлаган кунларининг бирида Наталья ой-куни яқинлашганини билиб, кўчага чиқаёт-ганида қайнанаси:

— Қаёққа?— деб сўраб қолди.

— Ўтлоққа бориб, молларни бир қараб келай.

Наталья шошиб-пишиб хутордан чиқди-да, атро-фига аланглаб қорнини остидан чанглаб, баланд ўсган буталар орасига кириб ётди. У орқа кўчадан уйга қайтганда қош қорайган эди. Мата фартугига эгизак болаларини ўраб келди.

— Айланай, нима қилганинг бу?.. Қаердайдинг, яшшамагур,— деб тўнфиллади Ильинична.

— Юзим чидамаганидан чиқиб кетдим... Отамдан уялдим... Ўзим ҳам ювиниб олдим, уларни ҳам чўмилтирдим... Мана олинг...— Бўзариб кетган Наталья ўзини оқламоқчи бўлди.

Дуняшка ғизиллаганча доя хотин олиб келгани кетди. Дарья довдираб қолиб, ғалвир опкелди. Ильинична эса дам кулиб, дам йиғлаб:

— Дашка, ғалвирингни қўйсанг-чи, улар мушук боласи эмас-ку, ғалвирга солмоқчи бўласан-а? Ёли-рим, иккита-я! Вой худойим-е, биттаси ўғил-а!.. Натальюшка!.. Урин соберсаларинг-чи!..— дерди.

Пантелеј Прокофьевич келини эгизак түққанини ҳовлида туриб эшишиб, ҳайрон қолганидан қўллари-ни кериб қўйди, сўнгра суюнганидан соқолини чим-диг кўз ёши қилди ва ҳеч нарсадан ҳеч нарса йўқ, кириб келган доя хотинга ўшқирди. У тирноғи ўсган панжасини кампирнинг тумшуғи остида ўйна-тиб ўдағайлади:

— Ҳой, парихон! Мелеховнинг зурриёти қўримайди! Келиним бир казаквачча билан бир қиз туғиб берди. Келинмисан келин-да! Ё худойим-э! Мунақа марҳамати учун келинга ҳарна қилсам кам.

Ўша йили баракали йил бўлди: сигири эгизак туғди. Михаил байрами кунида совлиқлар қўшалоқ-қўшалоқ туғиб берди. Эчкилар... Пантелей Про-кофьевич бу аҳволга ҳайрон бўлиб, ўз-ўзича дер эди: «Бу йил омадли келди, баракали! Биримиз икки бўляпти. Қўзи, бузоқлар кўпайяпти!»

Наталья болаларини бир йил эмизди, сентябрда уларни ажратди, аммо кеч кузгача ўзига келолмади. Юзи ориқлаб кетганидан кўзлари катта-катта бўлиб, оппоқ тишлари саналиб қолган эди. Бутун вақтини болаларига бағишилар, ўзига қарашга қўли тегмас, уй ишларидан бўшаган вақтини уларга сарфларди: идиш-товоқ ювар, кир чайқар, тўқир, ямар, кўпинча каравот устидан осилиб, беланчакдан болаларини олар ва елкасини қимирлатиб, кенг кўйлаги остидаги тирсиллаган, ҳар қайсиси қовундай келадиган кўкракларини чиқариб, бирданига икки боласини эмизарди.

— Болаларинг сени сўриб тамом қилдилар-ку! Ҳадеб эмизганинг-эмизган!— деб Ильинична невараларининг қат-қат бўлиб кетган биққа оёқларига се-кин шапатилаб қўярди.

— Эмизавер! Сутингни аяма! Нима, сутингни йиғиб қаймоқ қиласмидинг!— дерди Пантелей Про-кофьевич қўпол қилиб, болаларга ачингандай.

Бу йил тошқин Дон дарёсининг суви пасайган-дек, турмуш ҳам орқага кетди. Кунлар зериктирадиган, толиқтирадиган тарзда иш ва муҳтоҷликда бирин-кетин сезилмай ўтар, хурсандлик оз, урушда юрганларнинг ташвиши билан ўтарди. Петр билан Григорийдан, ҳаракатдаги армиядан фижимланган ва почта муҳрлари урилган кир конвертларда кела-диган хатлар сийраклашиб қолди. Григорийнинг сўнгги ёзган хати аллакимларнинг қўлидан ўтиб келганга ўхшарди: хатнинг ярми кўк сиёҳ билан яхшилаб бўялган, кул ранг қоғоз чеккасига сиёҳ билан номаълум белгилар қўйилган эди. Петро Гри-

горийга қараганда тез-тез хат ёзиб туарар ва Дарьяниг исмига ёзган мақтубларида, шўхликни ташлашни илтимос қилар, таҳдид этар эди,— афтидан, хотинининг суюқ оёқлиги тўғрисидаги гаплар унинг қулоғига бориб етган бўлса керак. Григорий эса хат билан бирга уйга моянаси ва «медаль» пулини юбориб туарар, отпуска олганда келиб кетишни ваъда қилса ҳам, негадир дараги йўқ эди. Ака-уканинг йўли икки ёққа ажралиб кетган: уруш Григорийнинг қаддини камон қилган, юзининг қизилини кетгизган, сарғайтириб юборган эди, урушнинг охиригача ўзининг омой қолишига кўзи етмасди. Петронинг эса мартабаси ошиб борарди, у ўн олтинчи йилнинг кузида вахмистрлик мансабига эришди, юзбошига лаганбардорлик қилиб, икки крест олди, ёзган хатларида ўзининг офицерлар мактабига юбортириш учун ҳаракат қилаётганини билдириди. Ёзда отпускага келган Аникушкадан уйига бир немис каскаси, шинели ва ўзининг фотосуратини юборди. Кул ранг картон парчасидан унинг кексайган мағрур сиймоси, учлари буралган малла мўйловлари кўзга ташланар, қанқайган бурни остидаги қалин лаблари қадимгидай иштшайиб туарди. Ҳаёт Петрога кулиб боқар, уруш эса унинг олдида порлоқ бир истиқбол очар эди: ёшлигидан мол орқасида юриб катта бўлган бу оддий казак офицерликка эришиб, яхши ҳаёт кечиришни бир вақтлар хаёлига ҳам келтирмасди. Аммо уруш олови гур этиб ёнгандан кейин унинг қонли шафақ нурида келажакдаги эркин ҳаёт манзараси аниқ намоён бўла бошлади.. фақат Петронинг ҳаётида бир нарса кўнглини ғаш қиласди: хоторда унинг хотини тўғрисида хунук гаплар юради. Степлан Астахов шу йил кузда отпускага борган ва полка қайтиб келгандан кейин ўз бўлинмасидаги казаклар олдида, Петронинг хотини билан маза қилиб қун кечирганини айтиб мақтанган эди. Петро ўртоқларининг гапини эшитаркан қулоқларига ишонмас, қизариб-бўзариб, тиржайиб:

— Степка ёлғон айтади! Гришканинг қасдини мендан оляпти,— дер эди.

Аммо бир куни Степан, тасодифанми, қасдданми,

хуалас, ертўладан чиқар экан, гул солиб тикилган дастрўмолини тушириб юборди; Петро унинг орқасидан келаётган эди у четига тўр тикилган гулдор дастрўмолни ердан олиб, хотининиң қўл хунарини таниди. Петро билан Степан орасидаги адоват яна кучайиб, аламларини кўнгилларига тугиб қўйишиди. Петро пайт пойлаб юрди, ажал Степанинг лайига тушган эди,— Фарбий Двина соҳилида у миасидан Петронинг ўқини еб ўлиши турган гап эди. Аммо кўп ўтмай, нимаям бўлди-ю, Степан ўз ихтиёри билан немис чегара соқчиларини «овлаш» учун кетиб, қайтиб келмади, унга ҳамроҳ бўлиб борган казакларнинг айтишича, уларнинг сим тўсиқларни қирқаётгандарини гўё немис соқчиси эшитиб қолиб, граната отган эмиш; казаклар тўсиқни ёриб ўтишибди, Степан бир мушт уриб, соқчини қулатибди, аммо соқчининг ёрдамчиси ўқ узиб, Степанинг тишишибди. Казаклар соқчи ёрдамчисига найза тиқиб ўлдиришибди, Степанинг қўроғонидай оғир муштини еб ҳушидан кетган немисни судраб опкетишибди, Степанин ҳам кўтариб олиб кетмоқчи бўлышган экан, оғирлик қипти,— ташлаб кетишга тўғри кепти. Ярадор Степан: «Оғайнilar! Мени ҳалок ётманг! Оғайнilar! Нега мени ташлаб кетяпсиз?..» деб ялинибди, аммо шу вақтда сим тўсиқ устига немислар пулемёт ўқи ёғдирибди, казаклар эмаклаб қочишишибди. «Ҳамқишлоқлар! Оғайнilar!» деб қичқирибди улар орқасидан Степан, аммо ҳар кимнинг жони ўзига ширин,— улар ўзларини қутқаришга ҳаракат қилишишибди. Петро Степан тўғрисидаги шу гапни эшитиб, енгил тортди, гўё зирқираб оғриётган ярасига малҳам қўйилгандай бўлди, аммо шундай бўлса ҳамики, «Отпускага борганимда Даշканинг қонини ичмасам, Степан эмасман, соғ қўймайман...» деб ўйлаб, хотинини ўлдирмоқчи бўлди-ю, лекин «У газандани ўлдирсам бутун умрам ҳазон бўлади, турмада чирийман, ҳамма меҳнатларим зое кетади, ҳамма нарсадан маҳрум бўламан...» деб ўйлаб дарҳол бу фикридан қайтди. У хотинини шундай дўп-послашга қарор бердики, эсидан чиқмайдиган, иккинчи бор қийпангламайдиган бўлсин: «Газандани

уриб кўзини кўр қиласман, ўшанда унга ҳеч ким-кинг ҳаваси келмайдиган бўлади». Қирғозлари тик тушган Фарбий Двина яқинидаги окопда ўтирган Петронинг хаёлидан шу фикрлар кечарди.

Куз дараҳтлар ва ўтларни сарғайтирди, субҳидамнинг салқини ўланларни сўлдирди, ер бағри соғуди, куз кечалари қоронғи, узоқ. Казаклар окопларда навбатма-навбат туарар, иссиқ кийим талашиб вахмистрлар билан уришар, очин-тўқин яшар, лекин Фикр-хаёллари файзсиз Польша ерларидан узоқда бўлган Донда эди.

Дарья Мелехова эса шу куз эрсиз кечирган ҳаётининг ҳиссасини чиқармоқда эди. Покров байрами-винг биринчи куни Пантелей Прокофьевич ҳар вақтдагидек, ҳаммадан эрта уйғонди: ҳовлига чиқди-ю, бошини чанглаб қотиб қолди: Аллаким шўхлик қилиб, дарвозани илгагидан суғуриб олиб кўчанинг ўргасига кўндаланг қилиб ётқизиб қўйибди. Бу шармандагарчилик эди. Чол дарвозани дарҳол ўз жойига ўрнатди ва эргалабки нонуштадан кейиноқ Дарьяни ёзлик ошхонага чақирди. Чолнинг у билан нима тўғрисида гаплашгани номаълум қолди, аммо Дуняшка бир неча минутдан кейин Дарьянинг рўмоли елкасига тушган ҳолда ошхонадан чопиб чиққанини, соchlари тўзғиб, юм-юм йиглаётганини кўрди. У Дуняшканинг ёнидан ўтаётганда елкалари липлип учар, кўз ёши билан ювилган юзи ғазабнок, қайрилма қора қошлари пирпираб туарди.

— Шошма, ер юткур!.. Мен сенга кўрсатиб қўяди,— деб пичирларди унинг шишган лаблари.

Дарьянинг кофтаси орқа томонидан йиртилгач, оппоқ бадани мўматалоқ бўлгани кўриниб турарди. У этакларини ҳилпиратиб, зинапояга чопиб чиқдила, ўзини даҳлизга урди, ошхонадан эса дарғазаб бўлган Пантелей Прокофьевич йўл-йўлакай янги чарм тизгинни тўрт буклаб оқсанб чиқди.

Дуняшка отасининг хириллаган овозини эшитиб қолди:

— ...Сендеқ манжалақига бу ҳам оз! Мочағар!..

Оилада тартиб яна жорий қилинди. Бир неча кунгача Дарья қўйдек ювош бўлиб юрди, кечалари

ҳаммадан олдин ухлагани ётар, Натальянинг ачиниб қарашларига совуққина илжайиш билан жавоб қиласар, елкалари, қошларини учирив қўярди: «ҳечқиси йўқ, кўрамиз ҳали» дегандай бўларди. Орадан тўрт кун ўтгач, шундай бир ҳодиса бўлдики, буни Дарья билан Пантелей Прокофьевичдан бошқа ҳеч ким билмади. Шундан кейин Дарья керилиб, кулиб юрди, чол эса, кечаси ўрнини булғатиб чиққан боладек хижолат тортиб юрди; бўлган воқиа тўғрисида кампирга оғиз ҳам очмади, ҳатто черковда ўз гуноҳларига иқорор бўлиш маросимида бу воқиани ва ундан кейин кўнглига келган қабиҳ фикрларни поп Виссариондан ҳам яширди.

Воқиа шундан иборат эди. Покров байрамидан кейин Дарьянинг бутунлай тавба қилганига ишонган Пантелей Прокофьевич Ильиничага:

— Сен Даشكани жудаям пайпаслайверма! Кўпроқ ишга сол. Иш кўп бўлса, шўхлик қилишга вақти қолмайди, йўқса у семирган байталдай ўйноқлади... Унинг кўнгли кўчада, фикри ўйин-кулгида,— деди.

Шу мақсадда у Дарьяга ўрилган буғдой турадиган саройни супуртирди, орқа ҳовлидаги ўтиналарни тердириди, у билан бирга сомонхонани тозалади. Кечкириб қолганда у шамол машинани омборхонадан сомонхонага киритиб қўймоқчи бўлиб, келинини чақирди:

— Дарья!

— Нима, дейсиз, ота?— деди у сомонхонадан туриб.

— Бу ёққа чиқ, шамол машинани киритиб қўямиз.

Дарья рўмолини тўғрилаб, кофтасининг ёқасидан тушган сомонни қоқиб, сомонхона эшигидан чиқдида, ўрилган буғдой турадиган сарой эшигидан ўтиб, омборхонага қараб юрди. Қалта пахталик куртка ва йиртиқ чолвар кийган Пантелей Прокофьевич унинг олдига тушиб оқсанб кетаверди. Омборхона кимсасиз эди. Дуняша онаси билан кузда қирқилган юнгни йигиришар, Наталья эса хамир қорар эди. Хутор орқасида қип-қизариб ботган қуёшнинг акси

түшио турар, кечки йбодатға черковдә жөм ғалинарди. Тип-тиниқ осмонда, қоқ тепада түқ қизил булут парчаси ҳаракатсиз турар, Доннинг нариги томонидаги оқ теракларнинг яланғоч шохларида қузғунлағ қораялоқдек тизилишиб қўниб ўтиради. Шоми ғаррибон сукунатида тиқ этган товуш жаранглаб эши-тиларди. Молхонадан бўрсиган гўнг ва пичанинг оғир ҳиди келиб турарди. Пантелей Прокофьевич инқиллаб, Дарья билан бирга тўқ сариқ рангга бўялган, бўёғи кўчган шамол машинани сомонхонага киритиб қўйиб, уни бурчакка жойлаштириди, машинадан тўқилган сомонни паншаха билан бир чеккага суриб, чиқиб кетмоқчи бўлиб турган ҳам эдики, Дарья шивирлаб:

— Ота,— деб чақириб қолди.

Чол, ҳеч нарсадан шубҳаланмай, шамол машина орқасига ўтиб:

— Нима дейсан?— деб сўради.

Ёқасининг кофтаси очилган Дарья қайнатасига қараб турар, қўлларини гарданига қўйиб, соchlарини тўғрилар эди. Сомонхона тўйнуғидан унинг устига ботган қуёшнинг қип-қизил шуъласи тушиб турарди.

— Мана бу еримда, ота, бир нарса ғимирлаётганга ўхшайди. Яқинроқ келиб қара,— деди у бир ёнга қийшайиб ва қайнатасининг елкаси оша ланг очиқ эшикка яширинча назар ташлаб.

Чол унга яқин келганда, Дарья бирдан қўлларини очиб юборди-ю, қайнатасининг бўйнидан қучоқлаб, бармоқларини бир-бирига бириклириб олди-да, тисланиб уни бир бурчакка торта бошлади:

— Мана, бу ёққа, ога... у ер юмшоққина экан...— деб шивирлади.

— Сенга нима бўлди?— деб сўради қўрқиб кетган Пантелей Прокофьевич.

У бош чайқаб бўйнини Дарьянинг қўлидан чиқариб олмоқчи бўлди, лекин Дарья унинг бошини қаттиқроқ тортиб ўз юзига яқинлаштириди, кулимсираб бир нималар деб шивирлади, унинг соқолига қайноқ нафаси келиб тегди.

— Кўйвор, мочагар!— деб чол ижирғанди, шу

топда қелинининг тирсиллаган қорни яқинлашғанини сезди.

Дарья уни қучоқлаб олиб, орқаси билан йиқилди, чол унинг устига чиқиб қолди.

— Жин ургур! Кутурдингми!.. Қўйвор!

— Кўнглинг тиламайдими?— деб сўради Дарья ҳарсиллаб, сўнгра қўлларини очиб юборди-да, қайнатасининг кўкрагидан итариб деди.— Шу ишга тобинг йўқми? Ёинки қўлингдан келмайдими?.. Ундоғ бўлса, сен мени айбситма!.. Эшитяпсанми?

Дарья ирғиб ўрнидан турди-ю, шошиб-пишиб юбасини тузатди, орқасидан сомон парчаларини қоқиб ташлади-да, ҳанг-манг бўлган Пантелеј Прокофьевичнинг бетига тикилиб туриб жилмайди:

— Анави куни мени нега дўппосладинг? Нима, мен кампирманми? Сен ўзинг ёшлигинда қандай бўлгансан? Эрим-ку, бир йилдан бери олдимда йўқ!.. Ахир, мен нима қиласай, итга ётайми? Ма, сенга!.. Манавини ебсан!..

Дарья беадабона бир ҳаракат қилди ва қошларини ўйнатиб эшик томон юрди. Бўсағада у ўз уст-бошига синчиллаб қараб, кофтасини ва рўмолининг чангини қоқди-да, қайнатасига қарамасдан деди:

— Мен бусиз чираб туролмайман... Менга эркак одам керак, сенинг бу ишга тобинг бўлмаса, мен бошқасини топаман, сен тилингни қисиб юр!

У ликонглаб, тез-тез юриб хирмонхона эшиги олдигача борди-да, қайрилиб ҳам қарамай, кўздан гоийиб бўлди. Пантелеј Прокофьевич эса ҳамон тўқ сариқ шамол машинасининг ёнида қаққайганича турар, соқолининг учини оғзига тиқар ва ўзини йўқотиб қўйиб, айбдор кишидек сомонхона ичиға кўз югуртирас, серямоқ чорифининг учига қарап эди. «Наҳотки, гапи ўринли бўлса? Балки, мен у билан гуноҳ иш қилишим керакмиди?» деб ўйлади шу топда гангиб қолган чол саросимага тушиб.

VI

Ноябрда совуқ чирсиллата бошлади. Қор ҳам эрта тушди. Дон дарёси Татарск хуторининг юқори томонида бурилган жойи музлади. Аҳён-аҳёнда кўм-кўк

мўрт ях устидан баъзи одамлар нариги томонга ўтарди, пастки томонда эса дарё қирғоқларигина ғадир будур муз парчалари билан қопланган, сувнинг ўртасидаги кўм-кўк тўлқинлар кўпикланиб бир-бирини қувлаб оқиб борарди. Қора жарнинг рўпарасидаги ўпқонда, ўн бир саржин чуқурликда лақقا балиқлар, уларнинг бош томонида усти шилимшиқ билан қопланган зофора балиқлар қишлигани ётган, фақат кумуш балиқларгина Дон ичидан изғиб юрар, тўғонлар яқинида сула балиқлар бодрезак балиқ орқасидан қуввивб юрар эди. Стерлядъ балиғи қумлоқ жойларда қишлигани ётди. Балиқчилар қаттиқроқ совуқ тушибини кутар, сув музлаши биланоқ қилтансоқсиз балиқларни санчиқ билан илиб олишни мўлжаллар эдилар.

Ноябрда Мелеховлар Григорийдан бир мактуб олдилар. Кувинскдан, Руминиядан ёзган хатида у. биринчи жангдаёт ярадор бўлганини, ўқ чап қўлининг суюгини мажақлаганини, шу сабабдан уни ўз округига, яъни Қаменская станицасига даволаш учун юбораётгандарини билдирган эди. Шу хатдан кейин Мелеховлар бошига яна бошқа бир мушкул иш тушди; бундан бир ярим йил илгари Пантелей Прокофьевич пулга муҳтоҷ бўлиб, Сергей Платонович Моховдан вексель билан юз сўлкавой олган эди. Шу ёз чолни магазинга чақиртирилар. Атепин Цаца олтин пенснэсини қаншарига қўндириб, кўзойнак устидан Мелеховнинг соқолига қараб:

— Бу нима деган гап, Пантелей Прокофьевич, пулни берасанми, йўқми? — деб сўради.

Пантелей Проковьевич бўшаб қолган тахта токчаларга ва силлиқ бўлиб кетган дўкон пештахтасига кўз югуртириди-да, мижғовланиб:

— Сабр қилиб тур, Емельян Константинич, ўзими ни ўнглаб олай, тўлайман,— деди..

Гап шу билан тамом бўлди. Чол ўзини ўнглаб ололмади, ҳосил бўлмади, сотадиган ортиқча қорамоли йўқ эди. Кутмаганида хоторга суд пристави бало-қазодек етиб келди, қарздорни олдига чақиртириди-да:

— Юз сўлкавойни бу ёққа чўзиб қўй,— деди.

Пристав келиб тушган хонадаги столнинг устида узун қофоз ётар, унда худди шу сўзлар ёзилган эди.

И Ж Р О И Я В А Р А К А С И

БУЮК ИМПЕРАТОР ҲАЗРАТИ ОЛИЙЛАРИНИНГ фармонларига мувофиқ, мен, Донец округи 7-участка мировой судьяси, 1916 йил 27 октябрь куни мешчанин Сергей Платонович Можовнинг урядник Пантелей Мелеховга вексель бадалига берган 100 сўмини даъво қилиб берган шикоятини тинглаб ва Граждан Суди Уставининг 81, 100, 129, 133, 146-моддаларига амал қилиб, ғойибона ҳукм чиқараман:

Қарздор урядник Пантелеймон Прокофьевич Мелеховдан, даъвогар, яъни мешчанин Сергей Платонович Можов фойдасига, 1915 йил 21 июлда берилган вексель қофозига мувофиқ 100 сўм ҳамда суд харжи учун уч сўм ундирилсин. Қарор қатъий эмас, ғойибона ҳукм экани билдирилсин.

Бу ҳумм Граждан Суди Уставининг 156-моддаси 3-пунктига асосан қонун кучига кирган деб ҳисобланиб, дарҳол ижро этилишига тегишdir. Донец округи Мировой судьясининг 7-участка судьи ИМПЕРАТОР ҲАЗРАТ ОЛИЙЛАРИНИНГ фармонига мувофиқ амр этади: ушбу қарорга тааллуқли бўлган барча маҳкамалар, шахслар мазкурни ўз вақтида ижро этсинлар, маҳаллий идоралар ва полициячилар Приставнинг чиқарган ҳукмини ижро этувчиларга қонун доирасида дарҳол ёрдам кўргазсинлар.

Пантелей Прокофьевич приставнинг гапини эшишиб, уйга бориб келишга рухсат сўради, шу бугуноқ ақчани келтириб беришга ваъда берди. Пристав турган уйдан тўғри қудаси Коршуновникига жўнади. Майдонда бир қўли чўлтоқ Алёшка Шамилга тўқнаш келиб қолди.

— Ҳалиям оқсан юрибсанми, Прокофьевич? — деб у билан сўрашибди Шамиль.

— Ха, аста-секин...

— Узоққами?

— Кудамникига. Ишим бор.

— Э! Уларникида тўй. Эшитмадингми? Мирон Григоричнинг ўғли фронтдан келибди. Ўғли Митька келди деб айтишяпти.

— Ростдан-а?

Шамиль лунжини учиреб ва бир кўзини пирпиратб, тамаки халтасини олар экан Пантелей Григорьевичга яқинлашиб,— ҳа, шунақа бир гап эшитдим. Кел, тоға, тамаки чекишайлик! Қоғоз мендан, тамаки сендан,— деди.

Пантелей Прокофьевич тамаки чекар экан, борсаммикан, йўқмикан, деб иккиланиб турди-да, ниҳоят боришига жазм қилди ва Алёшка билан хайрлашиб, оқсай-оқсай юриб кетди.

Шамиль эса унинг орқасидан:

— Митъка ҳам крест олган! Сенинг ўғилларингдан қолишигиси келмайди. Энди бизнинг хоторимизда нишондорлар шундай кўпайдики, асти қўявер, bemaza қовуннинг уруғидан ҳам кўп,— деб шангиллади.

Пантелей Прокофьевич шошилмай юриб, хоторнинг нариги бошига етиб олди; Коршуновнинг уйидаги деразаларга қарай-қарай, дарвозаси ёнига келди. Қудасининг ўзи уни эшикда кутиб олди. Чол Коршуновнинг сепкил тошган юзи хурсандлигидан янги ювилган самовардай ярқиради, юзи тоза, чўтирилиги ҳам билинмай қолганди.

Мирон Григорьевич қудаси билан қўл бериб кўришар экан:

— Бизнинг суюниб қолганимизни эшитдингми?— деб сўради.

— Йўлда келаётганимда Алёшка Шамилдан эшитдим. Қуда, мен сенга бошқа бир иш билан...

— Ишингни қўйсанг-чи! Юр уйга, бизнинг паҳлавонни кўр. Ростини айтсам, биз хурсандчиликка қиттак ичиб олган эдик... Кампирим, яхши кунлар учун деб бир шиша ароқ олиб қўйган эди.

— Сен буни менга гапириб бермасанг ҳам бўлади, ичганингни узоқдан туриб пайқаган эдим,— деди Пантелей Прокофьевич кулиб ва қирра бурнининг каткларини кериб.

Мирон Григорьевич эшикни ланг очиб юбориб, меҳмонни ичкарига ташриф этди. Пантелей Прокофьевич остона ҳатлаб ичкарига кириши билан столнинг тўрида ўтирган Митъкага кўзи тушди.

— Мана, бизнинг қаҳрамон!— деб Гриша бобо кўз

ёши қилди-да, ўрнидан турган Митъканинг елкасига юзини қўйди.

— Хуш келибсан, эй казак!

Пантелей Прокофьевич Митканинг узун панжаси-ни ушлаб туриб, орқага бир қадам ташлади-да, ҳай-рон қолиб уни бошдан-оёқ кўздан кечирди.

— Нимага ағрайиб қолдинг, қудабува?— деб дў-риллади Митъка тиржайиб.

— Қараб, кўзларимга ишонмайман: Гришка икка-лангни хизматга жўнатганимда бола эдиларинг, Энди бўлса... Атаман полкига ярайдиган казак бўпсан!

Йиғлаб кўзлари қизарган Лукинична Митъкадан кўзини узмас эди, рюмкага қуяётган ароғи тошиб ер-га тўкила бошлади.

— Ҳай, бадбахт! Шундай қиммат баҳо нарсани ерга тўқяпсан-а!— деб жекириб берди унга Мирон Григорьевич.

— Сизнинг шодлигинги, Митрий Миронич сенинг эсон-омон етиб келганинг учун!— деб Пантелей Прокофьевич кўкиш кўз соққаларини филтиллатиб, кип-рикларини пирпиратиб, бақалоқ рюмкадаги ароқни нафас олмай симириди. У кафти билан эран-қаран лаблари ва мўйловларини артди, рюмканинг тагига кўз ташлади-да, бошини осмонга қаратиб, бир-икки томчи ароқни тишлари қорайган оғзига қўйди-да, шундан сўнггина нафасини чиқариб, бодрингни та-мадди қилди-ю, роҳатланиб, анчагача кўзларини Қи-сиб ўтириди. Қудабува унга иккинчи рюмкани тутди, шундан сўнг чол бирданига кулгили тарзда маст бў-либ қолди. Митъка унга қараб куларди. Унинг му-шукникига ўхшаган кўзларининг қорачиғи, гоҳ кўкиш тусга кирап, гоҳ кенгайиб қорайиб кетарди. Шу бир неча йил ичида у таниб бўлмайдиган даражада ўзгар-ган эди. Бу қора мўйлов казак бундан уч йил бурун ҳарбий хизматга жўнатилган хипча бел, қад-қомати келишган Митъкага сира ўхшамас эди. Унинг бўйи чўзилган, яғринлари кенгайган, семириб, бир оз бук-чайган эди, ўзиям беш пудча келарди, дағаллашган юзи, дўриллаган овози уни ўзидан катта одамга ўх-шатиб қўйган эди. Фақат кўзларигина аввалгидаӣ ўйнаб, олма-кесак териб турарди. Онаси дам қулиб,

дам йиғлаб, оппоқ кафти билан унинг калта қилиб олинган соchlарини ва энсиз, оппоқ пешонасини си-лар экан, унинг кўзларидан кўзларини ололмасди.

Пантелей Прокофьевич мастона кулиб:

— Нишондор бўлиб қайтдингми? — деб сўради.

— Казаклардан крест олмаган ким қолди? — деб қовоғини солди Митька.— Штабда лақиллаb юргани учун Крючковга учта крест бердилар-ку.

— Қудажон, бизнинг азамат жуда мағрур,— деб гапга аралашди Гришак бобо.— У шумтака менга тортган, бирор олдида бўйин эгмайди.

— Лекин бунинг учун крест бермайдилар-ку,— деб Пантелей Прокофьевич гап бошлаган эди, аммо Мирон Григорьевич унинг қўлидан ушлаб, меҳмонхонага олиб кирди-да, сандиқнинг устига ўтиргизиб сўради:

— Наталья билан неварааларинг қалай, соғ-саломат юрибдиларми? Ҳа, худога шукур! Сен, қуда, менинг олдимга бир иш билан келганингни айтган эдинг шекилли? Гапир, нима ишинг тушиб қолди? Айт, яна бир оз ичиб олсақ, кайфинг ошиб қолади.

— Пул бериб тур. Худо хайрингни берсин. Ҳожатимни чиқар, пул бўлмаса, ишим хароб.

Пантелей Прокофьевич маст кишиларга хос хокисорлик билан ялиниб-ёлворарди. Қудаси унинг гапини бўлди:

— Қанча керак?

— Юз қофоз.

— Қанақа қофоз? Қофоз деган ҳар хил бўлади.

— Юз сўлкавой.

— Шундоғ дегин-да.

Мирон Григорьевич сандигини кавлаб, ёғ босган рўмолнани олди-да, уни ечди; шалдира мағоз пулларни санаб, ўн «червон» ажратди.

— Раҳмат, қуда... мушкулимни осон қилдинг!

— Гапиришга арзимайди. Қўйиндан тўкилса, қўнжга!

Митька уйида беш кун турди; кечаларини Аникушканинг хотини ёнида ўтказар, ёлғиз хотин боши билан муҳтоҷликда яшаган, кўнгилчан бу содда хотинг ачинарди. Кундузлари қавми-қариндошлариникига меҳмон бўлиб борарди. Узун бўйли, бир қават юпқа

қаҳво ранг тужурка кийган бу йигит фуражкасини пешонаснга дол қўйиб, совуқ менга чўт эмас, дегандай хотор кўчаларида лапанглаб юргани юрган эди. Бир куни кеч кирган пайтда у Мелеховларникига келди. Яхшилаб ёқиб иситилган емакхонага ўзи билан бирга қор ҳиди ва солдатларга хос бурунни ёрадиган аччиқ бир ҳид олиб келди. Уруш тўғрисида, хотор янгиликлари тўғрисида гапиришиб ўтирида, япроқ сингари яшил кўзларини Дарьяга қисиб қўйиб, чиқиб кетишга ҳозирланди. Митькадан кўзини олмай ўтирган Дарья, Митька кета туриб эшикни қаттиқ ёпганда худди шам яллигидай лопиллаб кетди, ўрнидан турдида, лабларини қимтиб, елкасига рўмолини ташлади. Аммо Ильинична:

- Қаёққа?— деб сўраб қолди.
- Эшикка... ҳожатхонага.
- Юр, бирга борамиз.

Пантелеј Прокофьевич эса, уларнинг гапини эшитмаган кишидай, қуи солинган бошини кўтармай ўтиради. Дарья тулкиникидек айёrona кўзларининг ўтини киприклари остига яширида, унинг ёнидан ўтиб эшикдан чиқиб кетди; қайнанаси инқиллаб, лапанглаганича унинг орқасидан эргашди. Митька йўталиб, этигини ғарч-ғурч босиб, дарвоза олдида депсиниб, папиросини кафтига яшириб чекиб турарди. Эшик тарақ этиб очилиши билан у зинапоя томон қадам ташлаган ҳам эдики, Ильинична пичинг аралаш:

— Митькамисан, а? Нима бало, бегона ҳовлида эшикни тополмай адашиб қолдингми?— деб гап отди.— Дарвозани орқангдан яхшилаб ёпиб кет, танбаланиб қолсин, бўлмаса кечаси шамол очиб-ёпиб тарақлатади... Шамолни қара...

Митьканинг дами ичига тушиб, жаҳл аралаш йўталдида:

— Ҳеч-да, адашганим йўқ... дарвозангизни маҳкам ёпиб кетаман,— деди-ю, кўчанинг нариги бетидаги Аникушканинг ҳовлисига йўл олди.

Митька қуш каби эркин, ғамсиз ҳаёт кечираади: шу бугун тирик бўлганига шукур қилар, эртанинг ғамини емас эди. Хизматини такасалтанглик билан

ўтар, ботир юрагида қони қайнаб турган бўлса-да, хизмат кўрсатаман деб жон койитмасди,— аммо Митьканинг хизмат дафтарчасида аллақандай қўнгилсиз нарсалар ёзилган эди: Митька рус фуқароси бўлган бир поляк аёлни зўрлагани ва ўғирлик қилгани учун икки марта судланган, уч йиллик уруш мобайнида жазо устига жазо ва танбиҳ устига танбиҳ олган; бир вақт ҳарбий дала суди уни ҳатто отишга ҳукм қилишига андек қолган эди; аммо Митька полкда энг беобрў казаклардан бўлса-да, бошига тушгап кулфатлардан қутулиб кетиш йўлини ҳам биларди. Қазаклар уни шўх кулгилари ва шалоқ ашулалири, (бунаقا ашулаларга Митька чакэна уста эмасди), соддалиги ва ҳамма билан ўртоқлашиб кета бергани учун севар эдилар, офицерлар эса юлдузни бенарвон уриши учун яхши кўрардилар. Митька кулиб туриб, қашқирдек енгил қадам ташлаб юрар, қилиқлари ҳам бўриникига ўхшар эди: битта-битта қадам ташлаб, лапанглаб юрар, яшил кўзлари билан ер остидан қарар; агар бирор ёқса қараш керак бўлса, Митька бутун гавдаси билан айланиб қарар, ўқдан шикастланган бўйинни ҳеч қачон буриб қаролмас эди. Суяклари йўғон, гўштлари пайга айланиб кетган Митька салмоқдор, енгил ҳаракат қилар, ундан соғлом ва бақувват одамнинг ҳиди келиб турарди, омоч билан очилган бўз тупроқ ердан шундай ҳид келади. Митька учун ҳаёт мушкулсиз адил йўлга ўхшаб кўринар, унинг ҳаёти эгатга ўхшаб чўзилиб кетаверар, ўзи ҳам бу ҳаёт йўлидан тап тортмай юраверарди. Шунингдек, унинг ўй-хаёллари ҳам мураккаб эмас, жуда содда эди: оч қолсанг, ҳатто ўртоғингнинг нарсасини ўмариб кетсанг ҳам бўлаверади, дерди. Оч қолганда ўғирларди ҳам, этигинг дабдала бўлганда, асир немиснинг этигини ечиб олишдан осони йўқ; гуноҳ иш қилиб қўйганингда — уни ювиш керак, дарҳақиқат, Митька гуноҳини ювар эди: разведкага борар, немис соқчиларини хиппа бўғиб чалажон қилиб келтиради, энг хатарли ишларга жон деб борарди. 1915-нчи йили асир тушиб, роса калтак еб, қилич тегиб ярадор бўлган, кечаси омборхонанинг томини тирноқлари қонагунча сидириб очиб қочган, эсадлик учун эгар-

жабдуқни ўмариб кетган эди. Шу важдан ҳам Митьканинг кўп ишлари кечирилар эди.

Келганига олти кун бўлди деганда Мирон Григорьевич ўғлини Миллеровога олиб борди, уни вагонгача кузатиб қўйди, қутичага ўхашаш кўк вагонларнинг кетма-кет тарақлаб кетаётганига анчагача қулоқ солиб, қамчи дастаси билан платформадаги шлакни ковлаб, тиниб кетган кўзларини ердан узолмай турди. Лукинична ўғли учун кўз ёши тўкди. Гришак бобо иҳ-иҳлаб юрди, бурнини кафтига қоқиб, қўлини ёғи чиқсан чакмонининг этагига сидириб ташлади. Аникушканинг хотини ҳам фаркўз Митьканинг оташдек баданини эслаб хунибийрон бўлиб йиғлади, ундан юқтирган чакмазак касалидан қийналиб юрди.

Шамол отнинг ёлини ҳилпиратгандай замон ҳам кунларни бирин-кетин учирив кетаверди. Рождество арафасида бирданига ҳаво исиб кетди, бир кеча-кундуз ёмғир ёғди. Дон устидаги тоғлардан жарларга қутуриб сув оқди; қордан очилиб қолган дарё бўйларида бултурги ўтлар кўкариб қолди, харсанг тошлар устини баҳмал ўт қоплади. Доннинг қирғоқлари кўпикланар, мурдадек кўкарған музлар қаққайиб қолган, қори кетган қора тупроқ ерлар ниҳоятда хушбўй ҳид таратарди. Гетман катта йўлида бултурги арава изларида сувлар пуфак-пуфак бўлиб турарди. Хуторнинг орқасидаги жарлар ўпирилиб тупроғи очилиб қолган, жануб шамоли Чир дарёсидан чириган ўтларнинг ҳидларини келтирас, туш пайтида эса худди кўкламдаги сингари уфқда кўкиш майин соялар тебраниб турарди. Қишлоқда четан деворлар тагидаги култепалар ёнида кўлмак сувлар ҳосил бўлган. Фарамлар ёнидаги ерлар эриган, ўткинчиларнинг димоғига чириган сомон ҳиди келиб уриларди. Усти похол билан ёпилган томларнинг бўғотларидағи сумалаклардан сарғиш сув томиб туар, четанлар устида зағизгонлар тинмай сайрашар, Мирон Григорьевичнинг қўрасида қишлиб чиқсан қишлоқ буқаси эрта тушган баҳордан безовталаниб бўкирас, шохлари билан четан деворларни бузиб ташлар, қурт еган қаттиқ сўқага ишқаланаар, осилиб тушган майин кўкра-

гини силкитар, эриб, юмшаб қолган қорни туёклари билан тўзитарди.

Рождествонинг иккинчи куни Донда музлар ёрила бошлади, дарёнинг ўртасидан катта-катта музлар шувиллаб оқа бошлади. Худди уйқудаги катта балиқлар сингари муз палахсалари қирғоқча чиқиб қолди. Доннинг нарёғида, қаттиқ жануб шамоли чайқалтирган тераклар эгилиб ерга салом берар эди.

Уша ёқдан шовиллаган овозлар келарди.

Аммо кечаси тоғдан гувиллаган овоз келди, қарғалар ерда сакрашиб қағиллай бошлади, Христонянинг чўчқаси оғзида бир тутам похол билан Мелеховлар қўраси ёнидан физиллаганича ўтди. Пантелей Прокофьевич баҳор ҳам тугади, эртага совуқ тушади, деб ўйлади. Кечаси шамол йўлини ўзгартириб шарқдан эса бошлади. Кун исигандан ёрилиб кетган ҳалқобдаги музларни изғирип бир-бирига ямаштириди. Эрталабга бориб шамол Москва томондан эди, совуқ ачита бошлади. Яна қиш бошланди. Доннинг ўртасидагина, иссиқ кунлардан қолган нишонадек, яхлит оппоқ музлар сузип борарди, тепаликларда яланғочланган ерлар совуқдан буғ чиқараарди.

Рождестводан кейин кўп ўтмай, станица йиғинида мирза Пантелей Прокофьевичга, Каменскаяда Григорийни кўрганини, у тезда қайтаман, ота-онамга айтиб қўй, деб илтимос қилганини хабар қилди.

VII

Сергей Платонович Мохов сийрак йилтироқ жун босган кичкина қорача қўллари билан ҳаётни ҳар жиҳатдан пайпаслаб кўтарди. Ҳаёт баъзан у билан ўйнашар, баъзан эса сувга чўқкан одамнинг бўйнидаги оғир тошдек оғирлигини соларди. Сергей Платонович ўз умрида кўп нарсаларни бошидан кечирди, кўп машмашаларни кўрди. Бундан анча муқаддам, ғалла харид қилиш билан шуғулланганида, казакларнинг дон-дунини арzonгаровга сотиб олиб димиқтириб қўйган, сўнгра эса тўрт минг пуд куйган буғдойни хутордан ташқарига олиб чиқиб, Ёмонжарга тўкиб ташлаган эди. 1905 йил ҳам унинг эсида. Ўшанда куз

кези бир куни кечаси аллаким унга сочма ўқ отган эди. Шундай бўлса-да, Мохов кундан-кунга бойиб кетаверди, пировардида олтмиш минг жамгариб, уни Волга-Камск банкасига қўйди, аммо замон алғовдалғов бўлиши яқинлашаётганини ўткир фаросати билан ҳис этди. Қора кунларнинг тушишини сезган Сергей Платонович янгишмади: ўн еттинчи йил январда сил касалидан ўлим тўшагида ётган муаллим Баланда унга:

— Революция бурун остига яқин келиб қолди. Мен эсам, аҳмоқона ва анойи бир касалликдан ўлиб кетяпман. Алам қиласи, Сергей Платонович!.. Сизнинг бойлигинги зга торож келишини ва ўзингизни иссиққина уйчангиздан ҳайдаб чиқаришларини кўролмай доғда қоляпман, шуниси алам қиласи,— деб зорланди.

— Нимаси алам қиласи?

— Нимаси дейсизми? Ахир, билсангиз, ҳаммаси-нинг кули кўкка совурилгани кишини қувонтиради-да.

— Йўқ, азизим. Сен бугун ўлсанг ўлавер, мен эсам эртага ўларман,— деди Сергей Платонович зимдан ғижиниб.

Январь ойидаёқ Распутин ва подшо оиласи ҳақида пайтахтда юрган гапларнинг акс садоси хоторлар ва станицаларда ҳам айланиб қолди. Март ойининг бошида эса подшонинг ағдарилгани тўғрисидаги хабар Сергей Платоновичнинг бошига тўқмоқдек урилди. Тўнтариш ҳақидаги хабарларга казаклар ташвиш аралаш интизорлик билан қарадилар. Шу куни Моховнинг тақа-тақ берк дўкони олдида кечгача ёш-қараги казаклар уймалашиб қолди.

Сариқ мўйловли, кўзлари сал ғилай, барваста казак — хотор атамани Кирюшка Солдатовнинг (ўлдирилган Маницковнинг ўрнига қолган эди) жуда кайфи бузуқ эди, дўкон олдида қизиган гапларга аралашмасди, ғилай кўзлари билан казакларга қараб-қараб қўяр, гоҳо паришонхотир гап қиласарди:

— Ишларни расво қилишиди!.. Ана холос!.. Энди турмуш нима бўлди!..

Сергей Платонович деразадан қараб дўкон олдинга тўпланган халойиқни кўрди-да, чоллар билан гу-

рунглашмоқ учун гашқарига чиқишига қарор берди. Ёнуі пўстинини кийиб, оти ва фамилиясининг бош ҳарфлари кумуш хал билан кичкина қилиб ёзилган қаҳво ранг ҳассасига таяниб кўча дарвозасидан чиқди.

Дўкон томондан ғовур-ғувур овозлар эшитиларди.

— Хой, Платонич, сен саводхонсан, биз эсак, оми одамлармиз, қани айт-чи, энди нима бўлади, бошимизга нима ишлар тушади?— деб сўради Кашулин кўрқув аралаш кулимсираб. Унинг совқотган бурни жийирилиб кетди.

Сергей Платоновичнинг саломига жавобан қариялар ҳурмат юзасидан шапкаларини олдилар, ораларини очиб даврадан унга жой бердилар.

— Подшосиз яшаймиз...— деди Сергей Платонович дудмал қилиб.

Чоллар бараваригачувиллашди:

— Подшосиз қандай яшаб бўлади?

— Ота-боболаримиз подшолар замонида яшаган, келиб-келиб энди подшо керак бўлмай қолдими?

— Бошсиз тана яшай оладими?

— Энди қанақа ҳукумат келаркин?

— Платонич, торгинмай гапиравер! Бизга гапнинг очиғини айт... Нимадан қўрқасан?

— Эҳтимол, унинг ўзи ҳам ҳеч нарса билмас,— деди лоғчи Авдеевич илжайиб, шунда унинг қип-қизил юзидағи кулдирғичлари чуқурлашиб кетди.

Сергей Платонович ўзининг эскирган, чуқур резина калошига аграйиб қараб қолди-да, сўзлари ичини ёндираётгандек гапирди:

— Ҳукуматни давлат Думаси бошқаради. Бизнинг мамлакат республика бўлади.

— Онамизни кўрадиган бўпмиз!

Авдеич:

— Бизлар марҳум Александр Иккинчи замонларида хизматда бўлганимизда ..— деб гап бошлаган эди, аммо бадқовоқ чол Богатирев унинг гапини шартта бўлди:

— Эшитганмиз! Ҳозир гап бошқа нарса устида кетяпти.

— Бундан чиқди, казакларнинг куни битибди-да?

— Биз бу ерда бўйинтоблик қилсақ, немис қараб турмайди, Санкт-Петербурггача бориб етади.

— Модомики тенглилк бўлса, бизни мужиклар билан баравар қилиб қўяр эканлар-да.

— Қараб тур, ҳали еримизга ҳам қўл чўзадилар.

Сергей Платонович зўрма-зўраки кулиб, ташвишига тушиб қолган чолларга кўз югуртириди, юраги ғамғусса билан тўлди. Одат бўлиб қолган бир ҳаракат билан қизғиш соқолини икки ёққа ажратиб, кимгадир аччиқ қилиб гапира кетди:

— Мана, чоллар, кўрдингларми, Россияни қандай аҳволга солдилар. Сизларни мужиклар билан тенглаштирадилар, имтиёзларингиздан маҳрум этадилар, бунинг устига, эски адватларни ҳам эслайдилар. Оғир кунлар келяпти... Лекин ҳукуматнинг кимлар қўлига ўтишига ҳам боғлиқ, балки бизларни ҳалокат жарига итариб ташларлар.

— Бош омон бўлса, кўраверамиз!—Богатирев бош чайқаб қўйди, ўсиқ қошлари остидан Сергей Платоновичга ишончсизлик билан қаради.—Сен Платонич, ўз ғамингни ейсан, аммо бизга, эҳтимол, енгиллик бўлар.

— Сизга нима енгиллик бўлиши мумкин?—деб сўради Сергей Платонович заҳарханда қилиб.

— Янги ҳукумат урушни тугаллаши мумкин... Шундай бўлиши мумкини, а?

Сергей Платонович қўл силтаб қўйди-да, оёғини судраб ўзининг ям-яшил, серҳашам зинапояси томон кетди. У кетар экан, гоҳ пул, гоҳ тегирмон тўғрисида, гоҳ савдо-сотиқнинг касоддиги ҳақида ўйлар, Елизаветанинг Москвага келиб қолгани, Владимирнинг тез орада Новочеркаскдан қайтиб келиши эсига тушар эди. Болалари тўғрисида еган ғами бир-бирига боғланмаган безовта фикрларига халал бермасди. Шуларни ўйлаб у зинапоя олдигача келди, бир кун ичида ҳаёт шами бирдан хира бўлиб, ичини аччиқ фикрлар мушукдек тирнаётганини сезди. Тупугидан оғзи тахир бўлиб кетди. Сергей Платонович дўкон олдидаги чолларга қараб туриб, зинапоянинг ўймакор панжараси орасидан «туф» деб тупурди-да, пешайвондан шипиллаб ўтиб, ўз хонасига кириб кетди.

Анна Ивановна емакхонада эрига дуч келиб қолди, ўз одатича нурсиз кўзлари билан эрининг юзига бир назар ташлаб:

— Чой олдидан пича овқатланиб оласанми? — деб сўради.

— Йўғ-э! Шу маҳалда овқат ўтадими? — деб қўл силтади Сергей Платонович ижирғаниб.

Ечинар экан оғзининг тахир эканини боши ғовлаганини ва таъби хира эканини ҳис этди.

— Лизадан хат бор.

Анна Ивановна питир-питир қилиб, ётоқ бўлмасига кириб кетди-да, у ердан йиртилган конверт олиб чиқди (у эрга чиқиб, катта рўзгор бошига тушгандан бери шунаقا питирлаб юрадиган бўлиб қолган эди).

Сергей Платонович қалин конвертдан гуркираб келиб турган атири ҳидидан бурнини жийириб, биринчи дафъя қизи тўғрисида «енгилтак, эҳтимол, эси паст қиз» деб ўйлади. Чол ҳафсаласизлик билан қизининг хатини кўздан кечирди, негадир «кайфим» деган сўз устида тўхталиб, унинг замирида нима гап борлигини билмай, анчагача бош қотирди. Елизавета хатининг охирида пул юборишни сўраган эди. Ҳамон калласи ғовлаб турган Сергей Платонович сўнгги сатрларни ўқиди-да, тўсатдан ўтириб йиғлагиси келиб кетди. Остин-устун бўлиб кетган ҳаёт шу пайтда унга бемаъни нарсага ўхшаб кўринарди.

«Бу қиз — менга бегонадек,— деб ўйлади у Елизавета тўғрисида. Мен ҳам унга бегона. Пулга муҳтож бўлиб қолгандагина ота-она эсига тушибди... Мурдор қиз, хушторлари бор... Кичкиналигига сочлари сарғиш, бирам ширин қиз эдики... Вой худойим-э! Дунёда турланиб турмайдиган нарса йўқ-а!. Қариганда ҳам менга ақл кирмади, келажакда яхши умр кечираман деб ишондим, ваҳоланки кимсасиз ғарид одамман... Ҳаром-хариш пул ортдирдим, ҳалол йўл билан давлат ортдириб бўлармиди! Муттаҳамлик қилдим, қисдим, мана энди инқилоб бўлди, эртаниндин ўз югурдакларим мени уйимдан қувиб чиқарышлари турган гап... Ҳамманинг бошида шу ғалва бор!.. Болаларим-чи? Владимир фирт аҳмоқ... Ундан нима чиқарди? Борми-йўқми, менга барибир...»

Бир вақтлар тегирмонда бўлган воқиа bemavrid эсига тушиб кетди: тегирмонга дон олиб қелган бир казак, буғдой йирик тортилибди, деб тегирмон ҳақи тўлашдан бош тортди; у, яъни Сергей Платонович, шу вақтда машина бўлимиди эди, шовқин-суронни эши-тиб у ердан чиқди-да, нима гаплигини билиб, тароз-бонга ва тегирмончига, тортилган унни берманг деб буюрди. Муштдаккина, кўримсиз казак қопнинг оғзи-дан ушлаб ўз томонига тортар, кўкракдор, ғўлабир тегирмончи Завар ўз томонига тортарди. Нима бўл-ди-ю, казак тегирмончини туртиб юборди, у эса қу-ложкашлаб туриб, маҳкам қисилган зилдай муштуми билан казакнинг чаккасига туширди. Қазак йиқилиб тушди, кейин гандираклаб ўрнидан турди; сўл чак-каси шилиниб, қон сизиб турарди. У тўғри Сергей Платоновичнинг олдига келди-ю, жиғибийрони чиқиб:

— Заҳарингга унни ея қол! Сен тўй! — деб пичир-лади-да, чиқиб кетди, унинг елкалари қалт-қалт қилиб турарди.

Сергей Платонович ҳеч қандай муносабатсиз шу ҳодисани ва унинг оқибатини эслади: ўша пакана казакнинг хотини унни қайтариб беришни сўраб кел-ди; у зўрма-зўраки йиғлаб, ун тортувчиларнинг раҳ-мини келтириш учун:

— Яхшилар, бу нима деган гап-а? Бу қандай но-ҳақлиқ? Қайтариб бер унни! — деди.

— Бор, яхшиликча жўнаб қол, хола, бўлмаса со-чингни битталаб юлиб оламан! — деб кулди Завар.

Ўша паканагина казак сингари заиф, пакана бўл-ган тарозибон Валет, Завар билан муштлаша кетди, бу ёқимсиз манзара кишининг ғашини келтиради. Роса қалтак еган Валет, жавобимни беринг, деб ту-риб олди. Сергей Платонович тўғрига қараб, ўқиб бўлган хатни буклар экан, шу хотиралар унинг мия-сидан лип этиб ўтди. Шу бугунги ҳодисалар унинг юрагини ҳасрат-надомат билан тўлдирди. Сергей Платонович кечаси тинч ухлаёлмади, биридан бири бемаъни фикрлар ва ушалмас орзулас миясига ке-либ, у ёнбошидан бу ёнбошига ағанаб чиқди; ярим кечага бориб кўзи илинди, эрталаб эса, фронтдан Ягодноега, отасининг олдига Евгений Листницкий

келганини эшитди-да, гапириб, юрагининг чигилларини ечиш ва ҳақиқий аҳволни билиб олиш учун у ерга боришга жазм қилди. Емельян, трубкасини чекиб туриб, шаҳарбон чанага тулпорни қўшди-да, кейин хўжайинини Ягодноега олиб кетди.

Хутор устида офтоб сап-сариқ баркашдай осилиб турар, унинг остида ва устида тутун сингари ҳафиф булутлар сузид юради. Муздек ҳаводан ҳўл мева-ларнинг ҳиди келиб тургандек эди. Тулпор отнинг туёқлари остида йўл устидаги музлар қирсиллаб синар, отнинг оғиз-бурнидан чиққан буғни шамол орқага учирар, буғлар ёлига ёпишиб, қиров хосил қиласарди. Чананинг тез юришидан ва совуқдан кўнгли таскин топган Сергей Платонович чайқалиб мудраб борар, чана орқасига сирилган гиламга орқасини ишқар эди. Пўстин кийган казаклар хутор майдонида уймалашар, почапўстинларининг этагига қундуз сирилган аёллар қўй сингари тўпланишиб турарди.

Оломоннинг ўртасида калға пўстинининг боғичига қизил лента тақиб олган муаллим Баланда дастрўмолини кўкариб кетган оғзиға тутиб, кўзларини чақчайтириб гапирав эди:

— ...Кўриб турибсиз, лаънати самодержавие йиқилди! Энди ишчиларни қамчи билан тинчтиш учун ўғилларингизни юбормайдилар, энди қонхўр подшога шармандаларча хизмат қилиш йўқ. Энди янги, озод Россиянинг хўжайини — Учредительное собрание бўлди. У бошқача, ёрқин ҳаёт қуради.

Унинг орқасида турган рафиқаси калта пўстинининг этагидан тортиб, ялиниб-ёлвориб шивирлар эди:

— Митя, қўйсангчи! Гапириш сенга зарар-ку, ахир. Яна оғзингдан қон келади... Митя!

Казаклар хижолат бўлгандай ерга қараб, йўталиб, кулгиларини яшириб Баланданинг гапига қулоқ солар эдилар. Муаллимга нутқини тамомлашга йўл бермадилар. Олдинги қатордагилардан бири унга ачингандай:

— Кўриниб турибдики, ҳаётимиз ёрқин бўлади, аммо сен бечора уни кўролмайсан. Яхшиси, уйингга бор, ҳаво совуқ...— деди.

Баланданинг гапи оғзида қолди, у, бўзариб кетиб оломон ичидан чиқди.

Сергей Платонович Ягодноега чоштгоҳда етиб келди. Емельян тулпорниң жиловидан ушлаб, отхона ёнидаги четан охур олдига етаклаб келди, хўжайини то чанадан тушиб, пўстинининг этагини кўтариб дастрўмолини олгунча, у отнинг юганини чиқарип, устига тўқим ташлаб қўйди. Зинапоя олдида Сергей Платоновични бўйи баланд, юнглари оқара бошлаган, устини сарғиш доғ босган този ит қаршилади. У ёт кишини кўргач, ўрнидан туриб, пайдор узун оёқларини чўзиб эснади, зинапоя олдида чўзилишиб ётган бошқа итлар ҳам унинг кетидан эринибгина ўринларидан турди.

Сергей Платонович уларга қўрқа-писа қараб, срқаси билан зинадан кўтарилар экан: «Вой қурғурлар-э, мунча кўп улар!»— деб ўйларди.

Ёп-ёруғ қуруқ даҳлиздан ит ҳиди ва сирка иси анқиб турарди. Сандиқнинг тепасида тарвақайлаган кийик шохида офицерча қоракўл папоқ, безакли бошлиқ ва енгиз кавказ чакмони осиғлиқ турарди. Сергей Платонович чакмонга қараб қолди; бир лаҳза сандиқ устида ҳамма ёғини жун босган, ҳайрон бўлиб елкаларини қисиб қўйган бир одам кўрингандай бўлди. Ён томондаги хонадан тўлагина қора кўз жувон чиқиб келди. Юзи қораҷадан келган чиройли жувон Сергей Платонович ечинаётганда уни кузатиб турди-да, кейин жиддий суратда:

— Сиз, Николай Алексеевични қўргани келдингизми?— деб сўради.— Ҳозир бориб айтаман.

Жувон эшикни тақијлатмасдан залга кирди-да, орқасидан эшикни маҳкам ёпиб олди. Сергей Платонович тирсиллаб семириб кетган бу қора кўз чиройли жувоннинг Астахова Аксинья эканини зўрға таниди. Аксинья эса уни дарров таниган эди, у лаъли лабларини қимтиб, қоматини ғайри табиий суратда тик тутиб, сутдек оппоқ яланғоч билакларини силкитиб ичкарига кириб кетди. Орадан бир лаҳза ўтгач унинг ерқасидан чол Листницкий чиқди. У сиполикни қўлдан бермай, илжайиб туриб, илтифот билан:

— Э! Жанеб! Қайси шамол учирди? Қани, мар-хамат...— деб дўриллади ва ўзини бир чеккага олиб, қўйл ишораси билан меҳмонни залга таклиф қилди.

Сергей Платонович кўпдан буён улуғлар олдида таъзим қилиб ўрганиб қолган эди, у ҳозир ҳам шундай эҳтиром билан бош эгиб, залга кирди. Евгений Листницкий ўрнидан турди-да, пенсне остидан кўзларини сузига унга қарши келаверди.

— Хўп келдингиз-да, азиз Сергей Платонович! Ассалому алайкум! Бу нима, қариб қолдингизми дейман-а?

— Қўйинг-э, Евгений Николаевич! Мен ҳали сиздан ҳам узоқ яшамоқчиман. Хўш, ўзингиз қалайсиз? Сиҳат-саломат юрибсизми?

Евгений кулимсираб, олтин қоплама тишларини ялтиратиб, меҳмоннинг қўлтиғига кирди-да, уни кресло томон етаклади. Улар стол ёнига ўтириб, у ёқ-бу ёқдан гаплашар эканлар, сўнгги марта кўришганларидан бери бир-бирларининг юзларида рўй берган ўзгаришларни диққат билан кўздан кечирдилар. Пан Листницкий чой келтиришни буюриб, ичкари кирди. Унинг оғзидағи эгри трубкаси тутаб турар эди. Сергей Платонович ўтирган кресло ёнида тўхтаб, қоқ сувак узун панжасини столга қўйиб туриб:

— Қишлоғингизда нима гаплар бор?.. Хушхабарларни эшитдингизми?— деб сўради.

Сергей Платонович паstdан юқорига, генералнинг соқоли қирилган буришиқ бўйнига ва иягига қарадида, хўрсиниб:

— Эшитмай бўладими!— деди.

— Тақдирнинг тақозаси билан бўлган ишларни қаранг...— генерал кекирдагини қимирлатиб, тутун ютди.— Урушнинг бошидаёқ шундай бўлишини билган эдим. Нима қилайлик... подшо хонадони маҳв бўлишга маҳкум эди. Ҳозир Мережковский эсимга тушиб кетди... эсингдами, Евгений,—«Пётр ва Алексей» деган асари. Қийноқлардан кейин шаҳзода Алексей отасига: «Менинг қоним сенинг авлодинг устига тўкилади...» деганди.

— Биз жўяли бирор хабар эшитмадик-ку, ахир,— деди Сергей Платонович ҳаяжонланиб. Кейин ўтир-

гац жойида қимирлаб қўйиб, трубкасини тортди-да, сўзида давом этди:— Бир ҳафтадан бери газета олганимиз йўқ. Ҳар хил бўлмағур хабарларни эшитамиз, шошиб қолганмиз. Бу бир балойи офат, воллоҳи! Мен Евгений Николаевич отпускага келибди, деб эшитиб, олдингизга келишга қарор қилдим, у ерларда нималар бўлаётганини ва нима бўлишини азбаройи суриштириб билмоқ учун.

Евгений энди кулмай, тоза қилиб қирилган юзига жиддий тус бериб ҳикоя қила кетди:

— Даҳшатли ҳодисалар... Солдатлар орасида интизом тамомила бузилган, урушишга тоблари йўқ, чарчаганлар. Аслини суриштирсангиз, шу бу йил том маъноси билан бизда солдат қолмади. Солдатлар бебош, жиноятчилар тўдасига айланган. Чунончи, масалан... дадамлар бу ҳолни тасаввур эта билмайдилар. Қўшинимизнинг нақадар бузилганини у киши хаёлига ҳам келтира олмайдилар... Аскарлар ўзбошимчалик қилиб позицияни ташлаб кетадилар, таланчилик қиласидилар, аҳолини қирадилар, офицерларни ўлдирадилар, халқни талайдилар... Ҳарбий буйруқларни бажаришдан бош тортиш — ҳозир оддий ҳодиса бўлиб қолган.

— Балиқ бошидан чирийди,— деди кекса Листницкий оғзидан тутун чиқариб.

— Менимча бундай эмас,— деди Евгений афтини бужмайтириб. Шунда майда томирли қовоқлари асабийлик билан пир-пираб кетди:— менга қолса... армия пастан, большевиклар таъсирига берилиб бузиляпти, деб айтар эдим. Ҳатто казак қисмлари ҳам, хусусан, пиёда аскарлар билан яқин алоқада бўлганлари оғмачи. Ҳаддан ташқари чарчаганлар, киндикларининг қони тўкилган қишлоқларини қўмсайдилар... Булар камлик қилгандай большевиклар...

— Уларнинг ниятлари нима?— деб сўради Сергей Платонович ўзини тутиб туролмай.

— У,— деб мийигида кулди Листницкий,— уларнинг ниятлари... Вабо маразидан ҳам баттар! Шу жиҳатдан ҳам ёмонки, бу мараз одамга тез юқади ва солдатлар оммаси орасида тез тарқалади. Мен уларнинг ғоялари тўғрисида гапиряпман. Бу шундай нар-

саки, ҳеч қандай карантин билан ундан қутула олмайсан. Большевиклар орасида, шубҳасиз, истеъдодли одамлар бор, баъзилари билан тўқнашишга тўғри келди, ўтакетган мутаассиблари ҳам бор, аммо кўпчилиги — бебош, ахлоқсиз кимсалардир. Большевиклар таълимотининг моҳияти уларни қизиқтирумайди, улар таланчиллик қилиш ва фронтдан кетиш учун баҳона излайдилар. Улар ҳаммадан бурун ҳокимиётни ўз қўлларига олиб, ўзларининг тили билан айтганда, «империалистик» урушни ҳар қандай шарт билан, ҳатто сепарат сулҳ тузиш йўли билан бўлса-да, тугатиши, ерни деҳқонларга, фабрикаларни ишчиларга олиб беришни истайдилар. Албатта, булар ҳом хаёл ва беҳуда гаплар, аммо шундай оддий йўл билан улар солдатларни ўз томонларига оғдириб оляптилар.

Листницкий аччиғи чиқиб турса ҳам ўзини тутиб туриб гапиради, фил суюгидан ясалган мундштугини бармоқлари билан ликиллатарди. Сергей Платонович ҳозир ўрнидан сапчиб туришга шайланаштагандек олдинга энгашиб қулоқ соларди. Кекса Листницкий юнглари ҳурпайган буркасини қимирлатиб қўйиб, оқарган кўкиш мўйловларининг учини тишлар, залда у ёқдан-бу ёққа юриб турарди.

Евгений ҳатто инқилобдан илгари казакларнинг ўч олишларидан қўрқиб, полкдан қочиб кетишга мажбур бўлганини, Петроградда ўз кўзи билан кўрган воқиаларни ҳикоя қилиб берди.

Суҳбат кесилиб, бир минутча жим бўлиб қолдилар. Кекса Листницкий Сергей Платоновичнинг қаншарига тикилиб туриб:

— Нима, кузда ўзинг кўриб кетган бўз отни — «Боярин»дан бўлган айғирни сотиб оласанми? — деб сўраб қолди.

— Николай Алексеевич, шундог вақтда отга бало борми? — деб, Мохов афтини буриштирди-да, тарвузи қўлтиғидан тушган одамдай, қўл силтаб қўйди.

Шу пайт хизматчилар турадиган уйда исиниб олган Емельян энди чойхўрлик қилар, қизил рўмолчаси билан лавлагидек қизариб кетган юзидаги терни артар, хутордаги гаплардан, янгиликлардан ҳикоя қи-

ларди. Аксинья каравотнинг нақшинкор панжарасига кўкрагини тираб, тивит рўмолга ўраниб турарди.

— Бизнинг уйимиз қулаб тушгандир-а?— деб ёўраб қолди у.

— Йўғ-э, нега қуласин, жойида турибди, бало-дек,— деб салмоқлаб жавоб қилди Емельян.

— Кўшниларимиз Мелеховларнинг турмуши қанақа?

— Кунлари ўтиб турибди.

— Петро отпускага келгани йўқми?

— Келмади шекилли.

— Григорий-чи? Ўғиллари Гришка-чи?

— Гришка Рождестводан кейин бир келиб кетувди. Хотини шу бу йил эгизак туғди... Ҳа, айтгандай, Григорий... Ярадор бўлгани учун келган эди.

— Яраланган экан дейсизми?

— Бўлмаса-чи? Қўлидан ўқ ебди. Урушган итдай ҳамма ёгини жароҳат босиб кетган: кўкрагига осиб олган крестлари ярасидан кўп, яралари крестидан.

— Гришка ўзи қалай?— деб сўради Аксинья томоғига бир нарса тиқилгандай бўғилиб, кейин овозини очиш учун ўталиб қўйди.

— Аввалгидай: қуш бурун ва қоп-қора. Баайни туркнинг ўзи, бурунгисидай.

— Мен унисини айтиётганим йўқ... ўзи қариб қолмаганими?

— Ким билади дейсан, қариган бўлса, бир оз қаригандир. Хотини эгизак туғди, бундан чиқди, жудаям қаримаган.

Аксиньянинг кифтлари қалтираб:

— Бу ер совуқ экан...— деди-да, чиқиб кетди.

Емельян шу билан саккизинчи чашкага чой қўйди-ю, Аксиньянинг орқасидан қараб, шошмасдан:

— Газанда, нас босган манжалаки,— деди.— Яқиндагина хуторда чориқ кийиб юрарди, энди бўлса «бат» эмас, «бу ер» деб гапирадиган бўп қопти-я. Бундай хотинларни кўрарга кўзим йўқ. Менинг қўлимда бўлса-ку, бу манжалакиларни... Ҳа, чаён! «Бу ер совуқ экан» дейди-я! Тилинг кесилгур!

У тутақиб кетганидан чой томоғидан ўтмай қолди, стол ёнида туриб чўқинди-ю, атрофидаги нарсалар-

га гердайиб қараб, ювиб тозаланган полни жўрттага лой этиги билан булғаб чиқиб кетди.

Ўйга қайтар экан, йўлда у ҳам хўжайнини сингари тумтайган эди. Аксинъянинг қилифидан жаҳли чиққан Емельян аламини отдан олар, қамчисининг учи билан отнинг нозик жойига туширас, пичинг қилиб уни қирчанғи, чўлоқ деб сўкарди. То хоторга етиб боргунча, Емельян ўз одатига хилоф қилиб, хўжайнинга бир оғиз ҳам гап қотмади. Дами ичига тушиб кетган Сергей Платонович ҳам чурқ этмай ўтиради.

VIII

Февраль инқилобидан олдин, ғарби-жанубий фронтда резервда турган пиёда аскарлар дивизиясидан биринчи бригада билан ўнга қўшиб берилган 27-нчи Дон казаклари полкини фронтдан олиб кетдилар, бундан мақсад — энди бошланәттган тартибсизликларни бостириш учун уларни пойтахт атрофига жойлаштириш эди. Бригадани фронт орқасига олиб ўтиб, уни янгигина қишилик кийим-кечак билан таъминладилар, бир кеча-кундуз роса боқдилар, эртасига вагонларга ўтиргизиб жўнатдилар, аммо Минск томон жўнатилган полклар кечикиб қолган эди: йўлга чиққан кунлариёқ, император бош қўмондон штабида тахтдан воз кечиш тўғрисидаги актга қўл қўйибди, деган овоза тарқалди.

Бригадани ярим йўлдан орқага қайтардилар. Разгон станциясида 27-нчи полк вагондан тушиш тўғрисида фармон олди. Йўллар поездлар билан тўлиб кетган эди. Платформаларда шинелларига қизил бант тақиб олган солдатлар рус милтиғидан нусха олиб, Англияда ишланган яп-янги милтиқлар билан у ёқдан, бу ёқса юриб турар эдилар. Солдатларнинг қўпи, юзта-юзтадан бўлиб саф тортаётган казакларга қўрқа-писа қараб безовталанар эдилар.

Ҳаво айниган, кеч кирган эди. Станция биносининг тарновидан сув шариллаб оқиб турар, йўлларда устини йилтироқ нефть доғлари босган кўлоб сувларда булатли кул ранг осмон акс этарди. Маневр қилиб турган паровозларнинг бўғиқ овози хириллаб эшити-

ларди. Юк складлари орқасида отлиқлар полки саф тортиб, бригада командирини қаршилади. Тўпигигача ҳўл бўлган отларнинг оёғидан буғ кўтарилиб турарди. Қузғунлар қўрқмасдан сафнинг орқа томонига қўнар, сап-сариқ юмалоқ от гўнгларини титкилаб, дон ахтарарди.

Бўйдор қора аргумоқ мингган бригада командири полк командири ҳамроҳлигига казаклар олдига келди. Отнинг жиловини тортиб туриб, казакларга кўз югуртирди. Енги шимарилган қўлини тўлғаб ўз оғзидан чиққан салмоқсиз, тутуруқсиз гапларини рад этаётгандай гапирав әди.

— Казаклар! Шу вақтгача подшолик қилиб келган император Николай Йккинчи халқнинг э-э-э... иродаси-ла таҳтдан туширилди. Ҳокимият Давлат думасининг Муваққат комитети қўлига ўтди. Армия ва шу жумладан сизлар бу... э-э-э... ахборотга парво қилмаслигингиз зарур... Казакларнинг вазифаси ўз ватанини ташқи ва э-э-э... демак, ташқи душманлар таъзиқидан ҳимоя этмоқдан э-э-э... иборатдир. Бизлар мамлакатда бошланган ғалаёнларга аралашмаймиз, граждан аҳолига янги ҳукумат тузиш йўлларини танлаш имкониятини берамиз. Бизлар холис туришимиз зарур! Уруш ва сиёsat армия учун олов билан сувдек гап. Жамият негизлари... э-э-э... шундай ларзага келган кунларда, биз худди...— кекса ва истеъдодсиз генерал — бригада командири нутқ сўзлашга ўрганмаган эди, шунинг учун муқояса тополмай қийналиб, тили тутилиб қолди. Унинг юзи мой суртилгандай йилтирас, қошлири чимирилиб турарди, казак бўлинмалари сабр-тоқат билан сўзининг охирини кутиб турардилар:—э-э-э... метиндай бикир бўлишимиз лозим. Казаклик ҳарбий бурчи сизларни ўз бошлиқларингизга итоат этишга даъват қиласди. Бизлар душман билан илгари қандай урушган бўлсак, ҳозир ҳам шундай қаҳрамонлик билан урушажакмиз, у ерда...— генерал орқасига қийшайиб қараб қўйди,— у ерда Давлат думаси мамлакат муқаддиротини ҳал қила-версин. Урушни бирёзлик қилганимиздан кейин биз ҳам мамлакатнинг ички ишларига иштирок этгусимиздир, ҳозирча бизга... э-э-э... иштирок этиш мумкин

эмас. Армияни биз қўлдан беролмаймиз... Армиянинг сиёsat билан иши бўлмаслиги керак!

Бир неча кундан кейин казаклар шу станцияда Муваққат ҳукуматга содиқ эканликларига онт ичдилар, тўда-тўда бўлиб, ўз ҳамқишлоқлари билан митингларга бордилар, лекин станцияни тўлдирган солдатларга қўшилмадилар. Митингдан кейин эшитган нутқларини узоқ муҳокама қилдилар, ҳар бир шубҳали сўзларни эсга олиб, уларга ишонқирамай мулоҳаза қилиб мағзини чақмоқчи бўлдилар; негадир ҳаммада: агар ҳуррият бўлган бўлса — уруш тугаши лозим, деган ишонч ҳосил бўлган эди. Одамларнинг миясига ўрнашиб қолган бу фикр билан, Россия охиригача урушиш керак, деган эътиқодда бўлган офицерларнинг кураш олиб бориши анча қийинлашди.

Ўзгаришдан кейин армиянинг юқори доираларини чулғаб олган саросималик пастки табақага ҳам таъсир этди; яrim йўлда тўхтаб қолган бригаданинг бор-йўқлигидан дивизия штаби бехабар эди. Вагонлардан тушган бригала саккиз кун учун берилган озиқ-овқатни еб тамом қилди, солдатлар тўп-тўп бўлиб, яқин орадаги қишлоқларга кетиб қолар, бозорда эса қаёқдантир келтирилган спирт сотилар эди, шу сабабдан, ўша кунлари маст бўлиб юрган аскар ва офицерларни кўриш таажжубланарли нарса эмасди.

Сафар муносабати билан кундалик вазифаларидан четлаштирилган казаклар иссиқ вагонларда зерикишиб, ўзларини Донга жўнатишларини кутишар («иккинчи навбатдаги казакларни уй-уйларига жўнатар эмишлар» деган миш-меш тарқалган эди), отларни парвосизлик билан боқишар, узун кун бозор майдонида сандирақлаб юришар, позициядан келтирилган бозорбоп нарсалар—немис одеяллари, найза, арра, шинель, чарм сумкалар, тамаки сотишарди.

Фронтга қайтилсин, деган буйруққа олағовур кўтариб қарши чиқишиди. Иккинчи сотня фронтга боришдан бош тортди, казаклар вагонларга паровозни тиркашга йўл қўйишимади, аммо полк командири қуролсизлантирамиз, деб дўқ қилгандан кейин, ҳаяжон босилди. Эшелонлар фронтга қараб жўнади.

— Бу нима деган гап-а, оғайнилар? Ҳуррият, ҳуррият дейишади-ю, уруш чўзилиб, яна қон тўкилаве-паркан-да?

— Яна эски тартибга жон киаркан-да!

— Бўлмаса, подшони нега ўрнидан туширишдий-кин?

— Унинг даврида биз нима яхшилик кўрувдикки, энди нима кўрамиз.

— Ўша эски тос, эски ҳаммом-да!

— Балли, балли!

— Қачонгача шунаقا бўларкин-а?..

— Уч йил бўлади, милтиқ қўлимиздан тушмайди!

Вагонда шу хилда гаплар тинмас эди.

Қандайдир катта бир станцияда казаклар худди тил биритиргандек, вагонлардан тушиб, полк командирининг насиҳат ва таҳдидларига қулоқ солмай, митинг бошлаб юбордилар. Кул ранг шинелли казаклар орасида комендант билан кекса станция бошлиғи беҳуда тентираб юриб, вагонларга чиқинг, йўлни бўшатиб қўйинг, деб казакларга ялиниб-ёлворар эдилар. Казаклар учинчи сотня уряднингинин нутқини дикқат билан тинглардилар. Урядникдан сўнг паст бўйли, келишган казак — Манжулов гапирди. Унинг оқарган, фазабдан қийшайган оғзидан заҳарли сўзлар отилиб чиқарди.

— Казаклар! Бу бўлмағур гап, ахир! Бизларни яна хижолатпазликка қўйдилар. Бизларни лақиллатмоқчилар. Бас, революция бўлган экан ва барча халққа озодлик берилган экан, бинобарин, урушга барҳам бериш лозим. Наинки биз ҳам, халқ ҳам урушни истамаймиз. Тўғри айтяпманми? Ростми, а?

— Рост!

— Энасига берсин!

— Жонимизга тегди!

— Этимиз бориб устихонга ёпишди, чалворлар ушламаяпти... Яна қанақа уруш?!?

— Хоҳла-май-миз!

— Уй-уйимизга кетамиз.

— Паровозни чиқариб ол, Федот, бўл!

— Казаклар! Шошманглар! Казаклар, оғайнилар! Занғарлар, хотин талоқлар!.. Оғайнилар! — Манжулов

минглаб кишиларнинг овозини босиб бақиради.— Шошилманглар, паровозни қўзғатманглар! Паровознинг бизга кераги йўқ, фақат алдаш учун... Бизларни фронтга борсин деб ростдан ҳам талаб қилишганми ёки бу полк командирининг найрангларими, шуни жаноби полк командири ҳужжат билан айтсин.

Ҳаяжонга келган, ўзини йўқотиб қўйган полк командири лаби лабига тегмай, полкни фронтга жўнатиш тўғрисида дивизия штабидан олган телеграммани овоз чиқариб ўқиб берганидан сўнггина, казаклар вагонларга чиқдилар.

Бир қизил вагонда 27-нчи полкда хизмат қилувчи олти ҳамқишлоқ — Татарск қишлоқлик Петро Мелехов, Мишка Кошевойнинг амакиси Николай Кошевой, Аникушка, Федот Бодовсков, лўли башара, жингалак соқол, сарғиши кўзлари бежо Меркулов, Коршуновларнинг қўшниси — бебош ва шўх казак Максимка Грязновлар жойлашган эдилар. Грязнов урушга қадар бутун станицада довюрак от ўғриси деб ёмон ном чиқарган эди. Казаклар доим Грязновни мазах қилиб: «От ўғирлаш Меркуловга ярашиб тушади, баайни лўлининг ўзи, лекин от ўғирламайди. Максим, отнинг думини кўрса, ўғирлагинг келиб иситманг ошадими!»— деб казаклар доим Грязновни калака қилишарди. Максимка қип-қизариб, чағир кўзларини қисиб, шалоқ гап қиласарди. «Меркуловнинг онаси лўли билан ўйнашган, менинг онамнинг ҳаваси келган чиқар, бўлмаса, мен худо кўрсатмасин, шунаقا бўлармидим!..»

Қизил вагон ичida шамол ғўрилларди; тўқим урилган отлар наридан-бери қилинган охурлар олдида туришарди; вагон ўртасидаги уйилган тупроқ устида ҳўл ўтин сасиб ёнар, унинг аччиқ тутуни эшик тирқишлиарига қараб уради. Эгар устида, олов атрофига ўтириб олган казаклар тердан намиқсан сасиқ пайтаваларини қуритишарди. Федот Бодовсков қийшиқ, яланг оёғини ўтга тоблар эди. Унинг қалмоқча чўзиқ юзида хурсандлик кулгиси ўйнар эди. Грязнов кўчиб кетган таг чармни шошиб-пишиб мумланган ип билан тикар экан, хириллаган овоз билан кимгадир пўнғиллаб гапирав эди:

— ...Кичкиналигимда қиши маҳали пеъчи устига чиқиб олардим. Бувим эса (ўша маҳалда юздан ошган эди), бошимнинг битини боқиб дер эди: «Қўзичоғим Максимушка! Қадимда ҳалқ бунақа умр кечирмаган, рисола билан яшаган, ҳеч қандай бало-қазо кўрмаган. Сен, эркатойим бўлсанг, шундай замоналарни кўрасанки, ер юзини сим билан чулгайдилар, осмонда темир тумшуқ қушлар учиб юради. Қарға тарвуз чўқигандек, у ҳам одамларни чўқилайди... Очарчилик бўлиб, вабо бошланади, шунда ака ука билан, ўғил ота билан жиққамуш бўлади... Одамлар ҳам яккамдуккам бўп қолади». Максим бирпас жим туриб, яна давом қилди:— мана, ростдан ҳам шундай бўлди: телеграфни ўйлаб чиқардилар, мана сенга сим! Темир тумшуқ қуш эса — аэроплан. Аэропланлар озмунча одамни мажақламадими! Ҳали очарчилик ҳам бўлади. Бизниклар бурноғи йилларга қараганда нисф экин экади. Ҳар бир деҳқон ҳам шундай. Станицаларда чолу гўдаклар қолган. Борди-ю, экин битмаса, ҳолимиз хароб.

Петро Мелехов оловнинг ўтини жўнаштирад экан:

— Ака-ука жиққамуш бўлади дегани бўлмағур гапдир?— деб сўради.

— Шошма ҳали, шу ҳам ҳалқнинг бошига тушади.

Федот Бодовсков гапга аралашиб:

— Тайин бир ҳукумат бўлмаса, алғов-далғов бошланади,— деди.

— Бундан ташқари, ғалвачиларни тинчитиш ҳам керак бўлади.

— Аввал сен германларни бир ёқлиқ қил,— деб кулди Кошевой.

— Нима қипти, ҳали тағин урушамиз...

Аникушка ўзини қўрқканга солиб, хотинчалиш юзини буриштириб деди:

— Папоқ ойим! Қачонгача «урушамиз?»

— Сен кўсага соқол битгунча,— деб пичинг қилди Кошевой.

Олов атрофида ўтирганлар баравар кулиб юбордилар. Тутундан ўйтали тутиб қолган Петр Аникушкага жиққа ёш кўзлари билан қараб, унга қўлинни нуқиб қўйди.

Аникушка хижолат бўлиб:

— Тукнинг ақли борми, нокерак жойда ҳам ўса-веради,— деди.— Сен Кошевой, бекорга валақлаяпсан...

— Бас энди! Пичноқ бориб устихонга қадалди,— деди бирдан Грязнов қизишиб.— Биз бу ерда битларга ем бўлиб, ўляпмиз. Бола-чақамиз эса муҳтоҷликда кун кечиряпти. Озиб, чўп бўлиб кетган.

Петро қизғиши мўйловини тишлаб пичинг қилиб:

— Сен нима қилиб, аравани қуруқ опқочяпсан?— деди.

— Нимагалиги маълум,— деб жингалак лўли соқолли Грязнов учун Меркулов жавоб қилди-да, мийғида кулди.— Маълум, казак жонидан безган, ғам ичида. Гоҳида подачи подаларини майсазорга ҳайдаб оборади, офтоб шабнамни қуритгунча қорамол, ҳарқалай ўтлаб туради, офтоб тиккага келиб, сўналар ўралашиб молни чақа бошлаганда, ана шундай...— Меркулов казакларга айёrona бир назар ташлаб қўйиб, Петрога ўгирилиб гапини давом қилди:— шунда, вахмистр жаноблари, моллар думини хода қилиб қочади. Ўзинг ҳам биласан-у, сен закунчи амалдорлардан эмассан-ку! Поданинг кетида юриб ўғсансан... Борди-ю, битта-яримта бузоқ думини хода қилиб, мағраб қочиб қолса, бутун пода орқасидан эргашади. Подачи халлослаб чопавериб энка-тинкаси қурийди! Моллар тутқизиб бўпти. Пода, баайни биз — Незвисск ёнида немислар устига бостириб борганимиздек, қуюндек қочади. Кейин олдини тўсиб бўпсан.

— Гапни қаёққа буряпсан?

Меркулов дарров жавоб қила қолмади. Қора соқолининг бир мўйини бармоғига ўраб туриб, жонжаҳди билан юлиб олди, кейин кулмасдан жиддий гапира бошлади:

— Уч йилдан бери урушяпмиз. Шундоғми? Уч йил бўлди, окопга ҳайдаб қўйганларига. Нима учун ва нега? Ҳеч ким билмайди... Шунинг учун айтяпманки, кўп ўтмай биронта Грязнов ёки Мелехов деган фронтдан думини хода қилади-ю, унга бутун бир полк, полк кетидан бутун армия эргашади... Ҳа-да!

— Э, гапнинг таги бу ёқда экан-ку...

— Ҳа, шу ёқда! Кўзим кўр эмас, очиқ... Ҳамма нарса қил устида. Бирор «кишт» деб юборса борми, ҳамма пўстинини ташлаб қочади. Учинчи йил деганда биз учун ҳам офтоб тиккага келди.

— Сен эҳтиётроқ бўлсанг бўларди,— деди Бодовсков.— Ахир Петро... вахмистр-ку.

— Мен дўстларга ёмонлик қилганим йўқ-ку!— деди Петро қизариб.

— Жаҳлинг чиқмасин, ҳазиллашиб айтдим-да.— Бодовсков хижолат чекди, яланг сёёкларининг қинғир бармоқларини қўмирлатиб қўйди, сўнгра ўрнидан туриб шипиллаб охур ёнига кетди.

Бир бурчакда прессланган той-той пичанлар ёнида бошқа хуторлик казаклар шивирлашиб гаплашиб ўтиришарди. Улардан иккитаси каргинлик Фадеев билан Каргин эди. Қолган саккизтаси эса бошқа хутор ва станицалардан эди.

Бир оздан кейин улар ашула бошлаб юбориши. Ашулани чирлик казак Алимов бошлади. У рақс куйини бошлаганди, аллаким унинг елкасига шапиллатиб уриб, ғурунглаган овоз билан:

— Тўхтат!..— деди.

— Ҳой, етимлар, оловга келинглар,— деб чақирди Кошевой уларни.

Гулханга станция деворларидан кўчириб олинган ёғочлар қолдифини ташладилар. Олов олдида қувноқ қўшиқни барала қўйдилар.

Сафар юки ортилган от кишинар черков ёнида,
Бир муштипар кампир йиғлаб туради ғов ёнида,
Невараси, келини ҳам йиғлайди хунибийрон,
Совут кийган казак чиқар зиёраттоҳ черковдан,
Найзасини узатади ёш жияни. Хотини—
Жиловидан ушлаб дарҳол келтиради отини.

Қўшни вагонда гармонни хириллатиб «Казачек» рақсини чала бошладилар. Тахта пол устида солдатча этикнинг пошналари қаттиқ тўқиллай кетди. Кимdir носоз овоз билан бақириб ашула айтди:

Қайғу-алам ҳазон қилди умримизни,
Чор кийгизган бўйинтуруқ бўйнимизни
Яғир қилди. Казакларга кун бермаслар,

На тинч қўяр, на ўлдириб ўлдирмаслар!
Пугачев Дон бўйларидан нидо қилар,
Қўйи Доннинг йўқсилларин жангга чорлар.
«Атаманлар, казаклар!..»

Иккинчиси биринчи ашулачининг овозини босиб жингиллаб бидирлаганича маза-матрасиз ашулани қўйди:

Подшога бажону дил хизмат этамиз,
Еримизни эслаб доим ҳасрат чекамиз.
Хотин топсак тарқалади дарров ғамимиз,
Подшонинг хизматини экиб қўямиз.
Ўйинга туш, тортина ҳеч, ўйинга туш, ҳа!
У-үҳ, у-үҳ, ҳа-ҳа, ҳа-ҳа!

Казаклар ашулани бас қилиб, қўшни вагонда авж олган тартибсиз ғовурга қулоқ сола бошладилар, бир-бирларига кўз қисиб, маъқуллагандай жилмайдилар.

Петро Мелехов ўзини тутолмай хохолаб кулиб юборди:

— Э, роса қутуришяпти, шайтонлар!

Меркуловнинг чақнаб турган сарғиш кўзлари ялтираб кетди. Ўнидан сакраб туриб, мақомга ростлаб, этигининг учлари билан майдада қадам ташлаб, полни тўқиллата кетди. Қейин бирдан тепиниб, чўнқайганча давра олиб айланса бошлади. Ҳаммалари навбат билан ўйин тушдилар, баҳона билан исиб ҳам олдилар. Қўшни вагонда аллақаҷон гармон овози тинди. У ерда хириллашиб, болохонадор қилиб сўкишарди. Бу ерда эса ўйинга тушиб, отларни безовта қилишарди. Аникушка ғалати қилиб чўккалаб ўйнайман деб оловорга кети билан йиқилиб тушгандан кейингина, ўйинни бас қилдилар. Аникушкани қаттиқ кулги остида кўтариб олдилар, ёниб соб бўлаёзган шам ёруғида куйган чалворини анчагача томоша қилдилар. Чалворнинг оғи куйиб кетган, пахталик нимчасининг этаклари ёнган эди.

Меркулов унга ачиниб:

— Чалворингни еч,— деди.

— Сен лўли, эсингни едингми? Нима, яланғоч қоламанми?

Меркулов бўғжамасини кавлаб, хотинлар киядиган ички без кўйлакни чиқарди. Яна гулханни ёқди-

лар. Меркулов елкалари тор кўйлакни икки четидан ушлаб турар, тисарилиб, кулгидан бўғилиб дер эди:

— Мен... Оҳ! Оҳ! Буни станцияда девордан ўмарби олувдим. Пайтавага мўлжалловдим... Оҳ! Йиртиб ўтирумайман, ола қол.

Сўкиниб турган Аникушкани зўрлаб кийинтиришар экан, шундай хохолашиб кулишардики, қўшни вагонлар эшигидан одамлар қизиқиб, бош чиқариб қарашарди. Тун қоронфисида ҳасадли овозлар эшитиларди:

— Нима қиляпсанлар?

— Қутурган айғирлар!

— Нега мунча қутурдинглар?

— Ҳой, шайтоннинг мардикорлари, ёмби топдиларингми?

Кейинги станцияда олдиндаги вагондан бир гармончини чақириб келдилар. Бошқа вагонлардан казлар келиб, вагон лиқ тўлди. Охурларни синдириб, отларни деворга қисиб қўйиши. Аникушка торгина бир доира ичидаги рақс этарди. Барваста бир хотиннинг оқ кўйлаги унга узун келиб, оёғи ўралашарди, аммо казакларнинг бақириғи ва кулгиси далда берарди. У ҳолдан тойгунча ўйин тушди.

Қонга белангтан Беларусь осмонида юлдузлар мотамсаро кўз ёши тўкар, қора тун вагонлар ёнидан ту тундек сузиги ўтарди. Чириган хазон ҳиди анқиган қизғиши, нам қумлоқ ер устида, март қори устида шамол ўйнарди.

IX

Полк бир кечаки бир кундуз йўл юриб фронтга яқинлашди. Катта бир станцияда эшелонни тўхтатдилар. Вахмистрлар казакларга «Вагонлардан тушилсин!» деган буйруқни етказдилар. Казаклар шошибнишиб отларини вагонга қўйилган тахтадан етаклаб тушиб, эгарлашар, шошқалоқликда унутиб қолдирган буюмларини олиш учун вагонларга чопиб чиқишар, йўл устидаги нам қумга той-той пичанларни отишар, ҳовлиқишиар эди.

Петро Мелеховни полк командирининг ординареци чақириб:

— Вокзалга кир, командир чақирияпти,— деди.

Петро шинели устидан боғланган камарини тузатиб, эран-қарап платформа бўйлаб кетди. Отлар олдида ивиришиб юрган Аникушкага:

— Аникеј, менинг отимга ҳам кўз ташлаб тур,— деди.

Аникушка чурқ этмай, унинг орқасидан қараб қолди. Аникушканинг бадқовоқ, одми башарасида ташвиш ва зерикиш аломати кўринарди. Петро сариқ лой сачраган этигидан кўзини олмай қадам ташлаб борар: «Нега полк командирига керак бўп қолдим экан?» деб боши қотар эди. Платформанинг у бошидаги сув қайнатадиган бак олдида тўпланган кичик бир оломон унинг диққатини жалб қилди. Узоқдан уларнинг гапига қулоқ солиб, олдиларига келди. Йигирма чоғлиқ солдат бўйдор, малла казакни ўртага оливолган, казак эса қуршовда қолган одамдай орқасини бакка ўғириб олган эди. Петро бўйнини чўзиб, ўзига сал-пал таниш бўлган серсоқол атаман полкидан бўлган малла казакка, урядниклик кўк погонидаги «52» рақамга кўз ташлади; уни бир вақтлар, қаердадир кўргандек бўлди.

Юзига сепкил тошган, ақлли одамга ўхшаган кўнгилли аскар.

— Қандай ҳийла ишлатиб қочдинг? Тағин елканнга латта чатиб қўйишибди-я!— деб малла соқол казакни майна қилаётган эди.

Петро орқасини ўғириб турган кўнгилли аскарнинг елкасига қўлини тегизиб:

— Нима гап?— деб сўради қизиқсиниб. Аскар унга юзини ўғириб, истар-истамас жавоб берди:

— Дизиртирни ушлаб олдик... Сизнинг казаклардан.

Петро, шу юзи товоқдек, сариқ мўйлов, малла қош атаманли казакни қаерда кўрган эдим-а, деб зўр бе-риб хотирлашга тиришди. Атаманли казак кўнгилли сур аскарнинг саволларига жавоб бермай, тўп ўқи гилзасидан қилинган мис кружкасидан хўплаб қайноқ сув ичар, сувга бўқтирган қора қоқ нонни тамадди

қиларди. Оралари очиқ бўта кўзларини қисиб боқар, нонни чайнаб ютар экан, қошларини чимирав, ерга ва теварак-атрофга аланглаб қарап эди. Уни қўриқ-лаб турган ўрта ёшли ғўлабир солдат милтигини найзасидан ушлаб ёнида туради. Дезертир казак кружкасидаги сувни ичди-да, ҳорғин кўзлари билан уялмай томоша қилаётган солдатларга тикилди, болаларникidek масъум, мовий кўзларида ғазаб ўти чақнади. Бир қултум сувни ютиб, лабларини ялаб олди-ю, дўриллаган овоз билан:

— Нима, маймун ўйнатяптими? Овқат еб олгани ҳам қўймайсанларми, зангарлар? Нима, одамзодни умрларингда кўрмаганмисанлар? — деди.

Солдатлар кулиб юбордилар. Петро дезертирнинг овозини эшитиши биланоқ (ҳамиша шундай бўлади), ҳайрон қоларли бир равшанлик билан, бу казак — Еланская станицасига қаравали Рубежин қишлоғидан бўлиб, оти Фомин эканини эслади. Урушдан илгари Елан ярмаркасида Петро отаси билан ундан уч яшар новвос сотиб олган эди. У оломон орасидан сиқилиб ўтиб:

— Фомин! Яков! — деб чақирди.

Фомин эсанкираб, бесўнақайлиқ билан кружкани бак жўмрагига тутди; оғзидагини чайнар экан, хижолатпазлик билан кулимсираб Петрога кўзини тикиб қараб қолди, сўнгра:

— Таниёлмадим, оғайни, — деди.

— Рубежинликмисан?

— Ҳа, ўша ерлик. Ўзинг еланскаяликдирсан.

Беш йил аввал сендан новвос сотовловудик.

Фомин боягидек хижолат чекиб, болалардек кулимсираб, ўтган воқиани эслашга уринаётгани афтидан кўриниб туради:

— Йўқ, ёдимдан кўтарилибди, сени танимай турибман, — деди у ачингандай.

— Сен Эллик иккинчи полкданмисан?

— Ҳа, Эллик иккинчи полкдан.

— Шундай қилиб, жуфтак уриб қопсан-да, оғайнчалиш? Бу нима қилганинг?

Шу пайт Фомин папогини ечиб, ичидан титилиб

кетган тамаки халтасини олди. Елкасини қисиб, папонини аста қўлтиғига қистирди-да, қофознинг бурчагидан бир парча йиртиб олди, шундан кейин жиддий ва йилтираб турган намли кўзларини Петрога қаттиқ тикиб туриб:

— Тоқатим тоқ бўлди-да, оғайнин...— деди Ғудраниб.

Ғўлабир соқчи солдат милтигини елкасига осиб:

— Ҳой, ҳамқишлоқлар, гапни бас қилинг, сизнинг касрингизга балога қолмай тағин,— деди ҳўрсиниб.— Юр, амаки!

Фомин кружкасини сумкаси остига ташлаб, кўзини опқочиб туриб Петро билан хайрлашди, сўнгра айиқдек лапанглаб, комендант олдига жўнади.

Вокзалда, илгариги биринчи класс буфетида полк командири билан икки сотня командири стол устига энгашиб туришар эди.

Полковник ҳорғин кўзларини пирпиратиб:

— Сен, Мелехов, шунақа кутдириб қўяссанми, ахир,— деди.

Петро ўзининг сотняси дивизия штаби ихтиёрига берилгани, казакларга кўз-қулоқ бўлиб юриши кераклиги, уларнинг аҳвол-руҳияларидаги ҳар бир ўзгариш ҳақида сотня командирига маълумот бериб туриши лозимлиги тўғрисидаги хабарга диққат билан қулоқ осди. У кўзларини пирпиратиб туриб полковникнинг кўзига қарап, унга диққат билан қулоқ сслар экан, Фоминнинг милтираб турган намли кўзлари кўз ўнгидан ўтар, «тоқатим тоқ бўлди, оғайнин...» деган гап қулоғидан кетмас эди.

Петро димиқиб кетган вокзалдан чиқиб, ўз бўлин- масига қараб йўл олди. Шу ерда, станцияда полкнинг иккинчи даражали юк аравалари турарди. Петро ўз вагонига яқинлашганда аравачи казакларга ва сотня тақачисига кўзи тушиб қолди. Тақачини кўриши билан Фоминни ҳам, у билан нима тўғрисида гаплашганини ҳам унутди. Отларни янгидан тақалатиш тўғрисида тақачи билан гаплашиб олиш учун илдам юриб кетди (шу он Петрони кундалик ташвишлар ўраб олган эди), аммо шу вақт қизил вагон бурчагидан бир аёл юриб келаверди, унинг бошида оқ тивит

рўмол бўлиб, рўмолини бу ердаги хотинлардан бош-қачароқ қилиб ўраб олган эди. Унинг ажиб қиёфаси танишдек кўринди, Петрони ўзига жалб этди. Аёл унга юзланиб ялт этиб қаради-да, елкаларини билин-ар-билинмас учирив, қизларнидек ингичка белини қилпанглатиб келаверди. Петро унинг юзини кўрмас-даноқ, қилпанглаб юришидан хотини эканини пайқа-ди. Вужудини муздек ёқимли тер босди, бирданига терисига сифмай, хурсанд бўлиб кетди. Ундан кўзини ололмай қолган аравакаш казаклар, жудаям суюниб кетди-я, деб ўйламасинлар деган андиша билан жўрт-тага юришини секинлаштириб, хотини томон боравер-ди. У хотинини қучоқлади, уч марта ўпди, ниманидир сўрамоқчи бўлган эди, ички ҳаяжони юзага тепиб, лаблари дир-дир титраб, тили гапга келмай қолди.

— Кутмовдим,— деди у тутилиб ниҳоят.

— Вой жоним-эй! Сираям таниб бўлмайдиган бўп қопсан-а!— деб чапак чалиб юборди Дарья.— Етти ёт бегонага ўхшайсан-а... Сени кўргани келдим, ахир... Бизникилар: «Нима қиласан бориб» деб йўлимни тў-сишди. Йўқ, деб ўйладим мен, бораман, ёrimни кўриб келаман...—деб бидирлар, эрининг пинжига суқилар, ёшга тўлган кўзлари билан унинг кўзларига мўлтираб қарар эди.

Вагон ёнида казаклар тўпланишиб турар, эр-хотинга қараб томоқларини қириб қўйишар, кўз қиси-шар, гап отишар эди:

— Петронинг бағри бутун бўлди.

— Манжалақи хотиним келолмайди, бирданига учта туғворибида.

— Унинг Нестердан бошқа яна ўнта жазмани бор!

— Мелехов, жилақурмаса, ўз взводидаги казак-ларга хотинини бир кечага бериб турсайди... ўлиб бўлдик-ку... Ўҳў-ў!

— Нарироқ кетайлик, йигитлар! Эрининг пинжи-га суқилишини кўриб, юрагимиз қон бўлади!

Шу пайт Петро хотинини ўлгудай урмоқчи бўлганини унутди-ю, одамларнинг кўз ўнгига уни эркалаб, тамаки тутунидан сарғайган йўғон бармоқлари билан хотинининг бўялган қошларини силай бошлади, тери-сига сифмай қувониб кетди. Дарья эса, бундан икки

кеча илгари вагонда Харьковдан полкига кетаётган отлиқ аскар — ветеринар фельдшери билан бир ўринда ётиб келганини эсидан чиқариб юборган эди. Фельдшернинг мўйловлари жуда қуюқ ва қоп-қора эди, аммо бу икки кеча илгари ўтган гап-ку! Ҳозир Даъя хурсандлик кўз ёшларини тўкиб эрини қутоқлар, унга маъсум кўзлари билан қараб тўймас эди.

X

Отпускадан қайтиб келгандан кейин ясовул Евгений Листницкий 14-нчи Дон казаклар полкига тайинланди. Илгари ўзи хизмат қилган ва февраль инқиlobи бўлмасдан илгари расвоси чиқиб қочган полкига қайтиб бормай, тўғри дивизия штабига келди; Дондаги машҳур казак-дворян оиласидан чиққан ёш генерал осонгина уни бошқа полкка кўчирди. У ўз кабинетида Евгений билан ёлғиз қолгач:

— Тушунаман, ясовул, эски жойда хизмат қилиш сиз учун жуда оғир, чунки казакларнинг сизни кўрарга кўзлари йўқ, номингизни эшитганда уларнинг сафроси қайнайди,— деди.— Шу важдан сиз Ун тўртинчи полкка борганингиз маъқул. Уша полкка офицерларнинг сараси йигилган, казаклари ҳам тўпори ва чидамли—уларнинг кўпи Усть-Медведицкий округидан. Уша жой сиз учун жуда боп.— Генерал бир оз сукут қилиб тургандан сўнг:— Сиз, назаримда, Николай Алексеевич Листницкийнинг ўғиллари бўлсангиз керак? — деб сўраб қолди. Уз саволини тасдиқлайдиган жавоб олгандан кейин сўзида давом этди:— Амин бўлингки, биз сиз каби офицерларни қадрлаймиз. Шу замонда ҳатто офицерлар орасида ҳам икки юзли одамлар кўп. Улар учун бошқа динга кириш ва ҳатто икки худога тоат қилиш ҳам ҳеч гап эмас... — Штаб бошлиги шу аччиқ сўзлар билан гапини тутатди.

Листницкий бошқа полкка кўчирилганидан жуда хурсанд бўлди. Уша куниёқ Двинскка жўнаб кетди, 14-нчи полк ўша ерда эди. Эртасига полк командири, полковник Бикадоровга расмий равишда ўзини таништирди, дивизия штаби бошлигининг гапи рост эканини билиб жуда қувонди: дарвоқе, офицерларнинг

кўпчилиги монархист экан, учдан бир қисми устъхонкерлик, Кумилженск, Глазунов ва бошқа станицалик эски мазҳабдаги кишилардан иборат бўлган казаклар асло революцион руҳда эмас, Муваққат ҳукуматга содиқ бўлиш тўғрисида истар-истамас қасамёд қилган эканлар, теварак-атрофда бўлиб турган қизғин ҳодисаларга тушунмас ва тушунишни истамас эканлар: полк комитети ва сотня комитетларига лаганбардор ва итоатли казаклар сайланибди. Янги муҳитда Листницкий кўкрагини тўлдириб эркин нафас олди.

Офицерлар орасида ўзи билан бирга Атаман полкда хизмат қилган иккита офицерни учратди, улар бошқа офицерларга қўшилмас эдилар; қолганлари жуда иноқ ва ҳамжиҳат бўлиб, подшо династиясини тиклаш тўғрисида рўйрост гапирадилар.

Полк икки ойча Двинскда туриб, куч тўплади, интизомни мустаҳкамлади. Илгари пиёда аскар дивизияларига бириктирилган казак сотнялари Ригадан гортиб Двинсккача фронт бўйлаб тентираб юрганлари юрган эди, аммо апрель ойда аллаким жонкуярлик қилиб ҳамма казак сотняларини бир жойга тўплатдирди, полк энди шайланиб турар эди. Қаттиққўл офицерлар назорати остида казаклар машқ қилишар, отларини тўйғизиб боқишар, худди шиллиқ қурт сингари имиллиб ҳаёт кечиришарди, ташқаридан уларни тафтиш қилиб турувчи ҳеч кимса йўқ эди.

Казаклар полкининг зиммасига юкланган вазифа тўғрисида ноаниқ тасаввурга эга бўлсалар-да, офицерлар сир сақламай, яқин келажакда полк, ишончли бир одамнинг қўлида тарихнинг чархини айлантириб юборади, деб рўйрост гапирав эдилар.

Двинска яқин ердаги фронт аланга ичида Армия жон бериб, жон олар, ўқ-аслаҳа, озиқ-овқат етишмас; жангчилар кўзлари тўрт бўлиб «сулҳ»ни кутишар эди. Армиядагилар республиканинг муваққат ҳукмдори Керенскийни турлича кутиб олган эдилар. Унинг асабий ҳолатда берган буйруқлари билан июнда ҳужумга ўтган қўшин қоқилиб тўхтаб қолди; жонидан тўйған аскарларнинг ғазаби булоқдек жўш ура бошлади.

Двинскда эса казаклар тинчгина, бехавотир яшар: отлар сули билан кунгабоқар кунжарасини еб ётар,

казаклар фронтда кўрган кулфатларини унута борар эдилар; офицерлар канда қилмай йиғилишга бориб турар, овқатнинг мазалигини еб, Россиянинг тақдири тўғрисида тортишар эдилар.

Июлнинг биринчисигача аҳвол шу зайлда ўтди. Учинчи июлда: «Бир минут ҳам кечикмай сафарга чиқилсин» деган буйруқ келди. Полк тушган эшелонлар Петроградга йўл олди. Еттинчи июлда эса казак отлари пойтахтнинг кўчаларига ётқизилган ғўлаларни тўқиллатиб юра бошлади.

Полкни Невский кўчасидаги уйларга жойлаштирилар. Бўш ётган бир магазинни Листницкийнинг сотнисига бердилар. Бу ердагилар казакларга интизор эканлар, шодлик ила кутиб олдилар. Пойтахт ҳукмрон доираларининг казаклар учун ажратилган уй-жойларни ҳафсала билан жиҳозлаганлари бунга шоҳид эди. Оҳак билан оқланган деворлар ярқираб турар, ишқалаб ювилган поллар ёғ тушса ялагундек тоза, қарағай тахтадан ясалган янги сўрилардан хушбўй смола ҳиди келиб турар; ярим подвалли бино ичи ёруғ ва шинам эди. Листницкий пенсне тақиб олиб, бино ичини диққат билан кўздан кечириб чиқди, кўзни қамаштиргудек оппоқ деворлар бўйлаб юриб, туриш учун бундан қулайроқ жой топиб бўлмас, деган фикрга келди. У бинони кўриб чиқиб, қаноат ҳосил қилгач, казакларни кутиб олишга мушарраф бўлган шаҳар маҳкамасининг башанг кийинган паканагина вакили ҳамроҳлигига ҳовлига чиқиб кетаётган ҳам эдики, ёқимсиз бир ҳодиса рўй берди; энди эшик тутқичини ушлагандан учи ўткир бир нарса билан деворга тирнаб солинган бир расмни — тишларини иржайтириб турган ит билан супурги суратини кўриб қолди. Афтидан, бинони жиҳозлашда меҳнати сингган ишчилардан бири бу жойнинг ким учун ҳозирланаётганини билган бўлса керак...

Листницкий қошлиарини пирпиратиб ҳамроҳи бўлган вакилдан:

— Бу нимаси? — деб сўраб қолди.

Шаҳар маҳкамасининг вакили битдек кўзларини расмга югуртириб, бурнини қаттиқ тортиб қўйди. Юзига юргурган қондан шу қадар қизариб кетдики,

ҳатто кўйлагининг крахмалланган оппоқ ёқаси ҳам пушти рангга киргандай бўлди...

— Кечирасизлар, офицер жаноблари... Ёмон ни ятли бир кимса...

— Ишонаманки, бу ерга опричнина¹ эмблемасини солғанларидан сиз бехабар қолгандирсиз?

— Худо асрасин, эсимни ебманми? Афв этинг!.. Большевикларнинг макри... Аллақандай бир абллаҳ журъат этиб шу ишни қилибди!.. Мен дарҳол деворни бошқатдан оқартиришни буюраман. Буни қаранг-а! Кечирснилар... бемаъни бир иш... Сизга ростини айтсам, бирорвнинг қилган қабиҳ ишидан мен уялиб кетяпман...

Хижолатпазлиқдан ерга кириб кетай деган гражданинга Листницкийнинг астойдил раҳми келиб кетди. У ўқрайиб қараб турган кўзларининг ифодасини юмшатиб, сиполик билан:

— Рассом андек хатога йўл қўйибdir,— деди.— Казаклар рус тарихини билмайдilar, ахир. Аммо билib қўйингки, бизга бундай муносабатда бўлганларнинг бошини силамаймиз.

Шаҳар вакили оппоқ қўлларининг тирноғи билан оҳак устидаги расмни тирнаб ўчира бошлади, қиммат баҳо инглиз нусха пальтоси устига майда оҳак кукуни тўкилиб, уни ифлос қилди, у эса ҳамон оёғининг учига босиб бўйини чўзиб девордаги расмни ўчирад, Листницкий эса пенсне ойнасини артиб, илжаярди, лекин шу он бир нарса унга жуда алам қилиб кетди:

«Бизни кутиб олганларини қаранг, зоҳирда мунақа-ю, ботинда унақа!.. Наҳотки, биз бутун Россия кўзига опричнина қиёфасида кўринсак?» деб ўйлади у ҳовлидан юриб отхона томон борар экан. Орқасидан эргашиб келаётган вакилнинг гаплари унинг у қулоғидан кириб, бу қулоғидан чиқиб кетар эди.

Ҳовлидаги чуқур ва кенг қудуқ ичига қуёш нури тик тушиб турарди.

Кўп қаватли уйларда турувчи одамлар деразадан бошларини чиқариб бутун ҳовли саҳнини тўлдирган

¹ О причинина — подшо Иван IV бевосита бошқарган аскарий қисм. (*Тарж.*)

казакларни томоша қилар,— казаклар отларини отхонага опкириб боғламоқда эдилар. Қўллари бўшаган казаклар эса тўп-тўп бўлиб, девор бўйида, салқинда чўққайишиб ўтиришарди.

— Йигитлар, нега уйга кирмайсизлар?— деб сўради Листницкий.

— Кириш қочмайди, жаноб ясовул.

— У ер ҳам кўнгилга ураг.

— Отларни жойлаб, сўнг кирамиз.

Листницкий отхона учун ажратилган омборни кўздан кецирди. Орқасидан эргашиб юрган вакилга нисбатан аввалги адоватини сақлаб:

— Тегишли одамлар билан келишиб, бизга яна бир эшик очдириб беринг. Юз йигирма от учун учта эшик бизга кифоя қилмас. Мабодо тревога бўлиб қолса отларни етаклаб олиб чиқмоқ учун яrim соат вақт кетади... Қизиқ! Ажабо ўз вақтида шуни назарда тутмоқ мумкин бўлмасми? Мен бу ҳақда полк командирига маълумот топширишга мажбур бўлман.

Шу бугун бир эмас, икки эшик очиб бериш тўғрисида вакилнинг ваъдасини олгандан кейин, Листницкий у билан хайрлашиди; қилган ғамхўрлиги учун унга қуруққина ташаккур билдиргандан кейин, навбатчилар белгилаш тўғрисида бўйруқ берди-да, иккинчи қаватда офицерлар учун вақтинча ажратилган квартирага чиқиб кетди. Йўл-йўлакай кителининг тугмаларини ечиб, шапкаси остидан оқиб тушган терни артди, сўнгра орқа зинадан юриб, намхуш, салқин бўлмасига кирди-ю, кўнгли очилиб кетди. Квартирада ясовул ёрдамчиси Атаршчиковдан бўлак ҳеч ким йўқ эди.

Листницкий ўзини брезент каравотга ташлаб, чанг босган этикдаги оёқларини осилтириб олди-да:

— Бошқалар қаёқда?— деб сўради.

— Кўчада. Петроградни томоша қилишялти.

— Сен нега бу ерда ўтирибсан?

— Э, томошанинг нима лузуми бор. Кириб келмасдан бурун дарров кўчага чиқиб кетишиди. Мен бу ерда бир неча кун аввал содир бўлган ҳодисалар ҳақида ёзилган нарсаларни ўқимоқдаман. Мароқли!

Листницкий тердан жиққа ҳўл бўлган кўйлаги орқасига муздек бўлиб тегаётганидан ҳузур қилиб, индамай чўзилиб ётди. У ўрнидан туриб ювенишга эринар, йўлда қаттиқ чарчагани энди билинганди. Ниҳоят, ўзини зўрлаб ўрнидан турди-да, чопарни чақирди. Кўйлак-лозимини алмаштириб, узоқ ювениди, роҳатланиб пишқира-пишқира момиқ сочиқ билан қорая бошлаган бўйинни артди.

— Вания, сен ҳам ювин,— деб маслаҳат берди Атаршчиковга:— елкангдан тоғ тушиб кетгандек бўлади... Хўш, газеталарда нима хабарлар бор?

— Нафси замон, бир ювениб олиш керак. Яхши бўлади, деяпсанми? Газеталардаги нима хабарлар бўларди? Большевикларнинг хуружи тасвир этилган, ҳукуматнинг кўрган чоралари баён қилинганд... Ўзинг ўқиб кўр!

Ювениб енгил тортган Листницкий газетани қўлга олган ҳам эдики, уни полк командири ҳузурига чақириб қолишиди. У эринибигина ўрнидан туриб, совун ҳиди уриб қолган, йўлда ғижимланиб тахи бузилган янги кителини кийди-ю, катта кўчага чиқди. Кўчанинг нариги бетига ўтиб олгач, орқасига ўгирилиб, сотня жойлашган бинони кўздан кечира бошлади. Ташқи кўриниши ва услуби жиҳатидан бу уй бошқалардан фарқ қилмас эди: беш қават, усти ғадир-будур кул ранг тош билан қопланган бу бино ўзи сингари иморатлар қаторида саф тортиб туради. Листницкий папиросини тутатиб олиб, тротуардан юриб кетди. Похол шляпа, котелок, кепка кийган эрлар, оддий ва серҳашам нафис шляпа кийган аёллар кўчада ғужфон ўйнар эди. Оломон тўлқини ичиди гоҳо биронта аскарнинг одми кўк фуражкаси кўриниб кетарди-ю, шу он ранг-баранг алвон кийимлар орасида ғойиб бўларди.

Денгиз қирғонидан салқин ва оромбахш шабада эсиб турагар, аммо баланд иморатларга келиб урилиб. кучини йўқотар, ҳар ёққа таралиб кетарди. Пўлат рангли, зангори тусдаги хира осмонда булутлар кун юриш томонга қараб сузиб кетмоқда. Уларнинг сутдек оппоқ сиртлари қиррали ва кунгирадор. Шаҳар устини ёмғир олдидаги димиқтирувчи буғ чулғаб ол-

ган. Қизиган асфальт ҳиди, ўткир бензин иси анқир, яқин орадаги денгизнинг гавжум шаҳарга хос бўлган аллақандай, турли-туман ислар, кишини маст этувчи ҳафиф атири ҳидлари келиб турар эди.

Папирос чекиб кетаётган Листницкий ўнг томондаги тротуардан салмоқлаб юриб борар, ўзига йўловчилар ҳурмат назари билан қиё боққанларини аҳён-аҳёnda пайқаб қолар эди. Бошда у ғижимланган кители ва эски фуражкаси учун андек хижолат тортди, лекин сўнгра фронтдан келган, айниқса шу бугуноқ вагондан тушган офицерга ташки қиёфаси учун уялиш ножӯя деган фикрга келди.

Магазинлар ва кафеларнинг эшиклари устига тортиб қўйилган брезент соявонлардан тротуарларга сарғиши ола-чалпак соя тушиб, чайқалиб турар эди. Шамол офтобда куйган брезент соявонни силкиб тебратар, тротуарлардаги соялар жимжима қилас, ўткинчиларнинг шипиллаган оёқлари остидан сирғаниб кетгандай бўларди. Вақт чоштгоҳдан ошиб, кун дим бўлишига қарамай, кўчада одам қайнар эди. Уруш йилларида шаҳардан бегоналашиб қолган Листницкий кулги, автомобиль гудоклари, газетфурушларнинг қийқириқлари билан тўлган ранг-баранг товушларга хурсанд бўлиб қулоқ солиб борар, башанг кийинган, қорни тўқ одамларни ўзига яқин деб ҳис қилас ва ўйлар эди:

«Ҳаммаларингиз ҳозир нақадар хурсанд, хушчақ-чэқ ва баҳтлисизлар, ҳаммаларингиз: савдогарлар ҳам, биржа даллоллари ҳам, турли мартабадаги амалдорлар ҳам, помешчиклар ҳам, аслзодалар ҳам — ҳаммангиз нақадар мамнунсиз! Бундан уч-тўрт кун илгари аҳволингиз нечук эди? Авом ҳалқ билан солдатлар худди лава каби мана шу кўчалардан оқиб ўтганда авзойингиз қандай эди? Аслини айтганда мен сизларни кўриб ҳам қувонаман, ҳам хафа бўламан. Сизларнинг тинч-омонлигингиз учун хурсанд бўлишимни ҳам билмайман...»

У ўзининг ҳардамхаёллигини таҳлил қилиб кўрмоқчи, унинг манбанини топмоқчи бўлди ва осонгина бир қарорга келди: бунинг сабаби шуки, уруш ва уруш туфайли бошидан кечиргандари уни бу тўқ ва

ўзидан мамнун одамлардан ажратиб қўйган, шу важдан у шундай хаёлга боради.

Юзлари қип-қизил, соқол-мўйлови чиқмаган йигитга кўзи тушиб қолиб: «Манови биққа семиз ёш азamat нега фронтга бормаган экан? Афтидан бирор заводчи бой ёки катта савдогарнинг ўғли бўлса керак... Аскарий хизматдан бош тортган бу абллаҳ. Ватанинни сариқ чақага олмайди, мамлакат ичкарисида қолиб кетиб, чўчқадек семирган, айшини суриб хотинбозлик қиласди...»

«Хўш, ўзинг-чи? Ахир, ўзинг ким билансан?»— деб ўз-ўзига савол ташлади-ю, мийигида кулиб туриб жавоб қилди: «Албатта, мана шулар билан-да, ахир! Мен уларнинг бир зарраси, улар менинг бир заррам... Уларга хос яхши ва ёмон хислатлар қисман менда ҳам бор. Эҳтимол, анови семиз тўнғизга қарагандан менинг терим юпқароқdir. Шу сабабдан мен ҳар нарсани кўнглимга олаверсам керақ, шунинг учун ҳам мен мамлакат ичкарисида қолганим йўқ, ҳалоллик билан фронтга кетдим. Шу важдан ўша вақтда, қишида Могилёвда, бош штабдан жўнаб кетаётган, таҳтдан туширилган императорни автомобилда кўрганимда, унинг тиззасига шалвираб тушган қўлларининг ажойиб бир ҳолда ётишини ва ғамгин важоҳатини кўрганимда қорга ётиб олиб, ёш боладай ҳўнграб йиғладим. Ахир мен революцияни чин кўнглимдан ёқтиромайман, қабул этолмайман! Кўнглим ҳам, ақлим ҳам бовар қилмайди... Жонимни эски ҳаёт учун иккиланмай, солдатасига тўппа-тўғри фидо қиласман. Бошқалар ҳам шундай қила олармикан?»

Февраль ойининг қизғиши шафақ нурига чўмган оқшомини, Могилёвдаги губернатор саройини, совуқдан қиоров босган чўян панжарасини, унинг орқасидаги қорни, юзига ипак дока тутган, қизарган пастаккина қўёш гардишини кўз олдига яққол келтириб, ҳаяжонланганидан ранги бўзариб кетди. Днепрнинг қия соҳиллари орқасида осмон зангори, қизғиши-сариқ тусда товланар, уфқ чизиқлари шу қадар ҳафиҳ ва муаллақ эдики, кўзни қамаштириб юборарди. Дарвоза олдида бош штабда ишловчи бир неча ҳарбий

ва граждан кийимидағи амалдорлар.... Жұнаб кета-
ётган усти ёпиқ автомобиль... ойнадан, афтидан Фре-
дерикс билан орқасига суюниб қолган подшо күрина-
ди. Подшонинг озғин юзи күм-күк күкариб кетган.
Оқариб кетган пешонасига казак конвой соқчилари
киядиган қора папогини қийшайтириб кийиб ол-
ган.

Листницкий ўзига ҳайратомуз қараган одамлар
єнидан ғизиллаб ўтиб кетар эди. Қора папогига қўл
тегизиб честь берган подшонинг бирдан қўли тушиб
кетгани кўз ўнгидан нари кетмайди. Жұнаб қолган
машинанинг товушсиз фириллаб кетиши, сўнгги им-
ператорни узатиб қолган халойиқнинг бешарм сукути
қулоғи остида...

Полк штаби жойлашган бинонинг зинапоясидан
Листницкий аста чиқиб борди. Унинг юzlари ҳамон
титрар, йигидан шишиб кетган кўзлари қизарган эди.
Иккинчи қаватнинг майдончасида у устма-уст икки
папирос чекди. Пенснесини артиб, зинанинг икки по-
фонасини бирданига босиб, учинчи қаватга чопиб
чиқди.

Полк командири, Листницкийнинг сотняси ҳуку-
мат идораларини ҳимоя қилиши лозим бўлган район-
ни Петроград харитасидан чизиб кўрсатди, сақлана-
диган муассасаларни бирма-бир санаб кўрсатди, қо-
ровулларнинг қайсисини қачон ва қаерга қўйиш ва
алмаштириш кераклигини батафсил тушунтиргач,
охирида шундай деди:

- Кишки саройга, Керенский ҳузурига...
- Керенскийни сира оғизга олманг,— деди Лист-
ницкий мурдадек оқариб, шивирлаган ҳолда.
- Евгений Николаевич, ўзингизни тутинг...
- Полковник, сиздан ўтинаман!
- Аммо, азизим...
- Илтимос қиласман!
- Сизнинг асабларингиз...
- Ҳозир Путиловскийга бир тўда казакни юбо-
ришни буюрасизми?— деди Листницкий оғир нафас
олиб.
- Полковник лабларини тишлиб туриб жилмайди-
да, елкаларини қисиб жавоб қилди:

— Шу топдаёқ! Тағин взвод офицери билан бирга.

Листницкий штабдан қайтар экан, бошидан ўтган хотиралардан ва полк командири билан суҳбатдан руҳан эзилиб, бўшашиб чиқди. Петроградда турган тўртинчи Дон полкининг казак разъездини бино олдидা турганини кўрди. Офицернинг бўз оти юганида сўлиб қолган гулларга кўзи тушди. Малла мўйловли офицернинг юзида кулги ўйнарди.

Қаттиқ ҳаяжонланган аллақандай кекса бир жаноб тротуардан тушаркан, шляпасини силкитиб:

— Яшасин, ватанни қутқарувчилар!..— деб бақирди.

Офицер ийиб кетиб, честь берди. Разъезд отлари ни йўртдириб кетди. Листницкий казакларни оғиз кўпиртириб олқишлигар жанобга, унинг танғиб бօғланган гулдор галстугига назар ташлади-да, афтини буришириб, энгашганча ўзи турган уйга кириб кетди.

XI

Генерал Корнилов Ғарби-Жанубий фронт бош қўмандони қилиб тайинланибди, деган хабарни 14-полк офицерлари хурсандлик билан кутиб олишди. Корнилов ҳақида меҳр-муҳаббат ва ҳурмат билан гапиришар, уни темир иродали, Россияни (Муваққат ҳукумат боши берк кўчага олиб кириб қўйган Россияни) қутқазишга шубҳасиз қодир бўлган одам деб билишарди.

Хусусан Листницкий бу хабарни қизғин табриклиди. У ўз бўлинмасидаги кичик офицерлар ва ўзига яқин бўлган офицерлар орқали казакларнинг бунга қандай қарашларини билмоқчи бўлди, лекин олган маълумотлари уни хурсанд қилмади. Казаклар чурқ этмас, ёки ҳафсалалари келмай зўрга жавоб беришар эди:

— Бизга барибир...

— Ким билсин унинг қанақалигини.

— Агарда у яраш-яраш қиласман деган бўлса, у вақтда, албатта...

— Унинг баланд мартабага минганидан бизга ниша фойда...

Юксак доирадаги граждан аҳоли ва ҳарбийлар билан алоқаси бўлган офицерлар орасида Корнилов, гўё Муваққат ҳукуматни қистибасга олиб, фронтда ўлим жазосини тиклашни ва армия ҳамда урушнинг тақдирини ҳал қилувчи қатъий чораларни амалга оширишни талаб қилаётган эмиш, деган мишиш гаплар тарқалди. Керенский Корниловдан қўрқар эмиш, уни ўрнидан тушириб фронт бош қўмондонлиги лавозимига бошқа итоатгўй генерални тайинлармиш, дер эдилар.

19 июлда Корниловни олий бош қўмондон қилиб белгиланиши тўғрисидаги ҳукумат ахбороти ҳаммани ҳайратда қолдириди. Офицерлар союзининг Бош комитетида таниш-билишлари кўп бўлган ясовул ёрдамчиси Атаршчиков, ишончли манбаларга суюниб қўйидагиларни ҳикоя қилиб берди. Муваққат ҳукуматга топшириш учун ҳозирланган ёзма докладида Корнилов қўйидаги асосий чораларни амалга оширишни қаттиқ талаб қилган эмиш: бутун мамлакат төрриториясида бўлган аскарлар билан аҳолини суд қилиш учун ҳарбий-дала судларига ҳуқуқ беришни, ўлим жазосини жорий қилишни, интизомга солиши учун ҳарбий бошлиқларнинг жазо чоралари кўриш ҳуқуқини тиклашни; ҳарбий қисмлардаги комитетларнинг фаолиятини чеклаб қўйиш ва ҳоказоларни талаб этган эмиш.

Уша куниёқ кечқурун Листницкий ўз сотняси ва бошқа бўлинма офицерлари билан суҳбатлашиб: «сизлар ким билан?» деган саволни кўндаланг қилиб қўйди.

— Жаноб офицерлар! — деди у ҳаяжонини яширишга уриниб.— Ҳаммамиз бир отанинг боласидек иноқ турамиз. Бир-биримизнинг кимлигимизни биламиз, аммо шу вақтгача ўртамиздаги бирталай чигил масалалар ҳал қилинмай келаётир. Эндиликда, олий бош қўмондон билан ҳукумат орасида келишмовчилик рўй бериши аниқ кўриниб қолган пайтда: «Биз ким билан ва ким тарафдоримиз?» деган савол ол-

димизда кўндаланг бўлади, келинг, дўстларча, очиқ-часига гаплашиб олайлик.

Ясовул ёрдамчиси Атаршчиков бу саволга элдан бурун жавоб берди:

— Мен генерал Корнилов учун ўз қоним ва бош-қаларнинг қонини тўкишга тайёрман! Корнилов соғ кўнгил, ҳалол одам, ёлғиз угина Россияни оёққа турғизишга қодирдир. Армияда қилаётган ишини томоша қилинг! Фақат унинг шарофати билан ҳарбий бошлиқларнинг қўллари баланд бўлиб қолди, бўлмаса, комитетлар зўравонлик қилаётган эди, фронтда биродарлашув, дезертирик авжига чиққан эди. Бу тўғрида гап бўлиши мумкин эмас. Ҳар бир виж-донли киши Корнилов тарафдоридир!

Оёқлари чиллакдек, лекин кўкраги кенг, фўлабир Атаршчиков қизишиб гапирди. Кўтарилган масала уни қаттиқ ҳаяжонга соларди. У гапини тамом қилиб, стол атрофини қуршаб олган офицерларга кўз югуртириди, нима дер эканлар, деб кутгандай, папироснинг орқаси билан портсигарини тўқиллатиб қўйди. Ўнг кўзининг пастки қовоғида нўхатдай сўгали бор эди. Ў қовоқларининг жипс юмулишига халал берарди, шу важдан Атаршчиковга биринчи қарашда у ўзини катта олиб, кинояомуз кулиб турибди деб ўйлаш мумкин эди.

— Большевикларни танлайсанми, Керенскийними ёки Корниловними, дейишадиган бўлса, биз албатта Корниловни танлаб оламиз.

— Корниловнинг муроди нима эканлигини билиш қийин: у Россияда фақат тартибни тикламоқчими, ёки бирор бешқа нарсаними...

— Бу—асосий саволга жавоб эмас.

— Йўқ, жавоб!

— Мабодо жавоб бўлса ҳам, ҳар ҳолда маъқул жавоб эмас.

— Сиз нимадан қўрқяпсиз, юзбоши? Монархиянинг тикланишиданми?

— Мен бундан қўрқмайман, аксинча, муддао-йим шу.

— Бас, нега гапни айлантиряпсиз?

— Жаноблар!— деди чўрт кесиб Долгов шамол-

лаб хириллаб қолган овоз билан. Яқиндагина вахмистр бўлган бу казак жангда кўрсатган жасорати учун хорунжий унвонини олган эди.—Нима тўғрида масала талашяпсиз? Гапнинг ўғил боласини айтинг, биз, казаклар, онаси ning этагига ёпишиб олган боладай, генерал Корниловга таянишимиз керак, денг. Соф кўнгил билан, очиқасига шуни айтинг! Биз ундан ажралиб қолсак адойи-тамом бўламиз. Россия кулимизни кўкка совуради. Масала равшан: у қаёққа бошласа биз ҳам шу ёққа юрамиз.

— Гап деган бундай бўлибди-да!

Атаршчиков, завқи келиб Долговнинг елкасига қоқиб қўйди-да, кулиб турган кўзларини Листницкийга тикди. Евгений эса жилмайиб, ҳаяжонга тушиб, шимининг тиззасидаги ғижимини қўли билан текислади.

— Хўш, нима дейсиз, жаноб офицерлар, атаманлар?—деди Атаршчиков овозини баландлатиб.—Корнилов тарафини оламизми?

— Ҳа, албатта!

— Долгов, мушкул муаммони бирласда ҳал қилди-қўйди.

— Ҳамма офицерлар Корнилов тарафдори.

— Биз бир чеккада қолишни истамаймиз.

— Қадрдон Лавр Георгиевич шарафига, қаҳрамон казак шарафига — ура!

Офицерлар кулишиб, чашкаларини бир-бири билан уриштириб чой ичдилар. Суҳбат бояги кескинлигини йўқотиб, сўнгги кунларда рўй берган воқиалар устига кўчди.

— Биз баримиз олий қўмондон тарафдори, лекинига казаклар мижғовлик қиласпти...— деди Долгов дудмоллик билан.

— «Мижғовлик» қиласпти деганинг нимаси?—деб сўради Листницкий.

— Мижғовлик қиласпти-да. У итваҷчаларнинг уйларига, хотинлари ёнига боргиси кеп қолган... Ит ётиш, мирза туриш жонларига теккан...

— Бизнинг вазифамиз — казакларни орқамиздан эргаштиришдан иборат бўлиши керак!—деб юзбоши Чернокутов столни муштлади.—Эргаштириш керак!

Офицерлик погонини нима қилиб тақиб юрибмиз, ахир!

Казакларга уларнинг дўсти ким, душмани ким аста-секин тушунтириш керак.

Листницкий қошиқ билан стаканни жингиллатди; ҳамма офицерларнинг диққатини ўзига жалб қилгандан кейин, дона-дона қилиб галира бошлади.

— Жаноблар, шуни ёдингизда туtingки, бизнинг ишимиз, Атаршиков айтгандай, казакларга ҳақиқий аҳволни тушунтиришдан иборат. Казакларни комитетлар таъсиридан қутқариб олмоқ зарур. Бунинг учун феъли-авторимизни ўзгартиришимиз керак. Чунончи, кўпчилигимиз, февраль революциясидан кейинги аҳволга қандай чидаб келган бўлсак, ҳозир ҳам ўшандай чидаш бериш керак. Илгариги вақтларда, масалан, ўн олтинчи йилда, биронта казакни калтакласам, урушда гарданимдан ўқ ейиш хавфи остида қолган бўлардим, февралдан кейин қўлимизни калта қилишга мажбур бўлдик, чунки мен бирорта аҳмоқни дўпосласам, қулай пайт пойлаб ўтирасдан, мени окондаёқ ўлдириб қўйган бўлар эди. Энди аҳвол бутунлай бошқача. Биз энди,— Листницкий урғу бериб гапирди,—казаклар билан оға-ини тутунишимиз лозим! Ҳамма нарса шунга боғлиқ. Биринчи ва Тўртинчи полкларда нима воқиалар бўлаётганидан хабарингиз борми?

— Даҳшат!

— Рост, даҳшат!—деб гапида давом этди Листницкий.—Офицерлар худди аввалгидек казакларни назар-писанд қилмай, натижада казакларнинг бари большевиклар таъсири остига тушиб қолган, уларнинг ўzlари ҳам большевиклашган. Маълумки, олдимизда турган даҳшатли воқиалар гирдобига тушмай иложимиз йўқ. Учинчи ва бешинчи июль — бегам юрган ҳамма одамлар учун қаттиқ огоҳлантириш бўлди. Ё биз Корниловга эргашиб революцион демократияга қарши жанг қиласмиз, ё бўлмаса большевиклар куч йиғиб, ўз таъсирини кучайтириб, яна бир революция қиласдилар. Улар дам олиб, куч тўплаятилар, биз эсак лапашанглик қиляпмиз... Шундай аҳволга йўл қўйиб бўладими?! Қелажакда бўла-

диган тўс-тўполонда ишончли казак кунимизга яраб қолади...

— Казаклар бўлмаса қўйисиз қўйчивондек гапмиз,—деди хўрсиниб Долгов.

— Гапингиз тўғри, Листницкий!

— Жуда тўғри.

— Россиянинг бир оёғи гўрда...

— Нима, буни тушунишмайди, деб ўйлайсизми?

Тушунамиз-у, лекин бирор ишни қилишга қурбимиз етмайди. «Приказ № 1»¹ ва «Окопная правда»² нинг сочган уруғлари ўсиб чиқяпти.

— Биз ўсиб чиқсан бу майсани босиб-янчиб, ўт қўйиб куйдириш ўрнига, уни томоша қилиб завқланамиз!—деб қичқириб юборди Атаршчиков.

— Йўқ, биз томоша қилиб завқланаётганимиз йўқ,—биз ожизлик қиляпмиз.

— Гапингиз нотўғри, хорунжий! Бизда ғайрат йўқ, холос.

— Ёлғон!

— Испот этинг!

— Секинроқ, жаноблар.

— «Правда»ни тор-мор қилдик... Керенскийнинг ақли тушдан кейин киради.

— Бу нима... от бозорми? Қўйинглар-э!

Пала-партиш гаплар, ҳайқириқлар секин-аста тинди. Листницкийнинг сўзларига қизиқиб қулоқ солиб ўтирган юзбошилардан бири, гап сўради.

— Мен нутқини тамомлаш учун ясовул Листницкийга имкон беришни таклиф этаман.

— Сўраймиз!

Листницкий мушти билан тиззасининг кўзини ишқалаб, сўзини давом этдириди:

— Фикримча, келажакда бўладиган жангларда, гражданлар урушида (мен гражданлар урушининг муқаррарлигини ҳозиргина пайқадим), бизга содик

¹ Петроград советининг Ижроия комитети революцион кайфиятдаги омманинг тазиқи остида 1917 йил 1 марта ҳарбий қисмларда сайлаб қўйиладиган ташкилотлар барпо этиш ва эски чор офицерлари устидан бу ташкилотларнинг контроллигини жорий қилиш тўғрисида фармон чиқарган эди.

² «Окпоная правда» — жанговар большевиклар газетаси.

бўлган казакларга ишимиз тушади. Жон-жаҳдимиз билан тиришиб, уларни большевикларга мойил бўлган комитетлар таъсири остидан ажратиб олмоғимиз зарур. Ниҳоятда зарур! Мабодо янги бир тўнтарин бўлса борми, Биринчи ва Тўртинчи полк казаклари ўз офицерларини отиб ташлагусидирлар...

— Турган гап!

— Аяб ўтиришмайди!

— Уларнинг тажрибалари,—кези келганда айтиб ўтай,—аччиқ тажрибалари биз учун сабоқ бўлиши лозим. Биринчи ва Тўртинчи полк казакларининг (энди уларни қандай казак деб атаб бўлади?) кела жакда иккитадан биттасини осишга ёки ҳаммасини гумдан қилишга тўғри келади... Ёввойи ўтни тагтомири билан юлиб ташламоқ зарур! Келинг, ўз казакларимизни келажакда фалокатга олиб бора-диган хатолардан асраб қолайлик.

Листницкийдан сўнг, унинг сўзларини зўр диққат билан тинглаган юзбоши сўз олди. Полкда тўққиз йил хизмат қилган, урушда тўрт марта яраланган бу кекса офицер, қадимда хизмат қилиш осон бўлмаганини, казак офицерлари оғир аҳволда, қаттиқчилик билан кун кўрганини, хизмат поғоналарида юқори кўтарилиш суст борганини, офицерларнинг кўпчилиги учун қўшин старшинаси деган унвон энг сўнгги марта бўлганини гапириб, чор ҳукумати ағдарилган пайтда казак бошлиқларининг лоқайдлигини шу билангина изоҳлаш мумкин деди. Аммо бунга қарамасдан, деди у, Корниловни жон-жаҳдимиз билан қўллаб-қувватлаш, казак қўшинлари союзи Совети ва Офицерлар союзи Бош комитети орқали у билан алоқани мустаҳкамлаш зарур.

— Майли, Корнилов диктатор бўлсин, казак қўшинлари учун бу нажот бўлади. У ҳукмдор бўлса, эҳтимол, биз подшо вақтидагидан ҳам яхшироқ яшармиз.

Вақт ярим кечадан ошган. Шаҳар устини кумуш ранг тун қоплаб олган, осмонда паға-паға оқ булутлар сузид юради. Деразадан адмиралтейство¹ чўққи-

¹ Олий ҳарбий денгиз бошқармаси. (Тарж.)

сидаги минора найзаси қорайиб кўринади, чироқ нурларининг сарғиши нурлари ҳар ёқни тўлдирган.

Офицерлар гаплашиб ўтириб тонг отдирилар. Ҳафтада уч марта казаклар билан сиёсий мавзуларда суҳбат ўтказишга қарор қилдилар, взвод офицерларига ҳар куни ўз взводлари билан гимнастика ўтказиш ва китоб ўқиб бериб туриш вазифаси юклатилди, шу билан казакларнинг бўш вақтларини машғул қилиб, уларни заарали сиёсий таъсирлардан қутқариб қолмоқчи бўлдилар.

Ўй-уйларига кетишдан олдин «Тошди, мавж урди проваслав тинч Дон» ашуласини айтдилар, ўнинчи самоварни ичиб тугатдилар, ҳазиллашиб стаканларни бир-бирига уриштириб, қадаҳ кўтардилар. Тарқалиш олдида Атаршчиков Долгов билан шивирлашиб олиб:

— Энди, овқатдан кейин ейиладиган ширинлик ўрнига сизни қадимий казак ашуласи билан хушнуд қиласмиш. Қани, жим бўлинг! Деразани ҳам очиб юборинг, уй тамаки тутуни билан тўлибди,—деди.

Икки товуш—Долговнинг дўриллаган ва бўғиқ овози билан Атаршчиковнинг жуда ёқимли ингичка товуши бошда бир-бирига қовушмади, ҳар бири ўзи хоҳлаган авжда ашула қилди, лекин бора-бора уларнинг товуши бир-бирига монандлашиб, кишини мафтун этувчи жарангдор оҳанг касб этди.

Бизнинг тинч Дон нақадар мағрурдир, бош эгмаган
Мусулмонлар олдида, у яшаш тартибини
Сўрамаган Масковдан, Туркия билан фақат
Ўткир қилич тили-ла сўзлашиб келган ҳар вақт.
Жондан азиз онамиз — Дон даштлари ҳар замон
Бизни муборак Маръям, проваслав динимиз,
Ҳамда тўлқинли дарё — эркин ва тинч Донимиз —
Учун доим душман-ла жанг қилишга чорлаган.

Атаршчиков панжаларини тиззаси устида чалмаштириб, овозини барада қўйиб, чинқириб ашула бошлади, Долговнинг дўриллаган овозини орқада қолдириб кетган бўлса ҳам, лекин овозини турли мақомга солиб, бирор марта ашулани бузмади. Атаршчиков кўринишида жуда қаҳрли эди, аммо Листницкий, унинг пастки қовоғидаги қизғиши холи

устидан йилтираб совуқ ёш оқиб тушганини пайқаб қолди.

Бошқа сотня офицерлари тарқалишиб, қолганлар ухлагани ётгандан кейин, Атаршчиков Листницкий каравотининг четига ўтириди-да, шимини кўтариб турган кўк тасмани ўйнаб туриб шивирлади:

— Биласанми, Евгений... Мен Донни, казакларнинг асрлардан бери давом этиб келаётган эскича ҳаёт тарзини ўлгудек яхши кўраман. Ўз казакларимизни, казак аёлларини севаман! Чўлда битган шувоқ ўтнинг ҳиди бурнимга келиб урилиши билан ҳўллигим келади... Ёки кунгабоқар гуллаганда, Дон қирғоқларидағи ёмғирдан ивиган токларнинг хушбўй иси келганда, Донни жонимдан ҳам ортиқ севаман билсанг... Аммо миямга шундай бир ўй келди: биз ўша казакларни лақиллатадаётганимиз йўқмикан? Биз уларни тўғри йўлга бошлайпмизми экан?

— Нима демоқчисан? — деб сўради Листницкий сергакланиб.

Атаршчиковнинг оқ кўйлаги ёқасидан чиқиб турган қорача бўйни болаларникидай маъсум ва ёқимтой эди. Жигар ранг холи устидаги қовоғининг кўкиш киприклари осилиб турар, ён томондан яrim ёпиқ намли кўзининг филтиллагани кўриниб турарди.

— Казакларга шу нарсанинг ҳожати борми, деб ўйлайман.

— Ундаи бўлса, уларга нима керак?

— Билмасам... Аммо нима сабабдан улар ўз-ўзларича биздан узоқлашаётирлар? Революция гўё бизни қўй ва такалар сингари бир-бирамиздан айрди, бизнинг манфаатларимиз бир-бирига зидга ўхшайди.

— Афтидан,—деб эҳтиёт бўлиб гап бошлади Листницкий,—бу нарса ходисаларни турлича тушунишдан келиб чиқади. Биз жуда маданиятлимиз, биз у ёки бу фактга танқидий кўз билан қараб баҳо берса оламиз, казаклар эса ҳар нарсани содда, ибтидоий суратда англайлар. Большевиклар, урушни битириш керак, тўғрироғи, уни гражданлар урушига айлантириш керак, деб уларнинг бошларини айлантирадилар. Улар казакларни бизга қарши қутқуга

соладилар, казаклар чарчаган вақтида одамгарчилигини йўқотади, ватан олдидаги бурчлари ва масъулиятларини ҳам унтишади (улар бизга ўхшаган эмас) шу сабабдан, большевикларнинг бу тарғиботи учун улар орасида қулай замин бор, бу ойнадек равшан. Улар учун ватан деган гап нима? Ҳар ҳолда улар учун бу мавҳум тушунча. Улар: «Дон қўшини Области фронтдан узоқ, немис у ерларгача етиб боролмайди» деб ўйладилар. Ҳамма бало шундада. Уларга, бу урушни гражданлар урушига айлантиришинг оқибати нима бўлишини тўғри тушунтириш лозим.

Листницкий гап уқтирап экан, сўзлари мўлжалга бориб тегмаётганини, Атаршчиков ўз чиғаноғига кириб олган шиллиқ қуртдай қалбининг сирларини яширишини ҳис этар эди.

Дарвоҷе шундай бўлди: Атаршчиков бир нарса деб тўнгиллади, кейин анчагача чурқ этмай ўтиради. Листницкий нафаси ичига тушиб кетган сафдошининг хаёлидан қандай фикрлар ўтаётганини, минг уринса ҳам, пайқаб ололмади.

«Фикрини охиригача айтиш учун имкон берсам бўлар экан...» деб ўйлади у афсусланиб.

Атаршчиков унга «яхши ётиб туринг»,—деди-да, бир оғиз сўз айтмасдан чиқиб кетди. Бир дақиқа самимий суҳбат қилишни истаган эди, ҳар бир одам сингари ўз сирини кўнгил ёриб дардлашмоқчи бўлган эди-ю, лекин ботинолмади.

Бегона, яширин сирни билиб ололмагани учун Листницкийнинг кўнгли ғаш бўлиб қолди. У папирос чекиб, кўзларини қоронғига тикиб бир оз ётди-да, Аксиньяни, отпускада у билан бирга ўтказган ширин кунларини эслади. Турли фикрлар ва ҳаётида дуч келган хотинлар ҳақидаги тасодиғий, бир-бирига боғланмаган хотираларга берилиб уйқуга кетди.

XII

Листницкий сотнясида Буканов станицасидан келган Иван Лагутин исмли казак бор эли. Биринчи сайловда у полк ҳарбий-революцион комитетига аъзо

бўлиб сайланди, полк Петроградга келмасдан бурун у ҳеч қандай иш билан ўзини кўрсатмаган эди, аммо июлнинг охирги кунларида взвод офицери Листницкийга қўйидагича маълумот берди: Лагутин Петроград ишчи ва солдат депутатлари Советининг ҳарбий секциясига қатнаб туради, Совет билан алоқа қилган бўлиши ҳам мумкин, нимагаки ўз взводидаги казаклар орасида тез-тез суҳбат ўтказиб тургани сезилиб қолди, казакларга салбий таъсир кўргазяпти. Сотнида қоровул туриш ва разведкага чиқишдан икки марта бош тортиш воқиаси юз берди. Взвод офицери бу ҳодисанинг сабаби — Лагутиннинг казакларга кўрсатган таъсири бўлса керак деб тахмин қиласарди.

Листницкий, ҳар қалай, Лагутин билан яқиндан танишиш, уни синааб кўришга қарор қилди. Уни чақириб очиқасига суҳбатлашиш аҳмоқлик ва эҳтиётсизлик бўлур эди, шу важдан Листницкий сабр қилиб пайт пойлаб юрмоқчи бўлди. Кўп ўтмай, қулай фурсат топди. Июль охирида учинчи взвод, навбат бўйича, Путилов заводига олиб борадиган кўчаларни кечаси билан қўриқлаб чиқиши лозим эди.

Листницкий взвод офицерини огоҳлантириб:

— Казаклар билан ўзим бораман,—деди.— Буюринг, қора тўриқни эгарласинлар.

Листницкий, ўзининг таъбирича, ҳар эҳтимолга қарши, иккита от сақлар эди. Даракчисининг ёрдами билан кийиниб, у ҳовлига тушди. Взвод от устида эди. Маржондек чироқлар билан ёритилган туманли қоронғилик ичида бир неча кўчани босиб ўтдилар. Листницкий жўрттага орқада қолиб Лагутинни ҷақирди. Лагутин кўримсизгина отининг бошини буриб, ясовул ёнига келди-да, унга кўз қирини ташлаб, сабр қилиб турди.

— Комитетингизда нима янгиликлар бор? — деб сўради Листницкий.

— Ҳеч қандай янгиликлар йўқ.

— Сен ўзинг қайси станицадансан, Лагутин?

— Букановдан.

— Қайси хутордан?

— Митякиндан.

Энди уларнинг отлари ёнма-ён борар, Листницкий фонарь ёруғида серсоқол казакнинг юзига кўз қирини ташлар эди. Лагутиннинг фуражкаси остидан чиқиб турган силлиқ соchlари кўринарди, кулчадек тўла юzlаридаги соқоли яккам-дуккам, туртиб чиқсан қалин қош усти суюклари остидаги маъноли айёр кўzlари ботиқ.

«Кўринишдан содда ва ғамгин одамга ўхшайди, лекин кўнглида нима борлигини ким билади? Эҳтимол, эски усули идора ва «капрал таёфи» билан боғлиқ бўлган нарсалар каби мени кўрарга кўзи йўқдир!..» деб ўйлади Листницкий ва нимагадир Пагутиннинг ўтмишини билгиси келиб қолди.

— Бола-чақалимисан?

— Ҳа, хотиним ва иккита болам бор.

— Рўзгоринг-чи?

— Қанақа рўзгор?—деб жавоб қилди Лагутин истеҳзо аралаш таассуф ила.—Бир амаллаб очинтўқин кун кечиряпмиз. Гоҳ ҳўқиз бизни боқади, гоҳ биз ҳўқизни... Бутун умр шу зайлда саргардону сарсонмиз... Еримиз бўлса қумлоқ,—деди у ўйланқираб, қовоғини осилтириб туриб.

Листницкий бир маҳал Буказовдан ўтиб Себряково станицасига борган эди. У катта ўйлдан узоқда бўлган станицани кўз олдига келтирди, жануб томони кўз илғамас теп-текис ўтлоқ, ўтлоқнинг этак томонида Хопер дарёси илон изи бўлиб оқади. Ушанда бир тепа устида туриб, Еланск томондан, ўн икки чақирим нарида ялангликдаги кўм-кўк боғларни, баланд черковнинг шувоги кўчган оппоқ жомхонасини кўрган эди.

— Қумлоқ ерлар,—деб хўрсинди Лагутин.

— Уйингга кетгинг келар-а, балким?

— Ҳа-да, жаноб ясовул! Албатта! Қанотим бўлса учиб кетардим. Урушда не-не кулфатларни кўрмадик.

— Аммо, оғайни, тезда уйга қайтиш бизга муясасар бўлмас.

— Бўлади.

— Ахир урушни тугатганимиз йўқ-ку, ҳали?

— Тезда тугатадилар. Кўп ўтмай, уй-уйимизга кетамиз,—деди Лагутин қаттиқ туриб.

— Ҳали ўзаро урушлар ҳам бўлиши турган гап. Сен нима деб ўйлайсан?

Лагутин эгарнинг қошидан кўзини олмай, жим турди-да:

— Ким билан урушамиз?—деб сўради.

— Ким билан бўларди... Масалан, большевиклар билан.

Лагутиннинг нафаси яна ичига тушиб кетди, худди отларнинг туёқ товушлари аллалагандай бўлди-ю, мудрай бошлади. Уч минутча индамай йўл юриши. Лагутин дона-дона қилиб:

— Отамиздан мерос қолибдимики, улар билан талашсак,—деди;

— Ер-чи?

— Ер ҳаммага етади.

— Сен большевикларнинг асл мақсадини биласанми?

— Бир оз биламан.

— Борди-ю, большевиклар бизнинг ерларимизни тортиб олиш, казакларни асоратга солиш учун устимизга бостириб келсалар, нима қилиш керак деб ўйлайсан? Сен немислар билан урушиб, Россияни ҳимоя қилгансан-ку, ахир?

— Немислар — бошқа гап.

— Большевиклар-чи?

— Нима деб ўйлайсиз, ясовул жаноблари,—деб дангал гапиришга қарор қилди. Лагутин бошини кўтарганича Листницкийнинг кўзларига тикка қараб.— Большевиклар менинг бор-йўқ бир парчагина еримни тортиб олмайдилар. Менинг бир чек ерим бор, улар менинг еримни бошларига урадиларми... Лекинига айтайлик, сиз тағин хафа бўлманг! Дадангизнинг ўн минг ботмон...

— Ўн минг эмас, тўрт минг.

— Фарқи йўқ, майли, тўрт минг деяйлик,—озмунча ерми?— Ахир шуям инсоф бўлдими? Бутун Россияни олинг,— дадангизга ўхшаганлар сон мингта. Ўзингиз ўйлаб кўринг. ясовул, ҳар бир оғиз бир парча ион сўрайди. Сизда бор оғиз, бошқаларда ҳам

бор, ҳамманинг ҳам егиси келади. Бир лўли ўз байталини овқат емасликка ўргатмоқчи бўпти, бир неча кун емаса, ўрганади, деб ўйлабди. Шўрлик байтал ўн кун чидабди, энди овқат емасликка ўрганганда оёғини чўзибди... Подшо маҳалида замона зўрники, томоша кўрники эди, камбағал нон деса, кесак фирилларди... Дадангизнинг пешонасига тўрт минг ботмон ер битибди, ахир унинг оғзи иккитамас-ку, биз фақирларнига ўхшаш — битта. Бизга ўхшаш битта одамнинг овқатини ея олади. Албатта, халқнинг бу аҳволи одамнинг хўрлигини келтиради! Большевиклар — нишонни тўғри олган, сиз бўлсангиэ — урушимиз дейсиз.

— Сен нима, большевикмисан?

— Гап лақабда эмас...— деди чўзиб Лагутин кинояномуз.— Гап лақабда эмас, ҳақиқатда. Халқ ҳақиқатни излайди, ҳақиқатни эса халқдан яширадилар. Дунёда ҳақиқат йўқ, ўлган дейдилар.

— Демак, депутатлар Советида большевиклар сенга шундай таълим берар эканлар-да... Сен улар билан бекорга оғиз-бурун ўпишмас экансан.

— Эҳ, жаноб ясовул, биздақа сабр-қаноатли одамларга қаттиқ турмушнинг ўзи таълим берган, большевиклар фақат пиликка ўт қўядилар...

— Сен бунақа гапларингни қўй! Сафсата сотиш хонаси эмас!— деб зарда билан гапирди Листницкий.— Менга айт-чи, сен менинг дадам ери тўғрисида, умуман помешчиклар ери тўғрисида гапирдинг, аммо бу — хусусий мулк-ку. Айтайлик, сенинг иккита кўйлагинг бўлса, менини бўлмаса, сенинг фикрингча нима қилишим керак, сеникини тортиб олишим керакми?

Листницкий Лагутиннинг афтини кўрмаса ҳам товушидан унинг илжаяётганини сезди.

— Мен ўзим ортиқча кўйлагимни ечиб бераман. Фронтда ортиқчасини эмас, энг сўнгги кўйлагимни ечиб бериб, ўзим яланғоч баданга шинель кийиб юрганман, аммо ҳеч ким ўз ерини беришни хаёлига келтирмайди...

— Нима, еринг озлик қилияптими? Етишмайдими?— деб сўради Листницкий жекириб.

Лагутиннинг ранги бўздек оқариб кетди, бўғи-
либ:

— Нима, сен у ўзининг ғамини еялти деб ўйлай-
санми?— деб ўшқириб берди.— Польшада бўлдик,
одамлар қандай кун кечиряпти, кўрдингми, йўқми?
Бизнинг мужиклар қандай тирикчилик қиляптилар?..
Мен ўз кўзим билан кўрганман! Одамларнинг юрак-
бағри қон бўп кетди!.. Сен, нима, уларга мени ачин-
майди деб ўйлайсанми? Мен, балким, ўша шўрлик
полякка раҳмим келганидан унинг бир парча ери
тўғрисида ғам ерман.

Листницкий бир гап билан уни узиб олмоқчи бўл-
ган эди, лекин шу топда Путилов заводининг кул
ранг, баланд корпуслари томондан «ушла!» деб чин-
қирган овоз эшитилди. Бир отнинг туёқ товуши,
«пақ» этган милтиқ овози эшитилди. Листницкий
қамчисини ўйнатиб, отини чоптириб кетди.

У Лагутин билан чорраҳада тўпланиб турган
взвод олдига бир вақтда етиб келдилар. Қазаклар
қилич-қинларини шиқиллатиб, отдан тушдилар, ўр-
тада улар ушлаб олган бир одам типирчилаб ту-
тарди.

Листницкий оти билан оломон ичига отилиб
кириб:

— Нима? Нима гап?— деб бақирди.
— Бир аblaҳ, тош билан...
— Тош отиб, ура қочди.
— Аржанов, тумшуғига тушир!
— Ҳа, итвачча! Тошбўрон қилмоқчимисан?

Эгар устида ўтирган взвод урядниги Аржанов от
устидан энгашиб, камарбанд қора кўйлакли бир
одамни орқа ёқасидан ушлаб турарди. Отдан тушган
уч казак унинг қўлларини орқасига бураётган эди.

Листницкий ўзини тутиб туролмай:

— Кимсан ўзинг?— деб сўради.

Қўлга тушган одам бошини кўтарди, юзи бўза-
риб, қимтилган лаблари буришиб кетди.

— Кимсан ахир?— деб Листницкий яна сўради.—
Одамга қараб тош отасанми, аblaҳ? А? Нега нафа-
синг чиқмайди? Аржанов...

Аржанов эгардан сакраб тушди, қўлга тушган

кишининг ёқасини қўйиб юбориб, қулочкашлаб ба-
шарасига туширди.

Листницкий отининг бошини буриб:

— Дўппосланг!— деб буюрди.

Эгардан тушган уч-тўрт казак қўли боғланган
кишини ерга булғаб, қамчи билан сола бошладилар.
Лагутин отдан тушиб, Листницкийнинг олдига келди.

— Жаноб ясовул!.. Бу нима қилганингиз?.. Жа-
ноб ясовул!— у титроқ босган чангак қўллари билан
ясовулнинг тиззасига ёпишиб олиб, бақирди:— Бун-
дай қилиш ярамайди!.. Одам-ку!.. Нима қиляпсиз,
ахир?

Листницкий жиловни силтаб, отини ниқтади, ле-
кин чурқ этмади. Лагутин ўзини казаклар устига
отиб, Аржановнинг белидан ушлаб, қилич қинига
ўралишиб, уни орқага тортди. Аржанов унга қарши-
лик кўрсатиб:

— Жонинг ачимай қўя қолсин! Куюнма! У тош
отса-ю, биз индамай тураверсак бўладими? Қўйвор!..
Яхшиликча қўйвор деяпман!..— деди.

Казаклардан бири бошини эгиб, бўйнидан вин-
товкасини чиқарди-да, қўндоғи билан ерда ётган
кишининг мажақ-мажақ бўлган гавдасига тушира
кетди. Бир лаҳзадан кейин кўча устида чинқирган
бир овоз янгради.

Бир неча секундгача унинг нафаси ичига тушиб
кетди, кейин хиқиллаган ўша аламзада раста овоз
дўриллаб:

— Аблаҳлар!.. Контрреволюционерлар!.. Уринг!..
О-оҳ! А-а-а-а!...— деди. Казаклар устма-уст пақилла-
тиб тушира бошладилар.

Лагутин Листницкийнинг олдига югуриб борди;
унинг тиззасига кўкрагини қўйиб, тирноқлари билан
эгарнинг четини тирнаб, ҳарсиллаган овоз билан:

— Раҳм қил!— деди.

— Қоч дейман!

— Ясовул!.. Листницкий!.. Эшитяпсанми? Жавоб-
гар бўласан!

Листницкий Лагутин устига оти билан бостириб
келавериб:

— Туф бетингга-е!— деб хириллади.

Лагутин бир чеккада турган казаклар олдига югуриб борди-да:

— Оғайнilar! — деб бақирди. — Мен полк ревкомининг аъзосиман... Сизларга буюраман: бу одамни ўлимдан сақлаб қолинг!. Жавоб... жавобгар бўласизлар!... Эски замон эмас!...

Листницкий ўтдай тутақиб, кўзига ҳеч нарса кўринмай қолди. Отининг икки қулоғи орасига қамчи билан уриб, Лагутин устига бостириб келди. Милтиқ мойининг ҳиди келиб турган қоп-қора тўп-пончасининг оғзини унинг юзига тираб:

— Товушингни ўчир, хоин! Большевик! Отиб ташлайман! — деб чийиллади.

Сўнгра ўзини аранг босиб олиб, бармоғини тўп-пончанинг тепкисидан чиқарди-да, отини тортиб, кейинги оёқлари устига турғизди-ю, чоптирганича кетди.

Бир неча минутдан кейин уч казак отларини ҳайдаб унинг орқасидан жўнаб кетди. Аржанов билан Лапиннинг отлари орасида жиққа ҳўл кўйлаги баданига ёпишиб қолган одам оёқларини кўтаролмай чайқала-чайқала тош кўчада судралиб борарди. Унн қўлтиғидан ушлаб олишган эди. Унинг шилқ этиб тушган боши, тутиб чиққан елкалари орасида лиқиллаб борар, оппоқ ияги кўтарилиб қолган, боши мажақланган, қонга беланган эди. Учинчи казак нарироқда борар эди. Ёруғ тушиб турган бир муюлишдаги извошчига унинг кўзи тушди-ю, узанги устида туриб олиб, отини унга томон ўўргалатиб кетди. Извошчига бир нима деб, пўписа учун қамчиси билан этигининг қўнжиға уриб қўйди. Шундан сўнг извошличи итоаткорлик билан шошиб-пишиб, кўча ўртасида тўхтаб қолган Аржанов билан Лапин олдига извошини ҳайдаб борди.

Эртаси куни Листницкий уйғониб, кеча кечириб бўлмайдиган катта бир хато иш қилганини пайқади. Казакларга тош отган кишининг калтаклатганини ва ўзи билан Лагутин ўртасида ўтган можарони эслаб, лабларини тишлади, афтини буриштириб, ўланқираб, йўталиб қўйди. Кийинар экан, полк комитети билан алоқани кескинлаштирмаслик учун, ҳозирча

Лагутинга индамаслик керак, деб ўйлади, кечаги тўқнашув бу можаронинг шоҳиди бўлган казакларнинг ёдидан кўтарилигандан кейин Лагутинни аста йўлдан олиб ташлаш лозим.

Листницкий ўзидан кулиб, истеҳзо билан: «Мана казаклар билан иноқлашиш...» дер эди, у бир неча кунгача бу можаронинг таъсири остида кўнгли хира бўлиб юрди.

Августнинг бошларида, ҳаво очилиб, офтоб ча-рақлаб турган кунларнинг бирида Листницкий Атаршчиков билан шаҳар айлангани кўчага чиқди. Офицерлар мажлиси бўлган кун ораларидан ўтган сұҳбатдан кейин юз берган англашилмовчиликни ҳал этиш учун қулай фурсат бўлмаган эди. Атаршчиков ичидағи сирини ҳеч кимга айтмай, миясидаги ўйини пишириб юрар, Листницкий уни гапга солиб, фикрини билмоқчи бўлгандა, ўз ҳақиқий башарасини бегона кўзлардан яшириш учун бетини ниқоб билан беркитган кишилардай, у ҳам қалбининг қопқофини беркитиб оларди. Листницкий низарида, одамлар бошқалар билан муомала қилганда ташқи қиёфаси остида кўриб бўлмайдиган ҳақиқий башараларни беркитиб юрадигандай туюларди. У, агар ҳар бир одамнинг юзидағи парда олиб ташланса, унинг ҳақиқий, чин башараси очилиб қолади, деб ўйларди. Шу сабабдан, у кўринишдан дағал, қаҳрли, жасур, сурбет, бегам, хушчақчақ одамларнинг ички сирини билиш орзуси билан ёнар эди. Ҳозир у Атаршчиков тўғрисида ўйлаб бош қотирап экан, бир нарсанигина пайқади: у юзага келган зиддиятлардан қутулиш, казак манфаатларини большевизм билан боғлаш йўлини зўр бериб ахтармоқда. Бу тахмини Атаршчиков билан яқинлашиш учун қилган ҳаракатини тўхтатишга, ундан ўзини опқочиб юришга мажбур қилди.

Улар Невский проспектида, у ёқдан бу ёқдан гаплашиб кетмоқда эдилар.

Листницкий кўзлари билан ресторон эшигига ишора қилиб:

— Кириб бир нима тамадди қилмаймизми?— деди.

— Майли.— деб кўнди Атаршчиков.

Улар ресторанга кириб, ҳар тарафга кўз юргутириб, тарвузлари қўлтиқларидан тушди: ҳамма столлар банд эди. Атаршчиков бурилиб чиқиб кетмоқчи бўлиб турган ҳам эдик, дераза ёнидаги стол ёнида икки хоним билан ўтирган, уларга диққат билан қараб турган, хомсемиз, башанг кийимли бир жаноб олдиларига келиб, назокат билан бошидаги цилиндрини кўтарди-да:

— Афв этсинлар! Марҳамат қилиб, бизнинг столга ўтирмайдиларми? Биз кетяпмиз,— деди тамаки тутунидан сарғайган сийрак тишларини кўрсатиб. Кейин кулиб туриб қўли билан столга таклиф этди.— Мен жаноб офицерларнинг хизматларига бажону дил тайёрдирман. Сизлар бизнинг ифтихоримиздирсиз.

Стол ёнида ўтирган хонимлар ўринларидан туришди. Бўйи баландгина, қорақадан келган аёл турмакланган сочини тўғрилаб қўйди, ёшроғи эса шамсиясини ўйнаб кутиб турар эди.

Офицерлар столларини бўшатиб берган жанобга ташаккур билдириб, дераза ёнига ўтишди. Тушириб қўйилган дераза дарпардаси орқали дастурхон устига танга-танга офтоб нури тушиб турарди. Овқат ҳиди столлар устидаги гулларнинг хушбўй ҳидини босиб кетар эди.

Листницкий қўкатлардан пиширилган совуқ шўрва келтиришни буюрди-да, овқат кутиб, вазага қўйилган сариқ гулларнинг баргини битталаб юлиб хаёл суриб ўтириди. Атаршчиков эса дастрўмол билан пешонасини артиб, ҳорғин қўзларини пирпиратиб, ёнидаги столнинг оёғига тушиб, ўйнаб турган офтоб нурига қараб ўтиради.

Улар ҳали овқат еб бўлгунларича йўқ эди, иккита офицер шанғиллашиб гаплашиб, ресторанга кириб келди.

Олдин кирган офицер бўш стол бормикан деб, қўзларини юргутириб, офтобда қорайган юзини Листницкийга ўғирди. Тим қора қийиқ қўзларида шодлик учқуни чақнаб кетди.

— Листницкий! Сенмисан-а?!..— деб бақирди у ва

тап тортмай, Листницкийнинг олдига дадил кела-верди.

Қоп-қора мўйловлари остидан тишлирининг оқи кўриниб кетди. Листницкий ясовул Калмиковни дарҳол таниди, унинг орқасидан келаётган офицер Чубов эди. Улар қатгиқ қўл қисишиб кўришдилар. Листницкий ўзининг илгариги полкдошларини Атаршчиков билан танишириар экан:

— Сизларни қайси шамол учирди? — деб сўради.

Калмиков мўйловларини бураб туриб, боши билан орқасига имлаб, кўзларини аланглатиб:

— Иш билан юбордилар. Кейин айтиб бераман. Сен ўзингдан гапир. Ўн тўртинчи полкда ишлар қай ахволда? — деб сўради.

...Улар биргалашиб ресторондан чиқишиди. Калмиков билан Листницкий орқароқда қолиб, биринчи дуч келган тор кўчага бурилиши. Орадан ярим соат ўтар-ўтмас, шаҳарнинг сершовқин қисмидан чиқишиди, теварак-атрофга қўрқа-писа қараб, шивирлашиб кетишиди.

— Бизнинг Учинчи корпус Руминия фронт резервига туради, — деб жонланиб ҳикоя қила кетди Калмиков. — Бундан бир ярим ҳафтача илгари полк командиридан: сотняни топшириб, юзбоши Чубов билан бирга дивизия штаби ихтиёрига жўнанг, деган ёзма буйруқ олдим. Жуда соз. Топширдим. Дивизия штабига етиб келдим. Оператив бўлимда ишловчи полковник М. (сен уни биласан), маҳфий равища, генерал Кримов ҳузурига дарҳол жўнашим кераклигини билдириди. Чубов иккимиз корпусга жўнадик. Кримов мени қабул қилди, унинг олдига офицерлардан кимларни юборганликларини билгани учун тап тортмай шундай деди: «Ҳокимият тепасида мамлакатни ҳалокатга олиб бораётган кишилар ўтирибди, — ҳукумат бошидагиларни ўзгартириш, эҳтимол, Мувакқат ҳукуматни ҳарбий диктатура билан алмаштириш лозим бўлади». У Корниловнинг бу лавозимга белгиланиши мумкинлигини айтиб, менга, Петроградга офицерлар союзи Бош комитети ихтиёрига боринг, деб таклиф қилди. Энди бу ерда бир неча юз ишончли офицерлар тўпланган. Бизнинг вазифамиз нимали-

гини биласами? Офицерлар союзининг Бош комитети бизнинг казак қўшинлари союзи Совети билан бир ёқадан бош чиқарип иш кўради, катта станциялар ва дивизияларда зарбдор батальонлар ташкил қилияти. Булар ҳаммаси яқин келажакда ишга яраб қолади.

— Охири нима бўларкин? Нима деб ўйлайсан?

— Баракалла-е! Наҳотки шу ерда яшаб туриб, аҳволни тушуниб олмаган бўлсанг? Албатта, ҳукумат ағдарилади, Корнилов ҳокимият тепасига келади. Ахир, бутун қўшин Корниловни қўллаб-қувватлаш учун шайланиб турибди-ку. У ерда бизниклар: майдонда бир-бирига teng бўлган икки куч бор, бири Корнилов бўлса, иккинчиси большевиклар, дейишади.

Керенский икки тегирмон тош орасида қолган,— униси бўлмаса буниси янчиб ташлайди. Майли, ҳозирча Алисанинг¹ тўшагида ишрат қилиб ётаверсин. У — бир соатли халифа.— Калмиков бирпас жим туриб, хаёл ичидаги қиличининг попукли тасмасини ўйнар экан,— биз ҳақиқатда сатранж тахтасидаги пиёдалармиз,— деди,— сатранжбознинг қўли қаерга суриб қўйишини пиёдалар билмайди... Масалан, мен бош штабда нималар бўлаётганидан бехабарман. Шунисини биламанки, Корнилов, Лукомский, Романовский, Кримов, Деникин, Каледин, Эрдели ва бошқа бир талай генераллар ўртасида махфий алоқа ва келишув бор...

— Аммо армия... бутун армия Корнилов орқасидан эргашармикин?— деб сўради Листницкий қадамини жадаллаштириб,

— Солдатлар албатта эргашмайди. Биз уларни эргаштирамиз.

— Керенский сўлларнинг тазиёки остида олий бош қўмондонни ўрнидан туширмоқчи бўлганини биласанми?

— Қўли калталик қиласиди! Эртасига ёқ уни тавбасига таянтиришади. Офицерлар союзи Бош комитети

¹ Алиса — Александра Федоровна (эрга тегмасдан бурун малика Алиса Гессенская), Николай II нинг хотини.

бу хусусда қандай фикрдалигини унга қатъий ра-вишда билдириб қўйган.

— Кечаказак қўшинлари союзи Совети унинг олдига ўз намояндаларини юборган эди,— деб гаппирди Листницкий кулимсираб.— Улар казакларнинг Корниловни ўрнидан туширишга йўл қўймасликлари-ни айтганлар. Биласанми, у нима деб жавоб қилиби: «Бу — бўхтон. Муваққат ҳукумат бундай қилишни ақлига ҳам келтиргани йўқ», дебди. У бир томондан жамоатчиликни тинчтиб, иккинчи томондан бузуқ хотиндай депутатлар Совети исполкомига жилва қиласди.

Калмиков йўл-йўлакай офицерча дала книжкаси-ни қўйнидан чиқарди-да, овоз чиқариб ўқиди.

— «Жамоат арбоблари кенгаши, сиз, рус армия-сининг олий қўмондонини табриклайди. Кенгаш сиз-нинг армиядаги нуфузингизга ва Россиянинг шаъни-шавкатига раҳна солиш учун қилинган ҳар бир ҳаракатни жиноят деб билади, офицерлар, георгий ор-дени кавалерлари ва казаклар билан ҳамжиҳат экани-ни барада эълон қиласди. Оғир синовлар олдидағи даҳшатли дамларда бутун Россиядаги ақл эгалари сизга умид ва ишонч билэн кўз тиккан. Олло таоло сизга, қудратли армияни қайтадан барпо этиш ва Россияни қутқазиш йўлида қилган ҳаракатингизга мадад берсинг! Родзянко».

Масала равшан! Корниловнинг ўрнидан тушири-лиши тўғрисида гап бўлиши ҳам мумкин эмас... Ҳа, айтгандай, сен Корнилов келганда бормидинг?

— Мен Царское Селодан шу бу кечакетиб келдим.

Калмиков теп-текис оппоқ тишларини ва қип-қи-зил соғлом милқларини кўрсатиб кулди. Унинг қийиқ кўзлари юмилиб кетди, кўзлари атрофида ўргимчак инидек майда ажинлар ҳосил бўлди.

— Ишлар қиёмат! Уни така туркманлар эскадро-ни қўриқлайди. Автомобилларда пулемётлар ўрнатил-ган. Ҳаммаси Қишки саройга қараб йўл олган. Бу — очиқдан-очиқ огоҳлантиришдир. Бай-бай-бай! Папоқ кийган у турқи совуқ одамларни бир кўрсайдинг. Ҳа-қиқатан ҳам уларни томоша қиласа арзийди! Улар одамда жуда фалати таъсир қолдиради.

Офицерлар Москва-Нарва районида кўчама-кўча айланиб юрганларидан кейин бир-бирларидан ажралдилар.

Калников хайрлашар экан:

— Женя, биз бир-биримизни йўқотиб қўймаслиги миз керак,— деди.— Оғир замонлар келяпти. Оёқ устида маҳкам турмасанг, йиқиласан!

Листницкий нарироқ кетгандан кейин унга қайрилиб қараб қичқирди:

— Сенга айтишни унутибман. Дўстимиз Меркулов эсингдами? Рассом-чи?

— Хўш, нима бўлти?

— Уни май ойида ўлдирдилар.

— Йўғ-э!

— Ҳа-да, билмасдан ўлдириб қўйишди. Бундан ҳам бемаъни ўлим бўлиши мумкин эмас. Разведкачининг қўлидаги граната портлаб унинг қўлини тирсагигача учирив кетган, Меркуловнинг эса ичак-чавоқларидан бир қисмини ва майдаланиб кетан дурбинининг топиб олдик, холос.

Калников яна бир нима деб қичқирди-ю, лекин шамол туриб чанг-тўзонни ҳавога кўтарди-да, унинг узуқ гапларини эшилдирмай қўйди.

XIII

Олтинчи августда олий бош қўмондон штабининг бошлиғи генерал Лукомский бош штаб биринчи квартирмайстер генерали Романовский орқали, Невель—Н. Сокольники — Великие Луки районида отлиқ аскарлар корпуси билан тоғликлар дивизиясини тўплаш тўғрисида буйруқ олди.

— Нега энди шу районга? Ахир, бу қисмлар Руминия фронтининг резервлари-ку? — деб сўради ганигид қолган Лукомский.

— Билмадим, Александр Сергеевич. Мен олий бош қўмондоннинг буйруғини сизга етказдим, холос.

— Сиз буйруқни қачон олдингиз?

— Кечак. Олий бош қўмондон кечаси мени соат ўн бирда чақириб, тонг отгач, шу маълумотни сизга етказишини буюрдилар.

Романовский оёқларининг учиға босиб, дераза тагида у ёқдан-бу ёқقا юрди, кейин Лукомский кабинети деворининг ярмини ишфол қилган Ўрта Европа стратегик харитаси олдида тўхтади-ю, орқасини ўғириб туриб, ҳаддан зиёд бир диққат билан картани кўздан кечира бошлади:

— Сиз кириб ўzlари билан гаплашинг... Кабинетларида ўтирибдилар.

Лукомский стол устидан қофозларини йифиштириб олиб, креслосини орқага сурниб қўйди-да, семира бошлагай ўрта ёшли ҳарбийларга хос юриш билан қаттиқ-қаттиқ қадам ташлаб кетди. Эшик олдига етганда Романовскийни олдин ўтказиб юборди-ю, хаёл сурниб:

— Тўғри. Шундоғ,— деб қўйди.

Лукомскийга нотаниш, оёқлари узун, новча бир полковник Корнилов олдидан чиқиб келаётган эди. Полковник ҳурмат билан йўл бўшатгандан кейин, сал-пал оқсоқланиб ва шикастланган кифтини ғалати қилиб қимирлатиб коридордан юриб кетди.

Корнилов бир оз олдинга энгашиб, қийшиқ қўйган кафтларига оғирлигини солиб, рўпарасида турган ўрта ёшли бир офицерга дер эди:

— ...шундай бўлишини кутиш керак эди. Гапимни уқдингизми? Псковга етиб борган ҳамоно менга хабар қилишингизни рижо этаман. Сизга энди жавоб.

Офицер эшикни ёпиб чиқиб кетгандан кейин, Корнилов ёшлардай эпчил ҳаракат билан креслога ўтириди-да, иккинчи бир креслони Лукомскийга сурниб қўйиб:

— Сиз Романовскийдан, менинг Учинчи корпусни кўчириш тўғрисидаги буйруғимни олдингизми?— деб сўради.

— Ҳа, олдим. Ўзим ҳам шу хусусда гаплашгани келдим. Сиз учинчи корпусни кўчириш учун нимага мазкур районни танладингиз?

Лукомский Корниловнинг қорамтири башарасига тикилиб қолди. Бу чеҳра сирли, тунд юзларидан, бурун катакларидан мўйлов билан қопланган оғзининг четларига қиясига чуқур ажинлар тушган. Бола-

ларнидай пешонасига тушиб турган кокили юзида-
ги қаҳрли, дағал ифодани юмшатиб турарди.

Корнилов тирсакларини столга қўйиб, кичкина
коқсуяк кафтини иягига тираб, чақнаган қийик қўз-
ларини қисди. Лукомскийнинг тиззасига қўлини теги-
зиб деди:

— Мен отлиқ аскарларни Шимолий фронтга
эмас, балки шундай бирон районга тўплашни истай-
манки, натижада уларни бу ердан Шимолий ёки
Гарбий фронтга юбориш ўнғай бўлсин. Назаримда,
танланган район шу талабларга жавоб беради. Сиз
бошқача фикрдамисиз? А?

Лукомский дудмоллик билан елкасини қисиб
қўйди.

— Гарбий фронтдан хавотирланиш учун асос
йўқ. Яхшиси, отлиқ аскарларни Псков районига тўп-
лаш керак.

— Псковга? — деб сўради Корнилов, сўнгра бу-
тун гавдаси билан олдинга энгашиб, афтини бу-
риштириб, қони қочган лабларини иршайтириди-да,
бошини чайқаб:— Йўқ, Псков райони ноқулай,— деб
қўйди...

Лукомский кексалардек ҳорғин ҳаракат билан
креслонинг суюнчиғига кафтини қўйди-да, ҳар бир
сўзни ўйлаб, эҳтиёт билан гапирди.

— Лавр Георгиеевич, мен ҳозир тегишли буйруқ-
ларни чиқараман, аммо назаримда сиз фикрингизни
айтиб тамомламаганга ўхтайсиз... Башарти, отлиқ
аскар қисмларини Петроград ёки Москва устига
юбориш керак бўлган тақдирда сиз танлаган район
жуда қулай, аммо Шимолий фронт отлиқ аскарлар-
ни бу тахлитда жойлаштиришни таъмин этолмайди,
шунинг учун ҳамки, уларни кўчириш амримаҳол.
Борди-ю, мен янгишаётган бўлмасам ва сиз ўз
фикрингизни очиқласига айтамаётган бўлсангиз,—
рижо этаман ё менга фронтга кетиш учун ижозат
беринг, ёинки кўнглингиздаги гапни битта ҳам қол-
дирмай айтинг. Штаб начальниги, бошлиқнинг ишон-
чига сазовор бўлган тақдирдагина ўз ўрнида қола
олади.

Корнилов бошини әгиб, унинг сўзларига диққат

Қилиб қулоқ солиб турди ва ўзининг ўткир кўзлари билан Лукомскийнинг бепарво кўринган юзи ҳаяжондан билинар-билинмас қизғиши тусга кирганини пайқади. Бир лаҳза ўйлаб туриб:

— Сиз ҳақлisisiz,— деди.— Менинг сизга айтмаган баъзи бир мулоҳазаларим бор эди... Отлиқ аскар қисмларини кўчириш тўғрисида фармон чиқариб, бу ерга учинчи корпус командири генерал Қrimovни чақиртиришингизни илтимос қиласман, Петрограддан қайтиб келганимдан сўнг сиз билан бафуржа гаплашамиз. Александр Сергеевич, амин бўлингки, сиздан яширадиган сирим йўқ.— Корнилов бу сўнгги гапни чертиб гапирди, шу пайт эшик тиқиллаб қолган эди, шартта ўша ёққа бурилиб:— Киринг,— деди.

Бош штаб қошидаги комиссарнинг ёрдамчиси фон Визин билан паканагина малла генерал кириб келди. Лукомский ўриндан турди; чиқиб кетаётганида фон Визиннинг саволига Корниловнинг:

— Ҳозир генерал Миллернинг ишини қайтадан кўришга фурсатим йўқ. Нима? Ҳа, жўнаб кетяпман,— деб кескин жавоб берганини эшилди.

Лукомский Корниловнинг ҳузуридан чиққандан кейин анчагача дераза олдида қаққайиб қолди. Оқ оралаган чўққи соқолини, хаёл суриб, шамолдан чайқалаётган каштан дараҳтларининг шох-шаббаларини ва офтобда товланиб, эгилиб-букилиб салом бераётган ўт-ўланларни томоша қилди.

Орадан бир соат ўтгач, 3-нчи отлиқ аскарлар корпуси штаби олий Бош қўмондон штаб бошлиғидан янги районга кўчиш учун ҳозирлик кўриш тўғрисида буйруқ олди. Ўша куни, Корниловнинг хоҳиши билан 11-нчи армияга қўмондон бўлишдан бош тортган генерал Қrimov махфий ёзишма алифбоси билан тузилган телеграмма орқали бош штабга чақиртирилди.

9 августда Корнилов така туркманлар эскадрони ҳимояти остида махсус поезд билан Петроградга жўнаб кетди.

Эртаси куни бош штабда, олий бош қўмондоннинг ўриндан туширилгани, ҳатто қамоққа олингани тўғрисида миш-миш гаплар тарқалди, бироқ 11 ав-

густда Корнилов эрта билан Могилёвга қайтиб келди.

Келган заҳоти Лукомскийни ўз ҳузурига чақиртирди. Телеграммалар ва сводкаларни кўздан кечириб чиқиб, у ингичка, заъфарондек қўлига соя ташлаб, чиройли қилиб кўрсатган қордек оппоқ манжетини ҳафсала билан текислаб, ёқасини тўғрилади. Унинг шошқалоқлик билан қилган бу ҳаракати безовта эканлигини кўрсатарди.

— Уша маҳалда узилиб қолган суҳбатимизни энди тамомлашимиз мумкин,— деди у паст товуш билан.— Учинчи корпусни Петроград яқинига кўчиришига мени мажбур қилган ва бу хусусда сизга айтмаган мулоҳазаларимни баён қилишни истайман. Билсангиз, мен учинчи августда, Петроградда ҳукумат мажлисида бўлганимда, Керенский билан Савинков, мудофаа соҳасидаги алоҳида муҳим масалалар устида тўхтаманг, чунки министрлар орасида ишончсиз одамлар бор, деб айтдилар. Мен, олий бош қўмондон, ҳукумат олдида ҳисобот берсам-у, оператив планлар тўғрисида оғиз очолмасам, бу нима деган гап? Айтилган гаплар бир неча кундан кейин герман қўмондонлиги қулоғига бориб етмайди, деб ҳеч ким кафил бўлолмайди! Шу ҳам ҳукумат бўлдими? Шундан кейин, шу ҳукумат ватанинни қутқаради, деб ишона оламаними?— Корнилов шаҳдам қадамлар билан тез-тез юриб, эшик олдига борди-ю, калитни бураб уни қулфлади, стол ёнида у ёқдан-бу ёққа юриб:— Қаёқдаги бўлмағур пасткаш одамлар мамлакатни идора этгани одамга алам қиласди,— деди.— «Ҳукумат» деб аташга ҳам одамнинг тили бормайдиган бу ҳокимият муассасасийнинг ишини лапашанг, иродасиз, нўноқ, журъатсиз, кўпинча разил одамлар бошқаради. Чернов сингари жанобларнинг марҳамати ва иштироки билан большевиклар Керенскийни қулатадилар... Россия, мана шу аҳволга тушиб қолди, Александр Сергеевич. Мен жанобингизга маълум бўлган принципга амал қилиб, ватанимизни янги ларзалардан қутқармоқ истайман. Учинчи отлиқ аскарлар корпусини, асосан, август охирида Петроград устига юбориш ва агар большевиклар хуруж қилса, ватан

хоинларини яксон қилиб ташлаш мақсадида жойидан қўзғатяпман. Бу операцияга бевосита раҳбарлик қилишни генерал Кримовга топшираман. Зарур бўлса, у ўйлаб-нетиб ўтирумай, бутун ишчи ва солдат депутатлари Советини дорга тортиб юборади, бундан кўнглим тўқ. Муваққат ҳукумат... Биз, ҳали кўрамиз... Мен ўзим учун ҳеч нарсани истамайман. Россияни қутқазиш... қанчалик қимматга тушса ҳамики, қутқазишни истайман!..

Корнилов юришдан тўхтаб, Лукомскийнинг рўпасига келиб тўхтади-да, кескин сўради:

— Сиз менинг, фақат шу тадбирлар билангина мамлакатимиз ва армиямизнинг истиқболини таъмин эта олишимиз мумкин, деган фикримга қўшиласизми? Сиз мен билан бирга охиригача борасизми?

Лукомский ҳаяжонланиб Корниловнинг қўлини қаттиқ қисди-да, ўрнидан турди.

— Фикрингизга батамом қўшиламан! Аҳдимдан қайтмайман. Ишни пишишиб, ақл тарозусига солиб, кейин бирдан ҳал қилиш керак. Бу вазифани менга топширинг, Лавр Георгиевич.

— Бунинг планини мен ишлаб чиққанман. Икирчикирларини полковник Лебедев ва капитан Роженко ишлаб тамомлашади. Сизнинг ишингиз бошингиздан ошиб ётиби, Александр Сергеевич. Менга ишонинг, буларнинг ҳаммасини бамаслаҳат бақамти қилиш ва агар зарур бўлса, тегишли ўзгаришлар киритиш учун ҳали вери фурсат бор.

Уша кунлари бош қароргоҳ ари инидек ғувиллар эди. Кун сайин Могилёв губернаторининг уйига фронтдаги турли қисмлардан чанг босган гимнастёрка кийган, шамолдан ва офтобдан қорайган офицерлар келиб, ўз хизматларини таклиф этар, офицерлар союзи ва казак аскарлар Союзининг башанг кийинган намояндалари келар, Дон Вилояти Қўшинининг биринчи марта казаклардан белгиланган атамани Келединдан чопарлар келиб турар эди. Аллақандай граждан кийимидағи шахслар ҳам пашшахурда бўлиб қолган эди. Февралда инқирозга юз тутган эски Россияни оёққа бостиришга астойдил интилган кишилар ҳам, қон исини сезган, Корниловнинг беомон

Қўли мамлакатни қонга ботиришини сезган «туллак» одамлар ҳам, бирор нарсани ўмариб қолиш илинжида юрганлар ҳам Могилёвга йигила бошладилар. Бош қароргоҳда Добринский, Завойко, Аладъинларнинг номи оғиздан тушмас, улар бош қўмондон билан бир ёқадан бош чиқарадилар, деб гаплашар эдилар. Бош қароргоҳда ва Дон Қўшинлари атаманининг кўчма штабида, Корнилов ҳар кимга ишонади, шу сабабдан фирибгар, қаллоб одамлар қуршовига тушиб қолди, деган шивир-шивир гаплар кўпайиб қолди. Аммо кўпчилик офицерлар, Корнилов Россияни оёққа бостирувчи байроқдор деб ишонишарди. Эски тартиби тиклашни жону диллари билан истаган одамлар бурчак-бурчакдан шу байроқ остига тўплана бошладилар.

13 августда Корнилов Москвада бўладиган давлат кенгашмасига жўнаб кетди.

Кун илиқ, ҳавода парча-парча булутлар кезарди. Осмон кўкиш рангдаги оқ тунука билан қопланган дай ярқирав эди. Қоқ тепада четлари кўкимтири булут парчаси юзиб юрар, рельсдан гулдураб кетаётган поезд устига, барглари сўлиб сарғайган ажойиб ўрмонга, узоқдан оқ бўёқ билан чизилган расмга ўхшаб кўринган қайнин дараҳтларига, кузакда ҳувиллаб қолган ерга турли тусга кириб товланган камалак орасидан қиялаб ёмғир қуйиб турарди.

Поезд остида ер орқага қараб чопиб кетаётгандай эди. Поезд орқасидан қизғиши тутун узун кўйлак этагидай судралиб борарди. Очиқ дераза ёнида пистоқи ранг мундир кийган жиккаккина генерал ўтирас, қоп-қора қийиқ кўзларини қисиб, деразадан бошини чиқариб қарап, илиққина ёмғир томчилари аллақачон офтобдан қорайган юзини ва ўсиқ қора мўйловларини ҳўллар эди; шамол эса болаларнидай ҳадеб пешонасига тушиб кетаверган сочини ҳилпирашиб, орқасига тарар эди.

XIV

Корниловнинг Москвага келишидан бир кун бурун ясовул Листницкий казак қўшинлари союзи Советидан у ерга маҳсус топшириқ билан борди. Москвада

турган казак полки штабига пакетни топширгач, эртага Корниловнинг етиб келишини билди.

Листницкий туш пайтида Александровский вокзалига чиқди. Кутиш залига, биринчи ва иккинчи классларнинг буфетларига одам сифмас эди. Ҳарбийлар кўччиликни ташкил қиласарди. Перронга Александровский ҳарбий мактаб шогирдлари, виадукда Москва хотин-қизлар ажал батальони жангчилари фахрий қоровул бўлиб тизилмоқда эди. Қундуз соат учга яқинлашганда поезд келди, гап-сўзлар бирдан тинди. Оркестр қаттиқ машқ қилиб, ҳамма ёқни ларзага солди, сонсиз-саноқсиз оёқларнинг тапир-тупури эши-тилди. Тала-тўпор оломон Листницкийни итариб-сурриб, перронга чиқарип ташлади. Тиқилинчдан чиқиб олгач, у қараса, бош қўмондоннинг вагони олдида икки қатор тизилиб така туркманлар турибди. Вагоннинг ялтираган девори уларнинг қизил чопонлари аксидан живир-живир қилиб турарди. Бир неча ҳарбийларнинг ҳамроҳлигига вагондан чиқсан Корнилов, фахрий қоровул олдидан, георгий ордени кавалерлари союзи вакиллари олдидан, армия флот офицерлари союзи ва казак қўшинлари союзи Совети вакиллари олдидан юриб ўтди.

Олий бош қўмондонга тақдим қилинган кишилар орасида Листницкий Дон атамани Каледин билан генерал Зайончковскийни таниди, қолганларининг номини уларнинг офицерлари айтиб таништирдилар.

— Кисляков — йўл ишлари министрининг ўринбосари.

— Шаҳар бошлиғи — Руднев.

— Князь Трубецкой — бош штаб дипломатия маҳкамасининг бошлиғи.

— Давлат кенгашининг аъзоси — Мусин-Пушкин.

— Франция ҳарбий-атташеси полковник Кайо.

— Князь Голицин.

— Князь Мансирев... — деган ҳурматомуз овозлар эшитилди.

Листницкий, ўзи томон келаётган Корниловнинг платформа бўйлаб гуж турган башанг кийимли хонимлар гулларга кўмиб юборганини кўрди. Пушти

ранг бир гул Корнилов мундирининг зар уқасига илиниб қолди. Корнилов хижолат аралаш бир ҳаракат билан уни қоқиб ташлади. Серсоқол, ураллик кекса бир казак тутилиб-тутилиб, ўн иккинчи казак қўшинлари номидан табрик қила бошлади. Листницкий унинг гапини эшитолмади, уни деворга сиқиб қўйган эдилар, қиличининг қайиши узилишига сал қолди. Давлат Думасининг аъзоси Родичевнинг нутқидан сўнг, зич халойиқ ўраб олган Корнилов яна юра бошлади. Бир-бирларининг қўлларидан ушлаб, муҳофаза доираси ясаган офицерларни суриб кетдилар. Корниловга ўнлаб қўллар чўзиларди. Аллақандай семиз, сочи тўзғиган бир хоним майдада қадам билан унинг ёнига келиб, оч-яшил мундирининг енгини ўпмоқчи бўлди. Вокзалдан чиқаверишда қаттиқ табрик қийқириқлари остида Корниловни қўлма-қўл кўтариб кетишиди. Листницкий аллақандай баланд мартабали амалдор жанобни елкаси билан қаттиқ туртиб суриб ташлаб, Корниловнинг амиркон этигини ушлаб олдиди, чаққонлик билан уни елкасига қўйди. Унинг оғирлигини ҳам сезмай, нафаси тиқилган ҳолда, мувозанати ва қадам ташлаш ритмини сақлашга ҳаракат қилиб қадам ташлар, бақириб духовой оркестрнинг садоларини босиб кетган халойиқ уни суриб борарди. Эшик олдида у шимидан чиқиб кетган кўйлагининг бурмаларини нари-бери тузатиб, зинадан майдонга тушди. Олдинда кўк шинелли аскарлар, отлиқ турган казаклар саф бўлган эди. Листницкий кафтини шапкасининг четига қўйиб, намли кўзларини пир-пиратиб турар, лабларининг титрофини босолмас эди. Фотоаппаратларнинг чиқир-чиқири, оломоннинг қутуриши, юнкерларнинг маросим марши билан қадам ташлаб боришлари ва уларни қузатиб турган пастак бўйли, мўғул башара, келишган генерал сал-пал эсида қолган эди.

* * *

Эртаси куни Листницкий Петроградга жўнаб кетди. Вагоннинг юқориги тахта каравотига жойлашиб олиб, шинелини ечиб остига солди, папирос чекиб ўтириб, Корнилов ҳақида ўйлай бошлади:

«Гўё ватан учун керак бўлиб қолишини билгандек ҳаётини тахлика остига қўйиб, асирикдан қочган. Сиймоси наҳадар кўркам! Байни мармар тошдан йўниб ясалгандек бежирим, овдий одамларникига ўхшамайди... Характери ҳам худди шундай. Ҳар нарса унинг учун очиқ-ойдин, ҳар нарсани ўлчаб бичиб қўйган бўлса керак. Қулай пайт келганда бизни орқасидан эргаштиради. Шуниси қизиқки, мен унинг кимлигини билмайман, монархистмикан? Конституцион монархия... Кошки эди ҳамма ҳам у каби ўз кутига ишонган бўлса».

Тахминан, айни шу вақтда Москвада Большой театрнинг залларида, Москва давлат кенгashi аъзоларининг мажлиси танаффусга чиқсан пайтда, икки генерал — бири жиккак, мўғул башара, иккинчиси — гўлабир, каллахум, сочи калта қирқилиб орқасига тараалган, тепакал, икки чаккасидаги соchlарига оқ оралаган, қулоқларининг кемирчаги чаккасига ёпишган генерал — ўзларини бир четга олиб, паркет пол устида юриб, паст овоз билан гаплашар эди...

— Декларациянинг бу моддаси ҳарбий қисмлардаги комитетларни йўқ қилишни назарда тутадими?

— Ҳа.

— Шубҳасиз, якдил ва ҳамжиҳат бўлиш зарур. Мен кўрсатиб ўтган тадбирлар амалга оширилмаса, нажот йўқ. Армия энди урушга қодир эмас. Бундай армия ғалаба қозониш у ёқда турсин, ҳатто жиддийроқ тазиёққа қаршилик кўрсатолмайди. Ҳарбий қисмлар большевикларнинг ташвиқоти орқасида бузғунликка юз тутган. Бу ерда, мамлакат ичкарисида чи? Ишчиларни нўхталаш учун чора кўрилганда улар қандай қаршилик кўрсатаётганликларини кўрояпсизми? Улар ишташлашлар ва намойишлар билан жавоб берәтиллар. Кенгаш аъзолари пиёда юришга мажбурдирлар. Шармандали! Мамлакат ичкарисида ҳарбий тартиб жорий қилиш, раҳмисиз, қаттиққўл ҳокимият ўрнатиш, ҳамма большевикларни, мараз тарқатувчиларни қириб ташлаш,— бизнинг вазифамиз ана шулардан иборат. Келажакда сизнинг ёрдам беришингизга ишонсанам бўладими, Алексей Максимович?

— Сўзсиз, сиз билан бирга бораман.

— Менинг сиздан кўнглим тўқ эди. Ташаккур. Ўзингиз кўряпсизки, қатъий ва қаттиқ чоралар кўриш керак бўлганда ҳукумат ярим-ёрти тадбирлар ва тумтароқли сўзлар билан чекланади, «июль кунлари-дагидек халқ ҳукуматига қасд қилганларни қиличдан ўтказамиз, қонга ботирамиз» деб вақиллайди. Йўқ, бизлар олдин иш кўрсатиб, кейин гапиришга ўрганганимиз. Улар бунинг тескарисини қиладилар. Майли, бир куни ярим-ёрти тадбирларнинг оқибатини кўрарлар. Аммо мен бу фирромбоқи ўйинда иштирок этишни истамайман! Мен очиқчасига жанг қилиш тарафдори эдим ва бундан кейин ҳам шундай қиламан, маҳмаданалик менинг табиатимда йўқ.

Сұхбатдошининг рўпарасига келиб тўхтаган пакана генерал унинг қорамтири пистоқи ранг френчининг мис тугмасини ўйнаб, ҳаяжонидан тутилиб-тутилиб деди:

— Нўхтани ечиб юбориб, энди ўзларининг революцион демократияларидан қўрқаётирлар, фронтдан пойтахтга ишончли ҳарбий қисмларни келтиришини сўрайдилар, айни замонда шу демократияни юзхотир қилиб, бирор амалий чора кўришдан қўрқадилар. Бир қадам олға, бир қадам орқага қадам ташлайдилар... Фақат кучларимизни бирлаштириб туриб, маънавий тазиик йўли билан ҳукуматни ўзимизга ёнбостиришимиз мумкин, ёнбосмаса — қўрамиз. Мен, ўйлаб-нетиб ўтирумай фронтни очиб қўяман, майли, немислар уларнинг таъзирини берсин!

— Биз Дутов билан гапни бир жойга қўйганмиз. Қазаклар, сизга ҳар тарафлама ёрдам кўргазди, Лавр Георгиевич! Биз бундан буён бирга қиладиган ишларимиз тўғрисида келишиб олишимиз лозим.

— Мажлисдан сўнг сизни ва қолган бошқа генералларни ўз уйимда кутаман. Сизнинг Доңдаги аҳвол-руҳия қандай?

Ғўлабир генерал соқоли қиртишланган тўрт бурчак иягини кўкрагига тираб, қовоғини солиб ер остидан қараб қўйди. У жавоб қилар экан, ўсиқ мўйловлари остидаги лаблари титраб кетди:

— Мен аввалгидек казакларга инонмайман... Ҳо-

зир уларнинг аҳволи руҳиялари тўғрисида бир гап айтиш қийин. Муросасозлик қилиш керак. Четдан кўчиб келганларни ўз таъсири мизда сақлаб қолиши учун казаклар баъзи бир нарсаларда ён босишлари зарур. Бу соҳада биз баъзи бир чораларни кўряпмиз, аммо уларнинг муваффақиятли чиқишига кафил бўлиш қийин. Казаклар билан Донга кўчиб келганлар манфаати бир-бирига тўқнаш келиб, нифоқ чиқмасайди, деб қўрқаман. Ер... Уларнинг ҳам, буларнинг ҳам фикри-зикри шунда.

— Сизнинг қўл остингизда ишончли казак қисмлари бўлиши лозим, шу билангина ичингизда низо чиққанда ҳар хил тасодифлардан ачин бўла оласиз. Бош қароргоҳга борганимда мен Лукомский билан гаплашаман, эҳтимол, фронтдан Донга бир неча полкни юбориш мумкин бўлар.

— Сиздан беҳад миннатдор бўламан.

— Шундай қилиб, биз бугун келажакда биргалишиб қиласидиган ишларимиз ҳақида келишиб оласиз. Ниятимизга етишамиз деб астойдил ишонаман, аммо омад деган нарса бекарордир, генерал. Агар омадим ўнгидан келмай қолса, сизнинг Донда бошпана топа оламанми?

— Ёлғиз бошпана эмас, ҳимоятимизга сифина оласиз. Казаклар қадимдан ўзларининг меҳмондўстликлари билан ном чиқарганлар.— Боятдан бери тумтайиб турган Қаледин биринчи марта илжайди, ер остидан қараган ҳорғин кўзлари кулимсиради.

Орадан бир соат ўтгач, Дон атамани Қаледин жи-мий қолган мажлис аҳли олдида «Ўн икки казак қўшини декларацияси»ни ўқиб эшиittiриди.

Уша кундан бошлаб, Дон, Кубань, Терек, Урал, Уссурияни, мамлакатнинг бир чеккасидан иккинчи чеккасигача чўзилган казак ерларини, бутун станицаларни зўр фитна иплари қора ўргимчак инидек ўраб ола бошлади.

XV

Июнь жангларида тўп ўқларидан теп-текис бўлган хароба шаҳарлардан бир чақиримча нарида, ўрмон ёқасида окоплар илон изидек чўзилиб кетган.

Үрмон ёқасидаги жойни маҳсус казак сотняси ишғол этган.

Кўм-кўк, қалин зирк дарахтлари ва ёш қайинлар ўсиб ётган чакалак орқасида, бир вақтлар урушга қадар ишга солинган ботқоқдаги торф қатлами қизғиши тусга кирган. Натъматак қип-қизариб, чиройли бўлиб пишган. Ӯнгроқда чўзинчоқ бўлиб чиққан ўрмон орқасида тўп ўқларидан дабдаласи чиққан тош йўл чўзилиб ётади, бу худди оёқ босилмаган йўлларни эслатарди. Үрмон ёқасида эса ўқлар каллаклаб кетган бурган ўтлар ўсиб кетган, кўмирга айланган тўнкалар дўппайиб ётар, окопларнинг четидаги соз тупроқ қўнғир тусда товланарди, окоп чизиқлари яланг дала бўйлаб, узоқ-узоқларга чўзилиб кетган. Орқада, ҳар ер-ҳар еридан қазилиб олинган ботқоқликдан ҳам, ҳатто вайрон бўлган тош йўлдан ҳам меҳнат тарк этган ҳаёт асари сезилар, ўрмон ёқасидаги ер инсон кўз олдига аллақандай хунук ва аянч манзарани келтиради.

Худди шу куни, бир вақтлар Моховнинг ун тегирмонида машинист бўлиб ишлаган Иван Алексеевич, биринчи разряд обози турган яқин орадаги шаҳарчага кетган эди, у ердан кечга яқин қайтиб келди. Ўз ертўласига кетаётганда Захар Королёвга тўқнаш келди. Тупроқ тўла қопларнинг қиррасига қиличи билан туртиниб-туртиниб, қўлларини саланглатиб Захар чопиб келмоқда эди. Иван Алексеевич унга йўл бериб, бир чеккага чиқди, лекин Захар унинг гимнастёркаси тугмасидан ушлаб, сарғайган кўз соққасини ўйнатиб шивирлади:

— Эшитдингми? Ӯнг томондаги пиёдалар жуфтакни уряпти! Балки фронтни ташлаб кетаётгандир.

Захарнинг баайни қозоннинг қора куясидек қоп-қора соқоли жудаям пахмайиб кетган, кўзлари оч одамнинг кўзларидек ғамгин эди.

— Ташлаб кетяптинг нимаси?

— Кетяптилар-да, қанақалигини билмайман.

— Эҳтимол, уларнинг ўрнига янгилари келаётгандир? Взвод командири олдига бориб биламиз.

Захар тийғанчиқ йўлдан сирғана-сирғана ертўлага, взвод командири олдига кетди.

Казаклар ўрнини пиёдалар ишғол қилгандан кейин, бир соат ўтгач, сотня шаҳарчага йўл олди. Эртасига эрталаб отбоқарлардан отларини олишиб, марш билан мамлакат ичкарисига юриш қилишиди. Майда ёмғир ёға бошлади, қайнинлар шамолдан эгиларди, йўл ўрмон ичига кириб кетди. Бултурги хазонларнинг ачиган ҳидини ва рутубатни сезган отлар пишқирап, илдам қадам боғар эди. Ёмғир ювиб тозалаган итбурунларнинг меваси пушти ранг бўлиб товланар, майда себарга гуллар чамани қордек ярқирап, шамол дараҳтлардан отлиқлар устига сув томчиларини тўкарди. Шинеллар ва фуражкалар гўё сочма ўқ тешгандек қора-қора доғлар билан қопланган эди. Махорканинг сийрак тутунлари қаторлар устида сузиб юарди.

- Бирданига қаёққадир ҳайдаб қолишиди-я.
 - Окоплар жонингга тегмаганми эди?
 - Дарвоҷе, бизларни қаёққа олиб кетишяпти.
 - Янги отрядлар тузишадиганга ўхшайди.
 - Йўғ-э, унақамасдир.
 - Кел-э, казаклар, чекишиб, ғамларимизни унұттайлик.
 - Мен ўз ғамларимни халтамда олиб юраман.
 - Жаноб ясовул, қўшиқ айтарга рухсат этинг.
 - Рухсат бердими? Архип, бошла.
- Олдинги сафдаги аллаким йўталиб олиб, бошлади:

Хизматдан қайтарди казаклар уйга,
Елкада погони, кўксисда нишон.

Рутубатдан бўғилган овозлар ашулани секин бир чўзди-ю, жимиб қолди.

Иван Алексеевич билан ёнма-ён кетаётган Захар Королёв узангига тик туриб, заҳарханда қилиб қичқирди:

- Ҳой, сўқир гадойлар, казакчасига шунаقا айтиладими? Сизлар черков ёнида коса тутиб туриб, хониш қилинглар. Вой, сендақа ашулачи зарни...
- Қани, бошла.
- Унинг бўйни калта, унда овоз нима қилсин.

— Мақтанишга мақтаниб қўйиб, энди думингни хода қиляпсанми?

Королёв битлаган соқолини тутамлаб, бир лаҳ-за кўзларини юмди-да, тизгинни қаттиқ силтаб, ашулани бошлади:

Қаҳрамон казаклар, хушнуд бўлинглар...

Сотня гўё унинг жаранглаган қаттиқ овозидан ўйғонгандек, бараварига олди:

Шонингиз, шуҳратингизга.

Намиққан ўрмонда, йўл устида ашула янгради:

Ўқ отиб душманни бизлардек қиринг,
Бу ишда дўстларга ўрнак кўрсатинг!
Урушда биз сафни бузмай борамиз,
Бошлиқлар амрига қулоқ соламиз.
Отамиз командир на буйруқ берса,
Биз шуни қиласмиз, чопиб, санчамиз.

Манзилгача ашулани қўйиб бордилар, «жаҳаннамнинг оғзи»дан омон қутулганларига суюндилар. Кечга бориб вагонларга жойлашдилар. Эшелон Псков томонга қараб йўл олди. Уч станция юрилгандан сўнггина, сотнянинг учинчи отлиқ аскарлар корпусининг бошқа қисмлари билан бирликда Петроградда бошланган тартибсизликни бостириш учун кетаётганларини билиб қолдилар. Шундан кейин гап-сўзлар тинди. Қизил вагонлар сукунат ичиданча вақтгача казакларни тебратиб борди.

Дароз Боршчев кўпчиликнинг фикрини ифода қилиб:

— Қордан қутулиб, ёмғирга тутилибмиз-да,— деди.

Февраль ойидан бери сотня комитетининг доимий раиси бўлиб келган Иван Алексеевич, биринчн остановкадаёқ, тўғри сотня командири олдига борди.

— Казаклар ташвишда, жаноб ясовул.

Ясовул Иван Алексеевичнинг иягидаги чуқурчасига тикилиб турди-да, мийигида кулиб деди:

— Азизим, ўзим ҳам ташвишдаман.

— Бизни қаёққа жўнатишяпти?

— Петроградга.

- Тинчтишгами?
- Сен, тартибсизликка ёрдамлашаман деб ўйловдингми?
- Бизга унисиям керакмас, бунисиям.
- Биздан сўраб ўтиришармиди.
- Ахир казаклар...
- «Қазаклар» дейди-я! — деб ғазаб билан ушинг сўзини бўлди сотня командири.— Мен казакларнинг ўйини биламан. Менга бу иш маъқул деб ўйлайсанми? Мановини олиб, казакларга ўқиб бер. Нариги станцияда ўзим казаклар билан суҳбат қиласман.

Командир найча қилиб ўралган телеграммани унга узатди-да, ирганиб афтини буриштириб, ёғи қотган консервани аранг чайнай бошлади.

Иван Алексеевич ўз вагонига қайтди. Телеграммани кафтида чўғдек кўтариб келди.

— Бошқа вагондаги казакларни ҳам чақирингиз.

Поезд қўзғалди, казаклар вагонга ирғишиб чиқавердилар. Ўттиз киши жам бўлди.

— Командирга телеграмма кепти, ҳозир ўқиб беради.

— Қани, нима ёзилган экан, ўқи.

— Ўқи, тўғри ўқи!

— Тинчлик тўғрисидами?

— Жим!

Сукунат чўккач, Иван Алексеевич, олий бош қўмондон Корниловнинг хитобномасини ўқиб эшийтди. Сўнгра, телеграмма терлаган қўллардан бир-бир ўтди. Унда баъзи сўзлар хато ёзилган эди.

Мен, олий бош қўмондон Корнилов, бутун ҳалойиққа маълум қиласманки, солдатлик бурчи, әркин Россия гражданининг филодорона садоқати, ватанга бўлган мендаги чексиз меҳр-муҳаббат мени ватанимиз бошига тушган шу оғир кунларда Муваққат ҳукуматга итоат этмасликка, армия ва флот бош қўмондонлигини ўз қўлимда сақлаб қолишга мажбур этди. Бутун фронтларнинг бош қўмондонлари менинг шу қароримни қўллаб-қувватлаганларига кўра, мек бутун рус ҳалқига бош қўмондонлик вазифасидан воз кечишдан ўлимни афзал қўрганимни ошкора маълум қиласман. Рус ҳалқининг асл фарзанди ўз постида жон беради ва ширин жонини ҳам фидо этади.

Ватанимизнинг ҳаёт-мамоти қил устида турган, тантана қи-лаётган душман учун иккала пойтахтимизнинг дарвозалари очиқ қолган бир пайтда, Муваққат ҳукумат мамлакатнинг мустақиллиги каби улуғ масалани унутиб қўйиб ҳалқни асоссиз контреволюция хавфи билан қўрқитмоқда, ваҳоланки, Муваққат ҳукуматнинг ўзи мамлакатни идора қила билмаслиги, ўз ҳукуматининг заифлиги, ўзининг қатъиятсизлиги орқасида контреволюцияни авж олдирмоқда.

Мен ўз ҳалқининг ҳақиқиӣ фарзанди бўлиб, ҳамманинг кўзи ўнгида ватан учун хизмат қилаётнган, агар мендек одам ҳалқимининг улуғ истиқболи йўлида ўз ҳаётимни фидо қилмасам, ким фидо қиласди. Лекин ҳозир истиқбол зαιф ва иродасиз одамлар қўлида. Сотқинлар ва хиёнаткорлар ёрдами-ла мутакаббур душман ўз уйимизда хўжайнлик қилмоқда, рус ҳалқининг ёлғиз эркинлиги эмас, балки ҳаётини ҳам ҳалокат гирдобига судрамоқда. Рус кишилари, кўзингизни катта очинг, наҳотки, ватанимиз фалокат жарига қулаш олдидা турганини кўрмасангиз!

Мен ҳеч қандай ғалаёнларга йўл қўймаслик, бир томчи ҳам рус қонини тўқмаслик учун ўзаро жангларнинг олдини олиш учун, бутун таҳқир ва кину кудратни унтиб, бутун ҳалойиқ олдидা Муваққат ҳукуматга мурожаат этаман: менинг ёнимга — бош қароргоҳга келинг, мен сизнинг озодлигингизга ва ҳаётингизнинг дахлесиз бўлишига кафилман. Келинг, биргаликда ҳалқ мудофаасини шундай уюштирайлики, у эркинликни таъмин этсин, рус ҳалқини қудратли озод ҳалқقا муносиб бўлган улуғ истиқбол сари етакласин.

Генерал Корнилов

Кейинги станцияда эшелонни тўхтатиб қўйдилар. Ана жўнатишади, мана жўнатишади деб маҳтал бўлиб турган казаклар вагонлар ёнида тўпланишиб, Корниловнинг телеграммасини ҳамда Корниловни хоин ва контреволюционер деб эълон қилган, сотня командири Керенскийнинг ҳозиргина ўқиб эшидирилган телеграммасини музокара қилмоқда эдилар. Казаклар ҳанг-манг бўлиб бир-бирларига қарап, сотня командири билан взвод офицерлари саросимада эдилар.

— Каллам ғовлаб кетди,— деб хуноб бўларди Мартин Шамиль.— Уларнинг қайси бири гуноҳкор эканини худонинг ўзи билсин!

— Ўзлари ёқалашадилар, аскарларни ҳам ёқавай-рон қиласидилар.

— Бошлиқтаримиз семизликдан қутурмоқдалар.

— Ҳар бири ўзим ҳоким бўлсан дейди.

— Ҳолвани ҳоким ейди, калтакни — етим.

— Бош бошга қовушмайди... Бало бўлди!

Бир тўп казаклар Иван Алексеевичнинг олдига келиб:

— Командирнинг олдига бор, нима қилишимизни айтсин,— деб туриб олдилар.

Тўп-тўп бўлишиб юзбошининг олдига келдилар. Офицерлар ўз вагонларида тўпланишиб, бир нарса тўғрисида маслаҳатлашаётган эдилар. Иван Алексеевич вагонга кирди.

— Жаноб командир, казаклар, энди нима қиласиз,— деб сўраяптилар,— деди.

— Ҳозир чиқаман.

Сотня казаклари энг чеккадаги вагон олдида йиғилиб кутиб туришар эди. Командир вагондан чиқди, казаклар уни ўраб олдилар. Ўртада қолган командир қўлини кўтариб, деди:

— Биз, Керенскийга эмас, балки олий бош қўмондонга, ўзимизнинг бевосита бошлиғимизга итоат этамиз. Тўғрими? Шу важдан биз ўз бошлиғимизнинг фармонини бажо келтириб, Петроград устига юришимиз лозим. Ҳеч бўлмаганда биз Дно станциясигача бориб, у ерда Биринчи Дон дивизияси командиридан вазиятни билиб оламиз,— у ёғи кейин маълум бўлади. Мен казаклардан ҳовлиқмасликни илтимос қиласман. Замонамиз ўзи шунаقا алғов-далғов.

Юзбоши аскарлик бурчи, ватан, революция ҳақида узоқ гапирди, казакларни тинчтди, саволларга муҳмал жавоб берди. Шу йўл билан ўз мақсадига эришди; шу орада эшелонга паровоз тиркадилар (казаклар, ўз бўлинмаларининг икки офицери станция бошлигини қурол билан қўрқитиб, эшелонни тезроқ жўнатишга мажбур этганларини билмай қолдилар). Шундан сўнг казаклар тарқалишиб вагонларига чиқиб олдилар.

Эшелон бир кечаю-бир кундуз йўл юриб, Дно станциясига яқинлашди. Кечаси уни тўхтатиб қўйиб,

уссурияликлар ва Доғистон полки тушган эшелонни ўтказиб юбордилар. Казаклар тушган поездни запасдаги темир йўл изига кўчирдилар. Зим-зиё қоронфиксикда Доғистон полки тушган поезднинг ёруғ вагонлари улар ёнидан ўтиб кетаверди. Доғистонликларнинг вагир-вуғурлари, сурнай товуши, қулоқ ўрганмаган ашула овозлари борган сари узоқдан эшитирди.

Сотнияти ярим кечада жўнатдилар. Кучсиз паровоз водокачка олдида узоқ туриб қолди, унинг ўтхонасидан ерга учқунлар сачарарди. Машинист тамакисини тутатиб, гўё бир нарсани кутгандай, деразадан қараб турарди. Паровоз яқинидаги вагондан бир казак бошини чиқариб:

— Ҳой, Гаврила, ҳайда, бўлмаса ҳозир отиб ташлаймиз,— деди.

Машинист папиросини туфлаб ташлади-да, унинг ҳавода ярим доира ҳосил қилиб учишини индамай томоша қилиб турди; кейин йўталиб:

— Ҳаммани отиб ташлаб бўпсанлар,— деди-ю, бошини тортиб олди.

Бир неча дақиқадан сўнг паровоз бир силтаб вагонларни тортиб, буферлар қасир-қусур қилиб кетди, вагон силкиниб кетганда мувозанатини йўқотган отлар безовталаниб депсина бошлади. Поезд водокачка ёнидан, онда-сондаги уйларнинг ёруғ тушиб турган тўрт бурчак деразалари ва темир йўлнинг нари томонидан қорайиб кўринган қайнин дараҳтлар ёнидан сузизб ўтди. Казаклар отларини хашаклатиб, ухлагани ётдилар, баъзиларининг уйқулари келмай, қия очиқ эшиклар олдида, бепоён осмонни томоша қилиб хаёл сурар эдилар.

Иван Алексеевич казак Королёв ёнида, эшик тирқишидан юлдуз тўла осмонга қараб ётар эди. У бир кун ичидан бўлиб ўтган воқиаларни ўйлаб, нима қилиб бўлса ҳам бўлинманинг Петроградга томон ҳаракатини тўхтатишга қаттиқ бел боғлади; ўрнида ётар экан, казакларни ўз қарорига мойил қилиш, уларни ўз гапига киргизиш чоралари устида бош қотирар эди.

Корниловнинг мурожаатномасидан анча аввал, казакларнинг Корнилов бошлаган ўйлдан кета олмасликларини аниқ тушунган эди, шу билан бирга Ке-

ренскиини ҳимоя қилиш фойдасиз эканлигини сезиб турарди; ўйлаб-ўйлаб шу қарорга келди: бўлинмани Петроградга киришига йўл қўймаслик керак, мабодо жанг қилишга тўғри келса — Керенскийга эмас, Корниловга қарши Керенский ҳокимияти учун, лекин у йиқилгандан кейин барпо эгилган ҳокимият учун жанг қилиш керак. Керенскийдан кейин орзу қилган чинакам халқ ҳокимияти барпо этилишига у астойдил ишонар эди. У ёзда Петроградда, ижроия комитетнинг ҳарбий секциясида бўлганди. Командири билан ораларида чиққан ихтилоф муносабатида сотня уни маслаҳат учун ижроқўм ҳарбий секциясига юборди. У ижроқўмнинг иши билан танишиб, бир неча большевик ўртоқлар билан сұхбатлашиди. Бу уюшма атрофида ишчилар уюшгач, у кенгайиб чинакам ҳокимиятга айланади! Иван, жонингни бер, худди бола онасининг кўкрагига қандай ёпишиб олса, сен ҳам ундан ажралма!» деб ўйлаган эди.

Шу кеча, тўқум устида ётар экан, ўз ҳаётининг машаққатли йўлинни топиб олишга ёрдам берган раҳбарини ҳар маҳалгидан кўра қизғинроқ эслади. Эртага казакларга нима дейишини ўйлар экан, Штокманнинг казаклар тўғрисидаги гапларини эслади ва сабофи ни ҳижжалаган боладай бу сўзларни қайта-қайта такрорлади: «Казаклар асли муҳофазакор халқ. Сен агар большевизм идеясининг ҳақлигига казакларни ишонтиromoқчи бўлсанг, бу ҳақиқатни унутма, эҳтиётлик билан, ўйлаб ҳаракат қил, шароитга уйғунлаш. Сен билан Мишка Кошевой бошда менга қандай муносабатда бўлган эсангиз, улар ҳам бошда сенга шундай муносабатда бўладилар, аммо сен гангид қолма. Тинмай, ишингда давом эт — ахир ғалабага эришамиз».

Иван Алексеевич, казакларни Корниловга эргаш маслика даъват этсам, уларнинг баъзилари эътиroz қилишлари мумкин деб ўйлади, лекин эрталаб ўз вагонида: «Фронтга қайтаришларини талаб этиш керак, Петроградга бориб ўз биродарларимиз билан урушмаймиз», деб эҳтиёт билан гап очганида казаклар бажони дил унинг фикрига қўшилдилар ва Петроградга юриш қилишдан бош тортишга қаттиқ бел боғлади-

лар. Захар Королёв билан Чернишевский станицалик казак Турилин Иван Алексеевичнинг энг яқин фикрдошлари эди. Уззукун улар вагондан вагонгэ ўтиб, казаклар билан сұхbatлашдилар, кечқурун аллақандай кичик бир станцияда, Иван Алексеевич кетаётган вагонга учинчи взводнинг урядниги Пшеничников сакраб чиқди.

— Биринчи станциядаёқ сотня вагонлардан тушиади!— деб қичқирди у ҳовлиқиб Иван Алексеевич га қараб.— Казакларнинг истакларини билмасанг, нима қилиб комитет раиси бўлиб юрибсан? Бизни энди лақиллата олмайдилар! Петроградга бормаймиз!. Офицерлар бўйнимизга сиртмоқ соляптилар, сен бўлсанг оғзингга сўк солгандай, миқ этмайсан. Шуният билан сени сайлаган эдикми? Нега, тишларингнинг оқини кўрсатиб тиржаясан?

— Аллақачон шундай қилиш керак эди,— деди Иван Алексеевич кулимсираб.

У биринчи станциядаёқ ҳаммадан олдин вагондан сакраб тушди. Турилин ҳамроҳлигига станция бошлиғининг олдига кирди.

— Поездни шу ерда тўхтат. Шу ерда вагондан тушамиз.

— Нега энди?— деб сўради станция бошлиғи ҳанг-манг бўлиб.— Менда фармойиш бор... йўлланма...

— Овозингни ўчир!— деб қаҳр билан унинг гапини бўлди Турилин.

Улар станция комитетини қидириб топдилар, ғўлабир, малла соч комитет раисига аҳволни тушунтиридилар, бир неча минутдан кейин машинист жон деб поездни запас йўлга киритиб қўйди.

Казаклар чапдастлик билан таҳта кўприк қўйиб, вагонлардан отларини етаклаб туша бошладилар Иван Алексеевич паровоз ёнида оёқларини кериб, кулиб туриб, юзидағи терларини артар эди. Рангида ранг қолмаган сотня командири унинг олдига чопиб келиб:

— Нима қиляпсан, ахир? Биласанки...— деди.

— Биламан!— деб шартта унинг гапини бўлди Иван Алексеевич.— Сен, жаноб ясовул, шовқин сола-

верма.— Сўнгра бўздек оқариб кетди-да, бурнининг катакларини кериб, дона-дона қилиб гапирди:— Энди кекирдагингни чўзолмайсан, йигит! Энди биз попилдириғингни пасайтириб қўямиз, шуни билиб қўй!

— Олий бош қўмондон Корнилов...— деб қизариб-ясовул гал бошлаган эди, Иван Алексеевич қумга ботиб кетган эски этигига қараб, бепарвогина қўл силтади:

— Энди Корниловни бут қилиб бўйнингга осиб ол, бизга кераги йўқ унинг,— деди.

Ясовул пошналари устида бурилиб ўз вагонига қараб чопди.

Бир соатдан сўнг, сотня бир нафар ҳам офицерни олмасдан, ҳарбий тартибни батамом сақлаган ҳолда станциядан чиқиб, ғарби-жануб томон жўнади. Сотня командирлигини ўз устига олган Иван Алексеевич билан унинг ёрдамчиси — паст бўйли Турилин энг олдинги взводда, пулемётчилар ёнида кетар эдилар.

Казаклар, собиқ командиридан тортиб олинган картага қарай-қарай, қаёққа кегаётганларини аранг билиб олиб, Горелое қишлоғига етиб келдилар-да, ўша ерда тунадилар. Ҳаммалари маслаҳатни бир жойга қўйиб, фронтга жўнашга, агар тўхтатиб қўймоқчи бўлсалар — жанг қилишга қарор қилдилар. Отларини тушовладилар, атрофга соқчилар қўйиб, ухлагани ётдилар. Гулхан ёқмадилар. Кўпчиликнинг таъби тирриқ экани билиниб турарди, ҳамиша уйқуга кетиш олдидан гап отишиб, ҳазиллашишни яхши кўрадиган казаклар чурқ этмасдан, фикрларини бир-бирларидан сир тутдилар.

Иван Алексеевич устига шинелини тортиб ётар экан: «Борди-ю, казаклар қилмишларидан пушаймон бўлиб, бошлиқларга бош эгиб борсалар нима бўлади?»— деб ўйлар эди.

Турилин гўё унинг фикрини билгандай олдига келиб:

— Иван, ухладингми?— деб сўради.

— Йўқ ҳали.

Турилин унинг оёқ томонига ўтириб олди-да, тамакисининг учқунини сачратиб, шивирлади:

— Казакларнинг кайфи бузуқ... Қилғиликни қи-либ қўйиб, энди юраклари пўкиллаяпти. Ишни... пишиқ қилмадик, нима деб ўйлайсан, а?

— Кейин маълум бўлади,— деди Иван Алексеевич хотиржамлик билан.— Сен ўзинг қўрқаётганинг йўқми?

Турилин фуражкаси остига қўлини суқиб қашинди-да, оғзини қийшайтириб кулди:

— Ростини айтсам, қўрқяпман... Бошда қўрқмадим-у, ҳозир юрагим орқамга тортиб кетяпти.

— Қасос олиш, пайти келганда «вит» дер экансанда.

— Ахир, Иван, уларда куч кўп.

Улар анчагача индамай ўтирилар. Қишлоқ уйла-рининг чироқлари ўчди. Қаердандир, тол ўсиб кетган кўкаламзор ботқоқликнинг бир чеккасидан ўрдакларнинг ғағалагани эшитиларди.

— Ўрдакларнинг зўри ғағалаяпти,— деди Турилин ўйланқираб, сўнgra нафаси ичига тушиб кетди.

Ўтлоқ устига оромбахш тун сукунати чўйкан эди. Казаклар ётган жойга шамол қарагай, чириган қўға, шабнам тушиб ҳўл бўлган ўтларнинг ҳидларини олиб келарди. Аҳён-аҳёнда отларнинг оёғидаги занжирнинг шиқирлаши, хихилаб кишинаши, ерга ағанаган отнинг дупури ва ҳансираши эшитиларди. Сўнgra орага яна сукунат чўқар, узоқ-узоқлардан ёввойи нар ўрдакнинг ғағалали, яқинроқдаги мода ўрдакнинг берган жавоби қулоққа чалинарди. Қоронғида кўзга кўринмаган ва тез учиб ўтган қушларнинг қанот товуши келарди. Тун. Ҳамма ёқ жимжит. Туман босган ўтлоқнинг рутубатли иси анқиб туради. Кун ботар томонда, осмон этагидаги қора булутлар ошган хамирдай бўкиб ётади. Осмоннинг ўртасида, қадимий Псков ўлкасининг қоқ тепасида кенг карвон йўли си-нгари Сомон йўллари чўзилиб кетган.

Тонг отарда сотия йўлга чиқди. Горелое қишлоғидан ўтар экан, сигирларини ҳайдаб чиққан аёллар, болалар казакларнинг орқасидан қараб қолдилар. Офтоб нуридан қизарган тепа устига чиқиб томоша қилдилар. Турилин атрофга қараниб, оёғи билан Иван Алексеевичнинг узантисини туртди.

— Уни қара, орқамиздан отлиқлар чопиб келяпти,— деди.

Қўнгир чанг-тўзон ичидаги чоптириб келаётган уч суворий қишлоқдан ўтган эди.

— Со-о-тня, тўх-та!— деб команда берди Иван Алексеевич.

Казаклар одатдаги чапдастлик билан тўрт бурчак шаклида тизилдилар. Суворийлар ярим чақирим йўл қолганда отларини аста йўртдириб кела бошлади. Улардан бири, казак офицер дастрўмолини олиб боши устида силкита бошлади. Казаклар келаётган отлиқлардан кўзларини олмай қараб турар эдилар. Пистоқи ранг мундир кийган офицер олдинда, черкасча мундир кийган икки отлиқ орқароқда келар эди.

Иван Алексеевич уларга пешвоз юриб:

— Нима иш билан?— деб сўради.

Офицер қўлини шапкасининг сояронига тегизиб:

— Музокара олиб бориш учун,— деди.— Сотняни қайси бирингиз қабул қилиб олдингиз?

— Мен.

— Мен Биринчи Дон казаклар дивизиясининг вакилиман, булар,— кўзи билан тоғликларга ишора қилиб кўрсатди,— маҳаллий дивизия вакиллариридир.— Офицер жиловни қаттиқ тортиб, совундек кўпирриб кетган отининг тэрга ботган силлиқ бўйнига секин уриб қўйди.— Агар музокара олиб боришни истасангиз, казакларга отдан тушишни буюринг. Мен дивизия командири генерал-майор Грековнинг оғзаки буйруғини сизга айтгани келдим.

Казаклар отларидан тушдилар. Келган вакиллар ҳам эгардан тушишида, казаклар орасидан ўтиб, ўртага тушиб олишди. Казаклар чеккага чиқиб кичик бир давра ясашди.

Олдин казак офицер гап бошлади:

— Казаклар! Биз сизларни ўз фикрингиздан қайтишга даъват этмоқ ва қилган ишингизнинг хунук оқибатидан сизни сақлаб қолмоқ учун келдик. Қеча дивизия штаби сизнинг аллақандай бузғунчи одамлар сўзига кириб, ўзбошимчалик билан вагонлардан тушиб жўнаганингиздан хабардор бўлди, бугун биз-

ни, дарҳол Дно станциясига қайтиш түғрисида берилган буйруқни сизга етказиш учун юборди. Тоғликлар дивизия аскарлари ва бошқа кавалерия қисмлари кеча Петроградни ишғол қылдилар, бугун телеграмма келди. Бизнинг илғор қисмларимиз пойтахтга кириб, барча ҳукумат муассасалари, банклар, телеграф, телефон станциялари ва ҳамма муҳим жойларни ишғол қылдилар. Муваққат ҳукумат қочди, у энди йиқитилган деб ҳисобланади. Қазаклар, эс-хушингизни йиғиб олинг! Сиз жар ёқасида турибсиз, ахир! Башарти, дивизия командирига итоат этмасангиз, устингизга қуролли кучлар юборилади. Сизнинг қилган ишингизга хиёнат деб, ҳарбий топшириқни бажаришдан бош тортиш деб қаралади. Сиз сўзсиз итоат қилиш йўли билангина қон-қардош урушининг олдини олган бўласиз.

Вакиллар етиб келгач, Иван Алексеевич казакларнинг аҳвол-руҳияларини ҳисобга олиб, музокаралардан бош тортиш мумкин эмаслигини англади, чунки музокараларга рози бўлмаслик тескари натижা бериши муқаррар эди. Шу мулоҳаза билан у сотняга отдан тушишга буйруқ берган ва ўзи Турилинга кўз қисиб қўйиб, вакилларга яқинроқ бориб турган эди. Офицер нутқ ирод қилган маҳалда, казакларнинг ерга қараб қовоқларини солиб қулок солаётганларини кўрди; баъзилари шивирлаша бошлидилар. Захар Королёв оғзини қийшайтириб кулар, қора чўянга ўхшаш қўйма соқоли кўйлагининг устига тушиб турарди; Боршчев қамчисини ўйнаторар, ён томонига кўз қирини ташлаб қўярди. Пшеничников оғзини карракдек очганича, гапириб турган офицернинг кўзига анқайиб қараб қолган эди. Мартин Шамиль кир-чир қўли билан чаккасини ишқалаб, кўзларини пирпиратар; унинг орқасидаги Багровнинг аҳмоқона юзи сарғайиб кетган; пулемётчи Красников бир нарсани кутгандай кўзларини қисиб боқар; Турилин пишиллаб нафас оларди; башарасига сепкил тошган Обнизов фурражкасини гарданига суриб қўйиб, бўйнига бўйинтуруқ тушганини сезган ҳўқиз каби кокилли бошини чайқатарди; бутун иккинчи взвод худди ибодат вақтидагидек бошини кў-

тармай ерга қараб қолган; ғуж бўлиб турган оломоннинг нафаси ичига тушиб кетган, одамларнинг иситмаси чиқиб, оғир-оғир нафас олар, юзларида саросималик аломати кўринарди...

Иван Алексеевич казакларнинг кайфиятлари ўзгарганини пайқаб қолди: бир неча минут ўтса, маҳмадана офицер бутун сотняни ўз томонига оғдириб олиши турган гап эди. Бир илож қилиб, офицернинг сўзлари қолдирган таассуротни тарқатиб юбориш, казакларнинг мияларида пайдо бўлган, лекин сўз билан ифодаланмаган қарорларини бузиш лозим эди. У қўлини кўтариб, катта очилган ва паҳтаси чиқиб кетган кўзлари билан оломонга кўз югуртириб чиқди-да:

— Оғайнilar! Бир оз сабр қилинг! — деди, сўнгра офицерга ўгирилиб: — Телеграмма ёнингиздами? — деб сўраб қолди

— Қанақа телеграмма? — деб ҳайрон бўлди офицер.

— Петрограднинг олингани тўғрисидаги телеграмма.

— Телеграмма?.. Йўқ. Телеграмманинг бунга нима дахли бор?

— Аҳа! Йўқ! — деб бутун сотня енгилланиб нафас олди.

Кўплар бошларини кўтариб, Иван Алексеевичга умид кўзи билан қаради. У эса хириллаб қолган овозини баланд чиқариб, истеҳзо билан, заҳарханда қилиб ўзига ишонган ҳолда гапира бошлади ва ҳамманинг диққатини ўзига жалб этди.

— Йўқ деяпсанми? Ҳаммани қўйиб биз сенга ишонармидик? Бизни анойи деб ўйловдингми?

— Алдаяпти! — деб казаклар ғовур кўтарди.

— Телеграммани менга юборишмаган! Казаклар! — офицер қўлларини кўксига босиб, казакларни ишонтироқчи бўлди.

Энди унинг гапига ҳеч ким қулоқ солмай қўйди. Иван Алексеевич казакларнинг рағбати ва ишончини қозонганини сезиб, гапини дўндириди:

— Олингани рост бўлганда ҳам, барибир биз билан сизларнинг йўлингиз бир эмас! Биз ўз оғай-

ниларимиз билан урушишни истамаймиз! Биз ҳалқа қарши боролмаймиз! Бизни ҳалқа қарши гижгижламоқчимисиз? Йўқ! Ер юзида энди аҳмоқлар қолгани йўқ! Генералларни ҳоким қилиб бошимизга чиқариб қўйиши истамаймиз! Шуни билиб қўйинг!

Казаклар бир оғиздан гапира бошладилар, оломон ҳаракатга келди, бақириқлар эшитила бошлади.

— Мана гап бундоғ бўлади!

— Гапнинг ўғил боласи шу!

— Тўғ-ре-е!..

— Бу жанобларни гарданига уриб ҳайдаш кепрак!

— Вой сендақа элчиларни...

— Петербургда учта казак полки бор, лекин улар ҳалқа қарши чиқишни ўйламайдилар ҳам.

— Ҳой Иван! Танобларини тортиб қўй! Туёқларини шиқиллатсинлар!

Иван Алексеевич келган вакилларга қаради, казак офицер лабларини қимтиб, сабр қилиб турар; бир-бирларининг пинжига суқилган тоғликлар унинг орқасида туришар, қомати келишган ёш офицер-инѓуш черкасча башанг мундириининг кўкрагига кўлларини қўйиб, қора кубанкаси остидан қийиқ кўзларини чақчайтириб, иккинчиси — ёши қайтган қўнғир соч осетин беларволик билан оёқларини кериб олган; кафтини эгри қиличининг дастасига қўйиб, кўзларини жавдиратиб, казакларга масхараомуз қараб турарди. Иван Алексеевич энди музокараларни тўхтатмоқчи бўлиб турганида, казак офицер ундан олдин гапириб қолди; у ингуш офицер билан шивирлашиб олиб, баланд овоз билан бақирди:

— Донликлар! Тоғлик дивизия вакилининг сўзлашига рухсат берасизми?

Ингуш казакларнинг розилигини кутмасдан пошнасиз юмшоқ этиклари билан юриб, давранинг ўртасига чиқди, энсиз, шокилали камарини асабийлик билан тўғрилаб қўйиб:

— Казак қардошлар! — деди.— Нечун бу қадар ғовға эдирсиз? Қизишмасдан сўйланг. Сиз генерал Корниловни истамайсиз? Сиз вурушмоғи истайсиз? Марҳамат! Биз вурушамиз. Қўрқмаймиз. Бу

кун сизи эзиб тўзитажағиз! Ортимиздан икки полк доғилликлар галмакдадир. Ба! Фобга этмак ная лозим!— Бошда у хотиржам гапиришга уринди, аммо гапнинг охирига келиб, қизишиб кекирдагини чўза бошлади; у бузуқ талаффуз билан томогини қириб гапирав, нутқига ўз лаҳжасидаги сўзларни аралаштириб юборар эди.— Бу казак сизи йўлдан чихарар, у большевикдир! Сиз-да унинг ортиндан кедирсиниз! Ба! Кўзларим кўр дагил! Уни ҳибс этинг! Қуролини олинг!

У тап тортмай, қўлларини бигиз, қилиб Иван Алексеевични кўрсатар, тор давра ичида у ёқдан-бу ёққа югуриб, ранги ўчган ҳолда қўлларини пахса қилиб гапирав, юзи бўртиб қизариб кетган эди. Унинг ўртоғи, ёши қайтган қўнғир соч осетин индамай қотиб турад; казак офицер қиличининг эскирган тасмасини ўйнарди. Казакларнинг нафаси яна ичига тушиб кетди, яна уларнинг ораларида саросималик бошланди. Иван Алексеевич ингуш офицерга, унинг иршайиб турган оппоқ тишларига, сўл чеккасидан оқиб тушаётган кул ранг терга қаттиқ тикилар, фурсатни бекор қўлдан бердим, бир оғиз сўз билан музокараларни тўхтатиб, казакларни орқамдан эргаштириб кетсам бўларкан, деб ўйлаб хуноб бўларди. Турилин жонига оро кириб, уни оғир аҳволдан қутқарди. У бир сакрашда давранинг ўртасига тушиб олди, қўлларини силкитиб, ёқасининг тугмаларини узиб-узиб ташлади-да, оғзини кўпиртириб, туфугини сачратасачратада ўдағайлади:

— Ҳой, ландавурлар! Ҳой, аплаҳлар!.. Итваччалар!.. Сизни худди бузуқ хотинни алдагандек авраб алдаятилар-у... сиз бўлсангиз шалпанг қулоқларинизни осилтириб гапларига қулоқ солиб ўтирибсиз!.. Офицерлар сизни ўз ноғораларига ўйнатмоқчилар!.. Сиз нима қиляпсиз? Ни-ма қил-япсиз?! Уларнинг каллаларини олиш ўрнига, гапларига қулоқ осяпсиз?.. Бошларини танларидан жудо қилиб, қонларини сувдек оқизиш керак. Сиз бу эрда улар билан гижиллашиб ўтирган вақтингизда, бизни қуршаб оладилар!.. Пулемёт билан қириб ташлайдилар. Пулемёт ўқлари остида митингбозлик қилолмайсанлар!

Аскарлари етиб келгунча бу ерда бизни калака қилмоқчилар... Эҳ, казаклар! Эркак эмас, хотинсизлар!

— Отларга!...— деб бақирди Иван Алексеевич милтиқдек овози билан.

Унинг бақириғи оломон устида тўп ўқидек янграб кетди. Казаклар отларига қараб югурдилар. Бир минутдан кейин сотня взвод-взвод бўлиб, колонна шаклида тизилди.

Казак офицер жонсарак бўлиб:

— Қулоқ солинг! Казаклар!— деб бақирди.

Иван Алексеевич шартта елкасидан милтиғини олди-ю, бўғинлари шишган бармоғини тепкига қўйиб, ўйноқлаган отининг жиловини қаттиқ тортиб, қичқирди:

— Музокаралар тамом! Энди агар сиз билан гаплашиш қерак бўлса, мана бу тил билан гаплашамиз.— Шуни деб у таҳдид қилиб, винтовкасини ўйнатиб қўйди.

Сотня взвод-взвод бўлиб йўлга чиқди. Казаклар орқаларига ўгирилиб қарадилар, вакиллар отларга миниб олиб, бир нарса тўғрисида маслаҳатлашаётганларини кўрдилар. Ингуш кўзларини қисиб, қўлларини пахса қилиб, ўз гапини маъқулламоқчи бўлар; черкасча чакмонининг қайтариб қўйилган енгидаги шоҳи астари оппоқ қордек товланарди.

Иван Алексеевич сўнгги марта қайрилиб қараб, кўзни қамаштирадиган оппоқ енг астарини сўнгги марта кўрди ва негадир гармсел шамол турган маҳалда чайқала бошлаган Дон дарёси, кўпикланган яшил тўлқинлар, қанотларининг учини тўлқинларга тегизиб қиялаб учган балиқчи қушлар кўзининг ўнгida жонланди.

XVI

29 августда Кримовдан олинган телеграммалардан қуролли тўнтариш иши мағлубиятга учрагани Корниловга равшан бўлди.

Кундуз соат иккита бош қароргоҳга Кримовдан офицер-ординарең келди. Корнилов у билан узоқ гаплашди, сўнгра Романовскийни чақиртирди; аса-

бий ҳолда қандайдир бир қофозни ғижимлаб гапирди:

— Ишлар хароб! Ўйинни ютқиздик... Кримов корпусни ўз вақтида Петроград яқинига тўплай олмайди, фурсат қўлдан кетаётир. Осонлик билан амалга ошириш мумкиндай кўринган иш минг тўсиқ-қа учраётир... Ишимизнинг оқибати хунук бўладиганга ўхшайди... Мана... қаранг, қўшинлар эшелон-эшелон бўлиб қандай жойлашган!— У Романовскийга корпус ва тоғликлар дивизияси тушган эшелонлар тўхтаган сўнгги станциялар қалам билан чизиб кўрсатилган харитани кўрсатди; уйқусизликдан сўлдан жиддий юзи тиришиб кетди.— Бутун темир йўлчи абллаҳлар йўлимизга ғов бўляптилар, билмайдиларки, агар ишимиз ўнгидан келса, уларнинг ҳар ўнтасидан биттасини дорга тортираман. Кримовнинг юборган маълумоти билан танишинг

Романовский япалоқ кафти билан хўппа семиз юзини сийпалаб маълумотномани ўқир экан, Корнилов шошиб-пишиб қўйидагиларни ёзди.

Новочеркаск, қўшин атамани

Алексей Максимович Калединга.

Сизнинг Муваққат ҳукуматга юборган телеграммагизнинг мазмуни билан мени таништирдилар. Хонилар ва сотқинларга қарши натижасиз қураш олиб борган, тоқати тоқ бўлган шонли казаклар, ўз меҳнати ва қони билан ўстириб вояга етказган ватанларининг маҳв бўлаётганини кўриб, қурол кучи билан унинг ҳаёти ва озодлигини сақлаб қолажакдирлар. Бир-биримиз билан алоқа қилиш бир муддат қийинлашиши мумкин. Мен билан бир ёқадан бош чиқариб ҳаракат қилишингизни илтимос қиласман, чунки ватанга бўлган муҳаббат ва казаклик шарафи шундай қилишини тақоза этади. 658.29.8.17.

Генерал Корнилов.

У ёзиб тугатгач:

— Шу телеграммани дарҳол юбортинг,— деб Романовскийдан илтимос қилди.

— Қнязь Багратионга саф тортиб юришни давом этдириш тўғрисида иккинчи марта телеграмма юборишни амр этасизми?

— Ҳа, шундай.

Романовский бир өз жим туриб, ўйланқираб:

— Лавр Георгиевич,— деди,— менимча ҳали умидсизликка тушишга асос йўқ. Сиз воқиаларнинг оқибатига нотўғри баҳо беряпсиз...

Корнилов шошқалоқлик билан қўлини кўтариб, боши устида учиб юрган жажжигина зангори капалакни ушлаб олмоқчи бўлди. Унинг панжалари қисилди, чеҳрасида енгил бир интизорлик аломати кўринарди. Ҳаво тўлқинида ўйнаган капалак пастлашиб, қанотларини ҳилпиратиб, очиқ деразадан учиб чиқиб кетишга ҳаракат этарди. Корнилов ахир уни тутиб слди-ю, енгил нафас олиб креслонинг орқа суюнчигига ўзини ташлади.

Романовский гапига жавоб кутарди, аммо Корнилов хаёлга ботиб, вазминлик билан кулимсираб ҳикоя қила кетди.

— Бугун бир туш кўрибман. Гўё пиёда дивизиялардан бирининг бригада командири эмишман. Карпат тоғларда ҳужумга ўтган эмишман. Штаб билан қандайдир бир деҳқоннинг қўргонига етиб келибмиз. Бизни ўрта ёшли, башанг бир русин қаршилабди. У мени сут билан сийлабди-да, бошидан оппоқ намат шляпасини олиб, соғ немис тилида: «Ич, генерал! Бу — ҳаддан зиёда шифоли сут» дебди. Мен сут ичар эканман, русиннинг бетакаллуфлик билан елкамга қоқиб қўйганига ажабланмас эмишман. Кейин тоғдан тоққа ошиб кетдик, энди Карпатларда эмас, Афғонистонда, ёлғиз оёқ тор сўқмоқда йўлдан кетаётган эмишмиз... Ҳа, ёлғиз оёқ йўлдан, оёғимиз остидан тошлар ва сарғиш шағал-қумлар кўчиб пастга думаламоқда эмиш, пастликда, даранинг нари томонида заррин қуёш нурига чўмган ажойиб жануб манзараси кўриниб туармиш...

Ғўриллаб кирган енгил шамол стол устидаги қоғозларни ҳилпиратиб, ланг очиқ деразадан чиқиб кетиб туарди. Корнилов хира кўзларини узоқларга тикар, Днепрнинг нари ёғидаги ўнқир-чўнқир дўнгликларга, узун-узун сариқ йўл тўшган майсазорларга қезар эди.

Романовский ҳам у тикилиб турған жойларга қа-

раб, секин хўрсиниб қўйди-да, юзини ўгириб, димликда ойнадек ярқираб турган Днепрга, эрта кузнинг субҳидами рангини ўчирган туманлии далаларга тикилиб қолди.

XVII

Петроград устига юбориладиган З-нчи отлиқлар корпусининг қисмлари ва тоғликлар дивизияси кенг масофадаги саккиз темир йўл бўйлаб эшелон-эшелонларга бўлинниб жойлашган эди. Равель, Везенберг, Нарва, Ямбург, Гатчина, Сомрино, Вирица, Чудово, Гдов, Новгород, Дно, Псков, Луга ва оралиқдаги барча станция ва разъездлар адашиб қолган, лекин жуда имиллаб ҳаракат қилаётган эшелонлар билан тирбанд эди. Полклар юқори команда составининг маънавий таъсиридан четда эди, тарқоқ сотнялар эса ўзаро муносабатни йўқотган эдилар. Ишқаллик шундай чуқурлашдик, тоғликлар дивизияси билан кучайтирилган корпус поход маҳалида армияга айланга бошлаган эди. Маълум даражада қисмларни алмаштириш, тарқоқ қисмларни тўплаш, эшелонларни қайтадан тузиш керак эди. Бу ишлар ҳаммаси ўтакетган чалкашлиқ туғдирар, бир-бирига тўғри келмайдиган буйруқлар шундог ҳам авжга чиқсан асабий ҳолатни янада кучайтиради.

Корнилов армиясининг эшелонлари темир йўл ишчи ва хизматчиларининг қаршилигига учраб, ўз йўлидаги тўсқинликларни бартараф қилиб, Петроград сари аста оқиб келар, станцияларда тўпланиб, яна таралиб кетарди. Қизил вагонлардаги эгарлоглиқ, оч отлар ёнида овқатсиз қолган донликлар, ускурияликлар, Оренбург, Нерчин, Амур казаклари, ингушлар, черкаслар, кабардинлар, осетинлар, доғистонликлар уймалашиб туришарди. Эшелонлар жўналишларини кутиб, станцияларда соатлаб тўхтаб қолар, отлиқлар дувиллашиб вагонлардан тушиб, худди чигирткадек вокзалга ёпирилиб кирав, темир йўл изларида тўдалашиб, илгари ўтиб кетган эшелонлардан қолган егулик нарсаларни талашиб

ердилар. Пайт пойлаб туриб, ўғрилик қилиб, озуқа омборларини талар эдилар.

Қазакларнинг шимларидаги тўқ сариқ ҳошиялар, енгил отлиқ аскарларнинг олифта нимчалари, тоғликларнинг черкасча чакмонлари... Шимолнинг рангларга камбағал бўлган табиати бу хил ранго-ранг бўёкларни бир умр кўрмаган эди.

29 августда Павловск ёнида князь Гагарин қўмондонлиги остидаги тоғликлар дивизиясининг З-нчи бригадаси душманга бетма-бет келган эди. Дивизиянинг бошида кетаётган ингуш ва черкас полклари йўлнинг бузилган жойига келиб тўхтаб қолди-да, вагонлардан тушиб, саф тортиб Царское Село сари йўл олди. Ингуш отрядлари Сомрино станциясиغا кириб борди. Полклар шошилмасдан ҳужумни кучайтириб, дивизиянинг қолган қисмлари етиб келишини кутар, гвардиячиларни сурib борар эди. Дивизия қисмлари эса Дио станциясида ўзларини жўнатишларини кутмоқда эдилар. Улардан баъзилари ҳали бу станцияга етиб ҳам келмаган эди.

Тоғликлар дивизиясининг командири князь Багратион станция яқинидаги бир помешчик қўрғонида қолган қисмларнинг тўпланишини кутиб ётар, Варича устига қўшин тортиб боришга журъат этолмас эди.

Йигирма саккизинчи августда у Шимолий фронт штабидан қўйидаги телеграмманинг копиясини олди.

«3-нчи корпус командири ва 1-нчи Дон, Уссурия ва Қавказ тоғликлар дивизияларининг бошлиқларига олий бош қўмондоннинг буйруғини топширишни сўрайман: башарти назарда тутилмаган бирор аҳвол сабаб бўлиб, темир йўлларда эшелонларнинг ҳаракатига монелик туғилса, олий бош қўмондон дивизияларга саф тортиб олға ҳаракат қилишни буюради, 1917 йил 27 август № 6411. Романовский.

Соат 9 да Багратион телеграф билан, эрталаб соат 6-ю 40 минутда Петроград округ штабининг бошлиғи полковник Багратуни орқали Керенскийдан барча эшелонлар қайтарилсан, деган мазмунда буйруқ олганини ва дивизия эшелонлари Гачки разъ-

еэди билан Оредеж станцияси ўртасидаги йўлда ушланиб қолганини, Муваққат ҳукуматнинг фармонига биноан, темир йўл маъмурияти поездларни жўнатишга ижозат бермаётганини Корниловга хабар қилди. Бироқ, шунга қарамай, Корниловдан олинган резолюцияда шундай дейилган эди.

Князь Багратионга. Темир йўл орқали қилинаётган ҳаракат давом этдирилсин. Башарти темир йўлдан юришнинг имкони бўлмаса, Лугагача саф тортиб борилсин. У ерда генерал Кримовга батамом итоат қилинсин.

Багратион саф бўлиб жўнашга журъат этолмай корпус штабини вагонларга жойлаштиришга буйруқ берди.

Бир вақтлар Евгений Листницкий хизмат қилган полк 1-инчи Дон казаклар дивизияси составига кирган бошқа полклар билан бирликда Ревель—Везенберг—Нарва йўллари орқали Петроград устига юборилди. 28-инчи август кундуз соат 5 да полкнинг икки сотняси тушган эшелон Нарвага етиб келди. Эшелон командири кечаси жўнаш мумкин эмаслигидан дарак топди. Нарва билан Ямбург ўртасидаги йўл бузилган, темир йўл батальон қисми шошилинч поезди билан ўша ёққа жўнатилган экан. Агар эрталабгача йўл тузатилса, эшелон йўлга тушади. Эшелон бошлиғи чор-ночор бунга кўпди. Сўкиниб ўз вагонига чиқиб, янгиликни офицерларга сўзлаб берди, улар билан чой ичгани ўтириди.

Қоронғи тушиши билан ҳавони булут қоплади, кўрфаз томондан рутубатли изғирин эсди. Темир йўл излари устида, вагонларда казаклар ғўнғиллашиб гаплашишар, паровоз гудокларидан чўчиган отлар вагон тахталарини туёқлари билан дукиллатарди. Эшелоннинг энг кетида ёш бир казак йигит қўшиқ айтар, қоронғилик ичидаги кимгадир зорланарди.

Алвидо, эй шаҳар, хайр эй қишлоқ,
Алвидо, севикли қадрдан хутор!
Алвидо, эй дилбар ва нозанин қиз,
Алвидо, қип-қизил гулдай гўзал ёр!
Бир маҳал оқшомдан тонг отгунгача,

Еримнинг қўлида ётарди бошим,
Энди-чи? Саҳардан қуёш ботгунча,
Қўлимдав тушмайди, милтиқ йўлдошим.

Кул ранг мол омбори орқасидан бир киши чиқиб, ашулага қулоқ солиб туриб қолди. Сарғиш нур сочиб липиллаб турган чироқларга ва темир йўл изларига назар ташлади-да, шаҳдам эшелон томон қараб юрди. Шпалларни босгандан қадам товуши шипиллаб эшитилар, заранг бўлиб кетган қумлоқ ерна босгандан товуш чиқмас эди. Энг орқадаги вагон ёнидан ўтганда эшик олдида турган казак қўшиғини тўхтатиб, уни чақирди:

— Кимсан?

— Сенга ким керак ўзи?— деди йўловчи истаристамас.

— Кечаси нима қилиб тентираб юрибсан? Биз сендақа ўғриларни шартта отиб ташлаймиз. Қулай нарса ахтариб юрибсанми?

Йўловчи унга жавоб қилмай, составнинг ўртасигача борди, сўнgra вагон эшигидан бошини суқиб сўради:

— Қайси сотня?

— Маҳбуслар сотняси,— деб кулишди қоронгиллик ичидан.

— Ҳазил қилмаларинг, қайси сотня?

— Иккинчи.

— Тўртинчи взвод қаерда?

— Бошдан санаганда олтинчи вагонда.

Олтинчи вагон олдида уч казак тамаки чекар, биттаси чўнқайиб олган, иккитаси унинг ёнида турарди. Улар ўзлари томон келаётган кишига индамай қараб туришарди.

— Саломатмисизлар, қишлоқилар?

Казаклардан бири келган кишининг юзига тикилиб:

— Худога шукур,— деди.

— Никита Дугин омонми? Ўзи қайдা?

Чўнқайиб ўтирган казак жингиллаб:

— Мен бўламан,— деди-да, ўнидан туриб, пошнаси билан папиросини эзив ташлади.— Сени тани-

маяпман? Қаерликсан, кимсан ўзинг?— У серсоқол юзини олдинга чўзиб, шинель ва ғижимланган фурражка кийган нотаниш кишини таниб олмоқчи бўлди, лекин бирдан ҳайрон бўлиб, томоғини қириб: «Илья! Бунчукмисан? Оғайничалиш, қайси гўрдан пайдо бўпқолдинг?» деб юборди. Сўнгра Бунчукнинг жун босган ғудур панжасини ушлаганича унга томон энгашиб аста деди:

— Булар ўзимизниkilар, улардан қўрқиб ўтирма. Бу ерга қаердан кепқолдинг? Айт, жин ургур!

Бунчук бошқа казаклар билан қўл олишиб қўришгач, хириллаб қолган панғ овоз билан жавоб қилди:

— Питердан келдим, сизларни аранг қидириб топдим. Зарур иш бор. Маслаҳатлашиб олишимиз керак. Оғайни, сени эсон-омон кўрганимга хурсандман.

Бунчук кулиб туради. Унинг япалоқ юзи бўзарган, тишлари оқариб кўринар, кўзлари эса илиқ, хотиржам ва қувноқ чақнар эди.

— Маслаҳатлашиб?— деб сўради серсоқол Дугин жингиллаб.

— Сен офицер бўлсанг ҳам, биз билан жўралик қилишдан ҳазар қилмайсан. Худо хайрингни берсин, Илюша, раҳмат! Биз умримизда бирордан ширин сўз эшиганимиз йўқ...— Унинг овозида лоқайд ва беғараз кулги оҳангি бор эди.

Бунчук ҳам гапни ҳазилга айлантириб:

— Етар, бас қил, гапни айлантираверма, сен доим ҳазиллашганинг ҳазиллашган. Соқолинг тиззангга тушай дебди-ю, ҳазилингни қўймайсан,— деди.

— Соқолни ҳар вақт шартта қирдириб ташлайверса бўлади, қани, сен айт-чи, Питерда нима гап? Алғов-далғовлар бошландими?

— Юр, вагонга чиқайлик,— деди Бунчук бир нарсани гапириб бермоқчи бўлгандек.

Улар вагонга чиқдилар. Дугин кимнидир оёғи билан тутириб, аста деди:

— Ҳой, йигитлар, туринглар. Бир керакли меҳмон кепқолди. Бўлинглар, казаклар, тезроқ!

Казаклар инқиллаб-синқиллаб ўринларидан тура

бошладилар. Кафтидан тамаки ва от тери ҳиди келган аллаким катта қўли билан қоронғида, эгар устида ўтирган Бунчукнинг юзини пайпаслаб, дўриллаб:

- Бунчукмисан? — деди.
- Ҳа. Сен Чикмасовмисан?
- Ҳа, ҳа. Салом оғайни!
- Салом.
- Югуриб бориб, учинчи взводдаги йигитларни чақириб келай.
- Майли, чоп.

Учинчи взводдагилар ҳаммаси келди. Улардан икки кишигина отлар ёнида қолди. Казаклар Бунчук ёнига яқин келиб, қадоқ босган ғудур қўлларини узатишар, фонарь ёруғида унинг тумтайган ялпоқ юзига тикилишар, уни дам Бунчук, дам Илья Митрич, дам Илюша деб чақиришарди. Лекин товушларнинг ҳаммасида дўстона илиқ оҳанг бор эди.

Вагон ичи дим бўлиб кетди. Тахта деворларга фонарь яллиғи тушиб ўйнар, бесўнақай соялар дам ҷўзилиб, дам кичрайиб чайқалар, фонарь гўё қора чироқдек тутаб ёнарди.

Бунчукни ҳурматлаб чироққа яқин ўтиргиздилар. Олдингилар чўнқайдилар, қолганлар эса гир айланниб давра ясаб турдилар. Дугин йўталиб, жингиллаб:

— Илья Митрич, хатингни тунови куни олдик. Шундай бўлса ҳам ҳамма гапни ўз оғзингдан эшитмоқчимиз. Бундан кейин нима қилишимизни бир айтиб берсанг. Бизларни Питерга қараб ҳайдаб кетяптилар. Иложимиз қанча,— деди.

Эшик ёнида турган, қулоғининг буришиб кетган гўштига ҳалқа тақсан казак:

— Кўряпсанми Митрич, гап шунаقا,— деди. Бу — Листницкий бир вақтлар окоп тўсиғи устида чой қайнатдирмаган ва хафа қилган казак эди:— Бизнинг олдимизга ҳар хил агитаторлар келиб, Петроград устига бора кўрманглар, ўзаро урушимииздан фойда йўқ, деган гапларни айтиб, бизни йўлдан уряптилар. Биз уларнинг гапига қулоқ солсак ҳамки жудаям ишонмаймиз. Бегона одамлар. Балки улар бизни лақиллатишаётгандир, ким билсин. Йўқ де-

санг, Корнилов черкасларни устимизга юборади. Яна хунрезлик бошланади. Сен эсанг ўзимизнинг казаклардансан. Сенга кўпроқ ишонамиз. Питердан ёзган хатларинг учун бошимиз осмонга етди. Газеталар эса... ростини айтсак, бу ерда қофоз танқис... газета обтурибмиз.

— Нималар деб валдираяпсан, тентак бузоқ,— деди казаклардан бири бўғилиб.— Ўзинг саводсиз бўлганинг учун ҳаммамизниям нодон деб ўйлаяпсанми? Гўё биз газетага тамаки ўраб чекаётган эмишмиз: Нафсилембировни айтганда Илья Митрич, биз олдин газетани бошдан-оёқ ўқиймиз.

— Ёлғонниям дўндирасан-да, дабба.

— «Ураб чекамиз» дейишини қара-ю.

— Тентакнинг катта-кичиги бўлмайди.

— Оғайнилар, мен унақа демоқчи эмасдим,— деб ўзини оқлай бошлади ҳалқа таққан казак.— Рост, бошда биз газетани ўқирдик.

— Ўзингиз ўқирмидингиз?

— Менга савод насиб бўлмаган. Шунинг учун ёппасига ўқирдик, кейин тамаки ўрардик.

Бунчук мийигида кулиб, эгар устида казакларга назар ташлаб ўтиради, ўтириб гапириш ўнғайсиз бўлганидан тик туриб, чироққа орқасини ўгириб, хириллаб аста гап бошлади:

— Петроградда сизларга пишириб қўйгани йўқ. У ерда ҳеч қандай алғов-далғов йўқ. Биляпсизларми, сизларни нега у ерга юборяптилар. Муваққат ҳукуматни ағдариш учун.. Сизларни ким бошлаб кетяпти? Подшо генерали Корнилов. Керенскийни ағдариш унга нима учун керак? Унинг ўрнига ёзи ўтириш учун. Огоҳ бўлинглар, казаклар. Бўйинларингдан ёғоч бўйинтуруқни олиб ташлаб, пўлат бўйинтуруқ кийгизишмоқчи! Икки оғатдан кичикроғини танлаш керак. Шундай эмасми? Ўзларинг бир ўйлаб кўринглар. Подшо замонасида тумшуқларингга туширишарди. Урушда сизларнинг панжангиз билан олов олишарди. Керенский даврида ҳам шундай қилишяпти, лекин тумшуққа туширишмайди. Аммо, лекин Керенскийдан кейин, ҳокимият большевиклар қўлига ўтгач, бутунлай бошқача бўлади. Большевиклар

урушишни истамайди. Ҳокимият қўлларига ўтиши биланоқ дарров яраш-яраш қилишади. Мен у ноба-кор Қеренский тарафдори эмасман. Уларнинг ҳам-маси бир гўр.—Бунчук кулиб қўйди-да, пешона терини енги билан артиб гапида давом қилди.—Мен сизларни ишчиларнинг қонини тўкмасликка даъват қиласман. Агар Корнилов ҳукумат бошлиғи бўлса — бутун Россия тизза бўйи ишчилар қонига ботади. У тепамизга чиқса, ҳокимиятни ундан тортиб олиш ва уни меҳнаткаш халқ қўлига олиб бериш мушкулроқ бўлади.

Бунчук сингари гирдиғум казак орқароқдан чи-киб келиб:

— Шошма, шошма, Илья Митрич,—деди. Сўнгра ўйталиб, кекса дарахтнинг томирига ўхшаган узун дастпанжасини артиб, Бунчукка қулимсираган қў-киш бит кўзлари билан қаттиқ тикилиб деди: — Сен ҳали бўйинтуруқ тўғрисида гап очдинг... Большевик-лар ҳукуматни қўлга олгандан кейин бўйнимизга қанақа бўйинтуруқ тақишади?

— Сен, нима, ўз бўйнингга ўзинг бўйинтуруқ тақасанми?

— Нега ўзимга ўзим?

— Нега деганингда, большевиклар ҳокимиятни олса, ҳукумат бошида ким ўтиради? Агар сени сай-лашса — сен, ёки Дугин, ё эса манови амаким. Со-вет — сайланиб қўйиладиган ҳокимият. Тушундингми?

— Энг юқорида ким ўтиради?

— Кимни сайласалар—ўша ўтиради. Агар сени сайлашса — сен.

— Ростдан-а? Ёлгон айтаётганинг йўқми, Мит-рич?

Казаклар кулиб юборишли. Ҳаммаси чувиллаб гапира бошлади, ҳатто эшик ёнидаги соқчи ҳам тур-ган жойини бир минут тарк этиб, гапга аралашди.

— Улар ер масаласига қандай қарайдилар?

— Ерларимизни тортиб олмайдиларми?

— Урушни тугатадиларми? Ёинки, ёнимизни ол-синлар, деб ҳозир шунақа ваъда беряптиларми?

— Сен бизга гапнинг пўсткалласини айтиб бер!

- Биз бу ерда кўр мулладекмиз.
- Ёт одамларга ишониш хавфли. Дунёда нима кўп, ёлғон гап кўп...
- Кечак бир матрос келиб, Керенскийнинг ҳолига йиғлади, биз унинг сочидан ушлаб, вагондан итариб юбордик.
- «Сиз аксилинқилобсиз» деб шовқин солди, тентак!
- Биз бундай сўзларни тушунмаймиз. Нима дегани у?
- Бунчук аланглаб, казакларни бошдан-оёқ кўздан кечирав, гапдан тўхташларини кутиб турарди. Бошда ўзи мўлжаллаган нарсани уддалашга кўзи етмаган бўлса, энди казакларни ўз томонига оғдириб олгандан сўнг, ҳарқалай эшелонларни Нарвада тўхтатиб қолишига ишончи комил бўлди. Бир кун аввал у Петроград район партия комитетига келиб, Петроград устига келаётган биринчи Дон дивизиясида ташвиқот ишларини олиб бориш учун ўзини юборишиларини таклиф этганида, муваффақият қозонишга ишонар эди. Аммо Нарвага етиб келгандан кейин, муваффақият қозонишига кўзи етмай қолди. У казаклар билан бир нав бошқача сўзлар билан гаплашиш кераклигини англади-ю, лекин улар билан умумий бир тил топиб гаплаша билмаслигини ҳис этиб юраги пўкиллай бошлади, чунки у бундан тўққиз ой бурун ишчилар муҳитига қайтиб келиб, ишчилар оммаси ўртасида илдиз ота бошлаган, оғиз очиши билан унинг гапларини тушунишларига ва ҳис этишларига ўрганиб қолган эди. Бу ерда ҳам-қишлоқлари билан эса ярим унтилган, қора халқ тили билан гаплашиши, печанлик кўрсатиши, уларни ишонтира билиши, уларнинг юрагига ўт солиши, асрлардан бери суяк-суякларига сингиб қолган итоат-гўйлик ҳиссини йўқотиши, қайсарликларини енгиши ва ўзининг ҳақли эканига ишонтириб, уларни ўз орқасидан эргаштириши керак эди.

Даставвал, гапира бошлаганида ўз товушида ишончсизлик, сохталик борлигини сезар, гўё ўзининг ширасиз сўзларига четдан туриб қулоқ солгандек, келтирган далилларининг тутуруқсизлигидан даҳ-

шатга келар, миясини ишлатиб, салмоқли сўзлар топиш ва булар ёрдами билан казакларнинг қайсарлигини енгишни истар эди... лекин бунинг ўрнига оғзидан совун кўпигидай енгил гаплар отилиб чиққанини, миясида бўш ва куракда турмайдиган фикрлар бир-бирига қоришиб ётганини пайқаб, юраги қон бўлар эди. У қора терга ботиб, ҳансира б турарди. Сўзлар экан: «Менга шундай катта бир иши топширилар-у, мен бўлсан, уни ўзим чатоқ қилаётирман... Сўзларим бир-бирига қовушмайди... Менга нима бўлди-я? Менинг ўрнимда бошқаси бўлса, минг марта яхшироқ гапирган ва ишонтирган бўларди... уҳ, нақадар нўноқ одамман-а!» деб ўйлар, бу фикр миясини кавлар эди.

Бўйинтуруқ ҳақида савол берган кўк кўз казак уни бу мушкул аҳволдан қутқарди; шундан кейин бошланган сұхбат Бунчукка эс-хушини йиғишириб, ўзини ўнглаб олишга ёрдам берди, шундан сўнг у қучига куч қўшилиб, эсига равшан, ўткир, аччиқ сўзлар келганини сезиб ўзи ҳайрон қолди, юзидаги хотиржамлик ниқоби остида ҳаяжонларини яшириб, қалтис саволларга салмоқли, ўткир ва кескин жавоблар берди, гўё минишіга ўргатилмаган асов отни миниб, совундай кўпиртириб, ювошлантирган отлиқдай, сұхбат жиловини қўлига оливолди.

— Хўш, айт-чи, Учредительное Собраниенинг нимаси ёмон?

— Сизнинг Ленинингизни немислар келтирганми-а?

— Митрич, тўғрисини айт, сен бу ерга ўз хоҳишинг билан қелдингми ёки сени юбордиларми?

— Дон қўшини ерлари кимлар қўлига ўтиб кетади?

— Подшо замонида биз ёмон яшармидик?

— Меньшевиклар ҳам халқ тарафдори эмасми?

— Бизда Қўшин кенгashi бор, ҳокимият халқники, бизга Советларнинг нима кераги бор?— деб сўраб-сuriшиштирас эдилар казаклар.

Казаклар ярим кечада тарқалишди. Эртасига эрталаб, ҳар иккала сотнияни тўплаб митинг ўтиказишга қарор қилишди. Бунчук ухлагани вагонда

қолди. Чикамасов унга ўзи билан бирга ётишни тақлиф қилди. У ётиш олдидан чўқиниб олиб, жой солар экан:

— Сен, Илья Митрич, қўрқмасдан ётавер, лекин айбга буюрмайсан... бир оз битлаганмиз. Агар бит юқтиранг—хафа бўлма. Гамимиз кўплигидан бит кўпайиб кетган, асти қўясан! Ҳар бири нақ бузоқдек келади.—Кейин бир оз сукут қилиб тургандан кейин сўради:—Илья Митрич, Ленин ўзи қайси халқдан? Ҳуллас, қаерда туғилиб ўсган?

— Ленинми? Ленин — руслардан.

— Йўғ-э!

— Ростини айтаётирман, рус.

— Йўқ, дўстим! Кўриниб турибдики, сен уни яхши билмайсан,—деди Чикамасов бу ҳақда кўп нарса билган одамдай мағрурланиб.—Унинг насл-насабини биласанми? Бизлардан. Ўзи Дон казакларидан, Сальск округи, Великокняжеск станицасида туғилган, тушундингми? Тўпчи бўлиб хизмат қилган дейишади. Унинг афти-боши ҳам ноппа-нозандай, қуий Дон казаклариники сингари ёноқлари чиқиқ, кўзла-ри ҳам қийиқ эмиш.

— Қаёқдан эшитдинг?

— Қазаклар гаплашиб турганда эшитиб қолдим.

— Йўқ, Чикамасов! У — рус, Симбирск губерниясида туғилган.

— Гапингга ишонмайман. Овора бўлма, ишониб бўпман! Пугач казакми—казак? Степан Разин-чи? Ермак Тимофеевич-чи? Билиб қўй! Улар йўқсил халқни подшога қарши оёқлантирган, ҳаммаси казаклардан. Сен бўлсанг Симбирск губерниясидан дейсан. Бундай гапни сендан эшитниш айб, Митрич...

Бунчук кулиб туриб:

— Шундай деб казак дейишадими-а? — деб сўради.

— Узи-ку казак-а, лекин ҳозирча ўзини кўрсатмай турибди. Мен бир одамнинг афтига тикилсам, дарров кимлигини билиб оламан.—Чикамасов тамаки чекиб, қуюқ тутунини Бунчукнинг юзига уфуриб, хаёл ичиди йўталди.—Ҳайрон бўламан, бизлар бу ерда бир-биrimiz билан муштлашгудек бўлиб тортишдик. Наҳотки Владимир Ильич бизнинг казак-

лардан, тўпчилардан бўлса. Шундай экан шунча илмни қаёқдан олган экан. Дейишларича, урушнинг бошидаёқ у немисларга асир тушган эмиш, у ерда ўқиган эмиш, бутун илмларни уқиб олганмиш. Уларнинг ишчилари орасида ғалоён чиқариб, олимларини ҳам мот қилиб қўйгандан кейин, немисларнинг ўтакалари ёрила ёзибди. «Бор, жўнаб қол, кенг пешона, худо хайнингни берсин. Бўлмаса, ишларимизни шундай чалкаштирасанки, кейин бутун умр калаванинг учини тополмаймиз!» — дейишибди ва ишчиларни қўзғатмасин деб қўрқиб, уни Россияга жўнатиб юборишибди. Ўҳў, оғайни у ўткир одам.— Чикамасов сўнгги гапини фурур билан гапириб, қоронғилик ичда жилмайиб кулди.— Сен, Митрич, уни кўрган чиқарсан-а? Йўқми, эсиз, эсиз! Айтишларича, калласи жуда катта эмиш.— Йўталиб, бурун тешигидан, сап-сариқ, паға-паға тутун чиқариб, цигарасини чекар экан, гапида давом қилди.— Ана шунақаларни аёллар кўпроқ туғса бўларди. Ўткир одам-да. У ҳали яна бир қанча подшони тўнтариб ташлайди.— Чикамасов оғир нафас олди.— Йўқ, Митрич, сен мен билан тортишиб ўтирма: Ильич — казак... Гапни чалғитишининг нима кераги бор! Сибирь губерниясида бунақалар асти бўлмайди.

Бунчук индамай анчагача, кўзларини очиб кулиб ётди.

Тезда уйқуси келавермади. Ростдан ҳам, ҳамма-ёйини бит босди, кўйлаги ичига кириб олиб, чақа бошлади. Унинг ёнида ётган Чикамасов ҳам хўрсиниб, қашланарди. Қимнингдир, нотинч оти қоронғиликда пишқириб, уйқуни бузар эди. Унинг энди кўзи илингандা отлар уришиб кетиб, дупурлашиб, ҳангиллаша бошлади.

Ўрнидан сапчиб туриб кетган Дугин жингиллаб:

— Э, ҳаром ўлгурлар. Так-так, — деб, яқин ердаги отни оғир бир нарса билан туширди.

Битлар безовта қилавергандан кейин, Бунчук қимиirlаб бир ёнбошига ағдарилиб олди. Уйқуси қочганига алам қилиб, эртанги бўладиган митингни ўйлай бошлади. Мабодо офицерлар қаршилик кўр-

сатиб қолса, оқибати нима бўлади, деб ўйлаб ўзича кулди: «Агар казаклар баравар қарши чиқсалар, офицерлар жуфтакни ростлаб қолса керак. Аммо ким билсин, ҳар ҳолда гарнizon комитети билан келишиб қўяман».

Бунчук беихтиёр урушдаги бир ҳодисани, 1915 йил октябридаги атакани эслади. Кейин эса хотираси гўё ўзига таниш, юриб ўтилган йўлга тушиб олганидан хурсанд бўлгандек, кўз ўнгиға узуқ-узуқ аччиқ эсадилкларни келтира бошлади: рус, немис солдатларининг хунук вожоҳатда ётишлари, ғалажевур гаплар, бир вақтлар кўрилган, лекин вақт ўтиши билан унитилган кўримсиз манзаралар, айтилмаган бўлса ҳам негадир сақланиб қолган фикрлар, тўпларнинг сезилар-сезилмас акс садолари, пулемётларнинг таниш тариллашлари, ленталарнинг шириллаши, кишининг кўнглини эритадиган жозибадор кўй, бир замонлар ошиқ бўлган хотиннинг оқарини қираган лаблари, яна уруш манзаралари.. ўлдирилганлар ва чўккан қардошлар мозори...

Бунчук шошиб-пишиб ўрнидан туриб ўтириди. «Ўлгунимча бу хотираларни эсда сақлайман. Мен эмас, ҳамма омон қолганлар ҳам сақлайди. Ҳаётни барбод этдилар, таҳқирладилар, лаънатилар! Маль-унлар!.. Сизлар ўз гуноҳингизни ўлимингиз билан ҳам юва олмайсиз!» деган гаплар унинг оғзидан чиқди ёки шундай деб ўйлади.

Яна тагин петроградлик металлист ишчи, урушда ўлдирилган ошнасининг ўн икки яшар қизи Лушани эслади. Бу ишчи билан бир вақтлар Тулада бирга ишлаган эди. Кечқурун бульвардан кетаётса, ўша ориққина, дароз ўсмир қиз энг четдаги скамейкада ингичка оёқларини кериб, тамаки чекиб ўтирган эди. Унинг юзлари сўлғин, кўзлари ҳорғин, бўялган, эрта балоғатга етганидан кўпчиган лабларининг четларида ғам излари кўринарди.

— Танимаяпсизми, амаки? — деб сўради у хириллаброқ, одатланиб қолган табассум билан. Сўнгра болалардек аянч бир ҳолда ўрнидан туриб, ҳўнграб йиғлаб юборди, бўйини эгиб, бошини Бунчукнинг тирсагига суюди.

Бунчук ўзида пайдо бўлган қаттиқ нафратдан бўғилаёзди. Ранги оқариб, тишларини ғижирлатиб, ингради. Сержун кўкрагини ишқалар экан, дир-дир титради. Назарида адоват кўкрагида пўлатдек қайнаб, нафас олишга халал бера бошлади, юрагининг тагида, чап томонда оғриқ пайдо қилди.

У эрталабгача мижжа қоқмади. Тонг отиши билан, ҳар қачонгидан кўра ранги сарғайган, тумтайган ҳолда темир йўлчилар комитетига борди. Казаклар эшелонини Нарвадан чиқармаслик тўғрисида келишиб олди. Бир соатдан кейин гарнizon комитетининг аъзосини қидириб кетди.

Соат саккиз деганда поездга қайтди. Тонг салқинини бутун вужуди билан ҳис этиб, ўз сафарининг омадли келишидан ичиде хурсанд бўларди. Станция омборининг занг босган томи устидан мўралаган қуёш ҳам, аллақаёқдан жаранглаб эшитилаётган хотин кишининг ашуласи ҳам уни қувонтиради. Тонг отиши олдидан бирпас шариллатиб жала қуиди. Излардаги қумлоқ ер ювилиб кетган, илон изи бўлиб ариқчалар оққан, рутубатли ёмғир иси келар, ер устида ёмғир из қолдириб кетган ўйдим-чукурлар кўринарди.

Вагон орқасидан шинель кийган ва узун қўнжли этигига лой сараган бир офицер чиқиб, Бунчук томон келаверди. Бунчук ясовул Калмиковни таниди-ю, юришини секинлаштириб, уни кута бошлади. Улар юзма-юз келиб қолишли. Калмиков тўхтаб, қийғоч қора кўзларини совуқ чақнатиб:

— Хорунжий Бунчук? Сен қамоқдамасмисан? Кечир, сенга қўл узатолмайман, — деди.

— Мен ҳам сен билан қўл бериб кўришиш ниятида эмасман... хомтама бўлма, — деди Бунчук истеҳзо аралаш.

— Сен, нима, бу ерда жон сақлаб юрибсанми? Еки... Петрограддан келдингми? Жонажон дўстинг Керенский юбордими?

— Нима, мени сўроқ қиляпсанми?

— Бир замонлар мен билан бир қисмда хизмат қилиб, кейин дезертирлик қилган кишининг тақдирига қизиқишим табиийдир.

Бунчук мийигида қулиб, елкаларини қисиб қўйди.

— Кўнглинг тўқ бўлсин, мени бу ерга Керенский юборгани йўқ.

— Лекин сизлар, яқинлашиб келаётган тахтика олдида, оғиз-бурун ўпишяпсиз. Ҳарқалай, сен ўзинг кимсан? Погонинг йўқ, солдатча шинелдасан... — Калмиков бурнини жийириб, истеҳзо арглаш нафрат билан Бунчукнинг бир оз букик гавдасини бошдан-оёқ кўздан кечирди. — Сиёсий даллол? Топдимми? — Шуни деб у жавоб кутмасдан орқасига ўгирилди-да, катта-катта қадам ташлаб кетди.

Ўз вагони олдида Бунчук Дугинни учратиб қолди.

— Нима қилиб юрибсан? Митинг бошланди-ку...

— Бошландими, а?

— Ҳа. Бизнинг юзбошимиз Калмиков Петроградга кетган эди, бугун паровозда ўша ёқдан келди-ю, казакларни бир жойга тўплатди. Казакларни авраб, ўз айтганига кўндиromoқ учун улар олдига кетди.

Бунчук тўхтаб, Калмиков Петроградга қаҷон юборилганини суриштира бошлади. Дугиннинг гапидан Калмиковнинг қарийб бир ойдан бери бу ерда бўлмаганини билиб олди.

«Бу одам ўта кетган аксилинқилобчилардан бири бўлиб уни бомба отишга ўргатиш баҳонаси билан Питерга юборган. Демак, Корнилов содиқ одам. Ҳай, майли», — деб ўйлади Бунчук Дугин билан бирга митинг бўлаётган жойга кетар экан.

Омборнинг орқа томонида кўк-яшил гимнастёркали, шинелли казаклар тиқилишиб турарди. Қоқ ўртада, атрофини офицерлар ўраб олган Калмиков тўнкариб қўйилган бочка устида туриб дона-дона қилиб:

— ... ғалаба қозонгунча урушни давом этдириш керак! — деб қичқиради. — Бизга ишонадилар, биз бу ишончни оқлашимиз керак! Ҳозир мен генерал Корниловнинг казакларга юборган телеграммасини ўқиб эшилдираман.

У лузумсиз бир шошқалоқлик билан френчининг ён чўнтағидан ғижимланган бир варақ қоғоз олдида, эшелон бошлиғи билан шивирлашиб қолди.

Бунчук билан Дугин казаклар олдига кели", уларга қўшилиб кетди.

— «Қазаклар, азиз орқадошлар! — деб Қалмиков ифодали, лекин руҳсиз бир товуш билан телеграммани ўқий бошлади: — Россия давлатининг чегараларини сизларнинг ота-боболарингиз жон фидо қилиб кенгайтирганларми? Улув Россия, сизничг жасоратингиз, шижаотингиз, фидокорлигингиз ва қаҳрамонлигинги соясида қудратли давлатга айланмаганми? Сиз, тинч Дон, гўзал Кубань, тўлқинли Терек, Ураль, Оренбург, Астрахань, Еттисув, Сибирь даштлари ва тоғларининг ва узоқ Забайкалье, Амур ва Уссурияning баландпарвоз бургутлари ўз байроқларингизнинг шарафи ва шуҳратига соқчи бўлиб тургансиз, ота-боболарингиз кўрсатган қаҳрамонликлар ҳақида сон-саноқсиз достонлар яратилган. Энди, ватанга ёрдам бериш вақти-соати етиб келди. Мен Муваққат ҳукуматни қатъиятсизликда, мамлакатни бошқаришда нўноқлик, лаёқатсизликда ва мамлакат ичкарисида немисларнинг хўжайнлик қилишига йўл беришда айблайман. Қозон шаҳрида рўй берган портлашда бир миллионча тўп ўқи ёрилиб кетиб, 12 000 пулемётнинг дабдала бўлиши бунга шоҳиддир. Бу ҳам оз. Мен ҳукумат аъзоларининг баъзиларини тўғридан-тўғри ватанга хиёнат қилишда айблайман ва бунга далиллар келтираман: Муваққат ҳукуматнинг Қишки саройда, августнинг 3 ида ўтказган мажлисида бўлганимда Керенский билан Савинков менга, бу ерда ҳар нарсани гапириб бўлмайди, чунки министрлар орасида ишончсиз одамлар бор, дейиши. Ҳаммага равшанки, бундай ҳукумат ўлкани ҳалокатга олиб бўради, бундай ҳукуматга ишюниб бўлмайди ва бундай ҳукумат бахтсиз Россияни қутқаза олмайди... Шунга кўра, кеча Муваққат ҳукумат, душманларнинг найрангига учеб, мендан олий бош қўмондонлик вазифасидан кечишини талаб этганда, мен бир казак сифатида, шарафим, номусим, бурчими ҳимоя этиб, бу талабни бажаришдан бош тортдим, ватанга хиёнат қилишдан, расвогарчиликдан жанг майдонида ўлишни афзал кўрдим. Қазаклар, рус ерларининг паҳлавонлари! Сиз

мен билан бирга, мен лозим топган вақтда ватанин ҳимоя этиш учун бел боғлашга ваъда берган эдигиз. Вақти-соат етди — ватан ҳалокат жари ёқасида турибди! Мен Муваққат ҳукуматнинг фармойишларига итоат этмайман ва эркин Россияни қутқариши мақсадида, Муваққат ҳукуматга ва унинг ватанин сотаётган масъулиятсиз маслаҳатчиларига қарши бораман. Казаклар, казакликнинг мислсиз шон-шарафини қўллаб-қувватланг, шу билан сиз ватанин ҳамда революция туфайли қўлга киритилган озодликни қутқазиб қоласиз. Менинг гапимга қулоқ солиб, амри-фармонларимни ижро этинг! Менинг орқадан юринг! 28 август, 1917 йил. Олий бош қўмондон генерал Корнилов».

Калников ўқиб бўлиб, бир оз жим турди-да, варақани буқлаб туриб:

— Большевиклар билан Керенскийнинг агентлари бизнинг қисмларимизнинг темир йўл орқали олдинга ҳаракат этишига монелик қиласптилар, — деб қичқирди. — Олий бош қўмондондан: башарти темир йўл орқали олдинга ҳаракат этиш мумкин бўлмаса, Петроград устига лашкар тортиб борилсин, деган бўйруқ олинган. Шу бугун йўлга чиқамиз, вагонлардан тушишга ҳозирланинг!

Бунчук, тирсаклари билан казакларни турта-турта ўзига йўл очиб, ўртага тушиб олди; офицерлар даврасига яқинлашмай, нотиқларга хос баланд овоз билан қичқирди:

— Казаклар, ўртоқлар! Мени Петроград ишчи ва солдатлари юборди. Сизларни қардош қонини тўкиш, революцияни тор-мор этдириш учун олиб кетаётирлар. Агар халққа қарши боришни истасангиз, агар подшо ҳукуматини тикламоқчи бўлсангиз — борингиз! Аммо Петроград ишчилари ва солдатлари ишонадиларки, сизлар қотил эмассизлар. Улар сизларга алангали саломларини юбордилар ва сизларни душман эмас, дўст бўлишингизни орзу этадилар...

Уни сўзлашга қўймадилар. Шундай шовқин-сурон кўтарилидик, гўё бу ҳайқириқлар Калниковни бочка устидан учириб юборгандек бўлди. Калников

энгашганича тез-тез юриб, Бунчук томон юрди, унга бир неча қадам қолганда пошнаси устида ўгирилиб қичқирди:

— Казаклар! Хорунжий Бунчук бултур фронгдан қочиб, дезертирлик қилган, — сизлар буни яхши биласизлар. Нима, энди биз бу қўрқоқ ва хоиннинг гапига қулоқ солиб ўтирамизми?

Олтинчи сотня командири, қўшин старшинаси Сукин дўриллаган овози билан Қалмиконинг товушини босиб кетди.

— Бу абллаҳни қамоққа олиш керак! Биз фронтда қонимизни тўкиб юрибмиз, у эса фронт орқасида жонини қутқариб қолган. Ушланг уни!

— Шошманг, сабр қилинг!

— Майли, гапирсин.

— Бироннинг оғзига элак тутиб бўладими. Майли, кўнгилдаги гапни айтсин.

— Қамоққа олинсин!

— Бизга дезертиларнинг ҳожати йўқ.

— Гапир, Бунчук!

— Митрич, уларнинг додини бер!

— Иўқол-син!

— Жим бўл, итвачча!

— Додини бер уларнинг, Бунчук! Бўш келма!

Уларга қарши дадил гапиравер!

Полк революцион комитети аъзоси, новча, фуражкасиз, сочи тақири қилиб олинган казак сакраб бочка устига чиқди. У казакларни революция хоини бўлган генерал Карниловга итоат этмасликка қизғин тарғиб этиб, халқа қарши урушнинг ҳалокатга олиб боришини айтиб берди, сўзини тамомлар экан, Бунчукка қараб деди:

— Сиз эса ўртоқ, жаноб офицерлар каби булар ҳам мендан нафрат қиласиди деб асло ўйламанг. Биз келганингиз учун жуда хурсандмиз ва сизни халқ вакили сафатида ҳурматлаймиз. Сиз офицер бўлган вақтингизда казакларга жабр қилмадингиз, бизга ўз ака-укаларингиздек муомала қилдингиз, шунинг учун ҳам сизни иззат қиласиз. Сиздан дағал сўз эшиitmадик, лекин гумон қилмангки, биздек ўқимаган одамлар иззат-ҳурматни тушунмайди деб, — яхши

гапни одам тугул, ҳайвон ҳам тушунади. Сизнинг олдингизда бош эгамиз ва Питер ишчи ва солдатларига маълум қилингки, биз уларга мушт кўтармаймиз!

Гурр этган овоз эшитилди, ҳамма унинг гапини олқишилаб сурон кўтарди, шовқин ўзининг энг юксак нуқтасига чиқиб, кейин пасайди, ҳамма жим бўлди.

Калников яна новча дараҳтдек ингичка қоматини букиб, бочка устига сакраб чиқди. Қадимий Доннинг шон-шуҳрати, казакларнинг тарихий роли, офицерлар билан бирликда казакларнинг тўккан қонлари ҳақида бўғила-бўғила гапирди, рангида ранг қолмади.

Калниковдан кейин ғўлабирдан келган малла соч казак чиқиб нутқ сўзлади. Унинг Бунчукка қарши гапирган аччиқ-тизиқ гапини бўлиб қўйдилар, — қўлидан тортиб бочка устидан туширдилар. Чикамасов сакраб бочка устига чиқиб олди-да, худди ўтин ёраётгандек қўлларини силкитиб ҳайқирди:

— Бормаймиз дедик, бормаймиз! Вагонлардан тушмаймиз. Телеграммада, казаклар гўё Корниловга ёрдам беришга ваъда берганлар, деб ёзилган, — лекин буни биздан ким сўради? Биз унга ҳеч қандай ваъда берганимиз йўқ! Казак союзи Советидаги офицерлар ваъда берган! Греков унинг олдида думини ликиллатган, — бориб ўзи ёрдамлашсин!..

Нотиқлар бирин-кетин чиқиб гапира бошладилар. Бунчук кенг пешонали бошини эгиб турар, унинг юзи бўриқсиб кетган, бўйни, икки чаккасидаги бўртиб чиққан томирлари тез-тез уради. Вазият жуда кескинлашди, агар аҳвол шундай давом этса, ўйламасдан қилинган бир ҳаракат қонли воқиа билан тугалиши турган гап эди.

Гарнizon солдатлари станция томондан тўп-тўп бўлиб кела бошлади, шундан сўнг офицерлар митингни ташлаб чиқиб кетишди.

Орадан яrim соат ўтгач Дугин Бунчукнинг олдига ҳовлиқиб чопиб келди.

— Митрич, нима қиласми?.. Калников бир балони бошламоқчи. Шу топда пулемётларни вагондан тушираётир, қаёққадир отлиқ чопар юборди.

— Юр ўша ёққа. Йигирма нафар казакни ол!
Дарров!

Калмиков уч офицер билан эшелон бошлигининг вагони олдида отларга пулемёт ортаётган эди. Бунчук аввал уларга яқинлашди, у орқасидаги казакларга ўгирилиб қараб қўйиб, қўлини шинелининг чўнтағига сүқди-да, ярқираб турган, янги офицерча наганини чиқарди.

— Калмиков, сен қамоққа олиндинг! Қўлингни кўтар!

Калмиков сакраб отдан тушди, энгалиб тўппонча қинига чанг солди, лекин тўппончасини чиқаришга ултурмади: бир ўқ бошининг устидан визиллаб ўтди; Бунчук ўқ чиқмасдан буруноқ бўғиқ ва шиддатли товуш билан:

— Қўлингни кўтар!— деб бақирган эди.

Наган курогининг пистон чақадиган учи яrim белигача кўтарилиди. Калмиков кўзларини қисиб, унинг ҳаракатини кўздан қочирмай, қўлини базўр кўтарди, бармоқларини шиқирлатиб қўйди.

Офицерлар истар-истамас яроқларини топширдилар.

Ёшгина хорунжий-пулемётчи эҳтиром ила:

— Қиличларни ҳам ечишни буюрасизми?— деб сўради.

— Ҳа.

Казаклар отлар устидаги юкни туширдилар, пулемётларни вагонга олиб кирдилар.

— Буларни қўриқлаш учун соқчилар қўйинг,— деди Бунчук Дугинга қараб.— Чикамасов қолганларни ҳам қамоққа олиб бу ерга олиб келади. Эшитяпсанми, Чикамасов. Калмиковни эса биз сен билан гарнizon ревкомига олиб борамиз. Ясовул Калмиков, марҳамат қилиб олдимизга туш.

Офицерлардан бири вагонга сакраб чиқди-да, узоқлашиб кетаётган Бунчук, Дугин ва Калмиковни кўзи билан таъқиб этиб:

— Уддабуронлигини қара-я! — деди завқи келиб.

— Жаноблар! Айб иш бўлди! Биз ёш болаларнинг қилиғини қилдик! У абллаҳни шартта отиб ташлаш њеч кимнинг ақлига келмади-я! Калмиковга наган ўқ-

талган пайтда биримиз унга қараб ўқ узсайдик — иш бир ёқлик бўларди-қўярди!— Қўшин старшинаси шуни деб, офицерларга нафратомуз назар ташлади, қалтираган бармоқлари билан бир папиросни хийла вақтдан кейин портсигаридан чиқарди.

— Ахир улар бир взвод-ку... ҳаммамизни отиб ташлар эдилар,— деди хорунжий-пулемётчи айбор кишидек.

Офицерлар чурқ этмай папирос чекишар, бир-бирларига қараб-қараб қўйишар эди. Кўз юмиб очгунча бўлиб ўтган воқиалар уларни шошириб қўйған эди.

Калмиков қора мўйловининг учини тишлаб, бир муддат индамай борди. Ёноклари туртиб чиқсан юзининг чап ёғи худди шапалоқ егандай ловиллар эди. Уларга дуч келган ерли аҳоли ҳайрон бўлиб қараб қолар, тўхтаб шивирлашарди. Говжум бўлган маҳалда Нарва устидаги булутли осмон аста очила бошлади. Йўл устида қайнин дараҳтининг тўкилган барглари олтиндай сочилиб ётар,— август жўнаб кетаётган маҳалда уларни йўлда тушириб қолдирган-дек эди. Кўк гумбазли черков устидан зағчалар учеб ўтар, станциянинг у тарафидаги маъюс далалар устидаги совуқ кечада қанотларини керган, Нарвадан Псков ва Луга томон осмон йўлларидан оқшом пайтида қўргошин тус олган ола-чалпак булутлар сузуб бормоқда; тун қоронғиси кўзга кўринмаган чегарадан ўтиб ҳамма ёқни босиб келмокда эди.

Станция ёнида Калмиков шартта орқасига бурилиб, Бунчукнинг афтига тупурди.

— Пасткаш!

Бунчук ўзини туфукдан олиб қочди-ю, бирдан қошларини чимириб, қўлини чўнтағига суқмоқчи бўлди, лекин ўнг қўлинини чап қўли билан ушлаб, туриб қолди.

Ўзини зўрлаб:

— Юр!— деди.

Калмиков беҳаё сўзлар билан сўкинар:

— Сен хоинсан! Сотқинсан! Сен бу қилмишларинг учун жавоб берасан,— деб қичқиради йўлда тўхтаб-тўхтаб, Бунчук устига бостириб келиб.

— Юр деяпман,— деб Бунчук ҳар сафар уни юришга кўндиromoқчи бўларди.

Калмиков муштларини қисиб, яна жойидан қўзғалар, оёғига ем тушган отдай силкиниб юрарди. Улар водокачка ёнига келдилар. Калмиков тишларини ғижирлатиб бақирди:

— Сизлар партия эмас, жамиятнинг қуйқаси, энг палид, разил бандитларсиз. Сизларга ким раҳбарлик қиласди!—Немисларнинг бош штаби! Больше-виклар... Ҳа-ҳа-ҳа! Пасткашлар! Сизнинг партиянгизни, бу яланг оёқларни ж... дек сотиб оладилар! Юзиз, беорлар!.. Ватаниннотдингизлар!.. Менинг қўлимда бўлса, ҳаммангизни бир дорга осар эдим... Ҳе, ҳали вақти-соати келади! Сизнинг Ленинингиз Россияни ўттиз немис маркасига сотмадими?! Бир миллионни чўнтакка уриб, жуфтагини ростлади... каторгачи!..

Бунчук дудукланиб, чўзиб деди:

— Деворга суюн!

Дугиннинг кайфи учиб кетиб, турган жойида қотиб қолди.

— Илья Митрич, шошмай тур! Нима қилмоқчисан? Тўх-та!..

Ғазабдан авзойи бузилган, юзи бўриқиб кетган Бунчук бир сакраб Калмиковнинг олдига келди-ю, жон-жаҳди билан чаккасига қараб туширди. Калмиковнинг бошидан учиб кетган фуражкасини оёғи остига олиб тепкилаб, ўзини водокачканинг қорайиб кетган девори томон судради.

— Деворга суюн!

— Нима қиляпсан? Сен!.. Ҳақинг йўқ! Уришга ҳақинг йўқ!— деб бўкирди Калмиков қаршилик кўрсатиб.

Водокачка деворига орқаси билан бориб урилгандан сўнг, қоматини ростлади-ю, нима бўлишини англади:

— Үлдирмоқчимисан?

Бунчук эгилиб, шошиб-пишиб, револьверига чанг солди, тепкиси чўнтагининг астарига илашиб қолди.

Калмиков шинелининг бутун тутгаларини солиб, олға бир қадам ташлади:

— От, итвачча! От! Кўр, рус офицерлари ўлимни қандай қарши оладилар... Мен ўлим олди...

Узилган ўқ унинг оғзидан кириб кетди. Водокачининг орқасидан ўқнинг акс садоси янгради. Қалмиков икки қадам босгандан кейин қоқилиб кетди-ю, чап қўли билан бошини ушлаб йиқилиб тушди. Камондай букилди, қора қонга беланган тишини кўкрагига туфлаб ташлади ва тилини тақиллатиб қўйди. У гавдасини тўғрилаб, шагал устига чўзилганда, Бунчук яна ўқ отди. Қалмиков бир сапчиб тушди-ю, ёнбошлаб, ухлашга ётган қушдек, бошини елкаси остига олиб, ҳиқиллади.

Биринчи муюлишда Дугин Бунчукнинг орқасидан етиб олди.

— Митрич... Бу нима қилганинг, Митрич! Сен уни нима учун ўлдирдинг?

Бунчук Дугиннинг елкасини қўли билан қисиб, тикандек ўткир кўзларини унинг кўзига тикида, киншини ҳайрон қолдирадиган совуққонлик билан аста деди:

— Ё улар бизни, ё бизлар уларни!.. Ўрта йўл йўқ. Қонга қон. Ким кимни... Англадингми? Қалмиков сингариларни йўқотиш, бошларини илондай янчиш керак. Уларга раҳм қилганларни ҳам отиш керак... англадингми? Нега сўлакайингни оқизасан? Лаб-даҳанингни йиғиштириб ол! Ғазабнок бўл! Агар ҳукумат Қалмиков қўлида бўлсайди, папирос чекиб туриб, бизни шартта отиб ташларди, сен бўлсанг... Эҳ, мишиқи!

Анча вақтгача Дугиннинг тишлари тишларига тегмай боши қалт-қалт қилиб турди, оҳори кетган этикдаги узун оёқлари чалишарди.

Кимсасиз танҳо кўчада чурқ этмай бордилар. Бунчук аҳён-аҳёнда орқасига бурилиб қараб қўярди. Зулмат ичиде қора булуллар бошлари устида мавжланар, шарққа қараб сузиб борарди. Август осмонини қоплаган булат орасидан кечаги ёмғирда ювинган кемтик ой яшил кўзлари билан қараб турарди. Кейинги муюлишда бир солдат билан елкасига оқ рўмол ташлаган бир хотин бир-бирининг пинжига суқилиб турар эди. Солдат аёлни қучоқлаб ўзига тортар, бир

нимадеб шивирлар, аёл эса икки қўлини унинг кўксига тираб, бошини орқасига ташлаб, энтика-энтика: «Ишонмайман! Ишонмайман»— дер ва ҳиринглаб куларди.

XVII

Керенский томондан чақирилган генерал Кримов 31 августда Петроградда ўзини отиб ўлдирди.

Кримов армиясидаги қисмларнинг командирлари ва намояндадар бош эгиб Қишики саройга кела бошлидилар. Яқиндагина Муваққат ҳукуматга қилич кўтариб келмоқчи бўлган одамлар энди Керенский олдига келиб тиз чўкар ва унга ўз садоқатларини изҳор қиласар эдилар.

Маънавий жиҳатдан соб бўлган Кримов армияси ҳалигача талваса ичида эди: унинг қисмлари ғайри ихтиёрий равишда Петроградга яқинлашар, аммо бу ҳаракат энди ўз маъносини йўқотган эди, чунки Корнилов фитнаси соб бўлаёзган, реакция ранг-баранг бўлиб ёнган мушакдек бир ловиллаб сўнган, республиканинг муваққат ҳокими,— гарчи шу кунлар ичида унинг гўштдор юзи ориқлаб бир ҳолатда бўлиб қолган бўлса-да,— тугмали қўнж кийган болдирини на-полеончасига диркиллатиб, ҳукуматнинг навбатдаги мажлисида «сиёсий стабиллик»ка батамом эришилгани тўғрисида лофурди.

Кримов ўзини ўлдирмасдан бир кун аввал генерал Алексеев олий бош қўмондон қилиб белгиланди Назокатли, сиркаси сув кўтармайдиган Алексеев ўзини уятга қолдирадиган дудмал аҳволга тушиб қолишини англаб, аввал бу лавозимдан қатъянн бош торти, кейин эса ёлғиз Корнилов ва унинг ҳукуматга қарши фитнасида маълум даражада қатнашганларнинг қисматини енгиллаштириш нияти билан бу вазифани ўз устига олди.

Йўлда келар экан телефон орқали бош қароргоҳ билан гаплашди, ўзининг бу янги мансабга белгиланишига ва бош қароргоҳга келишига Корниловнинг қандай муносабатда бўлишини аниқлашга уринди. Ўзини хуноб қилган бу музокаралар ярим кечагача чўзилди.

Ўша куни Корнилов ҳузурида штаб амалдорлари ва Корниловга яқин кишиларнинг маслаҳат мажлислари бўлаётган эди. Муваққат ҳукуматга қарши курашни давом этдириш мақсадга мувофиқми, йўқми деб берилган саволга мажлисда қатнашувчиларнинг кўпчилиги курашни давом этдириш истагини билдири.

Бутун мажлис давомида миқ этмай ўтирган Лукомскийга қараб:

— Ўз мулоҳазангизни айтишингизни сўрайман,— деди Корнилов.

Лукомский эҳтиёт билан, лекин қатъий қилиб, бу ички урушларни давом этдиришга қарши эътиroz билдири.

Корнилов унинг гапини бўлиб:

— Таслим бўлайликми? — деди кескин товуш билан.

Лукомский елкаларини қисиб қўйди.

— Бу саволга бериладиган жавоб ўз-ўзидан маълум.

Суҳбат яна ярим соат давом этди. Корнилов бутун ирода кучини сарф қилиб, ўзини совуққон қилиб кўрсатишига уринарди. Кўп ўтмай, мажлисни тарқатиб юбориб, бир соатдан кейин Лукомскийни олдига чақириди.

— Сиз ҳақлисиз, Александр Сергеевич! — деди у бармоқларини шиқиллатиб ва ёниб устини қул қоплаган чўғ сингари сўнник кўзларини бир томонга қаратиб, ҳорғин товуш ила: — Бундан кейин қаршилик кўрсатиш ҳам аҳмоқлик, ҳам жиноят бўлур эди,— деб қўйди.

У бармоқлари билан столни узоқ чертиб, бир нарсага қулоқ солиб ўтириди, балки хаёлидан лип-лип ўтаётган чалкаш фикрлари таъсирига берилаётгандир. Бир қанча вақтгача мум тишлигандай ўтириди, кейин:

— Михаил Васильевич қачон келади,—деб сўраб қолди.

— Эртага.

Биринчи сентябрда Алексеев етиб келди. Ўша куни кечқурун у Муваққат ҳукуматнинг фармони билан Корнилов, Лукомский ва Романовскийни қамоқقا олди. Қамоққа олингандарни «Метрополь» мусоифир-

хонасига юборишдан олдин (маҳбуслар шу мусофири-хонада соқчилар назорати остида сақланишлари керак эди), Алексеев Корнилов билан хилватда йигирма минутча бир нималар тўғрисида гаплашиб олди; у Корниловнинг хонасидан чиққанда ниҳоят даражада маъюс ва довдираб қолган эди. Романовский Корниловнинг ҳузурига кирмоқчи бўлганда унинг хотини:

— Афв этинг! Лавр Георгиевич ўз ҳузурига ҳеч кимни киритмасликни сўраган эди,— деди.

Романовский аёлнинг паришон чеҳрасига ялт этиб қаради-ю, ҳаяжонидан кўзларини пир-пиратиб, нарироқ кетди; унинг икки бети бўриқиб кетган эди.

Эртаси куни Бердичевда жануб-гарб фронтининг бош қўмондони генерал Деникин, унинг штаб бошлиғи генерал Марков, генерал Ваниновский ва Алоҳида армия қўмондони генерал Эрдели қамоқقا олинди.

Биховда, хотин-қизлар гимназиясида, тарих томонидан маҳкум қилинган корниловчилик ҳаракати шармандаларча хотима тоиди: келгусидаги граждандар уруши ва революцияга кенг жабҳа билан ҳужум этиш плани худди ўша ернинг ўзида тузилди.

XIX

Октябрь ойининг сўнгги кунларида, эрта билан ясовул Листницкий полк командиридан ўз сотнясини Сарой майдонига пиёда келтириш тўғрисида буйруқ олди.

Листницкий вахмистрга тегишли буйруқларни бергандан сўнг, шошиб-пишиб кийинди.

Офицерлар эснаб ўринларидан туришар, сўкинишарди.

- Нима гап?
- Гап большевиклар устида!
- Жаноблар, patronларимни ким олди?
- Қаёққа борамиз!
- Эшитяпсизми: отяптилар?
- Йўғ-э. Қулоғингизга эшитилаётганга ўхшайди.
- Офицерлар ҳовли саҳнига чиқдилар. Сотня взвод-взвод бўлиб, колонналарга тизилди. Листницкий ка-

закларни жадал юриш билан кўчага олиб чиқди. Невский кўчаси бўм-бўш. Ростдан ҳам қаердандир ора-сира милтиқ овози келарди. Сарой майдони бўйлаб броневик кезар, юнкерлар патрули изғиб юрарди. Кўчалар сув қўйгандек жимжит. Қишки сарой дарвозаси олдида казакларни юнкер навбатчилар ва тўртинчи сотня казак офицерлари қаршилади. Улардан бири — сотня командири Листницкийни бир чеккага чақириб олди:

— Сотнядагиларнинг ҳаммаси шу ердами?

— Ҳа, нимайди?

— Иккинчи, бешинчи ва олтинчи сотнялар келишдан бош тортди, лекин пулемётчилар командаси биз билан. Қазаклар қалай?

Листницкий қўйл силтаб қўйди.

— Чатоқ. Биринчи ва тўртинчи полклар-чи?

— Улардан дарак йўқ, келмайдилар. Сиз бугун большевикларнинг хуруж қилишларидан хабардормисиз? Ҳеч нимага ақлим етмай қолди! — Листницкий хўрсаниб қўйди:— Бошингни олиб, Донга жўнаб кетгинг келади...

Листницкий сотнясини сарой ҳовлисига олиб кирди. Қазаклар милтиқларини бир-бирига суюб, чорпоя қилгач, машқ майдони каби кенг ҳовли саҳнига таралиб кетишли. Офицерлар узоқ бир бурчакдаги уйга тўпланишли. Папирос чекишиб, гаплаша бошлашди.

Орадан бир соат ўтгач, юнкерлар полки билан аёллар батальони етиб келди. Юнкерлар саройга кираверишдаги катта даҳлизга жойлашди, пулемётларни ҳам ўша ерга олиб чиқишли. Зарбдор¹ аёллар ҳовли саҳнида уймалашиб туришарди. Тентираб юрган казаклар улар яқинига келиб, қалтис ҳазил қилишарди. Урядник Аржанов калтагина шинель кийган хўппа семиз аёл жангчининг орқасига шапатилаб урди.

— Сен, хола, эркакларнинг ишини қилгандан кўра, бола туғсанг бўларди.

¹ зарбдор аёллар — аёллар батальони («ажал батальони») солдатлари.

— Үзинг туғавер! — деб жавоб берди йўғон овоз билан серзарда «хола».

Эски мазҳабдаги хотинбоз Тюковнов аёл аскарларга шилқимлик қилиб:

— Вой жононлар-э! Сизлар ҳам биз билан бирга экансиз-да? — деди.

— Бу мочағарларни боплаш керак!

— Шулар ҳам аскар бўлдими!

— Уйларида ўтирасалар — ўладиларми! Бу ерда уларга пишириб қўйибдими?

— Кўрмайсанми бу хунасаларни!

— Олдидан қарасанг—солдатга, орқасидан ё попга, ё алланима балога ўхшайди... Туф бетларингга дегинг келади!

— Ҳой, жанговар аёл! Қетингни кўтар, бўлмаса қўндоқ билан солиб қоламан!

Қазаклар хоҳолашиб, хотинларни қалака қилиб кўнгил очишарди. Аммо тушга бориб, бу хурсандчилик барҳам топди. Зарбдор аёллар взвод-взвол бўлиб, майдондан йўғон қарағай ғўлаларини келтирдилар ва дарвазанинг оғзини тўса бошлидилар. Эркак нусха, шинели яхши ўтирган, георгий медаллик йўғон бир аёл уларга фармонбардорлик қилас эди. Бир броневик майдоннинг у ёғидан бу ёғига ўтиб турар, юнкерлар қаердандир патрон ва пулемёт ленталари солингган яшикларни саройга олиб кирав эдилар.

— Ҳой, казаклар, эҳтиёт бўлинглар!

— Бундан чиқди урушарканмиз-да.

— Сен нима деб ўйловдинг? Зарбдор аёллар биз билан қитиқлашгани келганлар деб ўйловдингми?

Лагутиннинг ҳамқишлоқлари — букановликлар, слашчевликлар унинг атрофини ўраб олган эдилар. Улар бир нарса тўғрисида маслаҳатлашишар, бир ердан иккинчи ерга борар эдилар. Офицерлар аллақаёқка чиқиб кетишган эди. Ҳовлида казаклар ва зарбдор аёллардан бошқа ҳеч ким йўқ эди. Пулемётчилар ташлаб кетган пулемётлар дарвоза оғзида турар, уларнинг қалқонлари мой суртгандек йилтйилт қилиб турарди.

Кечга яқин майда ёмғир ёға бошлади.

— Бу нима деган гап-а? Бизни бу ҳовлига қамаб, очимиздан ўлдирмоқчиларми?

— Листницийни топиш керак.

— Топиб бўпсан! У саройда, юнкерлар бўлса бизларни у ерга қўймайдилар.

— Кўчма ошхонага одам юбориш керак, овқат олиб келсин.

Икки нафар казакни кўчма ошхонани келтиришга юбордилар.

— Милтиқсиз боринглар, бўлмаса қўлингиздан олиб қўйишади,— деб маслаҳат берди Лагутин.

Кўчма ошхонани роса икки соат кутиши. На ошхонадан дарак бор эди, на чопарлардан. Кейин маълум бўлдики, кўчма ошхона дарвозадан чиқиши билан семёновчи солдатлар уни ҳовлига қайтариб юборибдилар. Дарвоза оғзида тўпланған зарбдор аёллар таралишиб саф тортиши; ғўлалар тагига ётиб олиб, майдоннинг нари томонига қараб қаёқ-қадир ўқ уза бошлишди: казаклар бир чеккада папирос чекиб пўнғиллар эдилар. Лагутин сотняни девор тагига тўплади, сарой деразаларига қўрқаписа назар ташлаб деди:

— Ҳой, казаклар, билсангиз — бизнинг бу ерда қиласидиган ишимиз йўқ. Бу ердан жўнаб қолиш керак, бўлмаса бекордан-бекорга ўлиб кетамиз. Саройга қараб ўқ отишса отишаверсин, бизнинг нима ишимиз бор? Офицерлар жуфтакни тўғриладилар... биз, ни ма, қарғишига учраганмизки, бу ерда балонинг ўқига дучор бўлсак? Юринглар уйга, бу ерда бизга пишириб қўйгани йўқ! Муваққат ҳукуматнинг бизга ҳожати йўқ! Нима дейсизлар, казаклар?

— Агар ташқарига чиқсан, қизил гвардиячилар пулемётдан ўт очадилар.

— Калламизни оладилар.

— Йўғ-э, ундаи қилмасликлари керак.

— Бўлмаса сафга тизилинглар!

— Йўқ, охиригача пойлаб ўтирамиз.

— Бизнинг ишимиз осон — овқат ейиш-у, уйқуга кетиш.

— Ким нима қиласа қилаверсин, лекин бизнинг взвод кетади!

— Ундаи бўлса, биз ҳам кетамиз!

— Большевикларнинг олдига одам юбориш керак. Бизга тегмасинлар, биз ҳам пешоналарига чертмаймиз.

Биринчи ва тўртинчи сотня казаклари ҳам улар олдига келишди. Ҳар бир сотнядан биттадан казак ажратиши, уч казак дарвозадан чиқиб кетди, бир соатдан кейин уч матросни бошлаб келди. Матрослар дарвоза оғзига тахлаб қўйилган ғўлалар устидан сакраб ўтиб, жўрттага ҳеч нарсани назар-писанд қилмагандай ҳовлига киришди. Улардан бири — қора мўйловли, пахталик камзуланинг олди очиқ, шапкасини гарданига суриб қўйган матрос фуж бўлиб турган казаклар орасига кирди.

— Казак ўртоқлар! Биз, революцион Болтиқ флотининг вакиллари, сизга Қишки саройни тарк этишини таклиф этгани келдик. Ўзингизга етти ёт бегона бўлган буржуа ҳукуматини ҳимоя этмоқдан сиз учун бир чақалик фойда йўқ. Қўйинг, уни буржуа болалари, юнкерлар ҳимоя этсин. Солдатлардан биттаси ҳам муваққат ҳукуматни ҳимоя этмади ва сизнинг орқадошларингиз бўлган Биринчи ва Тўртинчи полк казаклари бизга қўшилди. Ким биз билан кетишни истаса — сўл томонга ўтсин.

Биринчи сотнянинг азамат урядниги олдинга чиқиб:

— Шошма, оғайни! — деди.— Кетиш бўлса биз жон деб кетамиз... Борди-ю, қизил гвардиячилар бизнинг кулимиини кўкка совурса-чи?

— Ўртоқлар! Петроград ҳарбий-революцион комитети номидан сизларнинг хавфсизлигинизни таъмин этишга ваъда берамиз. Ҳеч ким сизга дахл қилмайди.

Ғўлабир, чўтироқ бир матрос қора мўйловли шериги ёнига келиб турди. У буқаникайдай йўғон бўйинини буриб, казакларга кўз югуртириди-да, кенг қўкрагини сиқиб турган матросча қўйлагига қўли билан урди.

— Биз сизларга ҳамроҳ бўламиз! Оғайнилар, шубҳаланманг, биз сизларга душман эмасмиз ва Петроград пролетарлари ҳам сизнинг душманингиз эмас,

дushmanlaringiz mana bular...— deb u kerik boşmol-dogi билан саройни кўрсатди ва оппоқ тишларини кўрсатиб жилмайди.

Қазаклар иккиланиб қолиши, зарбдор аёллар уларнинг олдига келиб, гапларига қулоқ солар, казакларга қараб қўйиб, яна дарвоза олдига кетишарди.

— Ҳой, аёллар! Биз билан бирга кетасизми?— деб бақирди серсоқол казак.

Аёллар жавоб бермадилар.

— Милтиқларингизни олинг, юринг!— деди Лагутин қатъий қилиб.

Қазакларнинг ҳаммаси винтовкасини олиб, сафга тизилди.

Пулемётчи казак қора мўйловли матросдан:

— Пулемётларни ҳам олайликми?— деб сўради.

— Олинг. Улар кадетларга қолмасин.

Қазаклар чиқиб кетай деб турганларида сотня офицерлари ҳаммаси бирдан келиб қолиши. Офицерлар ғуж бўлиб, матрослардан кўзларини узмай туар эдилар. Сотнялар сафга тизилгач, қўзғалди. Олдинга тушиб олган пулемёт командаси пулемётларини ҳам оливолган эди. Пулемётларнинг сал-палғичиллаган ҳўйларидан тошлар устида иргишлаб, тарақлар эди. Пахталик камзул кийган матрос биринчи сотнянинг олдинда кетаётган взводи ёнида борарди. Федосеев станицалик новча, малла казак унинг енгидан ушлаб, гуноҳкор кишидек таъсирили бир овоз билан:

— Азизим, халққа қарши чиқишига кимнинг тоби бор дейсиз? Аҳмоқлик қилиб, бу ерга кепқолдик, билганимизда келармидик?— деди кокилли бoshини чайқаб.— Сўзимга ишон, келмас эдик, худо ҳақи!

Тўртинчи сотня энг охирда борарди. Аёллар батальони дарвоза олдида ғуж бўлиб тўхтаб қолди. Бақувват бир казак гўлалар устига чиқиб олиб, тирноқлари ўсиқ қоп-қора бармоғини ўйнатиб маънодор қилиб:

— Ҳой, мерғанлар, гапга қулоқ осинглар!— деб уларга гап уқдирмоқчи бўлди.— Мана биз энди

кетяпмиз, сизлар эса хотинлигингизга бориб, ақлиңиз калталигидан бу ерда қоляпсиз, лекин аҳмоқлик қила кўрманг! Борди-ю, орқамиздан ўқ отадиган бўлсангиз, — қайтиб келиб, ҳаммангизни бурда-бурда қилиб ташлаймиз. Ё гапим ноўринми? Шуни билиб қўйинг. Ҳозирчалик, хайр.

Матрос ғўлалар устидан сакраб тушди-ю, йўргалаб ўз қисмига етиб олди, орқасига ўгирилиб, қараб-қараб қўяди.

Казаклар майдоннинг ўртасига етганда, улардан бири орқасига қайрилиб, ҳаяжон билан:

— Қаранглар, йигитлар! Орқамиздан офицер келяпти, — деди.

Кўплар кета туриб, бошларини ўгириб қарадилар. Баланд бўйли бир офицер қиличини ушлаганча, майдон саҳнида чопиб келаверди.

У, қўли билан тўхтанг дегандек ишора қилди.

— Бу — учинчи сотия офицерларидан Атаршчиков.

— Қайси бири?

— Новчаси, қўзининг тагида холи бори.

— Биз билан бирга кетмоқчи бўпти-да.

— Ўзи яхши йигит.

Атаршчиков чопа-чопа сотняга етиб олди, узоқдан илжаяётгани кўриниб турибди. Казаклар қўлларини силкитиб куладилар.

— Илдамроқ қимиранг, жаноб офицер.

— Қаттиқроқ.

Сарой дарвоздисидан пақиллаган ўқ овози эшитилди. Атаршчиков қўлларини ҳавода ўйнатиб, чалқанчасига, орқаси билан йиқилиб тушди, оёқларини ти-тиратиб, ўрнидан турмоқчи бўлди. Сотнялар команда берилгандек юзларини сарой гомон ўғирдилар. Оғзи саройга қаратилган пулемётлар ёнида пулемётчилар тиз чўкиб олдилар, ленталар шириллади. Сарой дарвозаси оғзида, қарағай ғўлалар орқасида ҳеч зоғ йўқ. Отилган ўқ бир минут аввал ўша ерда тўпланиб турган зарбдор хотинлар ва офицерларни гўё супуриб ташлагандек бўлди. Сотнялар яна шошибишиб сафга тизилди ва илдам юриб кетди. Сўнгги взвод казакларидан икки нафари Атаршчи-

ков йиқилган жойдан қайтиб келди. Улардан бири бутун сотняга эшилдириб:

— Сўл курагининг остидан тешиб ўтибди. Жони узилибди,— деб бақирди.

Бараварига ташланган қадамлар гурсиллаб эшилди. Пахталик камзул кийған матрос:

— Ўнгга бурил, марш,— деб команда берди.

Сотнялар эгри-буғри бўлиб ўнгга бурилдилар. Сув қўйгандек жимжит бўлиб, мунғайиб қолган сарой уларни индамай кузатиб қолди.

XX

Куз иссиқ келди. Пайдар-пай ёмғирлар ёғди. Бихов шаҳри устида нурсиз қуёш ҳар замон-ҳар замондагина кўриниб қўяр эди. Октябрь ойида ёввойи қушлар иссиқ ўлкаларга учиб кета бошлади. Ҳатто кечалари ҳам зах, қора тупроқ ер устида турналар қурқуллашиб учиб ўтгани эшилтиларди. Совуқдан, шамолдан баландлаб эсиб келадиган изғиринлардан қўрқкан қушлар гала-гала бўлиб шошиб-пишиб жўнаб қоларди.

Корнилов иши юзасидан Биховда қамоқقا олинган маҳбуслар бир ярим ойдан бери судни кутиб ётарилилар. Шу вақт ичида уларнинг турмадаги ҳаётни бир маромга тушиб қолгандек эди. Гарчи одатдагидан бошқачароқ бўлса-да, ҳарқалай ўзига хос мустаҳкам бир тус олган эди. Ҳар куни эрталаб ненуштадан кейин генераллар сайд қилгани чиқишарди; қайтиб қелгач, почта орқали қариндош-уруглари ва таниш-билишларидан келган хатларни олиб ўқишарди. Тушки овқатдан кейин мизғиб олиб, ҳар қайсиси ўз хонасида ўз иши билан машғул бўларди. Кечқурунлари эса Корниловнинг хонасига йиғилишиб, анчагача маслаҳатлашиб ўтиришарди.

Турмага айлантирилган аёллар гимназиясида улар шинам ҳаёт кечиришарди. Турманинг ташқарисини Георгиевский батальонининг солдатлари, ичкарисини эса, така туркманлар қўриқлар эди. Бу қўриқчилар маҳбусларнинг эркинлигини бир қадар сиқиб қўйган бўлсалар-да, бунинг афзаллик томони

ҳам бор эди. Кўриқчилар шундай қўйилган эдики, агар истасалар, маҳбуслар хоҳлаган вақтларида бу ердан bemalol қочиб кета олар эдилар. Турмада бўлган вақтларида улар ташқи дунё билан баҳузур алоқа қилиб турдилар, терговни ва судни тезлаштиришни талаб қилиб, буржуа жамоатчилигига тазийқ кўрсатдилар. Фитна изларини йўқотиб юбордилар, офицерларнинг қўйинларига қўл солиб кўрдилар ва ниҳоят, қочишига тайёрландилар.

Корнилов ўз ёнида бўлган садоқатли така туркманларнинг ғамини еб, Калединга мурожаат қилди. Каледин эса, унинг талаби билан Туркистондаги оч қолган така туркманларнинг оиласларига тезлик билан бир неча вагон ғалла жўнатди. Корнилов фитнасида қатнашган офицерларнинг оиласларига ёрдам кўрсатиш учун у Москва ва Петрограддаги катта банка эгаларига кескин мазмунда хат ёзиб мурожаат қилди. Улар ўзларининг сирлари очилиб шарманда бўлиб қолишларидан хавотирланиб, тезлик билан бир неча ўн минг сўм юбортирдилар. Корнилов билан Каледин ўртасида ноябрь ойигача муттасил ёзишма давом этди.

Корнилов октябрь ойи ўрталарида Калединга юборган катта хатида Дондаги аҳволни ва ўзининг у ерга боришига казакларнинг қандай қарашини суриштириди. Хатга Калединдан ижобий жавоб олди.

Октябрь ўзгариши Биховдаги маҳбусларнинг оёғи остидаги заминни ларзага келтириди. Ўзгаришининг эртасигаёт ҳар томонга ўқдай учиб чопарлар жўнаб кетди. Бир ҳафтадан кейин эса маҳбусларнинг тақдирли ҳақида жонкуярлик қилган аллакимнинг қистови билан Каледин генерал Духонинга хат ёзиб юборди. Духонин бу вақт ўзини ўзи бош қўмондон деб эълон қилган эди. Каледин бу хатида Корниловни ва бошқа маҳбусларни кафилга олиши қаттиқ илтимос қилган эди. Казак қўшинлари союзи Совети, армия ва флот офицерлари союзи Бош комитети Бош қароргоҳга ҳам шундай илтимос билан мурожаат қилди. Духонин эса сусткашлик кўрсатди.

1 ноябрда Корнилов унга хат ёзди. Духонин ҳатининг чеккаларига ёзган изоҳи Баш қароргоҳнинг жуда заифланиб қолганини очиқ кўрсатувчи бир далил эди. Бу вақтда энди Баш қароргоҳ сўнгги кунларини кечираётган, руҳи тушган армия устидан бўлган ўз ҳукмдорлигини бутунлай қўлдан бой берган эди.

Марҳаматли зоти олий

Николай Николаевич!

Тақдир сизни шундай бир мавқега қўйдики, мамлакатни ҳалокатга элтувчи ҳодисаларнинг боришини фақат сизгина ўзгартира оласиз. Бу ҳодисалар катта қўмондонлик составининг беқарорлиги ва масалага бефарқ қараши орқасида шундай тус олган эди. Баъзан шундай бир пайт келадики, бунда одамлар ё тавакkal қилиб бир иш чиқариши ёки истеъфога чиқиши керак, аks ҳолда мамлакатнинг ҳалокати учун жавобгарлик ва армиянинг батамом тор-мор бўлиши каби шармандалик доғи уларнинг зиммасига тушади.

Менга келган чала маълумотларга қараганда аҳвол оғирга ўхшайди-ю, лекин ҳали нажотсиз эмас. Башарти сиз бош қароргоҳнинг большевиклар қўлига ўтиб кетишига йўл қўйсангиз ёки бўлмаса, ўз ихтиёрингиз билан уларнинг ҳокимиятини тан олсангиз, у ҳолда нажот тўғрисида ўйлаб ўтирмаса ҳам бўлади.

Сизнинг ихтиёрингиздаги ярми йўлдан оздирилган Георгийевский батальони ва кучсиз така туркманлар полки заинфлик қилади.

Ҳодисаларнинг боришини олдиндан кўриб, шуни ўйлайманки, сиз ошғич равишда шундай чоралар кўришингиз керакки, бу тадбир бош қароргоҳни амин этиб, босиб келаётган анархияга қарши курашни ўюштиromoқ учун қулай шароит яратиб берсин.

Мен қуйидагиларни шундай тадбир деб ҳисоблайман.

1. Тезлик билан чех полкларидан бирини ва полк отлиқ аскарлар полкини Могилёв шаҳрига кўчириш;

Дуҳонининг изоҳи: Баш қароргоҳ уларни ишончли деб ҳисобламайди. Бу қисмлар большевиклар билан сулҳ қилишига биринчи бўлиб киришидилар.

2. Поляк корпус қисмлари томонидан Орша, Смоленск, Жлобин ва Гомелни ишғол қилиш; бунинг учун поляк корпуслари дивизиялари казак тўпчилари билан кучайтирилсин.

И з о ҳ: Орша ва Смоленскни ишғол қилмоқ учун 2-нчи Кубань дивизияси ва Астрахань казаклари бригадаси тўпландиган. Маҳбусларнинг хавфсизлиги учун биринчи поляк дивизияси полкими Бихов шаҳридан олиши ярамайди. 1-нчи дивизия қисмларида кадрлар заиф бўйаб, шу сабабдан ҳақиқий күч ҳисобланмайди. Корпуш Россиянинг ички ишларига аниқ аралашмаслик фикридадидир.

3. Орша — Могилёв — Жлобин линиясига бутун Чехо-Словак корпуси қисмларини, Корнилов полки (Петроградга олиб бориш баҳонаси билан) ва энг мустаҳкам казак дивизияларидан бир-иккитасини тўплаш.

И з о ҳ: Казаклар большевиклар билан урушмаймиз деб қаттиқ турив олганлар.

4. Уша районга барча инглиз, Бельгия бронемашина қисмларини тўплаш, уларнинг командасини фақат офицерлардан қилиш.

5. Могилёв ва унга яқин пунктлардан бирига, ишончли соқчилар остида, запас миљтиқ, ўқ, пулемёт, автомат, миљтиқ ва қўл гранатлари жамлаш ва уларни шу районга йигиладиган офицерлар ва кўнгиллиларга бўлиб бориш.

И з о ҳ: Бу чора эксцесслар чиқарии мумкин.

6. Дон, Терс ва Кубань қўшинлари атаманлари ҳамда поляк ва чех комитетлари билан мустаҳкам алоқа ўринатиш ва аниқ бўйр қарорга келиш. Казаклар мамлакатда тартиб ўринатишга очиқ тарафдор бўлиб чиқдилар. Поляклар ва чехлар учун Россияда тартиб ўринатиш эса ҳаёт-мамот масаласидир.

* * *

Кундан-кун ваҳимали хабарлар келмоқда, Биховдагилар безовталана бошлаган эди. Могилёв билан Бихов ўртасида Корнилов тарафдорларининг автомобиллари у ёқдан, бу ёққа қатнаб турар, улар Духониндан маҳбусларни озод қилишни талаб этар эдилар. Казак совети ҳатто маҳфий суратда таҳдид ҳам қилди.

Содир бўлаётган воқиалардан гангид қолган Духонин иккиланиб қолган эди. 18 ноябрда у маҳбусларни Донга жўнатиш ҳақида буйруқ берди-ю, лекин буйруқни дарҳол бекор қилди.

Эртаси куни эрта билан Бихов гимназияси —тур-

манинг катта дарвозаси олдига ҳамма ёғига лой сачраган автомобиль келиб тўхтади. Шофер эъзозикром билан автомобиль эшигини очди, машинадан ўрта ёшли, келишган бир офицер чиқди. У қоровул офицерга бош штаб полковниги Косунский номига ёзилган ҳужжатни кўрсатди.

— Мен бош қароргоҳдан келдим. Қамоққа олинганд генерал Корниловга шахсий топширифим бор. Комендантни қаердан топсам бўлади?

Комендант — Така туркман полкининг командири подполковник Эргардт келган офицерни Корнилов олдига бошлаб олиб борди. Кусонский ўзини таништиргандан кейин алоҳида илтифот ва ғайри табиий руҳий кўтаринкилил билан:

— Тўрт соатдан кейин бош қароргоҳ Могилёвни урушсиз топширади,—деди.—Генерал Духонин, ҳамма маҳбуслар дарҳол Биховни ташлаб чиқиб кетсин, деган буйруқни сизга маълум қилишни топширадилар.

Кусонскийдан Могилёвдаги аҳволни сўраб-сурештиргандан кейин Корнилов подполковник Эргардтни чақирирди-да, сўл қўлининг панжасини стол четига тираб туриб:

— Дарҳол генерални озод қилинг. Така туркманлар кечаси соат ўн иккida йўлга чиқишга ҳозирлансинлар. Мен полк билан бирга кетаман,— деди.

Бутун кун бўйи кўчма темирчилик устахонасида дамлар хириллаб, кўмирлар ланғиллаб ёнди, чўкичлар тарақлади, қозиққа боғланган отлар ҳангиллади. Така туркманлар отларининг тўрт оёғини тақалаб, юган-жабдуқларини тикиб ямадилар; милтиқларини тозалаб, сафарга ҳозирландилар.

Кундуз куни генераллар бирин-кетин маҳбусхонани тарқ этдилар. Коқ ярим кечада, ҳамма ёқ ҳувиллаб ётган маҳалда, кичкинагина шаҳарча аҳолиси чироқларини ўчириб, донг қотиб ухлаб қолгай пайтда Бихов гимназияси ҳовлисидан учта-учта бўлиб, суворийлар чиқа бошладилар. Уларнинг қорайиб кўринган қоматлари пўлат каби йилтираган осмон фонида яққол кўзга ташланарди. Ҳурпайған қора қушларга ўхшаган суворийлар катта папоқ-

ларини қошларигача бостириб кийиб олиб, эгар устида буқчайиб, жунжикиб ўтирап, ёфдек ялтираб турган қорача юзларини бошлиқлари билан ўраб-чирмаган эдилар. Полк колонналарининг ўрта бир ерида, полк командири полковник Кюгельгеннинг ёнида Корнилов бир оз букилиб, баланд бўйли, хипча от устида чайқалиб бораради. У Бихов кўчаларида елиб юрган изғириндан юзини тириштирап, кичкина қийиқ кўзларини қисиб, аёзда юлдузларга тўлган осмонга қарап эди.

Янги тақалангани отларнинг тарақлаган туёқ товуши кўчаларда барада эшитилиб турди ва шаҳардан четга чиққандан сўнг тинди.

XXI —

Полк икки кундан бери орқага чекинмоқда, се-кин-аста, жанг билан чекинмоқда эди. Баланд йўллардан рус ва румин армиясининг юк ортилган аравалари турна қатор кетмоқда. Бирлашган Австрия-Германия қўшин қисмлари чекинаётганларни ён томондан — узоқдан айланиб ўтиб, ҳалқадек ўраб олишга уринарди.

Кечга бориб, ўн иккинчи полк ва унга ёндош бўлган румин бригадасининг қуршовда қолиш хавфи борлиги маълум бўлди. Қуёш ботар олдида душман руминларни Ховинески қишлоғидан суриб чиқарди ва Голшеский довони билан чегарадош бўлган «480» тепалигигача силжиб борди.

Кечаси суворий тоғ дивизиони батареясидан мадад олган 12-нчи полк Гольшск водийсининг қуви томонларини ишғол қилиш тўғрисида буйруқ олди. Полк пойлоқчилар қўйиб, жангга ҳозирланди.

Уша кечаси Мишка Кошевой ва унинг ҳамқишлоғи гирдиғум Алексей Бешняк махфий пойлоқчиликда турардилар. Улар ўпирилган қудуқ ёнидаги пастқамликда яшириниб, муздек ҳавода ётар эдилар. Тумтайиб олган булутли осмондан аҳён-аҳёнда кечикиб қолган ёввойи ғоз галалари учиб ўтар, ғарифлашиб ўзларининг қаёққа кетаётганликларини билдириб турардилар.

Чекиш мумкин эмаслигини эслаб ранжиган Кошевой секин шивирлаб гапирди:

— Турмуш ғалати бўлди-да, Алексей. Одамлар кўрдек пайпасланиб юришади, бир йиғилиб, бир тарқалишади, баъзан бирини бири оёқости қилади... Ажал ёнида ана шундай турсанг, бу машмашаларнинг нима кераги бор деб таажжубланасан. Менимча, дунёда одамзоднинг қалбидаги нима борлигини билишдан мушкул нарса йўқ... Мана, мен сен билан ёнма-ён ётибман-у, нима тўғрида ўйлаётганингни билмайман. Бошингдан нималар кечганини бир умр билмайман, сен эсанг мени билмайсан... Балки мен сени ўлдирмоқчитирман, сен бўлсанг менга қоқон беряпсан, ҳеч нарсадан гумон қилмайсан... Одамлар ўзларини яхши билмайдилар. Ёзда мен госпиталда ётдим. Ёнимда москвалик бир солдат ҳам ётди. У казаклар қандай ва қай тарзда ҳаёт кечиришади, деб суриштиравериб, ҳайрон бўларди. Улар, казакнинг қамчисидан бўлак нарсаси йўқ, казак ёввойи, юраги тошдан деб ўйлайдилар. Биз ҳам ҳаммадақа одаммиз-да: хотинларни яхши кўрамиз, қизларни эркалатамиз, ўз қайгуимизга ўзимиз йиғлаймиз, бирорнинг хурсандчилиги билан ишимиз йўқ... Сен қандай деб ўйлайсан, Алёшка? Менинг ҳаётга меҳрим зўр, дунёда не-не нозанинлар борлигини эсласам, юрагим орзиқиб кетади! Назаримда ҳеч қайси сига етишадиганга ўхшамайман. Сиқилганимдан дод дегим келади! Хотинларга шундай муштоқ бўлганманки, ҳар қанақасини ҳам бағримга тортгим келади. Ориқми, туриқми, ишқилиб, нозанин бўлсин... Буни қаранг, зап ақл топишибди-да: ўлгунингча бигтаси билан бўл эмиш, жонингга тегса ҳам ўшани де эмиш. Тағин урушни чиқаришибди, э-ҳа...

— Сен ҳўқизнинг сағрига камроқ туширишганга ўхшайди,— деб беғараз сўкинди Бешняк.

Кошевой чалқанчасига тушиб олди-ю, индамади, анчагача поёнсиз осмонга қараб ётди ва хаёл ичидаги жилмайиб, музлаган қаттиқ ерни қўллари билан секин силаб қўйди.

Смена келмасдан бир соат бурун уларни немислар таппа босиб қолди. Бешняк ўқ узди-ю, тищлари-

ни ғижирлатиб, ўлар ҳолатда икки букилиб ўтириб қолди: немис наизаси унинг ичак-чавағини ағдариб, қовуғини ёриб юборган, умуртқасига қадалиб қолған эди. Кошевойни эса милтиқ қўндоғи билан уриб думалатиб ташладилар. Уни гирдиғум ландштурмист елкасига кўтариб, ярим чақирим жойгача олиб борди. Мишка ўзига келиб, оғзидан қон келганини билди-да, энтикиб нафас олди, бор кучини тўплаб, немиснинг елкасидан юлқиниб тушди. Унга қараб бараварига ўқ уздилар, аммо қоронғи тун ва чакалакзор жонига оро кирди-ю, қочди.

Чекиниш тўхтаб, рус-румин қисмлари қуршовдан чиққач, 12-нчи полкни турган жойидан олиб, ўз участкасидан бир неча чақирим чапроққа, ичкарироққа ташлаши. Полкка буйруқ эълон қилинди: «Қочоқларнинг олди тўсилсин, йўлларга пойлоқчилар қўйилсан, дезертирлар ичкарига ўтказилмасин, улар ушлансан, қурол ишлатишдан ҳам тортинилмасин ва соқчилар назоратида дивизия штабига жўнатилсан».

Мишка Кошевой биринчи бўлиб, навбатчиликка чиқди. У, яна уч казак эрталаб қишлоқдан чиқиб, вахмистрнинг топшириғи билан йўл ёқасидаги жўхорипоя этагига жойлашиши. Йўл кичик ўрмонзор ёнида бурилиб, тепалиқдаги чорбурчак пайкаллар орасига кириб кўздан ғойиб бўларди. Казаклар навбатма-навбат пойлоқчилик қилишди. Тушдан кейин ўzlари томонга келаётган ўн чоғлиқ солдатни кўриб қолишли. Солдатлар йўл муюлишидаги қишлоқчани ёндаб ўтиш ниятида келаётган эдилар. Ўрмонзорга яқин келиб, тўхтадилар. Маслаҳатлашиб туриб, папирос чекдилар. Кейин йўлларини ўзгартириб, шартта чапга бурилиб, тўғрига қараб кетдилар.

Кошевой жўхорипоя орасидан чиқиб, шерикларидан:

— Овоз берайлими? — деб сўради.

— Осмонга ўқ от.

— Ҳой, тўхтанглар!

Казаклардан бир неча саржин нарида турган солдатлар ҳайқириқи эшитиб, бир лаҳза тўхтадилар, кейин истар-истамас йўлга тушдилар.

— Тўх-та! — деб бақирди казаклардан бири, осмонга устма-уст ўқ узиб.

Казаклар милтиқларини қўлга олиб, секин юриб кетаётган солдатларни қувиб етдилар. Соқчилар бошлиғи урядник Количев чопиб келиб:

— Нега тўхтамайсанлар, абллаҳлар? Қайси қисм-дансанлар? Қаёққа кетяпсанлар? Ҳужжатларинг борми? — деб ҳайқирди.

Солдатлар тўхтадилар. Учтаси имиллаб милтиғини олди. Энг орқадагиси этигининг кўчиб кетган таг чармйни телефон сими билан боғламоқчи бўлиб энгашди. Уларнинг ҳаммаси жулдуурвоқи, кир-чир эди. Шинелларининг этагига қўйтиканаклар ёпишган эди. Афтидан, шу кечада чакалак ичида тунаб чиқишиганга ўхшарди. Иккитасининг бошида ёзлик шапқа, бошқаларницида эса боғичлари ечилиб, силкиниб келаётган кул ранг тўқима папоқ бор эди. Энг кейиндагиси новча ва кексалардек букчайган солдат, афтидан бошлиқ бўлса керак, салқи бетларини диплатиб, дўриллаган панг овоз билан қичқирди:

— Сизларга нима қసрак? Сизларга дахл қиляп-мизми? Нега тирғилиб қолдиларинг?

Урядник важоҳат билан унинг гапини бўлиб:

— Ҳужжатларингни кўрсат! — деди.

Мовий кўз ва хумдондан янги чиққан фиштдай қип-қизил солдат камаридан шишиасимон граната ни олди-да, уни урядникнинг бурни тагида ўйнатиб, шерикларига бир қараб қўйди, сўнгра Ярославл шева-сида бидирлаб гапира кетди:

— Мана, бизнинг ҳужжатимиз! Мана! Бу ҳужжат бутун умрингга етади! Жонингни асрасанг-чи, бўлмаса ирфитиб юбораман, ичак-чавағинг ағдарилиб тушади. Англадингми? Англадингми, деяпман? Англадингми?

— Сен граната билан ҳазиллашма,— деди урядник унинг кўкрагига туртиб.— Граната билан бизни қўрқитаман деб хомтама бўлма, биз қўрқиб бўпмиз. Модомики қочоқ экансиз, юрларинг штабга. У ерда сен каби таъвияларни чириқдан ўтказишади.

Солдатлар бир-бирига қарашиб, милтиқларини қўлга олдилар. Улардан бири — қора мўйлов, ранги

заъфарон, афтидан шахтёрга ўхшаган солдат ғазаб-нок кўзини Кошевойдан бошқа казаклар устига кўчириб, шипшиди:

— Йўлни бўшат! Бўлмаса қорнингга санчамиз!..
Қочларинг деяпман. Худо урсин, отиб ташлайман!..

Кўк кўз солдат, гранатани боши устида айлантириди, олдиндан новча, буқчайганроқ солдат, милициининг занглаган найзаси билан урядникнинг мовут шинилини илиб олди, шахтёрга ўхшаган солдат сўкиб, Мишка Кошевойга қўндоғини кўтарди, Мишканинг эса тепки устидаги бармоғи титрар, милигини маҳкам қисиб олган тирсаги қалтирарди; казаклардан бири ушоққина солдатни орқа ёқасидан ушлаб, судраб олиб борар ва орқамдан тушириб қолмасмикинлар деб олазарак бўларди.

Жўхориологиярнинг қуриган барглари шитирлар эди. Паст-баланд ялангликнинг орқа томонидан тоғ сиртлари кўм-кўк бўлиб кўринарди. Қишлоқ яқинидаги экинлари ўриб олинган далада тарғил сиғирлар ўтлаб юарди. Ўрмонзор орқасида шамол муздек ернинг чанг-тўзонини учирив юарди. Файзиз сунбула куни тинч; офтоб нури хира ёритиб турган бу манзара осойишта ва жимжит эди. Йўлдан сал нарироқда, инсонлар маъносиз бир қаҳрғазаб билан депсиниб турар, ёмғирга тўйган, дон сочилган серҳосил ерга ўз қонларини тўкишга ҳозирланар эдилар.

Улар бир оз ғижиллашиб олгандан кейин жаҳлдан тушиб, секин-аста гаплаша бошладилар.

— Позициядан келганимизга уч кун бўлди! Биз фронт орқасида юрганимиз йўқ! Сиз бўлсангиз, қочиб кетяпсиз, айб ахир! Ўз ўртоқларингизни ташлаб кетяпсиз-а. Бундай бўлаверса, фронтни ким ушлаб туради? Шу ҳам одамгарчиликми!.. Менинг ёнгинамдаги шеригимни найза санчиб ўлдиришди, иккаlamиз махфий пойлоқчиликда эдик, сен бўлсанг, урушда бўлмагансиз, дейсан. Сен ҳам бизчалик урушда бўлсайдинг!— деди жаҳл аралаш Кошевой.

— Булар билан айтишиб ўтиришнинг нима ҳожати бор!— деб унинг гапини бўлди казаклардач бири:— Юрларинг штабга, гапни чўзмаларинг!

— Казаклар, йўлни бўшатинг! Бўлмаса, худо ҳақи, отиб ташлаймиз!— деб гап уқдиради шахтёрга ўхшаган солдат.

Урядник таъна қилгандай, қўлларини кериб қўйди:

— Оғайни, биз бундай қилолмаймиз! Бизни ўлдириб кетганингизда ҳам, барибир қутулиб кетолмайсиз: анатви қишлоқда бизнинг сотнямиз турибди.

Букчайган новча солдат, дам пўписа қилас, дам гап уқдирмоқчи бўлар, дам ялиниб-ёлворарди. Ниҳоят, типирчилаб, яғир бўлиб кетган сумкасидач похол билан ўралган бир шиша чиқарди, ялтоқланаб, Кошевойга кўз қисиб қўйиб шивирлади:

— Ҳой казаклар, бунинг устига бир оз пул ҳам берамиз, ўзиям... немис ароғи... яна бирор нарса сўна қиласмиз... Худо ҳақи, бизларни қўйиб юборинг... уйда бола-чақамиз чирқираб қолган, ўзингиздан қоллар гап йўқ. Азоб-уқубатдан, ғамдан адо бўлдик... Қачонгача чидаб бўлади?.. Ё худо!.. Наҳотки, бизларни қўйиб юбормасангиз?—у шошиб-пишиб, этигининг қўнжидан тамаки халтачасини олди-да, иккита ғижимлаган Керенский пулини қоқиб тушириди-ю, зўрлаб Кошевой қўлига тутқиза бошлади.— Ол деяпман, ол! Э, худойим-э! Мендан хавотирланма!.. Бусиз ҳам етиб оламиз!.. Пул деган қўлнинг кири... пулсиз ҳам кунимиз ўтиб кетаверади... Ол! Яна тўплаб берамиз...

Уялганидан қип-қизил бўлиб кетган Кошевой, қўлини орқасига қилиб, бошини чайқаб, ундан нари кетди. Юзига қон тепиб, кўзларидан ёш чиқиб кетди: «Бешняк туфайли мен тошюрак бўлиб қолдим... Менга нима, зарир кептими... ўзим урушга қаршиман-у, одамларнинг йўлни тўсяпман-а — шундай қилишга менинг ҳақим борми?.. Вой худо ургур-э, қилғилиғингни қара-я! Вой ит-э!»

Кошевой урядник ёнига келиб, уни бир чеккага тортиб, кўзига қарамасдан деди:

— Кел, буларни қўйиб юбора қолайлик! Сен нима дейсан, Количев? Кел, худо ҳақи, қўйиб юборайлик!..

Урядник ҳам кўзларини яшириб, шу онда уят бир иш қилаётгандай:

— Майли, кетаверсинлар... — деди. — Уларни бoshimizga урамизми? Биз ўзимиз ҳам, кўп вақт ўтмай, шу кўйга тушамиз... Буни яшириб ўтиришнинг нима ҳожати бор!

Шуни деб у солдатларга ўгирилиб, норози оҳангда:

— Аблаҳлар! Раҳмимиз келиб, сизларга одамгарчилик қилсак, бизларга пул қистирмоқчи бўласизларми? Нима, ўзимизда пул қуриб қолганми? — деди бўзариб.— Ҳамёнингни беркитиб қўй, бўлмаса штабга обораман.

Қазаклар бир четга чиқиб турдилар. Кошевоӣ узоқдаги қишлоқнинг бўум-бўш кўчаларига қараб-қараб қўйиб, узоқлашиб кетган солдатларга бақирди.

— Ҳой, тентак бузоклар! Нега ялангликдан кетяпсизлар! Ҳув анови ўрмонзорга кириб, кечгача ўтиринг-да, кечаси йўлга тушинг! Бошқа постга дучкеп қолсаларинг, штабга оборадилар!

Солдатлар атрофларига аланглаб қараб, бир муддат тараддуланиб турдилар-да, кейин исқириб бўрилар сингари турна қатор бўлиб, оқ терак ўсиб чакалак бўлиб кетган пастқамликка уриб кетдилар.

* * *

Ноябрнинг бошларида казакларнинг қулоғига, Петрограддаги тўнтариш ҳақида бир-бирига зид харарлар эштила бошлади. Юз берган янгиликлардан ҳаммадан кўра кўпроқ хабардор бўлган штаб ординарецилари, Муваққат ҳукумат Америкага қочди. Қеренскийни матрослар ушлаб олиб, сочини тап-тақириб қилиб қирибдилар-да, бутун баданига қора мой суртиб, фоҳишидек Петроград кўчаларида икки кун саззойи қилиб айлантириб юрибдилар, дер эдилар.

Кейинроқ, Муваққат ҳукуматнинг йиқитилгани заҳокимиётнинг ишчи-дехқонлар қўлига ўтгани ҳақида расмий маълумот олинганидан кейин, казаклар сергакланиб писиб қолдилар. Кўплар энди уруш тўхтар экан, деб курсанд бўлар, аммо 3-нчи отлиқ ас-карлар корпуси Қеренский ва генерал Краснов билан биргаллашиб, Петроград устига ҳаракат этаётган эмиш, вақтдан фойдаланиб, Донга казак полклари-

ни оборволган Каледин жанубдан юриш бошлаган эмиш деган миш-миш гаплар казакларнинг юрагига ғулғула солар эди.

Фронт пароканда ҳолда эди. Агар октябрь ойида солдатлар уюшмаган ҳолда тўп-тўп бўлиб позицияни ташлаб чиқиб кетсалар, ноябрь охирида бутун-бутун роталар, батальонлар, полклар кета бошлиди, баъзилари ҳеч нарса олмай чекинар, аммо асарият полк мулк-ашёларини талон-торож қилиб, складларни бузар, офицерларни отиб ташлаб, йўл-йўлакай таланчилик қиласар, тошқин селдай дуч келган нарсани ағдариб-тўнтириб, ватанларига қайтар эдилар.

Бундай вазиятда 12-нчи полкка қочоқларни тўхтатиш вазифасини юклаш маъносиз нарса эди. Шундан кейин полкни яна позицияга юбориб, ўз участкаларини ташлаб кетган пиёдаларнинг бўш қолган ўрнини тўлдиришга уриниб кўрдилар, бироқ полк декабрда позицияни ташлаб, саф тортиб, энг яқиндаги станцияга етиб олди ва полкнинг бутун ашқолдашқоллари, пулемётлари, запас патронлари, отларини вагонларга юклаб, уруш олови ичидаги қолган Россия ичкарисига қараб жўнади.

12-нчи полк эшелонлари Украинани босиб, Дон тарафга йўл олди. Знаменка шаҳри яқинида қизил гвардиячилар полкни қуролсизлантиришга уриниб кўрдилар. Музокара ярим соатга чўзилди. Кошевой ва сотня революцион-комитетлари раислари бўлган беш нафар казак ўзларини қурол билан ўтказиб юборишларини илтимос қилдилар.

— Қурол-аслаҳанинг сизга нима кераги бор? — деб сўрашди станция депутатлари Советининг аъзолари.

— Ўз буржуйларимиз ва генералларимизни отиб ўлдириш ва Калединнинг белини синдириш учун! — деб ҳамма учун жавоб қилди Кошевой.

— Қурол-яроқлар ўзимизники, қўшинники, бермаймиз, — деб казаклар ғалва кўтара бошладилар.

Қизил гвардиячилар уларни ўтказиб юбордилар. Кременчугда казакларни яна қуролсизлантириш учун уриниб кўрдилар. Пулемётчи казаклар вагонлар-

нинг эшиги оғзига пулемётларини қўйиб, станция биносини нишонга олганларидан ва сотнялардан бири ёйилиб, темир йўл изининг нариги томонига ётиб олгандан сўнгина эшелонни қўйиб юборишга рози бўлдилар. Екатеринослав яқинида казаклар қизил гвардиячилар билан отишиб кўрдилар, лекин бу ҳам ёрдам бермади, — полкни қисман қуролсизлантирилар: қизил гвардиячилар пулемётларни, юздан ортиқ патрон яшикларини, дала телефони аппаратларини ва бир неча ғалтак симни олиб қолдилар. Офицерларни қамоққа олиш таклифини казаклар рад этдилар. Бутун йўл бўйи фақат биргина офицерларини — полк адъютанти Чирковскийни йўқотдилар, уни казакларнинг ўзи ўлимга ҳукм этдилар, ҳукмни Кокилдор билан яна қандайдир қизил гвардиячи матрос ижро этди.

17 декабрда кечга яқин Синельниково станциясида казаклар адъютантни вагондан судраб чиқдилар.

— Казакларни сотган офицер ана шуми? — деб кулиб туриб сўради маузер ва япон милтифи билан қуролланган қораденгизчи матрос.

— Сен бизни адашяпти деб ўйлайсанми? Йўқ, биз янглишмадик, худди ўзини қўлга туширдик, — деб нафаси тиқилиб жавоб қилди Кокилдор.

Ясовул ёрдамчиси бўлган ёш адъютант орқасидан овчи қуваётган йиртқич ҳайвон каби олазарак бўлиб атрофга қаранар, терлаган кафти билан соchlарини силар, юзини жазиллатиб чақиб олган совуқни ҳам, милтиқ қўндоғи билан тушириб қолганларида оғриқни ҳам сезмас эди.

Кокилдор билан матрос уни вагондан нарироққа олиб борди.

— Шунга ўхшашиб ифлосларнинг касофати билан одамлар ғалаён кўтарадилар, шунақаларнинг касрига революция бўлди. Ҳой, аканг ўргилсан, кўп қалтирайверма, учиниб қоласан, — деб Кокилдор шивирлади-да, фуражкасини ечиб чўқинди. — Ана энди таъзирингни ейсан, жаноб ясовул.

Матрос қўлида маузерни ўйнатиб, ишшайиб, Кокилдордан:

— Тайёрмисан? — деб сўраб қолди.

— Тай-эр!

Кокилдор яна чўқинди-да, оёқларини кериб, маузерини кўтараётган ва диққат билан кўзини қисаётган матросга кўз қирини ташлади, сўнгра хунук кулиш қилиб, матросдан олдинроқ ўқ узди.

Чаплино яқинида полк, анархистлар билан украинлар орасида боргётган урушга тасодифан аралашиб қолди, уч казакдан ажралиб, қандайдир пиёда аскарлар дивизияси томонидан ишғол қилинган йўлни улардан зўрға тозалаб, минг мاشаққат билан қутулиб чиқди.

Уч кундан кейин полкнинг бош эшелони Миллерово станциясида вагонлардан тушди.

Қолганлари Луганскда қолиб кетди.

Ярим-ёртиси қолган полк (иккинчи ярми станцияларда тушиб, уй-уйларига тарагалиб кетди) Каргин хуторига етиб келди. Эртаси куни фронтдан келтирилган, австрияликлардан ўлжа қилиб олинган отларни ким ошди қилиб сотдилар, полк ақчалари, кийим-кечакларини бўлашиб олдилар.

Кошевой ва Татарск хуторлик бошқа казаклар кечга томон уйларига йўл олдилар. Тепага чиққанларида, пастда, илондай буралиб, музлари ялтираган Чир сойининг нариги бегида Юқори Дондаги энг чиройли хутор — Каргин хутори кўринди. Буғ тегирмонининг трубасидан ҳалқа-ҳалқа бўлиб тутун чиқиб туради. Хутор майдонига тўпланган халойиқ қорайиб кўринарди; кечки ибодатга жом чалинаётган эди. Қаргин тепасининг нариги томонида Климовск хуторидаги оқтолларнинг учи кўринади, хутор орқасида осмоннинг ярмини алвон рангга бўяган қўёш ботмоқда, уфққа туташиб кетган қўр босган дашт офтоб нурида товланади.

Ўн саккиз отлиқ, уч туп ёввойи олма ўсиб ётган тепаликдан ошиб, отларини йўргалата-йўргалата, эгар чармларини ғичирлатиб, шарқ-шимол томон йўл олди. Тепанинг нариги томонидаги ерларни аёз тун қоронғиси босиб келмоқда. Қазаклар бошлиқларига ўралиб олиб, баъзан отларини чоптириб кетар эдилар. Отларнинг тақалари тарақлаб қулоқни бит-

кизар эди. От туёқлари остида топталиб текисланған йўл жанубга қараб чўзилиб кетган; ҳар икки томонни қор қоплаган, бир неча кун аввал кун исигандага эриб ерга ёпишган, ўтларга илашиб музлаб қолган қор ой нурида камалакдек товланарди.

Казаклар инламай отларини ниқтаб қўяр эдилар. Йўл жанубга қараб кетган. Кун ботиш томонда Дубовенько жарлигидаги ўрмон худди айланаётганга ўхшарди. Йўл чеккаларида қуёнларнинг майдага ўхаш излари кўзга чалинарди. Даشت устида Етти қароқчи юлдузлар туркуми безакли казак камари каби осмоннинг сиқиб олган эди.

БЕШИНЧИ ҚИСМ

1917 йил кеч кузида казаклар фронтдан қайтиб кела бошладилар. Қартайиб қолган Христоня ҳам ўзи билан 52-нчи полкда хизмат қилган уч казак билан бирга қайтиб келди. Ҳарбий хизматдан батамом бўшатилган, аввалгисидек икки бети қип-қизил Аникушка, тўпчилардан Иван Томилин билан Яков Тақачи, улардан кейин Шамиль Мартин, Иван Алексеевич, Захар Королёв, бесўнақай, дароз Боршчевлар ҳам қайтилар. Декабрь ойида тўсатдан Митъка Коршунов ҳам келиб қолди. Бир ҳафтадан кейин эса, 12-нчи полкда хизмат қилган бир тўп казаклар: Мишка Кошевой, Прохор Зиков, Кашулин чолнинг ўғли Андрей Кашулин, Епифан Максаев, Егор Синилнлар қайтишиди.

Австриялик офицердан тортиб олинган чиройли бўз отни миниб, ўз полкини ташлаб кетган қалмоқ башара Федот Бодовсков Воронеждан келди. Қейинчалик у Воронеж губерниясидаги революция ғалаёни ичida қолган бир қишлоқдаги, қизил гвардиячи отрядлари олдидан ўз чопқир отига ишониб қандай ўтиб келганини ҳикоя қилиб берди.

Унинг кетидан большевиклашган 27-нчи полкдан, Каменскдан Меркулов, Петро Мелехов ва Николай Кошевойлар етиб келдилар. Улар, сўнгги вақтда 2-нчи запас полкда хизмат қилган Григорий Мелеховнинг большевиклар томонига ўтиб, Каменскада қолиб кетгани тўғрисида хабар келтирдилар. Илгари бебош

бўлган от ўғриси, янгидан бошланган олағовур замонда бамайлихотир яшамоқ орзусида большевиклар томонига ўтган Максимка Грязнов 27-нчи полкда қолиб кетган. Максимка ўзига жуда хунук, лекин ниҳоятда учқур от топиб олибди, дер эдилар. Уларнинг гапига қараганда, Максимка отининг бутун белидан тасмага ўхшаш узун оқ йўл ўтган экан. От ўзи паканагина бўлса ҳам бўйи чўзиқ, ранги тўриқ экан. Григорийни тилга ҳам олмас эдилар. Ҳамқишлоқлари билан бир йўлдан кетмагани учун у тўғрида гапиришни истамасдилар. Унинг ҳамқишлоқлари билан топишиш-топишмаслиги номаълум эди.

Казаклар қайтиб келгач, меҳмон-изломлар билан тўлган уйларда хурсандчилик бошланди. Бу хурсандчилик ўз туғишгандари ва яқинларидан абадий маҳрум бўлган кишиларнинг ҳасратларига ҳасрат қўшар эди. Бирталай казаклар қайтмаган эди. Уларни Галиция, Буковина, Шарқий Пруссия, Карпат тоф этаклари, Руминия далаларида отиб ташлаган эдилар. Тўплар гумбурлаб турган даштларда уларнинг беҳисоб мурдалари чириб ётар, уларнинг мозорларини ўт босиб кетган, ёмғирлар чўқтирган, қор босган. Казак аёллари бошяланг бўлиб, кўча-кўйга чопиб чиқиб, нақадар интизорлик билан боқмасин, меҳрибон ёстиқдошларидан дарак тополмайдилар. Шишинқираган ва нурсизланган кўзлардан қанча ёш оқмасин, барибир, ғам-ғуссани ювиб кетолмайди. Улар ўз яқинларининг йил ошлари ва маъракаларида нақадар доддлаб йигламасинлар, шарқ шамоли уларнинг фарёдларини Галиция ва Шарқий Пруссияга, чўқкан қардошлиқ мозорларига учириб оборолмайди.

Мозорларни ўт босиб кетади, вақт ўтиши билан ғам-ғусса унутилади, шамол кетганларнинг изларини ўчириб текислаб кетади, замон эса қайғу-аламни, ўз яқинларини орзиқиб кутганларнинг хотирасини эскиртади. Инсоннинг ҳаёти қисқа бўлгани учун ўт-ўланларни узоқ вақтгача пайхон қилиш кишига насиб бўлмагани учун ҳам кутишга умр кифоя қилмайди.

Прохор Шамилнинг хотини марҳум эрининг укаси Мартин Шамиль фронтдан қайтиб келиб, ўз ҳомила-дор хотинини эркалаганини, ўз болаларини эркалат-

ганини, уларга совғалар улашиб берганини кўриб, бошини қора тупроққа уриб, ер тимдалар эди. Прохорнинг хотини ўзини савалаб, тиззалаб ер узра судралар, бир томонда болалар қўйдек ғуж бўлиб олиб, фарёд кўтарган оналарига қарашар, қўрққанларидан додлашарди.

Фарёд кўтар, эй бечора аёл, ягона кўйлагингнинг ёқасини чок-чок қил, оғир ва кўнгилсиз ҳаётдан сийраклашган соchlaringни юл! Қонталаш лабларингни тишила, меҳнатда майишган қўлларингни қайир, бук! Ҳувиллаб қолган уйинг бўсағасига каллангни ур! Уйинг эгасиз, ўзинг эрсиз, болаларинг отасиз қолган. Шуни билки, ўзингни ҳам, етимчаларингни ҳам энди ҳеч ким эркалатмайди. Сени оғир иш ва қашшоқликдан ҳеч ким халос этолмайди. Кечалари сенинг бошингни ўз бағрига босадиган ҳеч кимса йўқ, ҳолдан тойиб ҷарчаб йиқилганингда, бир вақтлар у: «Хафа бўлма, Аниська! Бир амаллаб кун кечирамиз» дегандек гапни энди ҳеч ким айтмайди. Энди сени эр олмайди, чунки сени меҳнат, муҳтожлик ва болалар тинка-мадорингни қуритган, ҳуснингдан айрилгансан. Ярим яланғоч мишқи болаларинг энди оталик бўлолмайди. Ерни ўлиб-тирилиб ўзинг ҳайдайсан, ўзинг мола босасан. Ӯроқ машинада ўзинг ишлайсан, буғдой боғларини ўзинг аравага ортасан. Оғир буғдой боғларини паншаха билан ўзинг кўтарасан, ичингда бир нарса узилса, жулдур кўрпани ёпиниб олиб, тўлғанасан, қонга беланасан.

Алексей Бешнякнинг эски оқ кўйлагини қўлига олиб онаси зор-зор йиғлар, Мишка Кошевой олиб келган ва чокларида ўғлининг тер иси қолган сўнгги кўйлагини искар, юзларига суртиб, чайқалиб, айтибайтиб йиғлар, муҳр босилган кир бўз кўйлагини қўз ёшлари билан ҳўл қиласан.

Маницков, Афонька Озеров, Евлантий Қалинин, Лиховидов, Ермаков ва бошқа казакларнинг болачақалари ҳам есир қолдилар.

Ёлғиз Степан Астаховга ҳеч ким йиғламади, чунки йиғлайдиган кишиси ҳам йўқ эди. Унинг михлаб қўйилган, ёзда ҳам совуқ кўринган хароба уйи ҳувиллаб ётарди. Аксинья Ягодноеда турар, хуторда унинг

ҳақида бурунгидек кам эшитишар, ўзи ҳам хоторга боргиси йўқ, хабар олгиси ҳам келмас эди.

Донец округининг юқори станицаларидан бўлган казаклар ўз ҳамқишлоқлари билан тўп-тўп бўлиб келар эдилар. Вешенская станицасига қарашли қишлоқларга фронтдаги ҳамма казаклар қайтиб келди.

Татарск хотори ичидан кеча-кундуз тўда-тўда отлиқ аскарлар Дон дарёсининг сўл томонига ўтиб турарди.

Чоллар уйларидан чиқиб:

— Ҳой, аскар болалар, қаердансизлар?— деб сўрардилар.

— Қорасойдан.

— Зимовнаядан.

— Дубровкадан.

— Решетовскаядан.

— Дударевскаялик.

— Гороховскаялик.

— Алимовскаялик,— деб жавоб қиласар эдилар казаклар.

— Урушиб хумордан чиқдингизми?— деб сўрар эдилар чоллар пичинг қилиб.

Баъзи инсофли ва ювош фронтчилар мулоийимлик билан кулиб:

— Бас қилдик, урушиб хумордан чиқдик,— дер эдилар.

— Абгор бўлдик, энди уй-уйимизга кетяпмиз.

Сержаҳл, довюрак казаклар онадан сўкиб:

— Сен эсини еган чол, бориб ўзинг жанг қил!— дер эдилар.

— Нега суришираверасан? Сенга нима дахли бор?

— Сизга ўхшаган эзма чоллар бу ерда ачиб ётибди!— деб ўдағайлашарди казаклар.

Қиши охирида Новочеркасскда гражданлар уруши бошланиб, дастлабки жанглар бўлди, Доннинг юқори қисмида хотор ва станицалар сув қўйгандек жимжит эди. Казакларнинг уйларида оила аъзолари ўртасида махфий, баъзан ошкор ички низолар бўлиб турарди: чоллар фронтчилар билан чиқишмас эдилар.

Дон қўшинлари вилоятининг пойтахт шаҳри яқинида бошланган қизғин жанглар тўғрисида миш-миш гаплар юрарди; казаклар юз берган сиёсий оқимлар тўғрисида аниқ тасаввурга эга бўлмаганлари учун воқиаларнинг нима билан тугашини тўрт кўз билан кутар эдилар.

Январгача Татарск хутори осоёишта ҳаёт кечирди. Фронтдан қайтиб келган казаклар хотинлар ёнида дам олиб ётар, тўйгунча овқат еб қорин солар, лекин уйларининг бўсағаларида уларни урушда бошлиридан кечирган балойи-офатлардан ҳам оғир фалокатлар кутиб турганини билмас эдилар.

II

Григорий Мелехов жангларда кўрсатган мардлиги учун 1917 йилнинг январида хорунжийлик мартабасига кўтарилиди ва 2-нчи запас полкнинг взвод офицери қилиб белгиланди.

Сентябрь ойида, зотилжам касалидан тузалганидан кейин отпушка олди. Уйида икки ярим ойча туриб, бутунлай соғайиб кетгач, округ тиббий комиссиясидан ўтди ва яна полкка юборилди. Октябрь революциясидан кейин сотня командири вазифасига тайинланди. Худди шу вақтда унинг руҳида ўзгариш пайдо бўлди, бу унинг атрофида бўлаётган ҳодисалар, қисман полк офицерларидан юзбоши Ефим Изварин билан танишганидан кейин унинг таъсири натижасида юз берган ўзгариш эди.

Григорий отпускандан қайтиб келган куниёқ Изварин билан танишди, кейин хизмат вақтида ва хизматдан бўшаганидан кейин ҳамиша у билан кўришиб турди, унинг таъсири остига тушганини ўзи ҳам сезмай қолди.

Ефим Изварин Гундоровск станицалик бой бир казакнинг ўғли бўлиб, Новочеркасск юнкерлар мактабида таълим олди. Уни тамомлагач фронтга кетиб, 10-нчи Дон казаклар полкига хизматга кирди, бу полкда бир йилча хизмат қилди, ўзининг таъбирича, кўкрагига осиш учун офицерлик георгий нишони олди, муносиб ва номуносиб жойидан ўн тўрт марта

граната парчаси тегиб яраланди, кейин ўзининг қис-
қа муддатли хизматини тугаллаш учун 2-нчи запас
полка тушиб қолди.

Жуда қобилиятли, шубҳасиз истеъдод эгаси бўл-
ган Изварин казак офицерлари ола биладигандан
ҳам анча юқорироқ маълумот олган, лекин ашаддий
казак автономисти эди. Февраль революцияси унинг
фикрини уйғотиб, эркин ҳаракат қилишга имкон бер-
ди, у мустақиллик тарафдори бўлган казаклар билан
алоқа боғлаб, Дон қўшинлари вилоятида тўла авто-
номия ўрнатиш учун, Дон казаклари самодержавие
асоратига тушгунча у ерда мавжуд бўлган усул-идо-
ра тартибини тиклаш учун усталик билан ташвиқот
юргизди. У тарихни яхши билар, ақли расо, ҳушёр
ва қизиққон одам эди. Ўз қадрдан Донида Кенгаш
ҳукмрон бўлганда, вилоят миқёсида битта ҳам рус
қолмаганида ва казаклар ўз ҳукумат чегараларига
соқчилар қўйиб, украинлар ва великоруслар билан тенг
асосда, bemalol гаплашадиган ва улар билан савдо-
сотиқ ва мол айирбошлиш қила бошлаган даврда
нақадар эркин ҳаёт бўлишини қизиқарли қилиб
тасвирлаб берар эди. Изварин соддадил казаклар ва
паст маълумотли офицерларнинг бошини айланти-
рарди. Григорий ҳам унинг таъсири остига тушиб
қолди. Бошда улар қизғин тортишарди, аммо чала-
савод Григорий ўз рақиби олдида заниф эди. Даҳана-
ки жангда Изварин уни енгарди. Улар одатда казар-
манинг бир бурчагида мунозара қилишар, лекин
тингловчилар аксари Изварин тарафида бўлар эди-
лар. У келасидаги мустақил ҳаёт манзарасини тас-
вирлаб бериб, ўз мулоҳазалари билан казакларга
манзур бўлар, аксари ўзига тўқ пастки табақа ка-
закларнинг кўнглидаги орзуларини қитиқлар эди.

— Бизда буғдойдан бошқа ҳеч нарса бўлмаган-
дан кейин Россиясиз қандай яшамогимиз мумкин?—
деб сўрарди Григорий.

Изварин сабр-матонат билан унга тушунтиарди:

— Мен Дон вилоятининг ёлғиз ўзини мустақил ва
алоҳида яшашини тасаввур этолмайман. Биз Кубань,
Терек казаклари ва кавказ тоғликлари билан федера-
ция, яъни бирлашиш асосида яшаймиз. Кавказда

маъдан бойлиги сероб, у ерда биз ҳар нарса топамиз.

— Тошкўмир-чи?

— Донец кўмир ҳавзаси ихтиёrimизда бўлади.

— Ахир у Россияники-ку!

— Унинг кимники эканлиги ва кимнинг еридалиги жанжалли масала, лекин, башарти Донец кўмир ҳавзаси Россияга ўтган тақдирда ҳам биз кўп нарса йўқотмаймиз. Бизнинг федерация иттифоқимиз саноатга суюнмайди. Бизнинг ўлкамиз табиатан деҳқончилик ўлкаси. Модомики шундай экан, мўъжазгина саноатимизни тошкўмир билан таъминламоқ учун биз уни Россиядан сотиб оламиз. Ёлиз тошкўмирнигина эмас, бошқа кўп нарсаларни ҳам Россиядан сотиб оламиз. Чунончи, ёроч, маъдан саноати буюмлари ва шу сингариларни. Буларнинг бадалига аъло сифат буғдой, нефть берамиз.

— Ажралишдан бизга нима наф?

— Нафи маълум. Аввало, сиёсий ҳомийликдан қутуламиз, рус подшолари поймол этган тартибларимизни тиклаймиз, келгиндишларни суриб чиқарамиз. Ўн йил мобайнида чет эллардан машина киргизиш ўюли билан ўз хўжалигимизни шундай кўтарамизки, ўн карра бойиб кетамиз. Бу ерлар ўзимизники, отабоболаримизнинг қони билан суфорилган, суклари ўғит бўлган, Россия асоратида қолган бизлар эсак, тўрт юз йилдан бери Россиянинг манфаатларини ҳимоя қилиб, ўзимизни унутдик. Денгизга чиқиладиган йўлларимиз бор. Бизнинг жуда кучли ва урушқоқ армиямиз бўлади. Украина гина эмас, балки Россия ҳам бизнинг мустақиллигимизга қасд этолмайди!

Ўрта бўйли, қадди-қомати келишган, чорпаҳил Изварин бориб турган казак эди: жингалак соchlари сарғиш, пишмаган жавдар поясига ўхшаш, юзлари қорача, пешонаси яssi ва оқ, юзлари андек қорайган, қошлари оқиши. Унинг овози жингиллаган, гаплашганда чап қоши пир-пир учиб турар, кичкина қирра бурнини жийириб қўярди. Гўё доим бир нарсани исказандек бўлиб кўринарди.

Шаҳдам қадам ташлашлари, бўйи-бастига бино қўйиши, қўй кўзларини парпиратиб туриши билан у

полкдаги бошқа офицерлардан ажралиб турарди. Қазаклар унга, ҳатто полк командиридан ҳам кўпроқ ҳурмат назари билан қарап эдилар.

Изварин Григорий билан узоқ сұхбатлашар, Григорий эса яқындагина мустаҳкам бўлган оёғи остидаги замин яна ларзага келаётганини сезиб, Москва-да бир вақтлар Снегирев кўз шифоҳонасида Гаранжа билан учрашган вақтида қандай ҳолга тушган бўлса, ҳозир ҳам шундай ҳолга тушди.

Октябрь ўзгаришидан бёвосита кейинроқ Изварин билан ўргаларида шундай гап бўлиб ўтди. Бир-бира-га зид фикрлар қийноғида қолган Григорий эҳтиётлик билан большевиклар ҳақида сўраб-суритирди.

— Қани айт-чи, Ефим Иванич, сенингча большевиклар қандай? Ҳақми, ноҳақми?

Изварин қошини чимириб, бурнини ғалати жийириб, кулди.

— Нима дединг? Ҳа-ҳа-ҳа!.. Азизим, сен худди чақалоққа ўхшайсан... Большевикларнинг ўз программаси, ўз истиқболи, ўз орзу-умидлари бор. Большевиклар ўз нуқтаи назарларида ҳақ, биз эсак—ўз нуқтаи назаримизда. Биласанми большевиклар партиясининг номи нима? Йўқ? Наҳотки билмасанг. Россия социал-демократ ишчилар партияси. Тушундингми? Ишчилар! Ҳозир улар деҳқонлар билан казакларни авраяпти, аммо уларнинг ўзаги ишчилар синфи. Улар ишчиларни озод қиласидилар, деҳқонларни. Эҳтимол, баттарроқ асоратга туширарлар. Ҳаётда ҳамманинг тенг яшаши мумкинмас. Большевиклар устун чиқса, ишчиларга яхши бўлади, бошқаларга — ёмон. Бизга унисининг ҳам, бунисининг ҳам кераги йўқ. Бизга ўз ҳокимиятимиз керак, аввало, ҳар қандай ҳомийлардан, у Корнилов бўладими, Керенскийми ёки Ленинми,— халос бўлиш керак. Биз ўз еримизда бу сиймоларсиз ҳам кун кўраверамиз. Худо ўзинг дўстлардан бизни қутқар, душманларни ўзимиз бартараф қиласиз.

— Аммо казакларнинг кўпчилиги, билсанг, большевиклар тарафида.

— Дўстим Гриша, сен бир нарсани тушунгин —

бу мұхим нарса, ҳозир казаклар билан деҳқонлар большевиклар билан йўлдош. Нега дегин.

— Хўш?

— Чунки... — Изварин бурнини шишириб кулди. — Чунки большевиклар сулҳ тарафдори, дарҳол сулҳ тузиш тарафдори. Урушнинг оғирлиги ҳозир казакларнинг мана бу ерида!

У ўзининг қорайиб кетган гарданига шапатилаб урди ва ҳайрат билан чимирилган қошларини тўғрилаб:

— Шунга кўра казаклардан большевизм ҳиди кепқолди, улар большевиклар билан баравар қадам ташлайдилар. Аммо уруш тамом бўлиши билан оқ большевиклар казакларнинг ер-сувларига қўлларини чўзадилар, шу заҳоти казаклар билан большевикларнинг йўли ажralиб кетади! Бу нарса исботланган ва тарихан муқаррардир. Казакларнинг бугунги тарзи ҳаёти билан большевистик революциянинг натижаси бўлган социализм орасида осмон билан ерча фарқ бор...

— Мен ростини айтсан... — деб пўнғиллади Григорий, — ҳеч нарсага ақлим етмай қолди. Бу масалани тагигача тушуниб етолмайман... Қаллам ғовлаб қолган...

— Бу гап билан сен қутулиб кетолмайсан! Ҳаёт сени тагигача тушуниб етишга мажбур этади, мажбур этиш у ёқда турсин, сени зўрлаб у ёки бу томонга ўтказиб қўяди.

Бу сухбат октябрь ойининг сўнгги кунларида бўлган эди. Ноябрда эса Григорий бошқа бир казак — Дондаги революция тарихида катта роль ўйнаган Федор Подтелков билан танишиб қолди, бир оз тараддуздан кейин у ўзининг қалбидаги ҳақиқат яна устун чиқди.

Уша куни чоштоғдан кейин майда ёмғир сепалаб ёға бошлади. Кечга яқин ҳаво очилиб кетди. Григорий эса ўз ҳамқишлоғи — 28-нчи полкда хизмат этган хорунжий ёрдамчиси Дроздовнинг квартирасига боришга қарор қилди. Орадан чорак соат ўтгач, у остона тагидаги оёқ остига солинган латтага этигини артиб, Дроздовнинг эшигини тақиллатди. Мажмагил

фикус гуллари билан безалган ва эскирган мебель билан жиҳозланган уйда мезбондан ташқари букла-ма офицерча каравотда, деразага орқа қилиб, гвар-дия батареяси вахмистри погонини таққан барваста, миқти казак ўтирас эди. У бир оз буқчайиб, қора мовут шим кийган оёқларини кериб, сарғиш тук боғсан қўлларини юмалоқ тиззалари устига қўйиб ўтиради. Гимнастёркаси унинг белини қисиб, қўлтиқлари-нинг ости буришиб кенг, тўла кўкрагини таранг қилиб турар эди. Эшик фирчиллаб очилиши билан у йўғон бўйини ўгириб, Григорийга совуқ бир назар ташла-ди, шунда бир оз шишинқираган қовоқлари остидаги қийиқ қўзлари совуқ ялтираб кетди.

— Танишинглар. Гриша, бизнинг қўшни қишлоғи-миз Уст-Хоперскдан, Подтелков.

Григорий билан Подтелков индамай қўл қисиши-ди. Григорий ўтирас экан уй эгасига қараб қулди:

— Ўйингни ифлос қилдим, хафа бўлмайсанми?

— Йўқ, қўрқма. Уй бекаси тозалайди. Чой-пой ичасанми?

Чуваккина, эпчил уй эгаси тамаки тутунидан сар-ғайиб кетган тирноқлари билан самоварни чертиб:

— Суви ўлиб қопти, совуқ чой ичишга тўғри кела-ди энди,— деди.

— Чой ичгим йўқ, овора бўлма.

Григорий Подтелковга папирос тутди.

Ўзининг қип-қизил, йўғон бармоқлари билан Под-телков папирос қутисига тифиз қилиб солинган папи-рослардан бирини тортиб чиқармоқчи бўлди-ю, кейин уялганидан қип-қизариб кетиб, жаҳл аралаш:

— Тортиб чиқаролмайман... Вой савил қолгур-э!— деди.

У ниҳоят, бир донасини тортиб чиқарди-да, кулги-дан қисишлиб кетган қўзларини кўтариб, Григорийга қаради. Григорийга унинг соддалиги ёқди.

— Қайси хутордансиз?— деб сўради у.

— Мен асли крутовскийликман,—деб мамнуниятла жавоб қилди Подтелков.— Ўша ерда ўсиб катта бўлганман, кейин Усть-Калиновскаяга келиб туриб қолдим. Крутовский хуторини биларсиз, эҳтимол, эшитгандирсиз? Бу хутор Елан билан чегарадош.

Плешаков хуторини кўрганмисан? Унинг орқаси Матвеев хутори, бизнинг станицанинг ёнбошида Тюканов деган хотор бор, у ёғи мен туғилган хотор: Юқори ва Қуий Крутовский хуторлари.

Бутун сұхбат давомида у Григорийни дам сенсирап, дам сизсирап, тортинаасдан бемалол гаплашарди, ҳатто бир марта уни ўзиға яқин олиб, ўзининг оғир қўли билан елкасига қоқиб ҳам қўйди. Подтелковнинг юзи چлпоқ, сал-пал чўтири, соқоли қиртишлаб олинган, мўйловлари бураб қўйилган, йилтираб турар, ҳўлланган, тараалган соchlари кичкина қулоқларигача тушиб турар, чап томондаги сочи тароқ билан жингалак қилиб қўйилган эди. Унинг қиёфаси одамга ёқар, бироқ катта танқайлан бурни билан кўзлари хунукроқ эди. Биринчи қарашда унинг кўзларидагайри оддий ҳеч нарса йўқдек эди, лекин Григорий тикилиб туриб, бу кўзларнинг одамга тикандек қадалишини сезди. Соққага ўҳшаган бу кўзлар қўрғонлардаги шинакка ўҳшаш қийиқ қовоқлари орасидан ялтираб қараб турар, унга тикилган одамнинг кўзини ерга қаратар, бир нуқтага тикилганича қотиб қоларди.

Григорий бу одамга қизиқсиниб қараб туриб, унинг ўзиға хос бўлган бир одати борлигини сезди: Подтелков кўзларини сира юммас, сұхбатдошидан ўқрайган кўзини олмас, гаплашгандан, кўзларини дамба-дам бир нарсадан иккинчи нарсага кўчириб турар, офтобдан сарғайган қисқа киприклари доим туширилган, ҳаракатсиз эди. Аҳён-аҳёнда шишинқираган қовоғини тушириб, ерга қараб қоларди, лекин яна бирдан бошини кўтариб тикандек кўзларини бир ерга гикар, атрофдаги нарсаларни кўздан кечириб чиқарди.

— Жуда қизиқ гап-а, оғайнилар!— деди Григорий уй эгаси ва Подтелковга мурожаат қилиб.— Уруш тамом бўлса, биз янгича ҳаёт кечира бошлаймиз. Украинада ҳукуматни Рада¹ бизда эса Қўшин Қенгashi бошқара бошлайди.

¹ Рада — Украин буржуазиясининг 1917—1919 йиллардаги контреволюцион ташкилоти. (Тарж.)

— Атаман Каледин,— деди паст овоз билан Подтелков унинг гапини тұғрилаб.

— Барибир. Нима фарқи бор?

— Ҳеч қанақа фарқи йўқ,— деб унинг гапига қўшилди Подтелков.

Григорий:

— Энди биз она Россияга энгашиб таъзим қилиб бўпмиз,— деб Извариннинг нутқларини тақрорлай бошлади; бу масалага Дроздов билан бу барваста гвардия тўпчисининг қандай қараашларини билиб олмоқчи бўлди.— Уз ҳокимиятимиз, ўз тартиб-низомимиз бўлади. Хоҳолларни казак ерларидан қувиб чиқарамиз, чегарамизни ажратиб оламиз,— яқин келмаларинг, деймиз. Қадимги вақтларда боболаримиз қандай яшаган бўлса, биз ҳам шундай яшаймиз. Ўилашимча, революциянинг бизга нафи йўқ. Сен нима деб ўйлайсан, Дроздов.

Үй эгаси қилпанглаб, кулимсираб қўйди.

— Албатта яхши бўлади! Мужиклар куч-қувватимизни олиб қўйдилар, уларнинг дастидан кун кўролмаймиз. Тайнинланган атаманлар ҳаммаси немис: фон Таубе, фон Граббе ва шунга ўхашлар! Ҳамма ерларни шу штаб-офицерларга қирқиб бердилар... Энди, ҳеч бўлмаса, енгилроқ нафас оламиз.

— Россия бунга кўнармикин?— деб аста сўради Подтелков, ҳеч кимга мурожаат қилмай.

— Қўнмай нима қиласди,— деди Григорий.

— Яна ўша эски ҳаммом, эски тос экан-да.

— Яъни қандоғ?

— Худди шундоғ.— Подтелков соққадек кўзларини ғилдирлатиб, Григорийга ер остидан ўқрайиб қараб қўйди.— Яна меҳнаткаш халқ устига атаманлар миниб олади. У жаноблар олдида таъзим қилиб турансан, улар юмшоқ жойингга тушираверадилар. Ўша сен айтган яхши ҳаёт... бўлса, бўйнимизга тош боғлаб, жарга итарадилар!

Григорий ўрнидан туриб, торгина хона ичидаги ёқдан-бу ёққа юра бошлади, бир неча марта оёқларини кериб ўтирган Подтелковнинг тиззасига оёғини уриб олди. Кейин унинг рўпарасида тўхтаб:

— Бас, нима қилиш керак?— деб сўради.

— Охиригача етказиш керак.
— Нимани охиригача?
— Бир ишни бошлагандан кейин уни охиригача обориш керак. Модомики подшо билан контрреволюцияга қарши эканмиз, ҳокимиятнинг ҳам халқ қўлига ўтиши учун курашувимиз керак. Сенинг айтганларинг — қуруқ сафсата, булар билан фақат болаларни алдаса бўлади. Йлгарилари бизни подшолар эзар эди, эндиликда эса подшолар эмас, бошқа кимсалар эзиб сувимизни чиқаради.

— Шундай бўлса, сенинг фикринг нима, Подтелков?

Подтелковнинг соққага ўхшаш оғир қўзлари тор ўйни яна бошдан-оёқ қараб чиқиб:

— Халқ ҳокимияти... сайданиб қўйиладиган ҳокимиият керак,— деди.— Агар генералларнинг панжасига тушиб қолсак, яна уруш бўлади, урушни эса биз бошимизга урамизми! Ҳамма ёқда, бутун дунёда шундай ҳукумат барпо этмоқ лозимки, у халқни эзмасин, халқларни бир-бирига гиж-гижлаб уриштирмасин. Шундай бўлмаса-чи? Йиртиқ-ямоқ чалварни тескарисини айлантириб кийсанг ҳам йиртиғи «ажай» деб кўриниб туради.— Подтелков қўллари билан тиззасига шапатилаб уриб заҳарханда қилиб кулди, садафдек оппоқ майда тишлиари кўриниб кетди.— Биз иложи борича эски ҳаётдан қутулишимиз керак, бўлмаса подшо бўйинтуруғидан ҳам оғирроқ бўйинтуруқни бўйнимизга соладилар.

— Бизларни ким идора қилади?

— Ўзимиз!—деди Подтелков жонланиб.— Ҳокимиятни ўз қўлимизга оламиз,— ўзимиз идора этамиз. Бошвоғимизни сал бўшатиб қўйсалар, Қалединларни ўзимиз устимиздан итқитиб ташлаймиз!

Григорий терлаган ойна олдида қаққайганича, хийла вақтгача кўчада, ғалати бир ўйин ўйнаётган болаларни томоша қилди, нарги томондаги уйларнинг ҳўл томларига, уй олдида ўсган яйдоқ қора теракнинг кул ранг новдаларига тикилиб қолди; Дроздов билан Подтелков нима устида тортишаётганларини эшитмади;чувалган калаванинг учини топиш, мияси ишлатиб, бир қарорга келишга уринди.

Григорий дераза олдида ўн минутча туриб, ойнага ўз исми ва фамилиясининг бош ҳарфларини чаплаштириб чизди. Дераза рўпарасида, пастаккина уйнинг томи устида мезон қуёши ҳолдан кетиб, ботмоқда: занглаган тунука томнинг қиррасига қўнган қуёш ҳўл мис баркаш сингари қизариб, томнинг ё у ёғига, ё бу ёғига думалаб тушиб кетадигандек кўринар эди. Ёмғирдан шалаббо бўлган шаҳар боғидан шитирлаб барглар учуб келар, Украинадан, Луганскдан эсган ва борган сари кучаяётган шамол станица устида ғувиллар эди.

III

Новочеркаск большевистик революциядан қочганлар йифиладиган марказга айланди. Пароканда бўлган рус армиясининг тақдирини бир вақтлар ҳал қилган катта генераллар реакциячи доңликларнинг ёрдамидан умидвор бўлишиб, қуйи Донга кела бошладилар, улар шу плацдармдан Совет Россиясига қарши ҳужумга ўтиш ниятида эдилар.

2 ноябрда ротмистр Шапрон ҳамроҳлигига генерал Алексеев Новочеркасскка етиб келди. Қаледин билан тил бириктириб, қўнгилли отрядлар тузса бошлади. Шимолдан қочиб келган офицерлар, юнкерлар «зарбдорлар», талабалар, казакларнинг энг контреволюцион табақалари ва ажойиб саргузаштларни севадиган Керенский пули билан бўлса-да, катта маошлар олиш дардидага юрган одамлар,— келажак Кўнгилли армиянинг ўзагини ташкил қилдилар.

Ноябрь ойининг охирларида генераллардан Деникин, Лукомский, Марков, Эрделилар етиб келишди. Бу вақтда Алексеевнинг отряди минг нафар кишидан ошиб кетган эди.

Корнилов йўлда ўзининг така туркман соқчилари ни ташлаб, кийимини ўзгартириб Дон чегарасига етиб келди, 6 декабрда Новочеркасскда пайдо бўлди.

Руминия, Австрия-Германия фронтларида бўлган казак полкларини шу вақтгача Дон тўплай олган Қаледин уларни Новочеркасск — Чертково — Ростов — Тихорецкая темир йўл магистрали бўйлаб жой-

лаштириди. Аммо уч йиллик урушдан чарчаган, фронтдан революцион кайфиятда қайтган казакларнинг большевиклар билан урушишга ҳафсалалари йўқ эди. Полклар составида бўлиши лозим бўлган отлиқларниң қарийб учдан бири қолган эди. Состави тўлароқ бўлган 27-нчи, 44-нчи ва 2-нчи запас полклари Каменская станциясида жойлашган эдилар. Лейб гвардия Атаман полки ва Лейб гвардия Казак полклари ўз вақтида Петрограддан ўша ерга жўнатилган эди. Фронтдан келган 58-нчи, 52-нчи, 43-нчи, 28-нчи, 29-нчи, 35-нчи, 10-нчи, 39-нчи, 23-нчи, 8-нчи ва 14-нчи полклар ҳамда 6-нчи, 32-нчи, 12-нчи ва 13-нчи батареялар Чертковода, Миллеровода, Лиховода, Глубокой, Зверовода ва кон районларида жойлаштирилган эдилар. Хопер ва Усть-Медведицкий округидаги казаклардан ташкил топган полклар Филонов, Юропинск, Себряков станцияларига етиб келди, у ерда бир неча вақт қолгандан кейин таралиб кетди.

Казакларни қадрдан уйлари ўз бағрига чорлар, уларнинг уй-уйларига кетиш истагига гов бўладиган ҳеч қандай куч йўқ эди. Дон казак полкларидан фаяқат 1-нчи, 4-нчи ва 14-нчи полкларгина Петроградда турар эди, улар ҳам Петроградда узоқ вақт қолмади.

Каледин баъзи бир қисмларни, хусусан, ишончсиз қисмларни қайтадан тузиш ёки уларни энг ишончли қисмлар билан ўраб олиб, бир-бирларидан ажратишга уриниб кўрди.

Ноябрнинг охирида у биринчи марта революцион Ростов устига фронтдан келган қисмларни юборганда, казаклар Аксайга етиб келишлари билан ҳужумга ўтишдан бош тортилар ва орқаларига қайтиб кетдилар.

«Қурама» отрядлар ташкил этиш учун кенг миқёсда олиб борилган ҳаракат ўз натижасини берди: ноябрнинг 27 сида Каледин матонатли кўнгилли отрядлар билан ҳужумга ўтишга муваффақ бўлди, бу вақтгача бир неча батальон тўплай билган Алексеевдан ёрдам олиб иш бошлаб юборди.

2 декабрда Ростовни кўнгилли қисмлар жанг билан ишғол қилдилар. Корнилов келгандан сўнг Қўнгилли армия ташкилотининг маркази Ростовга кўчи-

рилди. Қаледин якка мохов бўлиб қолди. У казак қисмларини вилоят чегараларига тарқатиб, Царицин ва Саратов губернияси чегарасига юборди, бироқ тез ҳал қилиниши керак бўлган кундалик вазифаларни бажариш учун офицер партизан отрядларини ишга соларди; кундан кунга ожизланаётган заиф «қўшин ҳокимиияти» ёлғиз офицерларгагина таяна оларди.

Донец шахтёrlарини тинчтиш учун янгидан ташкил этилган отрядлар улар устига юборилди. Макеевск районида ясовул Чернецов бош кўтарди, мунтазам 58-нчи казак полкнинг қисмлари ҳам ўша ерда эди. Новочеркасскда тезлик билан Семилетов, Греков отрядлари ва ҳар хил дружиналар тузилди; шимолда Хопер округида офицер ва партизанлардан «Стенька Разин отряди» деб аталган қисм ташкил этилди. Аммо Дон вилоятига қизил гвардиячилар колонналари уч томондан бостириб келмоқда эди. Харьковда, Воронежда оқларга зарба бериш учун куч тўпланаётган эди. Дон устини қора, қалин булатлар ўраб ола бошлади. Украинадан эсган шамол биринчи жангларда отилган тўпларнинг овозларини олиб келди.

IV

Новочеркасск устида оқ-сариқ, қадимги кема сингари кўкраги баланд булатлар аста сузиб ўтмоқда. Юқсан мовий осмонда, катта черковнинг ярқираб турган гумбази устида тарам-тарам барра булат парчаси муаллақ турар, унинг қуйруғи пастга тушиб, қаердадир Кривянский станцияси устида қизғиш тусга кириб, кумушдек товланарди.

Офтоб хира нур сочиб чиқиб келмоқда, аммо атаман саройининг дераза ойналарига офтоб нури тушиб жилоланиб турарди. Уйларнинг нишаб томлари устидаги тунукалар ярқирап, Сибирь тожи тахтини шимолга узатиб турган Ермакнинг ҳайкали кечаги ёмғирдан ҳўл бўлган эди.

Пиёда казаклар взводи Крещенский қиялигидан юқорига чиқиб борар, милтиқларининг найзаларида қуёш нури барқ урар эди. Онда-сонда ўтиб туради-

ган йўловчиларнинг қадам товуши ва извош фиди-ракларининг шалдираши тонг пайтининг оромбахш сукунатини бузар, лекин бараварига шипиллаб қадам ташлаб кетаётган казакларнинг шарпаси бу сукунатга унчалик халал бермасди.

Шу куни эрталаб Москва поездни билан Илья Бунчук Новочеркасскка етиб келди. У эскирган юпун пальтосининг этакларини тортиб, тўғрилаб қўйиб, ҳаммадан кейин вагондан тушди, чунки у граждан кийими ўзига ярашмаганини ҳис этиб сиқиларди.

Платформада жандармлар у ёқдан-бу ёққа юриб турар, иккита ёшгина қиз ўзидан-ўзи кулиб кезиб юрар эди. Бунчук эскирган жўнгина чамадонини қўлтиқлаб олиб, шаҳарга жўнади. Қўчанинг бошига етгунча йўлда ҳеч ким учрамади. Шаҳарни кўндалангига кесиб чиқсан Бунчук ярим соатдан кейин ярим хароба ҳолига келган бир кулба олдида тўхтади. Кўпдан бери шикаст-рехти тузатилмаган бу уй аянч ҳолда эди. Замон марҳаматсиз оғир қўли билан бу уйни босиб, томини ўпириб туширган, уйнинг деворлари нураган, дераза қопқоқлари шалвираб осилиб, деразалар шол одамдек қийшайиб қолган эди. Бунчук кўча эшигини очиб, ҳаяжон ичидага уйга ва торгина ҳовлига кўз югуртирди-да, шошиб-пишиб зинадан юриб чиқа бошлади.

Торгина коридорнинг ярмини ичи эски-туски билан тўлган сандиқ эгаллаб ётар эди. Қоронғида Бунчук тиззасини сандиққа уриб олди-ю, оғриқни ҳис этмай эшикни қаттиқ тортиди. Пастаккина даҳлизда ҳеч ким йўқ эди. У иккинчи хонага ўтди. Бу ерда ҳам ҳеч ким йўқлигини кўриб, оstonада тўхтади. Ўзига жуда таниш ва шу уйгагина хос бўлган ҳид димогига урилгач, боши айланиб кетди. Бир қарашда уйдаги нарсаларнинг ҳаммасини: даҳлизнинг ўнг бурчидаги оғир ромли иконани, каравот, стол, унинг устида эскириб доғ босиб кетган кичик ойна, фоторасмлар, бир неча кўхна стул, тикув машинаси, ишлатилавериб жилоси кетган, печь устидаги самоварни кўрди. Бунчукнинг юраги бирдан дукурлаб кетиб, бўғилган-дек оғзини очиб нафас олди, кейин бурилиб, чамадонини ерга қўйди-ю, ошхонага кўз югуртирди; анилини

билин бўялган катта, кўм-кўк печь кўзига иссиқ кўринди, ҳаво ранг чит парда орқасидан тарғил мушук қараб туради; бу мушукнинг кўзлари маъноли бўлиб, худди одамдай қизиқсиниб кўз тикиб туради,— афтидан, бу ерга одам боласи камдан кам кирса керак. Стол устида ювиқсиз идиш-товоқлар тартибсиз ҳолда ётар, табуретка устида жун ип калаваси қолган, тўқилиб битмаган пайпоқнинг тўрт бурчига қадалган санчиқ симлар йилт-йилт қилиб турад эди.

Саккиз йилдан бери бу ерда ҳеч нарса ўзгармабди. Гўё, Бунчук бу ердан кечагина кетгандек эди. У зинапояга югуриб чиқди. Ҳовлининг бир чеккасидаги омбор эшигидан ғам чекавериб адо бўлган, буқчайиб қолган кампир чиқди. «Она!.. Наҳотки онам бўлса?» Лаблари титраб кетган Бунчук унинг олдига югорди. У шапкасини бошидан олиб, қўлида фижимлаб турарди.

— Сизга ким керак? Ким?— деб безовталаниб сўради жойида қотиб қолган кампир кафтини оқарган қошлари устига қўйиб.

— Ойи!...— деб қичқирди Бунчук бўғиқ овоз билан.— Сенга нима бўлди, мени танимаяпсан-а?..

Бунчук қоқина-суқина онаси олдига келар экан, унинг овозидан онаси гўё зарба егандай гандираклаб кетганини кўрди, афтидан, у югуриб келмоқчи бўлган эди-ю, лекин мажоли келмай, гўё шамолга қарши юриб бораётган кишидай, оёқларини силтаб босарди. Бунчук оз бўлмаса йиқилиб тушай деган онасини ушлаб қолиб, ажин босган юзларидан, қўрққанидан, қувонганидан кўзлари тиниб кетган кўзларидан ўпар, ўзини йўқотиб қўйиб, кўзларини пирпиратарди.

— Илюша.. Илюша жоним!.. Үғлим! Танимабман-а... Ё худо қаёқдан келдинг-а?..— деб шивирлар эди. кампир қаддини ростлашга ва бўшашган оёқлари устида босиб туришга уриниб.

Она-бала бошлишиб уйга киришди. Бошидан ке-чирган ҳаяжонли дақиқалардан кейин бирорнинг пальтосини кийиб келган Бунчук ўзини ноқулай сеза бошлади,— пальто тор, қўлтиқларининг ости қисар, ҳаракат қилишга қўймас эди. Бунчук уни ечиб таш-

лагандан кейин ўзини енгил ҳис этиб, стол ёнига келиб ўтири.

— Сени тирик кўраман деб ўйламовдим!.. Кўришмаганимизга неча ой ва йиллар бўлди. Бўйларингдан айланай! Ўсиб, кап-катта бўлиб қолибсан, қандай қилиб таний ахир!

— Ойижон, ҳол-аҳволинг қалай!— деб сўради Бунчук, кулимсираб.

Кампир пойма-пой гапирав, шошиб-пишиб, стол устига дастурхон ёзар, самоварга кўмир ташлар ва кўз ёшини артаман деб юзига кўмир қурумини ёйиб юборар, ўғлининг олдига дам-бадам югуриб келиб, унинг қўлини силар, елкасига суйканиб, қалт-қалт титраб йиғларди. У сув иситиб, ўғлининг бошини ювди, сандиқ остида ётавериб сарғайиб кетган тоза кўйлак-иштонни олиб кийгизди, қадрдон меҳмондек сийлади,— ярим кечагача ўғлидан кўз узмай ўтири, ҳол сўраб, бошини ирғатиб, унинг гапини эшилди.

Бунчук ухлагани ётганда черков соати икки марта жом чалди. У ёстиққа бош қўйиши билан уйқуга кетди, кўзи илинар экан кўз ўнгига ўтмиши гавдаланди: ҳунар мактабида ўқиб юрган шўх болалик даври, елиб-югуриб чарчагандан кейин ётиб, уйқуга кетганда ошхона эшигини очиб онаси: «Илюша, эрталик дарсингни тайёрладингми?» дегани эсига тушди. Бунчук шод бўлиб, лабларида қотиб қолган табассум билан ухлаб қолди. Тонг отгунча муштипар она бир неча марта ўғлининг олдига келиб, дам кўрпасини, дам ёстигини тўғрилаб қўяр, бир тутам сочи тушиб турган кенг пешонасидан ўпар, кейин шипиллаб юриб чиқиб кетарди.

Орадан бир кун ўтгандан кейин Бунчук жўнаб кетди. Эрталаб солдатча шинель, яп-янги пистоқи ранг фуражка кийган бир ўртоғи келиб, унга алланарса деб шипшиган эди, Бунчук шошиб-пишиб кийимларини чамадонга жойлади-да, энг устига онаси ювиб берган бир жуфт куйлак-иштонини қўйиб, ижирғаниб пальтосини кийди. Онаси билан наридан бери хайрлашди-да, бир ойдан кейин қайтиб келаман деди.

— Илюша, қаёққа кетяпсан?

— Ростовга, ойижон, Ростовга. Тез қайтиб кела-ман... Сен, сен, ойижон, кўп ғам ема!—деб кампирга далда берди у.

Онаси шоша-пиша ўз крестини олди-ю, ўғлини ўпид, чўқинтириб, унинг бўйнига осди, крест тасмасини тўғрилаб қўяётганда титраётган бармоқлари Бунчукнинг бўйнига муздек тегиб кетди.

— Илюша, крест бўйнингда юрсин. Бу — муқаддас Николай Мерликийский крестидир. Ё, муборак азиз авлиё, ўғлимни ўз паноҳингда асра, ўзинг муҳофаза эт... Кўзимнинг оқу қораси, ёлғиз ўғлим...— деб шивирлади кампир, крестни қизарган кўзларига суртиб.

У титраб-қақшаб ўғлини қучоқлар экан, ўзини тўхтатолмади, лаблари титраб сўлжайиб кетди. Бунчукнинг тук босган қўлларига оби раҳматдек биринки томчи кўз ёши томди. Бунчук онасининг қўлини бўйнидан олиб, қовоғини солди-да, шошганча ташқарига чиқиб кетди.

* * *

Ростов вокзали — тумонат одам, полларда папироc қолдиқлари, чақиб ташланган пистачка пўчоқлари сочилиб ётибди. Вокзал майдонида гарнizon солдатлари ҳазинага қарашлик кийим-бош, тамаки, ўғирлик мол олиб сотар эдилар. Жанубдаги соҳил бўйларида жойлашган шаҳарларда турли миллат кишилари яшайди. Ҳозир улар ғовур-ғувур қилиб, кўчаларда кезиб юради.

Папироc сотувчи бир бола бақириб:

— Ас-с-смол папироc, Ас-с-смол папироc чакана-нааб сотилади!— деб бўкирар эди.

Кўринишидан шубҳали, номаълум бир шарқлик киши Бунчукнинг қулоғи тагига келиб:

— Арzon-гаровга сотаман, жаноб гражданин,— деб шивирлади-да, шинелининг этаги остида қаппайиб турган бир нарсани имлаб кўрсатди.

— Қовурилган пистачка! Пистачка олинг!— дебчувиллашарди вокзал олдида савдо қилиб ўтирган қиз ва аёллар.

Олти нафар қораденгиз матроси одамлар орасини

ёриб, шанғиллашиб, хохолашиб ўтиб кетди. Устларида байрамда кийиладиган лентали, ялтироқ сарық тутгали форма, почаси кенг, лой сачраган чалвор. Ҳамма уларни ҳурматлаб йўл бўшатиб берарди.

Бунчук халқ орасини ёриб ўтиб, аста борарди.

Радио-телеграф командасидан бўлган ушоқунина бир солдат:

— Тилладан? Ол-а! Миси чиқиб қопти-ку тиллангни, кўрмаяпманми? — дер эди кинояномуз.

Сотувчи каттагина, шубҳали олтин занжирни силкитиб, нафрат билан:

— Сен нимани биласан? Олтин, қизил олтин, у ёғини суриштирсанг, мировой судьядан сотовлганман... Туёғингни шиқиллат жулдуурвоқи! Пробасини кўрсат ҳам дерсан... манавини хоҳламайсанми!

— Флот бормайди... бемаъни гапингни қўй! — деган овоз эшитилди ён томондан.

— Нечун бормайди?

— Бу газеталарда...

— Ҳой шум така, бу ёққа опке!

— Биз бешинчи номерга¹ овоз бердик. Бошқа иложи йўқ, фойдасиз.

— Зогора! Мазали зогора! Биттасини олиб берайми?

Эшелон бошлиғи: эртага жўнаймиз, деб ваъда қилди.

Бунчук партия комитети биносини топиб, зинадан иккинчи қаватга кўтарилди. Найзаси пичоққа ўхшаган япон милтифи ушлаган қизил гвардиячи ишчи йўлини тўсади.

— Кимни қидириб юрибсиз, ўртоқ?

— Ўртоқ Абрамсонни. Шу ердами?

— Чап томондаги учинчи хонада.

Қисқа бўйли, бурни катта, ҳабашлардек қол-қора бир одам чап қўлининг бармоқларини сюргутининг тутгалайдиган жойига суқиб, ўнг қўлини пахса қилиб, ўрта ёшли темир йўлчига жаҳл билан гапи-рарди:

¹ Учредительное собрание бўлган сайловларда большевик номзодлар бешинчи рўйхат билан ўтган.

— Бу ишингиз ярамайди. Шуям ташкилот бўпти-ю! Сиз бу хилдаги ташвиқот усулини қўллансангиз, ишни пачава қиласиз!

Темир йўлчи бир нарса демоқчи бўлар, юзининг ифодасидан, хижолат чекиб туришидан ўзини оқла-моқчи бўлгани сезилиб турарди, лекин ҳабашга ўхшаган кишига оғиз очирмас эди; афтидан, ғазаби қайнаб-тошганга ўхшар, суҳбатдошининг гапига қулоқ солиши истамай, кўзларига қарамасдан ҳадеб бақирап эди:

— Митченкони дарҳол ишдан четлаштиринг! Сизда юз бераётган ҳодисаларга биз бефарқ қарай олмаймиз. Верхоцкий революцион суд олдида туриб жавоб беради! У қамоққа олиндими? А!.. Мен унинг отилишини талаб этаман!— деб қаҳр билан сўзини тамомлади ва қизариб-бўртиб кетган юзини Бунчукка ўғирди; ҳали жаҳлдан тушмагани учун кескин овоз билан сўради:— Сиз нима иш билан келдингиз?

— Абрамсон сиз бўласизми?

— Ҳа.

Бунчук унга ҳужжатларини ва Петроградда энг масъул ишда бўлган бир ўртоқнинг хатини узатди-да, ўзи дераза токчасига ўтирди.

Абрамсон хатни диққат билан ўқиб чиқди, хижолат чеккандек кулимсираб қўйди (ўринсиз ўшқиргани учун хижолатда эди), сўнгра:

— Бир оз кутиб туринг, сиз билан ҳозир гаплашамиз,— деди.

У терлаб-пишиб кетган темир йўлчига жавоб бериб юборди-да, эшикка чиқиб кетди, орадан бир минут ўтгач, соқоли қиришиланган, қуий жағи устида қиялаб тушган қилич ярасининг кўм-кўк изи қолган новча, қоматини офицерча тута билган бир ҳарбийни бошлаб келди.

— Бу киши — бизнинг ҳарбий-революцион комитетимизнинг аъзоси. Танишинг. Сиз, ўртоқ... кечиринг, фамилиянгизни унугибман.

— Бунчук

— ...ўртоқ Бунчук... афтидан, сиз пулемётчи мутахассис бўлсангиз керак?

— Ҳа.

— Бизга худди пулемётчи керак эди,— деб кулимсиради ҳарбий киши.

Унинг қулоғи тагидан иягигача чўзилган чандиғи кулгидан қизариб кетди.

— Сиз энг қисқа бир муддатда бизга қизил гвардиячи ишчилардан пулемёт командаси ташкил эта биласизми?— деб сўради Абрамсон.

— Ҳаракат қиласман. Гап — муҳлатда.

— Ҳўш, бу ишга қанча вақт керак? Бир ҳафта, икки, уч ҳафтами?— деб энгашиб сўради ҳарбий киши. Бунчукдан; кейин кулимсираб жавобини кутиб турди.

— Бир неча кун.

— Жуда соз.

Абрамсон пешонасини ишқалаб, жаҳл аралаш деди:

— Гарнizon қисмлари бузгунликка юз тутган, уларнинг ҳақиқий қиммати йўқ. Бизнинг ҳам, ўртоқ Бунчук, ҳамма ердагидек үмидимиз ишчилардан. Матрослар — тузук, солдатлар эса... Шу сабабдан, билсангиз, ўз пулемётчиларимиз бўлишини истаймиз.— У жингалак кўк соқолини тутамлаб, ғамхўрлик қилиб сўради.— Сиз моддий таъминот жиҳатидан қалайсиз? Ҳа, биз бу жиҳатдан таъминлаймиз. Бугун овқат қилдингизми? Албатта, йўқ.

«Эй биродар, сен ҳам очарчиликни кўп кўрганга ўхшайсан, негаки бир қарашда тўқ одамни оч одамдан ажратади билдинг, кўп даҳшатли, оғир кунларни бошингдан кечиргандирсанки, бир тутам соқолинг оппоқ бўлкетибди» деб ўйлади Бунчук ва Абрамсоннинг ҳабашникига ўхшаш чеҳрасига, ўнг томони пахтадек оқариб кетган бошига қараб юраги симобдек эриб кетди. Йўл кўрсатувчи билан Абрамсоннинг квартирига кетар экан, Бунчук уни ўйлар эди: «Мана бу чин инсон, ҳақиқий большевик! Бир томондан, ишга ўч, қаттиққўл, матонатли, иккинчи томондан, унда энг яхши одамшавандалик хислати сақланиб қолган. У Верхоцкий каби саботажчини шартта ўлимга ҳукм қилиб юбора билади, айни замонда ўз ўртоғига меҳрибонларчә ғамхўрлик қила олади».

Абрамсон билан учрашув натижасида олган

ёқимли таассурот остида унинг Таганрог кўчаси бошидаги квартирига етиб борди, торгина китоблар билан тўлган хонада дам олиб, овқатланди, Абрамсоннинг мактубини квартира бекасига берди-да, қаровотга чўзилди, қаерда ётганини билмай қаттиқ уйқуга кетди.

V

Бунчук тўрт кун, эрталабдан кечгача партия комитети ўзининг ихтиёрига юборган ишчилар билан машғулот ўтказди. Улар ўн олти киши эди. Булар турли ёшдаги турли касб эгалари бўлиб, ҳатто ҳар хил миллатлардан иборат эдилар. Буларнинг иккитаси ҳаммол, бири полтавалик украин Хвиличко, бошқалари — руслашган грек Михалиди, ҳарф терувчи Степанов, саккизтаси металлист, Парамонов, маъдан конида ишловчи Зеленков, нимжон армани нонвой Геворкянц, рус немисларидан чилангар уста Иогани Ребиндер, иккитаси депо ишчиси эди, ўн еттинчи йўлланмани солдатча пахталиқ нимча кийган, оёкларига катта хапқат этик кийган аёл киши олиб келди.

Бунчук аёлдан оғзи ёпиқ пакетни олар экан, унинг нима мақсадда келганини билмай:

— Сиз қайтишда штабга кириб ўта оласизми? — деб сўради.

Аёл кулимсиради, шошқин бир ҳаракат билан рўмоли остидан ҳурпайиб чиқиб қолган соchlарини тузатар экан, ҳадиксираб:

— Мени сизнинг ихтиёрингизга юбориши... — бир лаҳза хижолат ичиди қолиб, тили тутилиб, — пулемётчиликка, — деди.

Бунчук қип-қизариб кетди.

— Бу нимаси, у ердагилар эсини еб қўйдими? Мен бу ерда аёллар батальони тузяпманми?.. Сиз мени кечиринг, бу — сизга муносиб иш эмас: оғир иш, эркак кишининг кучи етадиган иш... Бу нима қилганлари-а?.. Йўқ, мен сизни қабул қилолмайман!

У қовоғини солиб, пакетди очди, ихтиёрингизга партия аъзоси Анна Погудко юборилади, деб ёзилган йўлланмага кўз юргутириб, Абрамсоннинг йўл-

ланмага илова қилган мактубини қайта-қайта ўқиб чиқди.

«Азиз ўрт. Бунчук!

Сизга Анна Погудко номли яхши бир ўртоқни юборяпмиз. Биз унинг қаттиқ талабини рад этолмадик, уни яхши пулемётчи жангчи қилиб етиштирасиз деган умид билан ихтиёргизга юборяпмиз. Мен бу қизни танийман. Уни сизга қизғин тавсия этиш билан, бир нарсаны илтимос қиласман: у қимматли партия ходими, лекин жуда қизиққон ва жўшқиндири (ҳали ёшлик ғурури бошидан кетмаган), уни эҳтиётсиз ҳаракатлардан сақланг, ҳимоя этинг.

Шубҳасиздирки, ихтиёргиздаги саккиз нафар металлист сиздаги одамларнинг ядроси бўлиб, уларни жисплаштирадилар, улардан ўртоқ Боговойга алоҳида эътибор беришингизни ўтинаман. Жуда ишбиларман ва революцияга содик кишидир. Сизнинг пулемётчилар отрядингиз — состави бўйича интернационал отряддир, бу яхши хислат: улар шубҳасиз жангда матонатли бўлурлар.

Таълимни тезлаштиринг. Қаледин устимизга бостириб келмоқчи эмиш, деган маълумотлар бор.

Дўстлик саломи билан *C. Абрамсон*.

Бунчук рўпарасида турган қизга бир назар ташлади (улар Московский кўчасидаги уйлардан бирининг ертўласида, пулемёт отишни ўрганаётган хонада эдилар). Фира-шира ёруғлик юзига кўланка ташлаб туради.

— Нима ҳам қилардик! — деди Бунчук нохушлик билан. — Бу сизнинг истагингиз экан... Абрамсон ҳам илтимос қиляпти; майли қолинг.

* * *

Оғзи карракдек «максимка»ни ҳар ёқдан ўраб олиб, олдингиларнинг елкасига суюнишиб, пулемёт устида энгашиб туришар, Бунчукнинг моҳир қўлларида унинг қисмларга ажралишини синчковлик билан кузатишарди. Бунчук секин ва аниқ ҳаракат қилиб,

унинг қисмларини яна йифишириар, айрим қисмларнинг тузилиши ва вазифасини тушунтириар, пулемётни ишлатиш усулларини ўргатар, ўқлаш, нишонга олиш қоидаларини кўрсатар, траектория бўйича ўқнинг қандай қилиб ўнг томонга оғишини, ўқнинг қанча масофага бориб тушишини уқтиради. Душманнинг ўқ сели остида қолмаслик учун жанг вақтида қандай жойлашиши таълим берарди. У бўёғи кўчиди кетган пулемёт қалқони остига ётиб олиб, жой танлаш, ўқ ленталари солинган яшикларни қаерга қўйиши гапириб берар эди.

Нонвой Геворкянцдан бошқа ҳамма осонгина билб олди. Бунчук пулемётни қисмларга ажратишни ҳар қанча кўрсатса ҳам Геворкянц уқиб ололмас; эсида турмас, адашар, шошиб қолар, хижолат ичида шивирлаб:

— Нега бўлмаяптийкин? Ахир мен... Гуноҳкорми?.. Мановини бу ёққа. Яна бўмаяпти!..— деб аччиғланиб хуноб бўларди. — Нега экан?

— Мана сенга негалиги!— деб қорача, юз-кўзига порох сачраб кўм-кўк доғ қолдирган Боговой уни майна қиларди. — Ўзинг нўноқсан, шунинг учун бўлмаяпти. Мана бундай қилиш керак.— деб қисмларни жой-жойига қўйиб кўрсатди у. — Мен болалик чоғимданоқ ҳарбий ишга ишқивозман, — деб ҳаммани кулдириб, бармоғи билан юзидағи порох доғ қолдирган изларни кўрсатди. Тўп қуяётган эдим, у портлаб кетди. Азобини кўряпман, лекин ҳозир ишга қўлим чечан бўпқолди.

Дарҳақиқат, у пулемётни ҳаммадан олдин осонгина ўрганиб олди. Геворкянц ношудлигича қолди. Унинг хафа бўлиб, йиғламсираб:

— Яна чиқмаяпти! Нимага экан? Билмадим, — деган овози эшитилиб қоларди.

Тили заҳар грек Михалиди ғазабланиб:

— Оббо, ҳафтафаҳм-э. Нахчивондан чиққан битта тўпос сен экансан-да,— дер эди.

— Бунаقا ношуд оламда топилмайди, — деб унинг гапига қўшилди оғир-вазмин Ребиндер.

— Бу сенга кулча ёпиш эмас, — деди кулиб Хвилчко. Унинг гапига ҳамма беғараз кулиб қўйди.

Фақат Степанов шолғомдек қизариб, титраб-қақшаб қичқирди:

— Ўртоқقا ўргатиш керак, майна қилиш ярамайди.

Унинг гапини қўллари узун, кўзлари ола-кула кекса депо ишчиси Крутогоров қувватлади.

— Кулавер-а, шақилдоқлар, иш қолаверсин. Ўртоқ Бунчук, бу оғзи коскиларни тинчит ё ҳайдаб юбор. Революция хатарда-ю, буларга кулги бўлса, — деб дўриллади чўкичга ўхшаган муштини кўтариб.

Анна Погудко ҳар ишни ҳафсала билан ўрганар. Бунчукни ҳоли-жонига қўймай, унинг рўдапо пальтосининг енгидан ушлаб олиб, пулемёт ёнида ўралашгани-ўралашган, чақнаб турган қора, катта-катта кўзларини Бунчукка тикиб:

— Агар қобиғида сув музлаб қолса, нима бўлади? Қаттиқ шамолда қандай чалғийди? Шунда қандай бўлади, ўртоқ Бунчук? — деб саволлар ёғдидарди.

Бунчук у борлигида ўзини ўнграйсиз ҳис қиласди. Шу ўнграйсизлигининг ҳиссасини чиқариш учун Аннага жуда талабчанлик билан муомала қилас, ўзини атайин совуқ тутар, аммо эрталаб соат еттида у қўлларини паҳталик нимчасининг енгларига тиқиб, жунжикиб, катта солдатча этигини тўқиллатиб, ертўлага кириб келганда Бунчук ўзини ҳаяжонга келгандек ҳис этарди. Анна Бунчукдан бир оз бўйи пастроқ, жуссаси меҳнаткаш қизларникига ўхшашиб миқтидан келган, бир оз буқчайганроқ, агар бутун вужудига ҳусн бериб турган ажойиб катта кўзларини мустасно қилганда, ўзини хунуқкина деса ҳам бўларди.

Тўрт кун мобайнинда Бунчук Аннани тўйиброқ ҳам кўролмади. Чунки ертўланинг ичи ним қоронфи, бунинг устига, унинг башарасига тикилавериш ўнграйсиз, вақт ҳам кўтармас эди. Бешинчи кун деганда улар ертўладан бирга чиқдилар. Анна олдинда борарди. Бешинчи погонага кўтарйлганда Анна орқасига ўгирилиб, Бунчукка қандайдир бир савол ташлади. Бунчук эса унга кечки қуёш ёруғида қараб,

ич-ицидан оҳ тортиб қўйди. Анна ўз одатига кўра сочларини тўғрилаб туриб, бошини сал орқага ташлаган ҳолда унга қиё боқиб жавоб кутди. Лекин Бунчук саволни эшитмаган эди. У юраги увишиб секин-аста зинапоядан кўтарилар эди. Анна хижолат чекканидан ботаётган қуёш ёруғида бурнининг катаклари қимирлаб турарди (рўмолини олмасдан сочини тузатиш ўнгфайсиз эди). Лабларининг бичими мардонавор, лекин болаларникидек маъсум эди. Устки дўрдоқ лаби устида қорайиб чиққан майин туклар юзининг рангини очиб юборган эди. Бунчук зарб тушишидан қўрққандек, бошини эгди ва ҳазил араплаш:

— Анна Погудко... иккинчи номерли пулемётчи, сен бирорни бахтиёр қиласидан даражада ажойибсан,— деди.

— Бўлмаган гап! — деди у шартта ва кулиб қўйди. — Бўлмаган гап, ўртоқ Бунчук. Мен соат нечада машқ майдонига борамиз, деб сўрайаман.

Бу кулгидан Анна аллақандай содда ва яқин бўлиб кўриниб кетди. Бунчук унинг ёнига келиб тўхтади, офтоб ҳамма ёқни зарга кўмиб ботаётган кўчанинг бошига аланглаб қараб секин деди:

— Машқ майдонигами? Эртага. Қаёққа бормоқчисан, турадиган жойинг қаерда?

Анна чеккадаги бир тор кўчанинг номини айтди. Биргалашиб кетдилар.

Чорраҳага етганда уларни Боговой қувиб етди.

— Менга қара, Бунчук! Эртага қаерга тўплана-миз?

Йўл-йўлакай Бунчук Тинч чакалак орқасида йи-филишларини айтди, Крутогоров билан Хвиличко пулемётни извошда келтиришади; эрта билан соат саккизда ҳамма тўпланиши керак, деди. Боговой улар билан бирга икки квартал ергача борди, кейин хайрлашди. Бунчук билан Анна Погудко бир неча минутгача индамай боришиди. Анна кўзининг қири билан қараб сўради:

— Сиз казакмисиз?

— Ҳа.

— Йилгари офицер бўлганмисиз?

- Э, офицерликни менга ким қўйибди?
- Асли қаерликсиз?
- Новочеркасклик.
- Ростовга келганингизга қанча бўлди?
- Бир неча кун.
- Ундан илгари қаерда бўлгансиз?
- Петроградда.
- Нечанчи йилдан бери партиядасиз?
- Бир минг тўқиз юз ўн учинчи йилдан бери.
- Оиласиз қаерда?
- Новочеркаскда,— деб ғулдураб шошиб жавоб берди Бунчук, сўнгра илтижо қилаётгандек қўлини чўзиб: — Шошма, сўрашга ижозат эт: ўзинг асли ростовликмисан? — деб сўради.

— Йўқ, мен Екатеринославшинада туғилганман, лекин сўнгги вақтларда шу ерда турганман.

— Энди мен сўраб-суриштираман... Українкамисан?

Анна бир лаҳза иккиланиб туриб, дадил жавоб берди:

- Йўқ.
- Яҳудиймисан?
- Ҳа. Нимайди? Тилимдан билиниб турибдими?
- Йўғ-э.
- Бўлмаса менинг яҳудийлигимни қаёқдан билдинг?

Бунчук у билан баравар қадам ташлаб кетиш учун юришини секинлаштириб, жавоб берди:

— Қулоғинг, қулоғингнинг шакли ва кўзингдан билдим. Ўз миллатингдан сенда жуда оз нишона бор... — Қейин ўйланқираб туриб: — Биз билан бирга бўлганинг жуда яхши,— деди.

— Нега?— деб қизиқсиниб сўради Анна.

— Биласанми: яҳудийлар ҳақида бир гап тарқалган, билишимча, кўп ишчилар ҳам шундай фикрдалар,— шу ерда Бунчук,— мен ўзим ҳам ишчиларданман,— деб қўшиб қўйди,— яҳудийлар одамларга йўл кўрсатиб, ўзлари ўт ичига кирмас эмишлар. Бу хато фикр, сенинг биз билан бўлишинг шу хато фикрни чипакка чиқаради. Сен ўқиганмисан?

— Ҳа, ўтган йили гимназияни тамомладим. Сиз-

нинг маълумотингиз қанақа? Шунинг учун сўраяпманки, гапингиздан ишчи эмаслигингиз билиниб турипти.

— Мен кўп мутолаа қилганман.

Улар секин-аста юриб борар эдилар. Анна уни жўрттага тор кўчалардан олиб юрди. У ўзи тўғрисида қисқача гапириб бергандан кейин, Корнилов фитнаси, Петроград ишчиларининг қайфияти, октябрь инқилоби тўғрисида сўраб-суриштириди.

Узоқдан, денгиз бўйидан милтиқдан узилган ўқ овози эшитилди, пулемёт бир неча ўқ отиб, тинчликни бузди. Анна фурсатдан фойдаланиб:

— Қайси системадаги пулемёт? — деб сўради.

— Льюис.

— Лентанинг қанча қисми отилиб соб бўлди?

Бунчук жавоб қилмади, у ботаётган қуёш шафадан қизариб яллиғланган осмонга лангар ташлаган ҳарбий кемадан узун қўл каби чўзилган, прожектор ёругини томоша қилди.

Хувиллаган шаҳар кўчаларида уч соат айланиб юриб, улар Анна турадиган уйнинг дарвозаси олдида хайрлашдилар.

Бунчук сабабини ўзи билмаган қувонч ҳисси билан тўлиб уйига қайтди. «Яхши ўртоқ, ақлли қиз! У билан ширин суҳбат қилдик, кўнглим ором олди. Сўнгги замонларда анча дағаллашдим, одамлар билан дўстона алоқада бўлиб туриш ҳам зарур, бўлмаса одам солдатнинг халтасидаги қоқ нондек қотиб қолади...» деб ўйлади у ўзини ўзи алдаб ва ўзини алдаётганини ўзи пайқаб.

Ҳозиргина ҳарбий-революцион комитетнинг мажлисидан келган Абрамсон пулемётчиларнинг тайёргарлигини сўраб-суриштириди; сўз орасида Анна Погудкони ҳам сўради:

— Анна қалай? Агар тўғри келмаса биз уни бошқа ишга юборамиз, ўрнига одам берамиз.

— Йўғ-э, нима деяпсан! — деди Бунчук қўрқиб кетиб. — Жуда салоҳиятли қиз.

Бунчук Анна тўғрисида гапиришга тили қичишиб турса ҳам, лекин ирода кучи билан ўзини аранг босиб олди.

25 ноябрь қиём вақтида Каледин ўз аскарлари-ни Новочеркасскдан олиб келиб, Ростов яқинида тўплади. Ҳужум бошланди. Темир йўл изининг ҳар икки тарафида Алексеевнинг офицерлардан тузган сийрак отряди саф тортиб келарди. Ўнг қанотда кул ранг кийимли юнкерлар гуж бўлиб, генерал Попов отрядидаги кўнгиллилар сўл қанётдаги қизил жарни айланиб, ўрмалаб келарди. Узоқдан гувалага ўхшаб кўринган аскарлар жар ичига сакраб тушар; жарнинг бу томонига ўтиб тўпланишар, яна ўрмалаб кетишарди.

Нахичеван районининг бир чеккасида сафга тизилган қизил гвардиячилар безовталана бошлади. Биринчи марта қўлига милтиқ олган ишчиларнинг кўпи қўрқар, ер бағирлаб, қора пальтоларини қоп-қора кўз балчиғига булғардилар; баъзилари бошларини кўтариб қарап; узоқ масофадан кичик бўлиб кўринган оқларни кўздан кечирар эдилар.

Бунчук сафда, пулемёт ёнида тиз чўкиб, дурбиндан қарап эди. У бир кун илгари қўпол, жўн пальтосини ечиб ташлаб, шинель кийиб олган, ўрганиб қолган шинелда ўзини яхши ҳис қиласарди.

Қизил гвардиячилар команда берилмасдан ўт очдилар. Юракни сиқувчи сукунатга тоб-тоқат келтиролмадилар. Биринчи узилган ўқ пақиллаб эшитилгач, Бунчук сўқинди-да, даст ўрнидан туриб:

— Отишни тўхтатинг,— деди.

Пақ-пақ ўқ овозлари унинг ҳайқириғини эшитдирмай қўйди, Бунчук қўлини силкиб қўйди-да, милтиқ овозини босиб, Боговойга: «Ут очилсан» деб команда берди. Кулиб турса ҳам, лекин юзининг рангида ранг қолмаган Боговой пулемёт ёнига ётиб олиб, бармоқларини замок устига қўйди. Пулемётнинг таниш овози Бунчукнинг қулоғини тешиб ўтгандек бўлди. У бир минутча душманнинг ер бағирлаб ётиб қолган сафларини кўздан кечириб, ўқларнинг қаерга бориб тушаётганини аниқлашга тиришди, сўнгра сакраб турди-да, саф бўйлаб, бошқа пулемётлар олдига чопиб кетди.

— Ўт очилсин!

Хвиличко ранги ўчган, қувноқ юзини унга ўгирив:

— Отамиз! Ҳа-ҳа-ҳой! — деб бақирди.

Үртадан бошлаб ҳисоблаганды учинчи пулемёт ёнидаги йигитлар у қадар ишончли эмасди. Бунчук улар ёнига чопиб борди. Яirim йўлда эгилиб, дурбиндан қаради: дурбиннинг терлаган ойналарида ғимирлашаётган кул ранг гавдалар кўринди. У томондан бараварига отилган ўқ овози эшитилди. Бунчук ерга ётиб олди-ю, ётган жойида учинчи пулемётнинг янглиш нишонга олганини аниқлади.

У саф бўйлаб эмаклаб бораркан:

— Пастроқ! Лаънатилар!.. — деб қичқирди.

Ўқлар унинг боши устидан ўлим ваҳмини сочиб визиллаб ўтарди. Алексеевчилар машқ вақтидаги-дек, усталик билан отардилар.

Оғзи баландга қаратиб қўйилган пулемёт ёнида пулемётчилар ерга ётиб олган: наводчик грек Михалиди, жуда баланд нишон олиб, бетўхтов ўқ отар, лента запасларини исроф қиласарди; унинг ёнида эсхонаси чиқиб, ранги бўзарип кетган Степанов пўнғилларди; орқароқда Крутогоровнинг дўсти, темир йўлчи ишчи бошини ерга эгиб, тошбақадек дўмпайиб ётарди.

Бунчук Михалидини нари итариб ташлаб, хийла вақтгача кўзини қисиб туриб нишонни тўғрилади, тепкини босгандан пулемёт унинг қўлида бир маромда тариллаб ўқ соча бошлади,— натижаси ҳам дарҳол кўрина қолди: бирин-кетин чопиб чиқсан бир тўда юнкерлар ўзини тепадан пастга отди, суғур инлари бўлган тепа улардан бири қолиб кетди.

Бунчук ўз пулемёти ёнига қайтиб келди. Ранги докадек оқариб кетган Боговой (унинг юзидаги пороҳ доғлари кўм-кўк бўлиб кўринарди) ёнбошлаб ётиб олиб, яраланган болдирини боғлар эди.

— От, падар қусур! — деб бақирарди унинг ёнида ётган қўнғир соч қизил гвардиячи тўмпайиб олиб. — От! Бостириб келяптилар-ку, кўрмаяпсанми, ахир?!

Отряддаги офицерлар мунтазам саф билан темир йўл кўтармаси бўйлаб чопиб келмоқда эдилар.

Ребиндер Боговойнинг ўрнини олди. У шошмасдан мўлжалга олиб, усталик билан ўқни тежаб ота бошлади.

Сўл қанотдан эса Геворкянц қуёндай сакраб-сакраб, боши устидан ўқ визиллаб ўтганда ерга ётиб олиб, уҳ торта-торта, Бунчук олдига чопиб келди.

— Эвлаёлмаяпман!.. Отилмаяпти!

Бунчук бошини эгмаёқ тик тутиб эгри-бугрини сафда ётган қизил гвардиячилар қатори бўйлаб чопиб кетди.

Узоқдан Аннанинг пулемёт ёнида тиз чўкиб турганини, пахмайган сочини тузатиб, кафти остидан душман сафига қараганини кўрди.

Аннанинг ҳаёти учун ваҳимага тушган Бунчук қип-қизариб бўртиб кетиб:

— Ёт! Ёт деяпман!— деб бақирди.

Анна унга ўгирилиб қаради-да, яна боягича тураверди. Бунчукнинг оғзидан ёмон бир сўкиш чиқиб кетди. Унинг олдига чопиб бориб, зўрлаб ерга ётқизди.

Пулемёт қалқони панасида ётган Крутогоров пишиллаб титраб-қақшаб, Бунчукка:

— Пулемёт тишлашиб қолди! Ўқ отилмаяпти!— деди ва кўзи билан Геворкянцни ахтариб, бўғилиб қичқириди:— Қочди, лаънати! Дақёнусдан қолган эшак қочди... Уҳ тортавериб безор қилди!.. Иш қилишга қўймади!..

Геворкянц илондай буралиб судралиб келарди. Унинг қирилмаган қоп-қора соқолига лой ёпишиб қолган эди. Крутогоров тер босган йўғон бўйинни буриб, унга бир лаҳза қараб турди-да, кейин отишма товушини босиб:

— Ленталарни қаерга қўйдинг?.. Э, ҳайвон!.. Бунчук! Ҳой Бунчук! Уни даф қил, бўлмаса ўлдираман!..— деди.

Бунчук пулемёт устида энгашиб уни тузатаётган эди, бир ўқ пулемёт қалқонига зарб билан келиб тегди, Бунчук қўлинини қайноқ нарсага тегизиб олгандай бирдан тортиб олди.

Пулемётни созлагандан кейин ўзи отишга бошлади. Тап тортмай елиб келаётган Алексеевчиларни

ерга ётиб олишга мажбур этди, сўнгра кўзлари ила пана жой қидириб, секин орқага чекинди.

Душман сафлари ҳамон яқинлашмоқда эди. Оқлар милтиқларининг қайшидан ушлаб, ўхтин-ўхтин ерга ётиб оларди, уларнинг келаётганлари дурбиндан кўриниб турарди. Оқлар шиддатли ўт очдилар. Қизил гвардиячилардан баъзилари судралиб келиб ўқ еб ўлган учта шерикларининг милтиқ патронларини олдилар,— ўликларга буларнинг энди лузуми йўқ эди... Крутогоров пулемёти ёнида ётган Анна билан Бунчукнинг кўзи ўнгидаги сафда ётган ёшгина қизил гвардиячи йигит ўқ еб ўлди. Йигит талваса ичидаги, обмотка ўралган оёгини ерга ура-ура узоқ хириллаб ётди, охири қўлларини кериб, кўтарилди-ю, сўнгги марта нафас олиб, инграб юзи билан ерга йиқилиб тушди. Бунчук Аннага кўз қирини ташлади. Қизнинг пахтаси чиқиб кетган катта кўзларида қўрқув аломати бор эди. У кўзини юммай, йигитнинг чачоқланган солдатча обмоткали оёғига қараб турар, ёнидаги Крутогоровнинг:

— Лента!.. Лента бер!.. Ҳой қиз, лентани берсанг-чи!— деган бақириғини эшилтмасди.

Калединчилар икки флангдан ўраб олиб, қизил гвардиячиларни орқага чекинтиридилар. Шаҳарнинг Нахичеван районидаги кўчаларида орқага чекинаётган қизил гвардиячиларнинг қора пальтолари ва шинеллари кўзга чалинарди. Ўнг қанотда бўлган энг четдаги пулемёт оқларнинг қўлига тушди. Аллақандай бир юнкер грек Михалидининг кўкрагига милтиғини тираб туриб, отиб ўлдирди, иккинчи номерли пулемётчини машқ майдонидаги қўриқчи каби найза билан саншиб ўлдирдилар; пулемётчилардан фақат ҳарф терувчи Степанов жон сақлаб қолди.

Ҳарбий қемалардан илк тўп ўқлари ёғила бошлигач, чекинаётганлар тўхтадилар.

Бунчукка таниш бўлган революцион комитет аъзоси олдинга чопиб ўтиб:

— Сафга!.. Қани, орқамдан!..— деб бақирди.

Қизил гвардиячилар сафи ҳаракатга келиб ҳужумга ўтди. Бунчукнинг пинжига суқилган Крутогоров, Анна ва Геворкянцнинг ёнгиналаридан уч киши

ўтиб кетди. Улардан бири папирос чекар, иккинчиси юриб кетатуриб, мильтининг қулфига тиззасини урар, учинчиси ўз пальтосининг лойга ботган барларидан кўз узмай борарди. Унинг юзида, мўйловларининг учидаги маъсум бир кулги ўйнар—гўё у ўлишга кетаётгани йўқ, балки ўртоқлари билан бирга зиёфат егандан кейин уйига қайтаётгандек ва булғанган пальтосини қўрганда, заҳар хотини қандай жазо беришини ўйлаб кетаётгандек эди.

Крутогоров узоқдаги четан деворни ва унинг орқасида фимирлашаётган кул ранг кийимли кишиларни кўрсатиб:

— Ана улар!— деб бақирди.

— Пулемётларни ўрнат!— деб Бунчук бесўна-қайлик билан пулемётни бурди.

Пулемётнинг даҳшатли овозини эшигач, Анна қулоқларини беркитиб олди. У чўнқайиб олиб, девор орқасидаги фимирлашлар тўхтаганини, бир минутдан сўнг у ердан бараварига ўқ узилганини кўрди. Ўқлар туман пардасига ўралган ҳавонинг бағрини тешиб ўтиб, бошлари устида визиллади.

Пачкалаб отилган ўқларнинг садоси ногора овоздига ўхшаб эшитилар, пулемёт устида илондек буралган ленталар қизиб кетган эди. Якка ўқ овозлари қулоқни тешиб ўтгудек қаттиқ эшитиларди. Қора денгизчи матросларнинг қизил гвардиячилар боши устидан ошириб, ҳарбий кемадан отган тўп ўқлари вағиллаб учиб ўтиб турарди. Анна, новча, қоракўл папоқ кийган, мўйловларини қўнғиз нусха қилиб қирқдирган қизил гвардиячилардан бирига қараб турарди: қизил гвардиячи учиб ўтган ҳар бир тўп ўқини гайри ихтиёрий равишда бош эгиб саломлар ва уни кузатар экан:

— Ҳа, Семён, барака топ, ўқларни ёғдир!— дер эди.

Тўп ўқлари ростдан ҳам дўл каби ёғиларди. Нижонни тўғри олган матрослар ҳамма тўплардан галма-гал ўт очар эдилар. Секин чекинаётган калединчилар айрим қисмлари устига қуюқ шрапнель ўқлари ёғдирадилар. Душманни мағлубиятга учратган тўплардан бирининг ўқи чекинаётган душман сафининг

қоқ ўртасида ёрилди. Портлашдан ҳосил бўлган, ҳавоға устундек кўтарилиган қўнғир туман одамларни тўс-тўс қилиб ташлади, ҳосил бўлган чуқур воронка устидаги тутун чўкиб аста-секин тарқалди. Анна дурбинни улоқтириб ташлаб, оҳ деб, кирланган қўллари билан қўрқувдан олайиб кетган кўзларини бер-китди,— у дурбин ойнасида тўп ўқининг портлаб ёрилишини ва бегона одамларнинг ҳалок бўлаётганини яқиндан кўрди. Унинг бўғзига бир нарса келиб тиқилиб қолгандек бўлди.

Бунчук унга томон энгашиб:

— Нима бўлди?— деб сўради.

Аннанинг тишлари қаришиб, катта очилган кўзларининг олди қоронғилашиб кетди.

— Тоқат қилолмайман.

— Дадил бўл! Менга қара... Анна, эшитяпсанми? Эшитяпсанми? Бу қилифинг ярамайди. Яра-ма-й-ди!— деб Бунчук унинг қулоги остида қаттиқ бақирав эди.

Ўнг қанотда, кичик бир тепа остидаги пастқамликда душман пиёда аскарлари тўпланмоқда эди. Бунчук уларни кўриб қолди-ю, пулемётини судраб юргурганича қулайроқ жойга бориб олди-да, тепаликка ва пастқамликка ўқ ёғдира бошлади.

Ребиндернинг пулемёти истекис, пала-партиш ўқ узарди.

Йигирма қадамча нарида аллаким бўғилиб, жаҳл билан:

— Носилки! Замбил йўқми? Замбил!— деб бақираварди.

Фронт солдатларидан бўлган взвод командири жаранглаган овоз билан:

— Ни-шон... ўн саккиз... Взвод, ўт оч!—деб қичкираварди.

Кечга яқин қаттиқ ер устига биринчи қор учқунлаб ёға бошлади. Бирор соатдан кейин далани ёпишқоқ ҳўл қор босди. Гоҳ ҳужумга ўтиб, гоҳ чекинган, қаттиқ туриб урушган, жойларда жон берган жангчилар қоп-қора гуваладек қотиб қолган эди.

Кечга яқин калединчилар чекиндилар.

Биринчи қор ёғиб, ҳамма ёқ оппоқ бўлди. шу кеччани Бунчук пулемёт бўлинмасида ўтказди. Крутого-

ров қаердандир топиб олган от ёпқичини бошига ташлаб, иплик-иплиқ гўштни чайнаб-чайнаб ер, ту-фуринар, пўнғиллаб сўкинарди. Геворкянц, шу ерда, шаҳар четидаги ҳовлиниң дарвозаси ёнида, совуқдан кўкарган бармоқлари орасига папирос қистириб чекиб ўтирар, Бунчук эса қалайдан ясалган патрон яшиги устида, совуқдан қалтираган Аннани шинелининг бари билан ўраб ўтирар, кўзига босиб турган ҳўл панжаларини кўзидан айириб, уларни ўпиб қўярди. Дудоқлари орасидан оғзи ўрганмаган наво-зишли мулойим гаплар чиқар эди:

— Э, бу нима қилганинг?.. Ахир сен бардам, ладил эдинг-ку... Аня, ўзингни қўлга ол!.. Аня!.. Жонгинам... дўстим!.. Бориб-бориб ўрганиб кетасан... Агар фуруринг бу ердан кетиб қолишга йўл бермаса, бу қилиғингни ташла. Ўликларга бунаقا тикилиб қараш ярамайди. Қарамасдан, ёнларидан ўтиб кетавер, вассалом! Фикрларингга эрк берма, нўхталаб ол. Кўряпсан-ку: сен нима десанг ҳам, барибир аёллингга борасан-да.

Анна чурқ этмасди. Унинг кафтидан кузги тупроқ иси билан илиққина аёл баданининг ҳиди келарди.

Буралиб ёғаётган қор осмонни хира ва майин парда билан қоплаб олган. Ҳовлилар, атрофдаги далалар ва жимжит шаҳар ширин уйқуга толган.

VII

Ростов ёнида ва Ростовнинг ўзида бўлган уруш олти кун давом этди.

Қўчаларда ҳам, чорраҳаларда ҳам жанг бўлади. Қизил гвардиячилар Ростов вокзалини икки марта кўлдан бериб, икки марта душманни у ердан қувиб чиқардилар. Олти кун давомида у томондан ҳам, бу томондан ҳам асир олинмади.

Ноябрнинг 26 сида Бунчук Анна билан бирга юк станцияси ёнидан ўтиб кетаётганда иккита қизил гвардиячи асир тушган бир офицерни отишганини кўришди; Бунчук юзини тескари ўғирган Аннага жаҳл қилиб:

— Мана бу маъқул иш. Уларни ўлдириш, шафқатсизлик билан қириб ташлаш керак!— деди.— Улар бизга раҳм-шафқат қилмайдилар, биз ҳам уларнинг марҳаматларига муҳтож эмасмиз, шу сабабдан уларга ачиши керак эмас. Қуриб кетсинлар! Ер юзини бу мурдорлардан супуриб ташлаш лозим! Үмуман революция тақдирни ҳал қилинаётган маҳалда кўнгилчанликининг ҳожати йўқ. Бу ишчилар тўғри қиласптилар.

Учинчи куни Бунчук бетоб бўлиб қолди. Шунга қарамай, у бир суткагача ётмади, сёқ устида юраверди, лекин у борган сари кўнгли беҳузур бўлар, қўл-оёғи бўшашиб, боши тошдай оғирлашиб борар, қулоги шангирлар эди.

Пароканда бўлган қизил гвардия отрядлари 2 декабрь тонг чоғи шаҳардан чиқиб кетдилар. Анна билан Крутогоров қўлтиқлаб олган Бунчук пулемёт ортилган, ярадорлар тушган арава кетида борар, бўшашган, заиф гавдасини зўрга кўтариб, чўяндай оғирлашгар оёқларини тушдагидек аранг кўтариб босар эди. Аннанинг жавдира б турган кўзларига кўзи тушар, унинг:

— Илья, аравага чиқиб ол. Эшитяпсанми? Гапларимни тушуняпсанми, Илюша? Барака топтур, бигоз ўтириб дам ол, ахир сен касалсан-ку!— деган гапларини гўё узоқдан эшитаётгандек бўларди.

Аммо Бунчук Аннанинг сўзларини тушунмас, тифкасали унинг кучини кетказиб, енгиб қўйганини ҳам англамасди. Атрофидаги бегона ва таниш одамларнинг ғалати товушлари онгига етиб бормас, қаердадир, узоқда Аннанинг аланг-жаланг, чаросдек кўзлари ёниб тураг, Крутогоровнинг пахмайган соқоли селкиллар эди.

Бунчук бошини ушлаб кўрар, иситмаси чиқиб бўртиб турган юзини кафти билан ушлаб кўрар эди. Назаридан кўзларидан тирқираб қон оқаётгандек, бутун дунё, чайқалиб тургандек, қандайдир кўзга кўринмайдиган парда билан тўсилган бепоён дунё оёғи остидан чиқиб чопиб-чопиб кетаётгандай, айланётгандай туюлар эди. Хаста тасаввuri ақлга тўғри келмайдиган нарсаларни кўз олдига келтиради.

Ўхтин-ўхтин тўхтаб, ўзини аравага ўтқизмоқчи бўлган Крутогоровга қаршилик кўрсатарди.

— Қераги йўқ! Шошма! Сен кимсан? Анна қаёқда?.. Менга бир қисим тупроқ бер... Ановларни қириб юбор — мен команда бераман, сен пулемёт билан! Нишонни тўғри ол! Тўхта! Қизиб кетибди!.. — деб хириллар эди у, қўлини Аннанинг қўлидан тортиб олиб.

Уни зўрлаб аравага ўтиргиздилар. Бир лаҳза унинг димоғига турли-туман ҳидлар келиб урилган-дек бўлди-ю, шунда қўрқиб кетиб ақл-ҳушини йиғишириб олмоқчи бўлди, лекин йиғишириб ололмади. Қўз ўнгидаги қоп-қоронғи, жимжит бир бўшлиқ пайдо бўлди. Фақат боши узра, осмонда алланарса зангори тусга кириб ловиллаб ёнаётгандай, қип-қизил чақмоқлар шамширдек ялт-юлт қилиб чақилаётгандай бўлди.

VIII

Томлардан сарғайиб кетган сумалаклар узилиб тушиб, ерда жаранглаб майда-майда бўлиб кетарди. Қунлар исиб кетиб, хотор кўчаларида кўлмаклар пайдо бўлди, дўнг ерлар кўриниб қолди. Кўчаларда ҳурпайган сигирлар исканиб, тентираф юар, молхона ёнидаги шоҳ-шабба устида уймалашган чумчуқлар баҳордан нашъаланиб чирқилларди. Ялангликда Шамиль Мартин отхонадан қочган семиз жийрон отни қувалаб юарди. От эса паҳмоқ думини хода қилиб чопар, тўзиган ёлини шамолда пирпиратиб, туёқлари билан қорларни тўзғитиб шаталоқ отарди, у майдонни бир айланиб, черков панжараси олдида тўхтади-да, ғиштни искади. Яқин келган эгасига, қўлидаги юганга чагир кўзларини ялтиратиб қараб, елдек учиб кетди.

Январь ойи ерни илиқ булутли қунлар билан ардоқларди. Қазаклар Донга қараб, бемаврид тошқин бўлишини кутардилар. Мирон Григорьевич, ўша куни қўра орқасидаги молхона олдида узоқ туриб, қордан кўпчиган ўтлоқча, Доннинг кўкиш музига назар ташлаб: «Бу йил ҳам бултургидек сув тошади шекилли,

қор ҳам зап ёғди-да, ерни зил-замбидек босиб қолди», деб ўйлади.

Пистоқи ранг гимнастёркасини кийиб олган Митъка оғилхонани тозалар, оқ папоги унинг гарданнида аранг туради. У тердан ҳўлланган, пешонасига тушган сочини гўнг иси келган ифлос кафтининг орқаси билан тўғрилаб қўярди. Оғилхона дарвозаси олдида музлаб қотиб қолган гўнг уйилиб ётар, унинг устида бароқ эчки тентираб юради. Қўйлар четан деворга қапишиб олган. Онасидан катта бўлиб кетган қўзи эммоқчи бўлар, онаси эса сузиб уни итариб ташларди. Бир томонда шохлари қайрилган қора қўчқор омочга сўйканарди.

Омборхонанинг сариқ лой билан бўялган эшиги олдида, офтобрўяда лаби сўлжайган, сариқ «тўрт қўз» ит ётарди. Бостирма шифти, омбор деворига балиқ овлайдиган, ҳалқали тўр осиб қўйилган; Гришак бобо ҳассасига таяниб туриб, унга қарап экан, баҳорнинг яқинлашаётганини кўриб, балиқ тўрларини ямаш керак экан-да, деб ўйланиб қолди.

Мирон Григорьевич усти ёпиқ хирмонни кўздан кечириб, пичан ғарамини чамалади. Энди, эчкилар тортқилаб тўккан тариқ похолни паншаха билан тўпламоқчи бўлиб турган ҳам эдики, қулоғига бегона товуш чалинди. У паншахани ғарам устига ташлаб, молхона томон кетди.

Митъка оёқларини кериб, папирос ўрас, жононастикиб берган гуллик тамаки ҳалтачасини икки бармоғи орасида қисиб туради. Христоня билан Иван Алексеевич унинг ёнида туришарди. Христоня атаманча ҳаво ранг фуражкаси ичидан кирланган тамаки қофоз олди. Молхона четан тўсифига суюниб турган Иван Алексеевич шинелининг олдини очиб, солдатча пахталик чалворининг чўнтакларини кавлар эди. Қиртишлаб қирилган юзида, иягидаги қорайиб турган чуқурчасида нохушлик бор эди: ниманидир унуган кўринарди.

— Яхши ухлаб турдингми, Мирон Григорьевич?— деб ҳол сўради Христоня.

— Худога шукур.

— Кел, биргалашиб тамаки тортишайлик.

— Қуллуқ. Яқинда чекувдим.

Казаклар билан қўл беришиб сўрашгач, Мирон Григорьевич усти қизил қулоқчинини бошидан олдида, диккайган оппоқ сочини силаб туриб:

— Қайси шамол учирди, атаманли оғайнилар?— деди.

Унга бошдан оёқ назар солиб чиққан Христоня тезда жавоб қилмади. Аввал анчагача папирос қофозини буқанинг тилидек ғудриш тили билан ялаб ҳўллаб ёпиштиргач, ўраб олди-да, дўриллаб жавоб қилди.

— Митрийда юмушимиз бор эди,— деди.

Улар ёнидан гардишли тўр кўтарган Гришак бобо ўтди. Иван Алексеевич билан Христоня шапкаларини ечиб, у билан сўрашдилар. Гришак бобо тўрни айвонга қўйиб қайтди:

— Ҳой шоввозлар, нега сизлар уй-уйларингизда ўтирибсизлар? Хотинларингизнинг пинжида исиниб ётирибсизларми?— деди у казакларга.

— Бўлмаса нима қилайлик?— деди Христоня.

— Сен Христошка, жим бўл, бир гапдан хабаринг йўқми?

— Худо ҳақи, хабарим йўқ,— деди Христоня.— Улай агар, бобо, билсан!

— Воронеждан тунови куни бир савдогар келди, Сергей Платонич — Моховнинг танишими ёки чатишганими, билолмадим. Келди-ю, Чертковода ёт қўшин турибди, большовойлар бўлса керак, деди. Рус бизга қарши уруш очган, сизлар бўлсангиз уй-уйларингизда ётаверасизларми? Ҳой ҳароми Митька, менга қара. Оғзингга сув олдингми, нега индамайсан? Нима қилмоқчисизлар?

— Ҳеч нарса,— деб кулди Иван Алексеевич.

— Ҳеч нарсани ўйламаганларинг чакки-да,— деди Гришак бобо қизишиб.— Сизларни худди какликдек тузоққа тушириб олишади. Мужиклар сизни банди қилиб олиб, ийингизни чиқаради.

Мирон Григорьевич кулимсиради; Христоня кўпдан бери устара гегмай ўсиб кетган соқолини қашиб қўйди; Иван Алексеевич, папиросини тутатиб, Митькага қаради, Митьканинг мушукникига ўхшаган

бит кўзлари чақнаб турар, унинг чағир кўзлари кул-яптими ёки ғазаб сочяптими, пайқаб бўлмасди.

Бир оз гаплашиб тургандан кейин Иван Алексеевич билан Христоня хайрлашиб, Митъкани эшик олдига чақириб олдилар.

— Кечаки нега мажлисга келмадинг? — деб жаҳл билан сўради Иван Алексеевич.

— Вақтим бўлмади.

— Мелеховларни книга бориш учун вақт топасан-а?

Митъка бошини бир силкитиб, папогини пешона-сига туширди-да, фижиниб:

— Қелолмадим — вассалом. Гапни чўзиб ўтиришнинг нима кераги бор? — деди.

— Хутордаги фронтчиларнинг ҳаммаси бор эди, фақат Петро Мелехов келмади. Хабаринг бордир... хутордан Каменскаяга вакиллар юборишга қарор қўйдик. У ерда ўнинчи январда фронтчилар қурултойи бўлади. Чек ташладик, мен, Христоня ва сен борадиган бўлдик.

— Мен бормайман, — деди Митъка қатъий қилиб.

— Сенга нима бўлди? — Христоня қовоғини солиб унинг гимнастёркаси тугмасидан ушлади. — Бундан тонасанми? Айнадингми?

— У Петька Мелехов билан оғиз-бурун ўпишиди... — деди Иван Алексеевич Христонянинг шинели енгига қўлинини тегизиб: — Хайр майли, кетдик. Бу ерда қиласидиган ишимиз йўқقا ўхшайди. Митъка, бормайсанми?

— Бормайман... «Йўқ» дегандан кейин йўқ-да.

— Хайр бўлмаса! — деди Христоня бошини эгиб.

— Оқ йўл!

Митъка кўзини опқочиб, унга иссиқ қўлинини узатди-да, хайрлашиб уйга кириб кетди.

— Алаҳ, — деди Иван Алексеевич паст овоз билан, бурнининг катакларини кериб. Кейин узоқлашиб кетаётган Митъканинг кенг яғринига қараб, шанғилаб: — Алаҳ! — деди.

Улар йўл-йўлакай баъзи одамларга йўлиқиб, Коршуновнинг қурултойга боришдан бош тортганини ва эртага икковлари жўнаб кетишлигини билдирилар.

8 январь тонг пайтида Христоня билан Иван Алексеевич

сеевич хутордан чиқиб жўнаб кетдилар. Яков Тақачи ўз хоҳиши билан улар тушган аравани ҳайдади. Бир жуфт яхши от қўшилган шалдироқ арава жуда тезлик билан хутордан чиқиб, тепага чиқди. Ҳаво илиб йўл устидаги қорларни эритиб юборган эди. Қори эриб кетган ерларда чана қўшқароғи ерга ёпишиб қолар, чана силкиниб кетар, отлар эса қайишларни таранг қилиб, чанани аранг судраб борарди.

Қазаклар арава орқасида борар эдилар. Субҳидамнинг шамолидан бетлари қизарган Тақачи этиклари билан муз парчаларини топтаб майдалаб кетарди. Юзи қизарган бўлса ҳамки, тақа изи тушиб қолган чандиги мурдадек бўзарид туарди.

Христоня, йўлнинг чеккасида, дона-дона қуруқ қорни босиб-янчиб, оғзини каппа-каппа очиб, ҳарсиллаганича тепаликка чиқиб борарди, чунки 1916 йили Дубно яқинида немисларнинг заҳарли газини бир исқаб кўрган эди.

Тепа устида шамол елиб юрар, ҳаво совуқ эди. Қазаклар миқ этмай боришарди. Иван Алексеевич юзини пўстинининг ёқаси билан буркаб олганди. Узоқдаги ўрмонзор борган сари яқинлашарди. Ўрмон ичидан кесиб ўтган йўл тик бир тепаликка олиб чиқарди. Ўрмон ичидан шамол оқар сув сингари шилдираб эсарди. Сершоҳ эман оғочининг пўстлоқлари тилла ва зумрад тахтакачдай товланарди. Узоқ бир ерда зағизғон сайрарди. Зағизғон думини қийшайтириб, йўл устидан учиб ўтди. Шамол уни суриб борар, шундай бўлса ҳам бошини қийшайтириб, ола-була патларини ҳурпайтириб, тез учиб кетарди.

Хутордан чиққандан бери чурқ этмай келган Тақачи Иван Алексеевичга юзланиб, дона-дона қилиб бундай деди (афтидан, у бу гапни миясида пишитиб келаётган эди):

— Қурултойда, ишнинг урушсиз бартараф қилинишига ҳаракат қилинг. Урушга ҳеч кимнинг тоби йўқ.

— Албатта,— деб гапини маъқуллади Христоня; бу зағизғоннинг эркин учишига ҳавас билан тикилиб, миясида қайғусиз қуш ҳаёти билан инсон ҳаётини бир-бири билан солиштирди.

Каменскаяга улар январнинг ўнида кечқурун етиб келдилар. Катта станица кўчаларида казаклар тўп-тўп бўлиб, станица майдони томон кетаётган эдилар. Ҳамманинг руҳланиб, ғайратга киргани кўзга ташланаб турарди. Иван Алексеевич билан Христоня Григорий Мелеховнинг квартирасини қидириб топдилар, лекин у уйида йўқ экан. Тўлагина, оқ-сариқ уй бекаси, квартирант қурултойга кетди, деди.

— Ўша, ҳалиги қурултой қаерда бўлади? — деб сўради Христоня.

— Балким округ маҳкамасида, ё бўлмаса почтахонада,— деди уй бекаси бепарвогина Христонянинг юзига эшикни ёниб.

Қурултойнинг ишлари қизгин кетмоқда эди. Сердераза катта хонага вакиллар зўрға сифишган эди. Казаклар зинапояда, коридорларда ва қўши хоналарда уймаланиб турар эдилар.

— Орқамдан юраверинглар,— деди Христоня тирсаги билан йўл очиб.

Унинг очиб берган торгина йўлидан Иван Алексеевич гизиллаб юриб бораарди. Қурултой бўлаётган хона эшигига яқин жойда Христоняни казаклардан бири тўхтатди, лаҳжасига кўра қўйи донликка ўхшарди.

— Секинроқ туртсанг ўласанми, найнов,— деди у.

— Қўйвор деяпман.

— Шу ерда турасан, кўриб турибсан-ку тиқилинч.

— Қўйвор дейман, жинқарча, бир чертсан ўласан-қоласан,— деб Христоня пакана казакни даст кўтариб, четга олиб қўйди-да, олдинга қараб кетди.

— Айиққа ўхшайди-я!

— Полвонлигини айт! Атаманли казак экан.

— Зап зўр экан-да! Катта тўпга қўшса бўларкан!

— Даст кўтариб опқўйди-я!

Фуж бўлиб турган казаклар хохолашиб кулишди ва ҳаммаларидан бир қарич баланд бўлган Христоняга ҳайратомуз ҳурмат билан тикилиб қолишиди.

Григорий орқа девор тагида чўнқайиб, папирос чекиб ўтирас ва 35-нчи полкдан вакил бўлиб келган қандайдир бир казак билан суҳбатлашмоқда эди.

Уни ўша ердан топдилар. Ҳамқишлоқларини кўрган Григорийнинг табассумдан қора мўйлови қимирлаб кетди.

— Хўш, қайси шамол учирди сизларни? Саломатмисан, Иван Алексеевич! Қалайсан, Христон тоға!

Христоня Григорийнинг қўлини ўзининг ялпоқ кафтига олар экан, кулиб туриб:

— Ўзларимиз соғмиз-у, лекин ишларнинг мазаси йўқ,— деди.

— Бизнинг уй ичи қалай?

— Худога шукур, соғ-саломат, салом дейишиди. Отанг бир келиб кўриб кетсин, деди.

— Петро қалай?

— Петро...— Иван Алексеевич ўнғайсизланиб кулди,— Петронинг биздақалар билан борди-келдиси йўқ.

— Хабарим бор. Наталья-чи? Болалар-чи? Уларга кўзларинг тушдими?

— Ҳаммалари соғ, салом дейишиди, лекин отанг бир оз хафа...

Христоня бошини буриб, президиум столи орқасида ўтирганларни кўздан кечирди. Орқадан ҳам унга ҳамма нарса барада кўриниб турарди. Григорий қисқа танаффус вақтидан фойдаланиб, ҳамма нарсани сўраб-суриштириди. Иван Алексеевич хутор тўғрисида ва ундаги янгиликлар ҳақида гапириб, ўзини Христоня билан бу ерга юборган фронтчилар йиғини тўғрисида қисқача маълумот берди. У Каменскаяда нималар бўлаётганини билмоқчи бўлган эди, шу вақт стол орқасида ўтирган аллаким:

— Жим, казаклар! Ҳозир кончи ишчилардан келган вакил сўзлайди. Диққат қилиб эшитишларингни ва тартиб сақлашларингни сўраймиз,— деди.

Үрта бўйли киши орқага тараалган малла сочини тузатиб, гап бошлади. Ғовур-ғувур бирдан тинди.

Бу бегона кишининг оташин ва алангали нутқида Григорий ва бошқалар зўр куч ҳис этдилар. У казакларни Россия ишчилар синфи ва деҳқонларга қарши курашга фиж-фижловчи хоинона Қаледин сиёсати тўғрисида, казаклар билан ишчиларнинг манфаатлари бирлиги тўғрисида, казак аксилинқилобчилари-

га қарши кураш олиб бораётган большевикларнинг қўзлаган мақсадлари тўғрисида дўриллаб гапирди:

— Биз меҳнаткаш казакларга биродарлик қўлини чўзамиз ва оқ гвардиячи бандаларга қарши курашда фронтчи казаклар ёнимизни олишига ишонамиз. Чор ҳукумати олиб борган урушда ишлини ва казаклар биргаликда қон тўқдилар, энди Каледин ўз паноҳига олган буржуа қўйқаларига курашда ҳам биз бирга, ҳамжиҳат бўламиз. Меҳнаткашларни асрлар бўйи асоратга солиб келганларга қарши урушмоқ учун қўлни қўлга бериб бирга борамиз!

— Вой хумпар-э! Роса боплади-ку,— деб Христоня ҳаяжонланиб шивирлади ва Григорийнинг билагини шундай қисдики, у ижирғаниб қўйди.

Иван Алексеевич оғзини очиб унинг гапига қулоқ солди, астойдил тинглаганидан қўзини юмиди очар ва:

— Рост! Манови гапи тўғри!— деб ғўлдиради.

У вакилдан кейин шамолда чайқалган теракдек дароз бир шахтёр чиқиб гапирди. У ўрнидан тура солиб, қоматини бирдан ростлади, қўзларини тикиб турган оломонга қараб, шовқин-сурон тингунча кутиб турди. Бу шахтёр жун арқондек чайир, миқти ва қотмадан келган, юзи даҳанапарангдек кўкиш эди. Юзидаги ҳар бир туки остига кўмир чанги ўтирган, қоронғи ер остида нурсизланган қўзлари кўмирдек йилтираб турар эди. У калта қирқилган соchlарини силкиди, қўлини чўкич сингари силтаб гап бошлиди:

— Фронтда солдатларга ўлим жазосини ким жорий қилди? Корнилов! Қаледин билан бирга бизни бўғаётган ким? Ўшанинг ўзи!— Сўнгра тез-тез гапириб чинқирди: — Казаклар! Оғайнилар! Оғайнилар! Сизлар кимнинг тарафида бўласизлар? Қаледин истайдики, бизлар бир-бишимизнинг қонимизни исчак! Йўқ, улар айтганича бўлмайди. Уларни қора ерга жойлаймиз, кунини қўқдан келтирамиз!

— Оббо занғар-э!— Христонянинг оғиз таноби қочиб чапак чалиб юборди ва ўзини тутиб туролмай хохолаб:

— Рост айтасан, бопла уларни!— деди.

— Оғзингни юм, Христон! Сенга нима бўлди? Худди чиқарворишади-я!— деди Иван Алексеевич чўшиб.

Буказовкалик казак ва иккинчи чақириқ Умум Россия Марказий Йжроия Комитети қошидаги казаклар шўъбасининг биринчи раиси Лагутин пойма-пой галирса ҳам, кишининг кўнглидаги гапни топиб гапирарди. Ундан кейин раислик қилиб турган Подтелков нутқ сўзлади, сўнгра хушмўйлов, соchlари инглиз нусха — калта қилиб қирқилган Шчаденко гапирди.

Христоня хаскашга ўхшаш қўлини чўзиб, Григорийдан:

- Бу ким?— деб сўраб қолди.
 - Шчаденко. Большевиклар командири.
 - Буниси ким?
 - Мандельштам.
 - Қаёқдан келишган?
 - Москвадан.
 - Булар ким?— деб, Христоня Воронеж қурултойидан келган бир тўп вакилларни кўрсатди.
 - Бир оз жим турсанг-чи, Христан.
 - Ёпирим-э, билгим келаверса нима қиласай!..
- Менга айт-чи: ҳув анови, Подтелковнинг ёнида ўтирган ким ўзи?
- Кривошликов, еланлик, Горбатов хуторидан. Унинг орқасидагилар бизнинг хуторлик Кудинов билан Донецков.
 - Яна бир нарса сўрамоқчиман... Ҳув анови... Йўқ! У эмас, энг чеккада ўтирган, кокилли?
 - Елисеев... Қайси станицаликлигини, ўзим ҳам билмайман.
- Христонянинг кўнгли жойига тушиб, чурқ этмай, янги нотиқнинг сўзини аввалгидек диққат билан тинглади ва дўриллаган овози билан ҳаммадан бурун: «тўғ-ре-е!»— деб бақириб, юзлаб кишиларнинг овозини босиб кетди.

Большевик казаклардан бири бўлган Стехиндан кейин 44-нчи полк вакили чиқиб гапирди. У тутила-тутила, битта сўзни кучаниб айтиб тўхтаб қолар, бурнини тортиб қўярди. Аммо казаклар унинг гапига қизиқсиниб қулоқ солишар, аҳён-аҳёнда маъқуллаб,

гапини бўлар эдилар. Афтидан, унинг гаплари казакларга майдек ёқарди.

— Оғайнilar! Бизнинг қурултойимиз бу катта ишни шундай бир ёқлик қилсинки, сих ҳам куймасин, э... кавоб ҳам!— деб чўзиб гапиради у дудуқ кишидек.— Менинг гапим шуки, ишни қонли урушсиз битириш керак, дейман. Шундоғ ҳам уч ярим йил окопларда кўргиликни кўрдик, агар борди-ю, яна бизди урушга рўпара қилишса борми, казаклар тозаям жондан тўйган...

— Тўғ-ре-е!..

— Жуда тўғр-е!..

— Урушга тобимиз йўқ!..

— Большевиклар билан ҳам, қўшин кенгаши билан ҳам келишиб олиш керак!

— Тинчлик билан, пўписа қилмасдан... Хўрозлик қилишга ҳожат йўқ.

Подтелков столни қаттиқ муштлади,— шу заҳоти шовқин-сурон тинди. 44-нчи полк вакили яна кўкрагига тушиб турган соқолини сийпаб:

— Биз ўз қурултойимиздан Новочеркасска делутат юбориб, яхшиликча илтимос қилишимиз керакки, қўнгиллилар ва ҳар хил партизанлар бу ердан чиқиб кетсинлар. Большевикларнинг ҳам бу ерда қиладиган иши йўқ. Биз ишчи халқнинг душманларини ўзимиз бирёқлик қиламиз. Ҳозирча бирорванинг ёрдамига муҳтож эмасмиз, агарда керак бўлса, биз ўшандада ёрдам беринг деб сўраймиз.

— Бу жўяли гап эмас!

— Тўғ-ре-е!

— Шошма, шошма! Нима «тўғри!» Улар ғиппа то. моғингдан бўғиб олгандан кейин ёрдам сўраб кўр-чи. Қочгани жой тополмай қоласан!

— Ўз ҳукуматимиз бўлсин.

— Ҳолва деган билан оғиз чучимайди... Халқ қўйдек гап экан!

44-полк вакилидан кейин Лагутин оташин нутқ сўзлади. Унинг нутқини қийқириб, бўлиб турдилар. Ўн минутлик танаффус қилиш тўғрисида таклиф тушди, лекин ҳамма жим бўлгандан кейин Подтелков, ҳаяжонга келган халойиққа қараб:

— Казак оғайнилар! — деб бақирди. — Биз бу ерда мажлис қилиб ўтирган пайтимизда меҳнаткаш халқ душманлари мудраб ётмайди. Биз сих ҳам куймасиң, кавоб ҳам, деймиз, Каледин бўлса — бундай ўйламайди. Биз унинг шу қурултойда қатнашувчиларнинг барини қамоқقا олиш тўғрисидаги буйруғини қўлга туширдик. Ҳозир шу буйруқни ўқиб эшигидирамиз.

Калединнинг қурултой аъзоларини қамоқقا олиш тўғрисидаги буйруғи ўқиб эшигидирилгач, вакиллар ҳаяжонга келдилар. Оддий станица майдонида кўтариладиган шовқиндан ўн чандон ортиқ шовқин-сурон кўтарилиди.

— Гап билан овора бўлмасдан ишга ўтиш керак.

— Жим!.. Тс-с-с!..

— Тсс деганинг нимаси! Гапир!..

— Лобов! Лобов!.. Уларга бир сўз айт!..

— Бир оз сабр қиласайк!..

— Каледин аҳмоқ эмас!

Григорий индамай қулоқ солиб туар; бошларини чайқатиб, қўлларини пахса қилиб гапирган вакилларга қараб, тоқати тоқ бўларди, ниҳоят, бўйнини чўзиб бақирди.

— Жим бўлсаларинг-чи, аблаҳлар!.. Нима, бу ер бозорми! Подтелковнинг гапига қулоқ солсаларингчи!..

Иван Алексеевич 8-нчи полк вакили билан тортиша кетди.

Христоня полкдошининг ҳужумини даф қиласар экан, ёкираради:

— Бундан чиқди, энди бу ерга қоровул қўйиш керак экан-да! Сен менга... Нима деб валлақляяспсан! Ойимтилла-е! Вой, оғайничалиш-э! Ўзимизни ўзимиз эплашга қўлимиз калталик қиласади, ахир!

Шовқин-суронлар тинди. Энди гина чўккан сукунат ичida Кривошликовнинг қизларникидек майин овози жингиллаб қолди:

— Даф бўлсин Каледин! Яшасин казак Ҳарбий-революцион комитети!

Халойиқ чуввос кўтарди. Уни олқишилаган ҳайқириқлар қулоқ-мияни тешиб ўтгудек бўлди. Кривош-

ликов қўлини кўтарганича қаққайиб қолди. Бармоқлари новда устидаги япроқлар сингари титраб турарди. Босилиб қолган шовқин яна кўтарилиши билан Кривошликов бўри овлаётган овчилар каби овози борича қийқириб:

— Ўз орамиздан казак Ҳарбий-революцион комитети сайлаб қўйишни таклиф этаман! — деди. — Каледин билан кураш олиб бориш ва ташкило...

Худди тоғ ағанаб тушгандай «Гур-р-р!» этган овоз кўтарилиди. Шифтнинг кўчиб қолган шувоқлари ерга тўкила бошлади.

Революцион Комитетга аъзолар сайлай бошладилар. Боя нутқ сўзлаган 44-нчи полк вакили ва бошқалар руҳбарлигидаги бир ҳовуч казак Қўшин ҳукумати билан низони тинчлик йўли билан бартараф қилишни талаб этиб туриб олди, аммо қурултой иштирокчиларининг кўпчилиги уларни қўллаб-қувватламади; казаклар Калединнинг қамоққа олиш тўғрисидаги буйругини эшишиб, тўнларини тескари кийиб олдилар ва Новочеркасскка қарши кескин кураш олиб бориши талаб этдилар.

Григорий сайловнинг охиригача мажлисда туролмади, уни шошилинч суратда полк штабига чақиртирилар. У эшикка чиқиб кетаётганида Христоня билан Иван Алексеевичдан:

— Мажлис тамом бўлди дегунча менинг олдимга келинглар,— деб илтимос қилди.— Кимларнинг аъзо бўлиб сайланганини билгим келади.

Иван Алексеевич кечаси қайтиб келди.

— Подтелков — раис, Кривошликов — котиб,— деб хабар қилди оstonадан туриб.

— Аъзолари-чи?

— Иван Лагутин, Головачаев, Минаев, Кудинов, яна аллакимлар.

— Христан қаёқда қолди?

— У казаклар билан Каменскаядаги ҳукуматдорларни қамоққа олишга кетди. У шундай қизишиб кетганки, устига сув сепсанг, ҳовури осмонга чиқади фалакатнинг.

Христоня тонг отарда қайтди. Этигини инқиллаб ечар экан анчагача бир нималар деб пўнфиlldади.

Григорий чироқни ёндириди, шундагина у Христоня-нинг қорайиб кетган юзида қон изи борлигини ва пешонасининг юқори томонини ўқ тирнаб кетганини кўрди:

— Ким сени ярадор қилди?.. Бое́лаб қўяйми? Ҳозир... шошма, бинт олиб келай,— деб Григорий кара-вотдан сакраб турди-ю, дока билан бинт толиб келтириди.

— Ит ярасидек битиб кетади,— деб дўнғиллади Христоня.— Менга ўша, ҳалиги қўшин бошлиғи на-гандан ўқ узди. Биз худди меҳмондек кўча эшигидан кириб келувдик, у яроққа ёпишса бўладими! Яна бир казакни отиб ярадор қилди. Жонини сууриб ол-моқчи бўлдим, офицернинг жони қанақалигини бил-моқчи эдим-у, лекинига казаклар қўймадилар-да, бўлмаса додини берардим... Кекирдагини узиб олар-дим!

IX

Эртаси куни Калединнинг буйруғи билан 10-нчи Дон казак полки, қурултой аъзоларининг барини қа-моққа олиш ва энг революцион казак қисмларини қу-ролсизлантириш учун Каменскаяяга етиб келди.

Шу пайтда станцияда митинг бўлиб турган эди. Тумонат казак ғовур-ғувур кўтарар, нотиқнинг гапини ҳар ким ўзича тушунарди.

Минбарга чиқсан Подтелков нутқ сўзлар эди:

— Оталар, оға-инилар, мен ҳеч бир партияга ёзилган эмасман, большевик эмасман. Мен фақат бир нарсага: адолат ва баҳт-саодатга интиlaman, барча меҳнаткашларнинг ака-укалардек иноқ бўлиб, ҳар қандай зулм, муштумзўрлар, буржуйлар ва бойлар-нинг йўқ бўлишини, ҳамманинг эркин ва ўз ихтиёрича яшашини истайман. Большевикларнинг тилаги шу ва шу йўлда кураш олиб бораётирлар. Большевиклар — ишчилар, худди биз казаклар сингари меҳнаткашлардир. Фақат большевик ишчилар биздан кўра онглироқдирлар: бизни қоронғи зулмат ичida асрар келганлар, улар бўлса, шаҳарларда туриб, ҳаётни биздан кўра яхшироқ тушуниб олганлар. Бундан чиқ-

ди, гарчи большевиклар партиясига ёзилмаган бўл-
сам ҳам, демак мен большевикман.

Вагонлардан тушган полк митингга келиб қўшил-
ди. Полкнинг ярмини ташкил этган баланд бўйли ва
хушқомат гундоровчилар бошқа полк казаклари би-
лан аралашиб кетдилар. Уларнинг аҳвол-руҳлари-
да кескин бир ўзгариш рўй берди. Полк командири-
нинг Қаледин томонидан берилган фармонни ижро
этиш тўғрисидаги буйруғига казаклар итоат этмади-
лар. Улар орасида ғалаён бошланди, бу — большевик
тарафдорларининг зўр бериб олиб борган ташвиқот-
лари натижаси эди.

Шу пайт Қаменская станицаси фронт яқинлашиб
қолгандай ташвиш ичида эди: шошилинч тузилган
казак қисмлари станцияларни ишғол этиши ва ишғол
қилингандарини мустаҳкамлаш учун юборилмоқда,
Зверево — Лихая станциялари томон эшелонлар тез-
тез жўнаб турмоқда эди. Қисмларда командирлар сос-
тави сайланмоқда. Урушишни истамаган казаклар
яширинча Қаменскаядан қочиб кетмоқда эдилар. Қе-
чикиб қолган қурултой вакиллари хутор ва станица-
лардан ҳам келиб тураг әдилар. Қўчалар жуда ҳам
серқатнов бўлиб қолган эди.

13 январда оқлар тузган Дон ҳукуматининг вакил-
лар ҳайъати музокара олиб бориш учун Қаменскаяга
етиб келди. Бу ҳайъат Қўшин кенгашининг раиси
Агеев, Кенгаш аъзолари Светозаров, Уланов, Қарев,
Бажелов ва қўшин старшинаси Кушнаревдан иборат
эди.

Вокзалда уларни тумонат халқ кутиб олди. Лейб-
гвардия Атаман полкнинг казаклари келган вакил-
ларни почта-телеграф маҳкамаси биносигача қўриқ-
лаб олиб бордилар. Ҳарбий-революцион комитет
аъзолари билан Қаменскаяга келган ҳукумат вакил-
ларининг бирлашган мажлиси кечаси билан давом
этди.

Ҳарбий-революцион комитет аъзоларидан мажлис-
да ўн етти киши қатнашди. Подтелков биринчи сўз
олиб, ҳарбий-революцион комитет Донга хиёнат қил-
ди ва большевиклар тил бириттирди, деб туҳмат
қилган Агеевга қақшатғич зарба берди. Ундан кейин

Кривошликов билан Лагутин чиқиб гапирди. Қўшин старшинаси Кушнаровнинг нутқини коридорда тўпланган казаклар дамба-дам қичқириб бўлиб турдилар. Пулемётчилардан бири революцион казаклар қомидан Дон ҳукумати вакилларини қамоққа олишни талаб этди.

Кенгашдан ҳеч бир натижа чиқмади. Кечаси соат иккита битимга келиш мумкин эмаслиги ҳаммага равшан бўлгач, Қўшин кенгаши аъзоси Каревнинг ҳокимият масаласини узил-кесил ҳал қилиш мақсадида Новочеркасскка ҳарбий-революцион комитет аъзоларидан вакил юбортириш тўғрисидаги таклифи қабул қилинди.

Дон ҳукумат вакиллари кетиши билан Новочеркасскка Подтелков бошлиқ ҳарбий-революцион комитет вакиллари жўнади. Кўпчилик овоз билан Подтелков, Кудинов, Кривошликов, Лагутин, Скачков, Головачев ва Минаевлар вакил қилиб сайланган эдилар. Каменскаяда қамоққа олинган Атаман полки офицерлари гаровга олинди.

X

Вагон деразалари орқасида бўрон бўлаётган эди. Темир йўл изи бўйлаб тизилган, ярми йиқилиб тушган тахта тўсиқларнинг устини шамол ялаб кетган қор уюмлари босиб ётарди. Қор уюмларининг устига қушларнинг майда тўрдек излари тушиб қолган.

Ярим станциялар, сим ёғочлар, ва бошдан оёқ қор билан қопланган кимсасиз дала шимолга томон чўзилиб кетарди.

Янги чарм камзул кийиб олган Подтелков дераза ёнида ўтиради. Елкалари энсиз, ўсмир боладай қотма Кривошликов унинг рўпарасида тирсагини столча устига қўйиб, деразага қараб ўтиради. Унинг болаларнидек маъсум кўзларида ташвиш ва зориқиши аломати бор эди. Лагутин эса сийрак, сариқ соқолини тароқ билан тараарди. Барваста казак Минаев ўтирган жойида типирчилаб буғ трубаларига қўлини тутиб иситарди.

Головачев билан Скачков вагоннинг устки тахтасида ётиб бир нарса тўғрисида секин гаплашишарди.

Вагон ичини палирос тутуни тўлдирган, совуқ эди. Новочеркасскка йўл олган вакилларнинг кўнгиллари безовта эди. Гаплари бир-бирига қовушмас, ўртага юракни эзадиган сукунат чўккан эди. Лихаядан ўтиб кетдилар. Подтелков ҳамманинг кўнглидаги гапни топиб:

— Бир иш чиқазолмаймиз. Келишолмаймиз, — деди.

— Бекорга кетяпмиз, — деб унинг гапини маъқуллади Лагутин.

Яна оғизларига сўк солгандай жимиб қолдилар. Подтелков худди тўр тўқиётгандай ҳадеб қўлини қимирлатарди. Баъзан ярқираб турган чарм камзулига кўз ташлаб, завқи келарди.

Новочеркасск яқинлашиб қолган эди. Минаев ҳаритага, шаҳардан узоқлашиб кетган Дон дарёсига қараб туриб, оҳиста ҳикоя қила бошлади.

— Бир вақтлар казаклар Атаман полкида ўз хизмат муддатларини тугатгандаридан кейин уларни айнажомлари билан уй-уйларига жўнатар эдилар. Вагонларга сандиқларини, ашқол-дашқолларини, отларини юклар эдилар. Эшелон йўлга тушар, Воронеж яқинида Дон дарёси устидаги кўприкка яқин қолганда поезд ҳайдаб келаётган машинист, паровознинг юришини секинлаштиради... Унинг бир гапдан хабари бор эди. Поезд кўприк устига чиқиши билан, шундай бир ҳол рўй берардики, асти қўявер! Қазаклар жинни бўп қолгандай: «Дон! Бизнинг Дон! Тинч Дон! Қадрдон Дон, валенеъматимиз! Ур-р-ра-а-а!» деб бақиришар ва деразадан кўприкнинг панжараси устидан ошириб, дарёга фуражкаларини, эски шинеллари, чалворлари, халталари, кўйлаклари ва бало-бадтарларини итқитар эдилар. Хизматдан қайтаётгандарида буларнинг ҳаммасини Донга бахш этар эдилар. Баъзан, дарёга қарасанг, сув устида ҳаво ранг атаман фуражкалари гўё оққувдек ёинки гулдек сузиб борарди... Қадимдан шундай одат бор эди.

Поезд юришни секинлаштириб, кейин тўхтади.

Казаклар ўринларидан турдилар. Кривошликов шиңель устидан камарини боғлаб, оғзини қийшайтириб кулди:

— Мана, соғ-саломат етиб келдик!

— Негадир нону туз олиб чиқиб кутиб олмадилар! — деб ҳазил қылмоқчи бўлди Скачков.

Эшикни тақиллатмасдан новча, барваста бир ясувул кириб келди. У вакилларга ўқрайиб қараб, жўрттага дағаллик билан:

— Сизни қўриқлаб бориш менга топширилган, — деди. — Большевик жаноблар, марҳамат қилиб, вагонни тезроқ бўшатинглар. Оломон қутуриб кетгундай бўлса... соғ-саломатлигингизга кафил бўлолмайман.

У ҳаммадан кўпроқ Подтелковга, тўғриси унинг офицерча чарм камзулига қараб қолди; сўнgra очиқ бир душманчилик билан:

— Вагондан тушинг, тез бўлинг! — деб команда берди.

Одам билан лиқ тўлган перронда мўйлови шопдек қандайдир бир офицер:

— Ана, малъунлар, казакларга хиёнат қилған абллаҳлар! — деб бақирди.

Подтелковнинг ранги оқариб кетди, ҳанг-манг бўлиб, Кривошликовга кўз қирини ташлади. У Подтелковга эргашиб вагондан тушди ва кулимсираб шиншиди:

— «Биз олқиши садолари ширин мадҳияларда эмас, газаб тўла ҳайқириқларда янграётганини эшиятяпмиз...» Эшиятсанми, Федор?

Подтелков, гарчи кейинги сўзлар қулоғига чалинмаган бўлса-да, жилмайиб қўйди.

Уларни бир тўда офицерлар бошлаб бораради. Область маҳкамаси биносига етгунларича, уларни ўлдириб ўч олиш орзусида бўлган оломон орқаларидан эргашиб борди. Ёлғиз офицерлар ва юнкерлар эмас, яна қандайдир казаклар ва ясанган-тусангандар аёллар, талабалар адабсизлик қилиб, вакилларни таҳқири этар эдилар.

Уларни бошлаб олиб бораётган офицерларнинг бирига Лагутин:

— Сиз бебошликка йўл қўяяпсиз, — деди.

Офицер унга бошдан-оёқ нафрат билан кўз юргутиб деди:

— Соғ-саломат қолганинг учун худога шукур қил. Агар ихтиёр менда бўлсайди мен сендаقا таги пастни... ҳе, ўлакса!

Ёшрөқ бир офицер таъна қилгандай қараб қўйган эди, у тилини тишлаб қолди.

Головачев фурсатдан фойдаланиб, Скачковга шипшиди:

— Бошимизга бало орттиридик-ку.

— Гёй дор тагига олиб кетяптилар...

Область маҳкамасининг зали тўплланган ҳалойиқ-қа торлик қилиб қолган эди. Келган вакиллар, қандайдир фармонбардор бир юзбоши кўрсатган жойга — столнинг бир томонига жойлашдилар, кейин ҳукумат аъзолари залга кирди.

Бир оз буқчайган Қаледин худди бўридек, оёқ панжасини оҳиста ерга босиб, Богаевский ҳамроҳлигида улар ёнидан ўтиб кетди. У ўз стулини суреб қўйиб ўтириди ва хотиржамлик билан пешонасига офицерлик нишони тақилган пистоқи ранг фуражкасини стол устига қўйди, сўнгра сўл қўли билан френчининг ён чўнтағи тугмасини қадади-да, унга қараб бир нима деб гапираётган Богаевский томони энгашди. У имиллаб ҳаракат қилар, ҳар бир ҳаракати ўзига ишончи зўрлиги ва куч-қувватга тўлганлигидан далолат берарди; ҳукумат тепасида турган ва узоқ йиллар давомида бошқалардан кўра қоматлари, бошларини бошқачароқ тутишга, савлат тўкиб юришга ўрганиб қолган кишиларгина одатда ўзларини шундай тутадилар. Подтелков билан унинг ўртасида бир ўхшашлик бор эди. Ҳолбуки Қалединнинг ёнида ўтирган Богаевскийнинг важоҳати унга нисбатан кўримсиз бўлиб, олиб бориладиган музокаралардан ҳаяジョンガ тушгани кўриниб турарди.

Богаевский салқи малла мўйловлари қоплаб олган лабларини қимирлатиб бир нима деб пичирлар, пенсне остидаги қийиқ кўзлари чақнар эди. Ёқасини тўғрилаб, қаттиқ иягини аста силаб қўйнишидан, кўзлари устидаги кенг қошларининг липиллаб

учиб туришидан асабий ҳолатда экани билиниб турарди.

Үртада ўтирган Калединнинг ҳар икки томонида қўшин ҳукумати аъзолари жойлашган эдилар. Уларнинг баъзилари: Қарев, Светозаров, Уланов, Агеев Каменскаяга келган эдилар; сал нарироқда Елатонцев, Мельников, Боссе, Шошников, Поляковлар ўтиришарди.

Митрофан Богаевскийнинг Калединга бир нима деб айтгани Подтелковнинг қулоғига чалинди.

Каледин қўзини қисиб Подтелковга бир қараб қўйди-да:

— Менимча бошласа ҳам бўлади, — деди.

Подтелков кулимсираб вакилларнинг нима мақсад билан келганини ҳаммага эшилдириб айтиб берди. Кривошликов ҳарбий-революцион комитет ҳозирлаб қўйган ультиматумни стол устидан узатди, аммо Каледин оппоқ кафти билан қоғозни итариб, қатъий суратда деди:

— Ҳукуматнинг ҳар бир аъзосини бу ҳужжат билан айри-айри танишириб, вақтни зое кетказишнинг маъниси йўқ. Ўз ультиматумингизни, марҳамат қилиб, овоз чиқариб ўқиб беринг, кейин муҳокама қиласиз.

— Ўқи, — деди Подтелков.

У ўзининг обрўсини қўлдан бермай ўтирас, лекин бошқа вакиллар сингари, юраги дадил эмасди. Кривошликов ўрнидан турди. Унинг қизларникидай жаранглаган, лекин майин овози одамга лиқ тўлган залда янграб эшитилди:

— «1918 йилнинг 10 январидан эътиборан, Дон Қўшини Областидаги аскарий қисмлар устидан ҳукмронлик қилиш ҳуқуқи қўшин атаманидан Дон казак ҳарбий-революцион комитети ихтиёрига ўтади.

Революцион қўшинга қарши ҳаракатда бўлган барча отрядлар чақиритириб олинади ва қуролсизлантирилади, шунингдек, қўнгилли дружиналар, юнкерлар мактаблари ва офицерлар мактаблари қуролсизлантирилади. Донда илгари яшамаган, лекин шу ташкилотда қатнашганларнинг бари Дон области

чегарасидан чиқарилади ва ўз жойларига қайтарилади.

Эслатма. Қурол-аслаҳа, ҳарбий анжом ва кийим-бош. Ҳарбий-революцион комитет комиссарига топширилиши лозим. Новочеркасскдан чиқиб кетиш учун Ҳарбий-революцион комитет комиссари пропуска беради.

Новочеркасск шаҳри Ҳарбий-революцион комитет тайинлаган полклар томонидан ишғол қилиниши зарур:

Қўшин кенгаши аъзолари шу январь ойининг ўн бешидан ўз ҳуқуқларидан маҳрум этилган ҳисобланадилар.

Қўшин ҳукумати томонидан Дон областининг кон ва заводларига қўйилган полиция батамом чақиртириб олинади.

Хунрезликнинг олдини олиш учун қўшин ҳукумати ихтиёрий равишда ўз ваколатидан воз кечгани, областда меҳнаткаш халқ ҳокимиияти барпо этилгунча ҳокимият область казак Ҳарбий-революцион комитетга топширилгани бутун областга эълон қилинади».

Кривошликов ўқиб бўлар-бўлмас Каледин баланд овоз билан:

-- Сизга қайси қисмлар ваколат берган? — деб сўраб қолди.

Подтелков Кривошликов билан кўз уриштириб олғач, гўё ўқиётгандек жавоб қилди:

— Лейб-гвардия Атаман полки, Лейб-гвардия казак полки, олтинчи батарея, Қирқ тўртинчи полк, ўттиз иккинчи батарея, ўн тўртинчи алоҳида сотня... — буларни санар экан, у чап қўлининг бармоқларини бирин-кетин букар эди. Залда шивир-шивир бошланди, кинояномуз кулгилар эшитилди. Шунга қарамай Подтелков қовоқ солиб, сап-сариқ тукли қўлини стол устига қўйди-да, овозини баландлатиб сўзида давом этди: — Йигирма сакизинчи полк, йигирма саккизинчи батарея, ўн иккинчи батарея, ўн иккинчи полк...

— Йигирма тўққизинчи полк, — деб секин қўшиб қўйди Лагутин.

— Йигирма тўққизинчи полк, — деб давом этди

Подтелков дадилланиб ва овозини қаттиқроқ чиқарib: — Ўн учинчи батарея, Каменскаяяниг маҳаллий командаси, Ўнинчи полк, Йигирма еттинчи полк, иккичи пиёда аскарлар батальони, запасдаги Иккичи полк, Саккизинчи полк,—деди.

Аҳамиятсиз саволлар ва қисқача фикр олишувдан кейин, Қаледин кўкрагини столнинг четига тираб, Подтелковга кўзини қаттиқ тикиб сўраб қолди:

— Сизлар Халқ Комиссарлар Советини тан оласизларми?

Подтелков стакандаги сувни ичиб бўлиб, графини тарелка устига қўйди-да, енги билан мўйловини артиб, дудмал жавоб қилди:

— Буни халқ билади.

Соддадил Подтелков ортиқча бир сўз айтиб қўймасин, деб Кривошликов гапга аралаши.

— Казаклар «халқ озодлиги, партияси»¹ вакиларидан иборат бўлган органни тан олмайдилар. Биз — казакмиз, ҳукумат идоралари ҳам казаклар қўлида бўлиши керак.

— Советларнинг бошида Нахамкеслар ва шу кабилар ўтиради, буни қандай тушунса бўлади?

— Уларга Россия ишонч билдириди, бинобарин, биз ҳам ишонамиз!

— Улар билан алоқада бўласизми?

— Ҳа!

Подтелков «ҳм» деб қўйиб унинг гапини маъқуллади:

— Биз шахслар билан эмас, идеялар билан ҳисоблашамиз.

Қўшин ҳукумати аъзоларидан бири соддалик қилиб: «Халқ Комиссарлар Совети халқ манфаатини кўзлайдими?» деб сўраб қолди.

Подтелков унга ўсмоқчилаб ер остидан қараб қўйди, сўнгра кулимсираб, графинга қўл узатди-да, сув қўйиб иштаҳа билан ичди. Унинг юраги куяр, гўё ичиди ёнаётган оловни сув билан сўндиримоқчи бўларди.

1 Кадетларнинг контрреволюцион партияси «халқ озодлиги, партияси» деб аталарди.

Каледин бармоқлари билан столніг чертиб, синч-көвлаб сўради:

— Сиз билан большевиклар ўртасида қандай ўхшашлик бор?

— Биз ўз Дон областимизда казак усули идорасини жорий қилмоқчимиз.

— Балли, аммо сизга маълум бўлса керакки, тўргинчи февралда Қўшин кенгаши чақирилади. Аъзолар қайтадаң сайланади. Сизлар ўзаро назорат ўрнатишга розимисиз?

Ерга қараб ўтирган Подтелков бошини кўтариб, қатъий жавоб берди.

— Йўқ! Агар сиз озчиликни ташкил этсангиз, у ҳолда биз ўз айтганимизни қилдиралими.

— Бу зўравонлик бўлади-ку!

— Ҳа!

Митрофан Богаевский Подтелковдан кўзини олиб, Кривошликовга қаради-да:

— Сизлар Қўшин кенгашини тан оласизларми? — деб сўради.

Подтелков елкасини қисиб:

— Мумкин бўлганича... — деди. — Область Ҳарбий-революцион комитети халқ вакиллари съездини чақиради. Бу съезд барча ҳарбий қисмлар назорати остида иш олиб боради. Бордю съезд бизни қаноатлантирумаса, у ҳолда биз уни тан олмаймиз.

— Ким ҳакамлик қилади? — деб сўради Каледин қошини чимириб.

— Халқ! — деб жавоб қилди Подтелков бошини фоз кўтариб. У ўймакор стулнинг суюнчиғига ясланиб олган эди, чарм камзули шилдираб кетди.

Қисқача танаффусдан кейин Каледин гап бошлади. Зал жимиб қолди, сукунат ичидагатаманинг паст овози минғирлаб, аниқ эшитилди.

— Ҳукумат Область Ҳарбий-революцион комитет талабига мувофиқ ўз ваколатидан воз кечолмайди. Бу ҳукуматни бутун Дон аҳолиси сайлаган, шу сабабдан, айрим қисмлар эмас, балки бутун аҳоли ўз ваколатимиздан воз кечишимизни биздан талаб эта билади. Сизлар областга ўз тартибларини зўрлик билан қабул қилдирмоқчи бўлган большевикларнинг

жинояткорона ташвиқотига учиб, бутун ҳокимиятни ўзларингизга берилишини талаб этаётисизлар. Сиз большевиклар қўлидаги кўр-кўрона қуролсиз. Сизлар казаклар олдида буюк бир масъулиятни бўйнингизга олаётганингизни сезмаган ҳолда, немисларга сотилганларнинг хоҳишини бажо келтиряпсиз. Маслаҳатим шуки, бу фикрдан қайтинг, чунки сиз бутун аҳолининг иродасини акс этдирган ҳукумат билан низолашиб, ўз ўлкангизни катта фалокат жари ёқасига судраяпсиз. Мен ҳоким бўламан деб ўлиб турганим йўқ. Улуғ қўшин кенгаши тўпланиб, ўлканнинг тақдирини ҳал қиласди, аммо кенгаши чақирилгунча мен ўз вазифамда қоламан. Сўнгги марта сизни ўз фикрингиздан қайтишга даъват этаман.

Ундан кейин ҳукуматнинг казак ва казак бўлмаган қисмлардан қелган аъзолари нутқ сўзладилар. Эсер Боссе революцион комитет аъзоларига қараб, узундан-узун, энсани қотирадиган нутқ сўзлади.

Лагутин қичқириб унинг гапини бўлди:

— Бизнинг талабимиз шу: ҳокимиятни ҳарбий-революцион комитетга топширинг! Модомики қўшин ҳукумати масалани тинчлик йўли билан бирёқлик қилмоқчи экан, кутиб ўтиришнинг ҳожати йўқ...

Богаевский кулимсиради:

— Хўш!

— ...Барча халқقا, ҳокимиятнинг революцион комитетга ўтганини эълон қилиш керак. Қўшин кенгаши йигилади, деб, икки ярим ҳафтағача кутиб туриш мумкин эмас! Халқнинг сабр косаси тўлган.

Карев имиллаб мужмал гап қилди. Светозаров эса беҳудага икки томонни яраштиришга уринди.

Подтелков бу гапларга қулоқ солиб ўтириб зардаси қайнаб кетди. У ўз шерикларига ялт этиб қаради: Лагутин докадек оқариб тумтайиб ўтирас, Кривошликов столдан қўзини олмас, Головачев сабрсизлик билан бир гап айтгиси келиб турарди. Кривошликов пайт пойлаб туриб Подтелковга: «Гапир!» деб шипшиди.

Подтелков шуни кутиб тургандай стулни орқароқ-қа суриб қўйди-да, кучаниб ҳаяжонидан дудуқланиб

гапира бошлади, у бамаъни сўзларни топиб гапиришга уринарди:

— Ҳамма гапингиз нотўғри! Қўшин ҳукуматига ишониш мумкин бўлганда эди, мен ўз талабларимни жон деб қайтиб олган бўлардим... Аммо халқ ишонмайди! Биз эмас, сизлар гражданлар урушини бошлайяпсиз! Қаёқдаги қочиқ генералларга казак ерларида нега бошпана беряпсиз? Шу важдан большевиклар бизнинг Тинч Донга қилич яланғочлаб келяптилар. Мен сизга бўйсунмайман. Бунга рози бўлмайман! Менинг мурдам устидан ҳатлаб ўтмоқчи бўлсаларинг, унда бошқа гап. Аммо биз фактлар билан сизни енгамиз! Қўшин ҳукуматининг Донни қутқазиб қолишига кўзим етмайди! Сизга бўйсунишни истамаган қисмларга нисбатан қандай чора қўллаяпсиз? Аҳа, кўрояпсизми? Нега ўз кўнгилли аскарларингизни шахтёрлар устига юборяпсиз? Бу билан ҳаммани аламзада қиляпсиз-ку! Қани, айтинг-чи, гражданлар урушининг олдини олишга қўшин ҳукуматининг қодирлигига ким кафил бўла олади?.. Бунга жавоб беролмайсиз. Халқ ҳам, фронтчи казаклар ҳам биз томонда!

Залда ҳиринглаган қулги овозлари эшитилди; Подтелковнинг гапидан ғазабланган норози товушлар эшитилди. Подтелков бўртиб-қизариб кетган юзини ўша томонга ўгириб, нафрат аралаш ғазаб билан бақирди:

— Ҳозир куляпсиз-у, лекин кейин йиғлайсиз!— Калединга бурилиб, унга тикандек кўзларини тикиди:— Биз ҳокимиятни бизга, яъни меҳнаткаш халқ вакилларига топширишингизни ва барча буржуйлар билан кўнгилли армияни ҳайдаб юборишишингизни талаб этамиз!.. Сизнинг ҳукуматингиз бу ердан чиқиб кетиши керак!

Каледин чарчаган кишидек, бошини эгиб:

— Новочеркасскдан чиқиб кетишини хаёлимга ҳам келтирганим йўқ, ҳеч қаёққа кетмайман ҳам,— деди.

Кичик бир танаффусдан сўнг мажлис Мельниковнинг қизғини нутқи билан бошланди:

— Қизил гвардия отрядлари казакларни маҳв эт-

моқ учун Дон устига юриш бошладилар! Улар ўзларининг номаъқул тартиблари билан Россияни барбод этдилар, энди бизнинг областимизни барбод қилмоқчилар! Бир ҳовуч ўзбошимча ва муттаҳам одамларнинг мамлакатни яхши идора этгани ва халқ фойдасини кўзлагани тарихда кўрилган эмас. Россия эсҳушини йигиштириб олгач, бундай Отрепьевларни¹ улоқтириб ташлайди! Сизлар бирорларни г номаъқулчилигидан ўрнак олиб, большевикларга дарвозани очиб бермоқчи, қўлимиздан ҳокимиятни тортиб олмоқчи бўласиз! Йўқ!

— Ҳокимиятни революцион комитетга топширинг, ўшанда қизил гвардия ҳужумни дарҳол тўхтатади...— деб луқма ташлади Подтелков.

Қалединнинг ижозати билан халқ орасидан, тўрт даражали георгий орденини олган ва оддий казаклар орасидан ясовул ёрдамчиси даражасига кўтарилган Шеин чиқиб нутқ сўзлади. У гўё ҳозир кўрик бўладигандек, гимнастёркасининг тахларини текислаб, томдан тараша тушгандек бирдан гап бошлади:

— Казаклар, шуларга қулоқ солиб ўтирасизми!— деб қичқирди у команда бераётгандек, қўлларини силкитиб.— Большевиклар бизга йўлдош бўлолмайди! Фақат Донга ва казакларга хиёнат қилганларгина ҳокимиятни Советларга топширишга ва казакларни большевиклар билан бирга боришга даъват этади!— Сўнгра у Подтелковни кўрсатиб, қийшанглаб, унга қараб гапирди.— Ҳой Подтелков, Дон аҳли ҳаммани қўйиб сиз каби нодон ва саводсиз бир казак орқасидан эргашармиди? Фақат йўлдан озган, бир ҳовуч дарбадар казакларгина эргашиби мумкин. Лекин уларнинг кўзи очилган, сени дорға осадилар!

Шамолда кунгабоқарларнинг бошлари чайқалгандек, залдаги одамларнинг каллалари ҳам қимиirlаб кетди, унинг сўзларини маъқуллагал овозлар эшитилди. Шеин ўрнига ўтириди. Белбурма калта пўстин кийгани, қўшин старшинаси погони таққан новча бир

¹ Григорий — Чудово монастирининг монахи. Аксарият тарихчиларнинг айтишича у XVII аср бошларида ўзини шаҳзода Димитрий Иванович деб танитган. (Тарж).

офицер ийиб кетиб, Шеиннинг елкасига қоқиб қўйди.
Офицерлар уни ўраб олишди. Асабий бир хобти:

— Барака топинг, Шеин! Раҳмат!— деб чийиллади.

Орқа қаторда ўтирганлардан бири гимназия тала-
баларидек, дўриллаган овоз билан:

— Офарин, ясовул Шеин, яшанг,— деб ясовул
ёрдамчиси Шеиннинг унвонини бир поғона ошириб
дўриллади.

Дон ҳукуматининг маҳмадана, оғзи катта аъзола-
ри Каменск революцион комитети аъзолари бўлгау
казакларни йўлдан оздирмоқчи бўлдилар. Папирос
кўп чекилганидан зал дим, кўм-кўк тутунга тўлган
эди. Ойна орқасидан кўринган офтоб уфқقا бош қўй-
ган. Ойна деразаларига совуқдан арча баргига ўх-
шаш гул тушган эди. Дераза токчаларида ўтирган
кишилар кечки ибодатга чалинаётган қўнғироқ садо-
ларини ва паровозларнинг бўғиқ овозларини эшитар
эдилар.

Лагутиннинг тоқати тоқ бўлиб, қўшин ҳукумати
нотиқларидан бирининг нутқини бўлди-да, Қалединга
қараб:

— Масалани бирёқлик қилинг, гапни тамом қи-
лиш керак,— деди.

Богаевский аста гапириб:

— Ўзингизни босинг, Лагутин!— деб гап билан
унинг оғзига урди.— Мана сув. Бола-чақали, суяғида
фалаж касали бўлган одамга ҳаяжонланиш зарарли.
Умуман, нотиқларнинг сўзини бўлиш ярамайди, бу
ер аллақандай бир депутатлар совети эмас-ку.

Лагутин ҳам унга ўхшатиб жавоб берди, аммо
ҳамманинг қулоғи Калединда эди. У мажлиснинг бо-
шида усталик билан сиёсий найранг ишлатар ва боя-
гидек Подтелковнинг оддий ва тўпори эътиrozларига
дуч келарди.

— Ҳокимиятни бизга топширсангиз, большевиклар
Донга ҳужумни тўхтатадилар, деб айтдингиз. Аммо
сиз шундай деб ўйлайсиз. Борди-ю, большевиклар
Донга келгудек бўлса, нима қилишлари бизга но-
маълум:

— Комитет ишонадики, большевиклар худди мен айтган сўзларни тасдиқлайдилар. Бир тажриба қилиб кўринг, ҳокимиятни бизга топширинг. Дондан «кўнгиллилар»ни чиқариб ташланг — кўрасиз, большевиклар урушни тўхтатадилар.

Бир оздан сўнг Қаледин ўрнидан турди. Унинг жавоби аввалдан ҳозирланиб қўйилган эди. Чернецов Лихая станциясига ҳужум бошлаш учун отрядини бир жойга тўплаш тўғрисида унда буйруқ олган эди. Аммо Қаледин вақтдан ютиш учун мажлисни чўзиш ҳаракатида эди:

— Дон ҳукумати революцион комитетнинг таклифларини музокара этиб, эртага эрталаб соат ўнда ёзма жавоб беради.

XI

Эртасига эрталаб Дон ҳукуматининг революцион комитет вакилларига берган жавоби шу бўлди:

«Дон қўшини ҳукумати Атаман, Лейб-казак 44-инчи, 28-инчи, 29-инчи полклари, 10-инчи, 27-инчи, 23-инчи, 8-инчи, 2-инчи запас полклари қисмлари ҳамда 43-инчи полк, 14-инчи алоҳида сотия, 6-инчи гвардия, 32-инчи, 28-инчи, 12-инчи ва 2-инчи пиёда батальоннинг 13-инчи батареялари ва Каменск-маҳаллий командаси вакил қилиб юборган ҳарбий-революцион казак комитети намояндадарининг талабларини музокара этиб маълум қиласиди, ҳукумат бутун обласатдаги казак аҳолисининг вакилларидан ташкил топгандир. Аҳоли томонидан сайланган ҳукумат янги Қўшин кенгаши чақирилмагунча ўз ваколатидан воз кечадолмайди.

Дон қўшини ҳукумати Кенгашнинг аввали составини тарқатиб, станицалар ва қўшин қисмларидан кенгашга вакиллар сайлашни лозим топди. Бутун казак аҳолиси томонидан тўппаттёри, teng, яширин овоз бериш йўли билан эркин сайланган (бунда ташвиқот эркинлигига йўл қўйилади) кенгашнинг янги состави Новочеркасскда шу бу йил 4 февралда Донга кўчидекелганлар қурултойи билан бир маҳалда тўпланади. Революция томонидан тикланган, бирдан-бир қснуний орган ва облостъ казакларининг вакили бўлган Кенгаш қўшин ҳукуматини ўрнидан тушириб, янги ҳукумат сайлаш ҳуқуқига эгадир. Шу Кенгаш қўшин қисмларини идора этиш ва ҳокимиятни ҳимоя қилиш

учун отрядлар ва Кўнгилли армия керәкми-йўқлиги масаласини муҳокама қилади. Кўнгилли армия тузиш ва унинг фаолияти масаласига келсак, бирлашган ҳукумат илгари Область ҳарбий комитети иштирокида уларни ўз назорати остига олишга қарор қилган.

Қўшин ҳукумати томонидан юборилган полицияни тоғ-кон завод районидан чақириб олиш масаласи хусусида ҳукумат шу нарсани билдирадики, полиция масаласи 4 февралда Кенгаш муҳокамасига қўйилади.

Ҳукумат билдирадики, маҳаллий масалаларни ҳал қилишда фақат маҳаллий халқ иштирок эта олади, шу сабабдан Кенгашинг иродасига амал қилиб, областга ўз тартибларини жорий қилишга интилган большевиклар отрядларининг киришига қарши тиш-тироғимиз билан кураш олиб боришини лозим деб топади. Аҳоли ўз хаётини ўзи истагича қура билади.

Ҳукумат гражданлар урушини истамайди, масалани тинчлик йўли билан бартараф қилиш учун бутун чораларни кўради, шунга кўра Ҳарбий-революцион комитетга, большевик отрядлари олдига вакиллар юборишда ҳамкорлик қилишни таклиф этади.

Ҳукумат шу нарсани қайд этадики, башарти бошқа область отрядлари область чегарасига бостириб кирмасалар,— гражданлар уруши бўлмайди, нимагаки ҳукумат Дон ўлкасини мудофаа этади, уруш бошлиш мақсадида ҳужумга ўтмайди. Россиянинг бошқа қисмларига ўз иродасини зўрлаб қабул қилдирмайди, шу сабабдан бошқаларнинг ҳам Донга ўз тартибларини мажбуран қабул қилдиришларини истамайди.

Ҳукумат станицаларда ва ҳарбий қисмларда тўла сайлов эркинлигини таъмин этади, шунинг учун ҳар бир гражданин ўз ташвиқотини юргиза билади ва Қўшин кенгashi сайловларида ўз нуқтани назарини баён эта олади.

Казакларнинг эҳтиёжларини текшириш учун барча дивизияларда дарҳол қисм вакилларидан иборат комиссиялар белгиланиши лозим.

Қўшин ҳукумати, Ҳарбий-революцион комитетга ўз вакиларини юборган барча қисмларга, Дон ўлкасини ҳимоя этиш юзасидан ўз зиммаларидаги вазифани бажарини тавсия этади.

Қўшин ҳукумати, ўзимизнинг донлик қисмларимиз ҳукуматга қарши чиқади ва шу билан Тинч Донда ўзаро урушларни бошлаб юборади, деган ўйни хаёлига ҳам келтирмайди.

Ҳарбий-революцион комитетни сайлаган қисмлар тарқатиб юборилиши лозим, бунинг эвазига бутун қисмлар ўз вакиллари-

ни областдаги барча қўшин қисмларини бирлаштирган область ҳарбий комитетига юборишлари лозим.

Қўшин ҳукумати, Ҳарбий-революцион комитет томонидан қамоққа олинган кишиларни дарҷол озод қилишни талаб этади, областда мұтадил ҳаёт барпо этиш мақсадида маъмурият ходимларини ўз вазифаларини давом этдиришлари лозим.

Ҳарбий-революцион комитет жуда оз қисмларининг вакили бўлгани учун ҳамма қисмлар номидан, хусусан бутун казаклар номидан бизга талаблар қўйишга ҳақли эмасdir.

Қўшин ҳукумати комитет билан Халқ Комиссарлар Совети ўртасида алоқа ўрнатилишига ва комитетнинг ундан пул билан ёрдам олиб туришига асло йўл қўйиб бўлмайди деб топади, чунки бу — Халқ Комиссарлар Совети таъсиричинг Дон областига ёйилиши демакдир, ваҳоланки казаклэр Кенгаши ва Донга кўчиб ёлган деҳқонлар қурултойи Украина, Сибирь, Кавказ ва барча казак қўшинлари сингари Советлар ҳокимиятини тан олиб бўлмайди деб ҳисоблайди.

Қўшин ҳукумати бошлиғи,
Қўшин атамани муовини **М. БОГАЕВСКИЙ**

Дон қўшинлари старшиналари:
ЕЛАТОНЦЕВ, ПОЛЯКОВ, МЕЛЬНИКОВ

Большевиклар билан музокара олиб бориш учун Дон ҳукумати томонидан Таганрогга юборилаётган вакиллар орасида Қаменск революцион комитети аъзолари — Лагутин ва Скачковлар ҳам бор эди. Революцион комитетнинг бошқа аъзолари билан Подтелковни Новочеркасскда ушлаб қолдилар. Бу вақтда бир неча юз аскардан иборат бўлган Чернецов отряди, оғир тўплар батареяси ва икки енгил тўп билан қуролланиб, шиддатли жанг қилиб Зверево ва Лихая станцияларини ишғол этди ва у ерини сақлаш учун икки тўп билан бир ротани қолдириб, асосий қисмлар билан Қаменскка ҳужум бошлади. Чернецов Северний Донец деган кичик бир станция ёнида революцион казакларнинг қаршилигини синдириб, 17 январда Қаменскни ишғол қилди. Аммо орадан бир неча соат ўтгач, Саблиннинг қизил гвардиячи қисмлари Чернецовнинг Зверево ва Лихая станцияларида қолдирган қисмини суриб чиқаргани тўғрисида хабар олинди.

Чернецов ўша томонга юриш бошлади. У қисқа бир жангдан сўнг З-нчи Москва отрядини енгди, жангла Харьков отрядига шикаст етказди ва саросимага тушган қизил гвардиячиларни аввалги позицияларига чекинтириди.

Лихая томонидаги вазият яна тикланганидан кейин ташаббусни қўлга олган Чернецов Каменскка қайтиб келди. Новочеркасскдан унга 19 январда маддад келди. Эртасига Чернецов Глубокая станциясига ҳужум этишга қарор берди.

Ҳарбий кенгашда юзбоши Линьковнинг таклифи билан узоқдан айланиб ўтиб Глубокаяни ишғол қилишга қарор қилишди. Чернецов темир йўл бўйлаб ҳужум қилишдан ҳадиксиради, чунки бу томонда Каменск революцион комитети қисмлари ва Чертковдан уларга келиб қўшилган қизил гвардиячи отрядлари қаттиқ қаршилик кўрсатади, деб қўрқарди.

Кечаси Глубокаяни ишғол қилиш ҳаракати бошланди. Колоннайи Чернецовнинг ўзи бошлаб олиб борди.

Тонг отарда Глубокая станциясига етиб келдилар. Колонна мунтазам равишда қисмларга бўлинниб цеп тузди. Чернецов сўнгги буйруқларни бериб отдан тушди ва увишган оёқларини ишқалай-ишқалай, рота командирларидан бирига хириллаган овоз билан амр берди:

— Қўнгилчан бўлманг, ясовул. Гапимни уқди-игизми?

Босилиб қотиб қолган қорни гарчиллатиб босиб, қоракўл папогини чаккасига суриб қўйди-да, қўлқопи билан ловиллашган қулогини ишқалади. Газабнок чағир кўзларининг ости уйқусизликдан кўкариб кетган эди. Лаблари совуқдан жийирилган, калта қилиб кесилган мўйловларидаги қиров сеъзининг ҳароратидан эрий бошлаган эди.

Бир оз исингандан кейин у сакраб отига мишиб олди, пистоқи ранг офицерча нимча пўстинининг ғижим жойини текислаб, эгар қошидаги жиловни қўлига олди-да, жайрон Дон аргумоғини оёғи билан ниқтади ва ўзига ишонган дадил овоз билан;

— Бошлаймиз, — деди.

Фронтчи казакларнинг Каменскдаги қурултойидан аввал ясовул ёрдамчиси Изварин полкдан қочган эди. Бир кун илгари у Григорийникуга келди ва қочганига баҳона қилиб:

— Ҳозирги шароитда полкда хизмат этиш қийин,— деди.— Қазаклар икки оқим ўртасида овораи сарсон — большевиклар билан аввалги подшолик тузуми орасида қолиб, ўзларини гоҳ у ёққа, гоҳ бу ёққа урадилар. Қаледин ҳукуматини ҳеч ким қўллаб-қувватлагиси келмайди, қисман бунинг сабаби шуки, у ўз ватанпарварлигини ҳаммага пеш қилгани қилган. Бизга мустаҳкам иродали, келгиндиларнинг попилтириғини пасайтириб қўя биладиган одам керак... Аммо ҳозирги вазиятни назарда тутиб, ҳамма нарсани бой бериб қўймаслик учун Қалединни қўллаб-қувватлаган яхшироқ деб ўйлайман.— Кейин гапдан тўхтаб, папиросини тутатди-да:— Сен... чамамда қизилларнинг эътиқодини қабул этгансан-а?— деб сўраб қолди.

— Ҳа, десам ҳам бўлади,— деб унинг гапини маъқуллади Григорий.

— Бажону дилми ёинки Голубов сингари казаклар орасида ном чиқариш учунми?

— Ном чиқараман деб ўлиб турганим йўқ. Ўзим нажот йўлини изляяпман.

— Сен боши берк кўчага кириб қолгансан, ҳали нажот йўлини топганинг йўқ.

— Қўрамиз-да.

— Григорий, қўрқаманки, бир-бири мизга душман бўлиб қоламиз.

— Ефим Иванич, жанг майдонида дўст ахтармайдилар,— деб кулди Григорий.

Изварин бир оз ўтириб чиқиб кетди, эрталаб эса беному нишон фойиб бўлди.

Қурултой очилган куни Григорийникуга Вешенская станицасига қарашли Лебяжье хуторлик атаманли казак келди. Григорий наганини тозалаб, милтиқ мөйи билан мойлаётган эди. Қазак бир оз ўтириди-да, кетиш олдидан гўё анчайин гапдек:

— Григорь Пантелейевич, мен бугун станцияда ошнангни кўрдим,— деди. Аслида у шу гапни айтиш учун келган эди (у Атаман полканинг собиқ офицери Листницкий Григорийнинг ўйнашини тортиб олганини биларди, тасодифан вокзалда Листницкийни кўриб қолиб, Григорийн огоҳлантиргани кирган эди).

— Қанақа оғиз ам?

— Листницкий да. Танийсан-а?

— Қачон кўрдинг?— деб сўради Григорий жонланиб кетиб.

— Бир соат бўлди.

Григорий ўтириб қолди. Эски дарди-алами юратига ўт солди. У душманига нисбатан аввалгидек кучли адовати борлигини сезмаса ҳам, лекин энди бошланган гражданлар уруши шароитида Листницкийга дуч келиб қолса, у билан қирпичноқ бўлишини яхши биларди. Листницкийнинг номини тасодифан эшитганда, эски яраси тъомоман битиб кетмаганини англади: эҳтиёtsиз бир сўз билан эски яраси янги бўлди. Григорий эски алами учун қойил қилиб қасос ола биларди. Бир нокаснинг касофати билан ҳаёт гули сўлган ва шодлик билан тўлган аввалги ҳаёти ўрнини кўнгилсиз турмуш эгаллаган эди.

Бир оз жим ўтиргандан кейин қони қочиб, ранги оқараётганини сезиб:

— Шу ерга кептими, билдингми? — деб сўради.

— Қайдам. Черкасскка кетаётган чиқар.

— Э...

Атаманли казак қурултой тўғрисида, полкдаги янгиликлар тўғрисида бир оз гаплашиб ўтириди-да, чиқиб кетди. Шундан кейин бир неча кунгача Григорий юрагини тўздек ачиштираётган аламини унудишига ҳарчанд уриниб кўрса-да, унупотмади. У худди маст кишидек юрар, Аксиньяни ҳар қачонгидан ҳам кўпроқ эслар, оғзи қақраб, юраги тошга айланар эди. Григорий Натальяни, болаларини эслади, лекин вақт ўтган сари, хотиротлар эскирган сари, булар унга шодлик бағишиламас эди. Юрагида фақат Аксинья яшар, кўнгли аввалгидек фақат уни тусар эди.

Чернецов бостириб келгандан кейин Қаменскдан тезлик билан чекинишга тўғри келди. Дон революцион

комитетининг тарқоқ отрядлари ва ярим-ёрти' казак сотнялари тартибсиз ҳолда поездларга юкланаар ёки олиб кетиш мумкин бўлмаган оғир нарсаларни ташлаб, пиёда жўнар эдилар. Аслда анча катта кучга эга бўлган бу отрядларни бир жойга тўплаб, уларни тартибга солиш учун мустаҳкам бир одам йўқлиги сезилиб турарди: уюшқоқлик йўқ эди.

Сайланган командирлар орасида қаёқдантир пайдо бўлиб қолган қўшин старшинаси Голубов бошқалардан ажралиб турарди. У энг жанговар 27-нчи казак полкига қўмондонлик қилишни ўз қўлига олди ва қаттиқўллик билан иш олиб борди. Қазаклар унинг полкдаги камчиликларни тугатиб, пухта уюшган состав ташкил қилиш, вазифаларни тақсимлаш, йўлбошлилк қилиш қобилиятига эга эканини кўриб унга сўзсиз итоат этдилар. Гирдиғумдан келган, лўпни юзли, фарқўз офицер Голубов станцияда қиличини ўйнатиб, вагонга имиллаб чиқаётган казакларга ўшқиради:

— Бу нима қилганингиз? Куёз новкарга кетяпсизми?! Вой оналарингни!.. Юкларни орт... Сўзсиз итоат этишни революция номидан буюраман!.. Ни-ма?.. Ким демагог? Шартта отиб ташлайман, абллаҳ! Овозингни ўчир!.. Саботажчилар билан маҳфий контролреволюционерларга шафқат қилмайман!

Шу тариқа казаклар унга итоат этдилар. Худди илгаригидек унинг қилифи кўпларнинг кўнглига ёқди, чунки эски тартиб уларнинг кўнглидан кўтарилимаган эди. Илгариги вақтларда казаклар назарида қаттиқўл командир энг яхши командир ҳисобланарди. Голубов сингарилар тўғрисида гапириб: «Бу одамнинг хонлиги ҳам бор, беклиги ҳам» дер эдилар.

Дон революцион комитетининг чекинган қисмлари Глубокая станциясини тўлдирган эдилар. Бутун ҳарбий кучларнинг қўмондонлиги аслда Голубов қўлига ўтган эди. У икки кун ўтмасдан пароканда қисмларни интизомга солди, Глубокаяни мустаҳкамлаш учун тегишли чораларни кўрди. Унинг талаби билан Григорий Мелехов запасдаги 2-нчи полкнинг икки сотнясидан иборат дивизиони билан, атаманлилар сотняси қўмондонлигини ўз қўлига олди.

... 20 январда қош қорайган пайтда Григорий линия орқасидаги соқчилар пунктига қўйилган атаманлилар постини текшириш учун квартиридан чиқди-ю, дарвоза олдидা Полтелков билан тўқнашиб қолди. Подтелков уни таниб:

— Мелеховмисан? — деб сўради.

— Ҳа.

— Йўл бўлсин!

— Соқчилар постини текшириб чиқмоқчиман, Черкасскдан келганингга кўп бўлдими? Ҳўш, ишлар қалай?

Подтелков қовоғини солди.

— Халқнинг ашаддий душманлари билан сулҳ тузиб бўлмайди. Қылғилиқларини кўрдингми? Музокара вақтида... Чернецовни занжирдан ечиб юборибдилар: Қаледин нақадар ифлос одам экан-а?! Ҳўп соғ бўл, фурсатим йўқ, штабга шошиляпман.

У шошиб Григорий билан хайрлашди-да, каттакатта қадам ташлаб марказга йўл олди.

У революцион комитет раиси қилиб сайланмасдан буруноқ Григорийга ва бошқа таниш казакларга нисбатан муомаласи ўзгариб, ўзини катта оладиган бўлған, димоги шишган эди. Юқори марабага эришиб, бу оддий казакнинг боши гангид қолди.

Григорий шинелининг ёқасини кўтариб, тез-тез қадам ташлаб кетди. Кечаси аёз бўладиганга ўхшарди. Қозоқ чўлларидан шамол эсиб турар, ҳаво очилиб келаётган эди. Совуқ чирсиллар, қорғичирларди. Қомати букилган ой осмонга аста кўтарилимоқда эди. Уйларнинг орқа томонидаги чўлга кўкиш шом қоронғилиги чўкмоқда. Ҳар нарса ўз шаклини, рангини, масофасини йўқотган говгум маҳал эди; бу пайтда кун ёруғи тун қоронғиси билан олишиб, бирбири билан қўшилиб кетади-ю, ҳар нарса фусункор, тебраниб тургандек кўринади; ҳатто бу пайтда ҳиллар ҳам ўткирлигини йўқотиб, хидалашиб қолади.

Григорий, постдаги соқчиларни текшириб бўлиб, квартирига қайтди. Темир йўл хизматчиси бўлған, яйёр, чўтири юзли уй эгаси самовар қўйиб, стол ёнига келиб ўтирди.

— Ҳужумга ўтасизми?
— Маълум эмас.
— Ёнки уларнинг келишини кутасизми?
— Кўрамиз-да.
— Жуда тўғри айтасиз. Гумонимча, ҳужум қилиш учун сизда куч йўқ, шундай бўлгач, албатта кутиш лозим. Мудофаада бўлиш қулайроқ. Камина, герман урушида сапёр бўлиб хизмат қилган, тактика нима-ю, стратегия нима, сувдек биламан, ёд қилиб олганман... Нафсилаэр, кучингиз озлик қиласди.

Унинг гапидан юраги сиқилган Григорий дудмал қилиб:

— Хўп, бўлди,— деди.

Аммо уй эгаси сурбетлик қилиб ҳадеб гап сўриштирас, стол атрофида парвона бўлиб, мовут жи-леткаси остидаги ичига кириб қапишиб кетган қорнини қаширди:

— Тўпларингиз кўпdir-a? Тўп-замбараклар?

— Хизмат қилишга қилибсан-у, лекин хизмат қоидасини билмас экансан!— деди зардаси қайнаб Григорий ва шундай ўқрайиб қарадики, уй эгаси ўзини четга олди.— Хизмат қилибсан-у, лекин уқиб олмабсан!.. Бизнинг аскарларимиз ва планларимизни сўраб-сурштиришга нима ҳақинг бор? Сени сўроққа олиб борсам...

— Жаноб... офицер! Но... Нодон!..— ранги бўза-риб кетган уй эгасининг тили калимага келмай қолди, ярим очиқ оғзидағи қоп-қора кемтик тишлари кўриниб кетди.— Но... Нодонлик қилибман! Кечир-синлар!..

Чой ичиб ўтиаркан, тасодифан уй эгасига Григорийнинг кўзи тушиб қолди, шунда унинг пирпираған кўзларидан ўт чақнаб кетгандек бўлди, лекин уй эгаси киприкларини кўтариб қараганда кўзларининг ифодаси ўзгариб, мулоиймлашган, ҳатто ундан меҳр ёғилиб турарди.

Уй эгасининг оиласи — хотини билан икки қизи шивирлашиб гаплашиб ўтиришарди. Григорий иккичи чашкадаги чойини чала қолдириб, ўз бўлмасига кириб кетди.

Бир оздан кейин Григорий билан бир квартирада

турадиган запасдаги 2-нчи полк тўртинчи сотнясидан тўрт нафар казак қаердандир келишди. Улар шанғиллашиб гаплашиб чой ичишар, кулишар эди. Григорийнинг кўзи илинган маҳалда уларнинг баъзи гаплари қулоғига чалинди. Улардан бири (Григорий овозидан унинг Луганская станицалик казак взвод командири Бахмачев эканини билди) ҳикоя қиласар, қелгандари аҳён-аҳёнда луқма ташлар эдилар.

— Бу ҳодиса кўз ўнгимда юз берди. Горловск районидаги ўн биринчи кондан учта шахтёр келиб: гап шундай, биз бир уюшма туздик, қурол-яроқ жуда зарил бўпқолди — қўлингиздан келганича қарашиборинг, дедилар. Революцион комитет раиси... Мен ўз қулоғим билан эшилдим! — у кимнингдир луқмасига жавоб қайтариб овозини баландлатиб ҳикоя қила кетди,— шундай деди: «Ўртоқ Саблинга мурожаат қилинг, бизда ҳеч бало йўқ». Нега энди ҳеч нарса йўқ бўлсин? Мен ортиқча милтиқлар борлигини биламан. Гап бошқа ёқда... Мужикларнинг шижоатини кўриб, рашклари келяпти.

— Тўғри-да! — деб гапирди бошқа бир казак.— Уларга яроқ берсанг, ё урушадилар, ё йўқ, лекинига ер масаласи кўтарилса дарров қўлларини чўзадилар.

— Биз у қаланғи-қасанғиларни биламиз! — деб дўриллади учинчиси.

Бахмачев ўйланқираб чой қошиғи билан стакани чалиб қўйди:

— Йўқ, бундай қилиш ярамайди,— деди у дона-дона қилиб, қошиғини ўз сўз оҳангига монанд ҷалиб.— Большевиклар бутун халқ ғамини еяпти, биз эсак, яхши большевик эмасмиз. Қалединни супуриб ташласак, кейин заптимизга оламиз...

— Шундай, оғайничалиш! — деди раста бўлган ўғил болалардек дўриллаб бир казак гапини маъқуллатмоқчи бўлиб.— Тушунсанг-чи ахир, бизнинг берадиган еримиз йўқ! Чекимизга бир ярим ботмондан тузукроқ ер тушади, қолганлари қумлоқ, жарлик, ўнқир-чўнқир ерлар. Нимани берамиз?

— Сенинг ҳеч нарсангни олмайдилар, ер-суви кўп бойлар бор.

- Қўшин ерлари-чи?
- Саломат бўлинг! Ўзингникини бер-у, бошқаларга муте бўласанми?.. Ҳо, оғзим бор деб гапира-верасиз-а!
- Қўшин ерлари ўз кунимизга ярайди.
- Бу тўғрида гапириб ўтиришга ҳожат йўқ.
- Очкўзликни қара-я!
- Очкўзлик деганинг нимаси!
- Балким ўзимизнинг юқори донлик казакларни кўчириб келишга тўғри келар. Биз уларнинг ерлари қанақалигини биламиз — сап-сариқ қумлоқ ерлар.
- Шундоғ, шундоғ!
- Нонимизни түя қилдирмаймиз.
- Яримта ароқ бўлмаса калаванинг учини тополмайдиганга ўхшаймиз.
- Ҳой йигитлар! Бугун вино складини тала-тала қилдилар. Биттаси спиртга чўкиб бўғилиб ўлибди.
- Шу топда бўлса-ю, отардим-а. Пўлатга сув бергандек бўларди-да.

Григорий уйқу ичидаги казакларнинг полга ўрин солганларини, эснашиб қашинганларини, ҳамон ер тўғрисида, ерни қайтадан тақсимлаш тўғрисидағи гапларини эшитиб ётди.

Тонг отарда дераза тагида пақ этиб милтиқ овози эшитилди. Казаклар ирғиб ўринларидан турдилар. Григорий гимнастёркасини киймоқчи бўлиб енгини тополмас эди. Шоша-пиша этигини кийди-ю, шинелини қўлига олди. Дераза орқасида осмондан дўлдек ўқ ёғарди. Шалдираб бир арава ўтиб кетди. Кимdir эшик ёнида қўрқиб кетиб:

— Милтиққа!.. Милтиққа ёпиш!.. — деб бақиради.

Чернецовчилар соқчиликка қўйилган казакларни орқага сурисиб, Глубокаяга кирган эдилар. Тонг фириширасида отлиқлар чопар, этикларини дўқиллатиб пиёдалар қочарди. Чорраҳага пулемёт ўрнатдилар. Уттиз чоғлик казак кўндаланг саф тортди. Яна бир ғуруҳ казак тор кўчани кесиб ўтди. Ўқдонга ўқ жойлаётган милтиқларнинг қулфлари шақир-шуқур қиласарди. Нариги кварталдан баланд овоз билан аллаким команда берди:

— Учинчи сотня, илдамроқ! Ким у сафни бузаётгән?.. Ҳозирлан! Пулемётчилар — ўнг қанотгә! Тайёрмисиз? Сот-отня...

Бир взвод тўп шалдираб ўта бошлади. Отлар лўк киллаб чопар, суворийлар қамчи ўйнатар эди. Ўқ яшикларининг қисирлаши, гилдиракларнинг шалдираши, шотиларнинг ғичиллаши шаҳар четида отилаётган ўқ овозларига қўшилиб кетган эди. Қаердадир, яқин орада пулемётлар қасира-қусурга олиб ота бошлади. Қаёққадир чопиб кетаётган дала куҳниси муюлишга қоқилган стунга урилиб ағдарилиб тушди.

Ўша томондан ўлгудек қўрқиб кетган бир кишининг:

— Кўрмисан, шайтон! Кўрмаяпсанми?! Кўзинг ўйилиб тушганми?— деб бўкиргани эштилди.

Григорий зўр-базўр сотнясини бир ерга тўплали, отларни елдириб станицанинг бир чеккасига олиб чиқди. У ерда казаклар ғуж бўлиб орқага чекинаётган эдилар.

— Қаёққа?..— деди Григорий олдиндаги казакнинг милтиғига ёпишиб.

— Қўй-вор!..— деб юлқинди казак.— Қўйвор, падар лаънат!.. Нега менга ёпишасан? Чекиняптилар, кўрмаяпсанми?..

— Душман зўр келди!..

— Орқа-ўнгига қарамай келяпти...

— Қаёққа қочамиз?.. Қайси томонга — Миллерс-кайагами?— деб ҳаллослаб гапирган кишиларнинг товуши эштиларди.

Григорий станицанинг энг четидаги узун бир омборхона ёнида ўз сотнясини сафга тизишга ҳаракат қилди, лекин янги бир гурӯҳ қочоқлар сафни ёриб ўтиб кетди. Григорийнинг сотнясидаги казаклар қочиб келаётганлар билан аралашиб кетди-ю, кўча бўйлаб орқага қараб қоча бошлади.

— Тўхта!.. Қочма!.. Отаман!.. — деб бақирав эди Григорий ғазабидан титраб.

Аммо унга қулоқ соладиган одам йўқ эди. Пулемётдан отилган ўқ кўчага ёғила бошлади, казаклар бир зум тўп-тўп бўлиб ерга ётиб олдилар, де-

ворларнинг тагига судралиб келиб, тор кўчаларга ўзларини урдилар.

— Энди улар сўзингга кирмайди, Григорий,— деди унинг ёнидан чопиб ўтаётган взвод командири Григорийнинг кўзига тикилиб.

Григорий тишларини фирчиллатиб, милтигини ўйнатиб, унинг орқасидан кетди.

Отряд саросимага тушиб, Глубокаядан чиқиб, тартибсиз ҳолда қоча бошлади. Отряднинг қарийб барча анжомларини ташлаб кетдилар. Фақат кун ёришгандан кейингина сотняларни бир жойга тўплаб, қарши ҳужумга ўтишга муваффақ бўлдилар.

Бўртиб қизариб кетган, терлаб-пишган Голубов, нимча пўстинининг олдини очиб, ўз командасидағи 27-инчи полкнинг цеплари ёнида югуриб юриб, кескин овоз билан қичқираарди.

— Чаққонроқ қимиirla! Ётма!.. Марш, марш!

14-инчи батарея еридан қўзғалиб, позиция ишғол қилди, тўплар ўқ солинган аравалардан чиқарилди; батареянинг старший офицери ўқ яшиги устида туриб, дурбиндан қарай бошлади.

Жанг соат бешдан ошганда бошланди. Казаклар ҳамда Петровнинг Воронеж отрядидаги қизил гвардиячиларнинг аралашиб кетган сафлари ғуж бўлиб ёнирилиб борар, оппоқ қор устида одамлар қора-қора нуқталарга ўхшаб кўринарди.

Кун чиқиши томондан муздек шамол эсарди. Шамол булутларни ҳайдаб юборгач, осмон этаги қонга бўялгандек, қип-қизариб кўринди.

Григорий атаман сотнясининг ярмини 14-инчи батареяни қўриқлаш учун қўйиб, қолгани билан ҳужумга ўтди.

Мўлжал учин отилган биринчи тўп ўқи Чернецов отрядининг сафларидан анча берига тушди. Ўқ ёрилди-ю, тўқ қизил олов ҳавога кўтарилди. Иккинчи ўқ ҳам гумбурлаб ёрилди. Тўплар галма-гал ўқ узиб мўлжални аниқлаб олди.

Тўп ўқлари ҳавода визиллар, узоқлашар эди.

Бир лаҳза ўртага сукунат чўқди, бу орада милтиқлардан бараварига отилган ўқ товушлари эшитилди, кейин узоқдан гумбуrlаган садо келди. Мўл-

жалдан нари тушаётган ўқлар сафларга яқин ерда ёрила бошлади, Григорий шамолдан кўзини қисиб, хурсандлик билан: «Топдилар» деб қўйди.

44-нчи полк сотнялари ўнг қанотда борар эди. Голубовнинг полки ўртада, Григорий ундан сўлроқда эди. Сўл қанотдаги қизил гвардия отрядлари улар орқасидан бораради. Григорий қўл остидаги сотняларга уч пулемёт берилган эди. Пулемётчилар командири бўлган ўрта бўйли, бадқовоқ, қўлларини тук босган қизил гвардиячи маҳорат билан ўтишиб, душманинг ҳужумини қайтарарди. У атаманлилар цепи билан бирга ҳаракат қилаётган пулемётлардан нари кетмас эди. Унинг ёнида шинель кийган тўлагина қизил гвардиячи аёл бор эди. Григорий саф олдидан ўтаркан, энсаси қотиб: «Хотинбоз! Позицияда ҳам хотиндан бир қарич нари кетмайди-я. Бўндақалар билан бир иш чиқариб бўлармиди!.. Бола-чақаси билан пар тўшагини ҳам олиб келса бўларди!..» деб ўйлади. Пулемёт командасининг бошлиғи Григорийнинг олдига келиб, наганининг бўйнидаги қайшишини тузатди.

— Шу отрядга сиз командирлик қиласизми?

— Ха, мен.

— Мен атаманли ярим сотня участкасида душман йўлини ўққа тутаман. Кўряпсиз, бизнинг йўлимизни тўсиб қўйишган.

— Майли, шундай қилинг,— деб Григорий унинг гапига кўнди ва овози тинган пулемёт томондан бирорнинг қичқирганини эшишиб ўша томон бурилди.

Серсоқол, барваста пулемётчи:

— Бунчук!.. Пулемёт эриб кетади-ку!.. Шунақајам бўладими?— деб бақиради.

Шинель кийган аёл унинг ёнида тиз чўкиб туради. Аёлнинг тивит рўмол остидаги қора кўзлари Григорийга Аксиньяни эслатди, бир лаҳза у нафасини қисиб, кўзларини юммай, аёлга ҳасрат билан боқди.

Чоштоҳда Голубовдан чопар келиб, Григорийга хат топширди. Дала дафтаридан нотекис йиртиб олинган бир варақ қофозга катта-катта ҳарфлар билан шулар ёзилган эди:

«Дон революцион комитети номидан, ихтиёриңгизда бўлган сотняларни позициядан олиб, шитоб билан душманнинг ўнг қанотига ўтиб олишни, шу ердан кўриниб турган участкага, ел тегирмоннинг сўл томонидаги жарлик билан боришни сизга буюраман... Ҳаракатингизни душман сезмасин (бир неча ўқиб бўлмайдиган сўзлар)... Биз қатъий ҳужумга ўтганда сиз ён биқиндан ҳамла қиласиз.

Голубов»

Григорий икки сотняни ажратиб, отлантириди, душман қай томонга кетаётганини пайқаб қолмаслиги учун орқага чекинди.

Душман устига йигирма чақиримча наридан айланиб бордилар. Отлар қалин қорга ботиб-ботиб кетар эди. Улар ўтиб бораётган жарликни қор босган эди. Баъзи жойларда қор отларнинг қорнидан келарди. Григорий тўпларнинг гумбурлашига қулоқ солар, безовталаниб дамба-дам соатига қарап эди. Бу соатни у Руминияда ўзи ўлдирган бир офицернинг қўлидан ечиб олган эди. Кетаётган ерини компасга қараб белгилаб бораётганига қарамай, анча сўл томонга бурилиб кетди. Қиямаликдан яланглийка чиқиб олдилар. Терлаб кетган отлардан буғ кўтаришлар, папоқлар ҳўл бўлиб кетган эди. Григорий эгардан тушишга команда бериб, биринчи бўлиб тепаликка чиқди. Отлар жарликда от етакловчилар қўлида қолди. Григорийнинг кетидан казаклар ҳам қияликтан эмаклаб чиқа бошладилар. У қайрилиб қаради, орқасида юздан ортиқ казакнинг қор босган ён бағирдан мўр-малаҳдек ўрмалаб чиқаётганини кўриб, ўзини дадил ва бардам ҳис этди. Жангда, ҳар кимда бўлгани сингари, уни ҳам ҳамжиҳатлик, бирдамлик ҳисси қамраб олди. Григорий бир қарашдаёқ вазиятни тушуниб олди, йўлнинг оғирлигини ҳисобга олмасдан, лоақал ярим соатга кечикканини пайқади.

Голубов маҳорат-ла ҳаракат этиб, Чернецов отрядининг чекинадиган йўлларини тўсиб қўйган, иккӣ томонга посбон қўйиб, қуршовга тушай деб қолган душманга ҳамла қилмоқда эди. Бараварига отилган тўплар гумбурлар, милтиқ ўқлари тунука

тот устига тушаётган дўл сингари шарақларди. Чернечов отрядининг бузилган сафлари устига шрапнел тўкилар, тўп ўқлари устма-уст келиб тушарди.

— Саф-га ти-зил!..

Григорий ўз сотнялари билан душманнинг ён томонидан ҳамла қилди. Отиш машқига кетаётгандек, эмакламасдан рўй-рост бостириб боравердилар, аммо Чернечов отрядидаги бир эпчил пулемётчи сафни шундай усталик билан ўққа тутдики, казаклар уч кишини йўқотиб, апил-тапил ерга ётиб олдилар.

Кундуз соат учда Григорий ўқ еди. Усти никель билан қопланган ўқнинг чўғдек парчаси тиззасидан юқорироққа — сонига кириб жазиллатди. Григорий қизиб кетган ўқ зарбидан, қон оқаётганидан кўнгли беҳузур бўлиб, тишларини фичирлатди. Сафдан чиқдида жон ачифида ўрнидан сакраб туриб, ўқ зарбидан гангиган бошини силкитиб қўйди. Оёғининг оғриғи борган сари кучаярди, чунки ўқ тешиб чиқмаган эди. Ўқ шинели, чалвори ва терини тешиб ўтиб, юмшоқ эт ичидан совий бошлади. Қаттиқ санчиқ харатат қилишга қўймас эди. Григорий ётган жойида 12-полкнинг Трансильвания тоғларида ҳужумга ўтган пайтини эслади, ўшанда қўлидан яралangan эди. Уша ҳужум манзараси кўз ўнгига яққол гавдаланди: кокилдор, Мишка Кошевойнинг ғазабдан бужмайиб кетган чеҳраси, яралangan юзбошини қўлтиқлаб пастга олиб тушиб кетаётган Емельян Грошев эсига тушди.

Сотня командирлигини Григорийнинг ёрдамчиси офицер Любишкин Павел қабул қилиб олди. Унинг буйруғи билан икки казак Григорийни от етакловчилар олдига обориб қўйди. Казаклар Григорийни отга мингизишар экан, ачинишиб:

— Ярани боғлаб олсангиз бўларди, — деб маслаҳат беришли.

— Бинт борми?

Эгар устига чиқиб олган Григорий ўйлаб туриб отдан тушди, чалворини пастга туширди, терлаб кетган яғрини, қорни ва оёқлари музлай бошлаганини сезиб афтини бужмайтирди, қаламтарош тилган-

дек очилиб қолган қонли ярасини боғлади-да, ординареци ҳамроҳлигида ўзлари ҳужум бошлаган ерга ўша йўл билан кетди. Григорий қор устига тушган туёқ изларини, бир неча соат илгари ўз сотниясини олиб ўтган жарликнинг ўзига таниш манзарасини томоша қилиб кетди. Уни мудроқ босар, тепалик устида юз берадиган ҳодисалар унга жуда узоқда бўлаётган кераксиз нарсадек туюларди.

Тепалик томондан пала-партиш отилган ўқ садолари, ўз аскарларини қутқариш учун ўқ отган душман оғир батареясининг гумбурлаши, пулемётларнинг ўхтин-ўхтин тариллаши эшитиларди.

Григорий уч чақирим жойгача жар ичи билан кетди. Отлар қорга ботиб-ботиб кетар эди.

Григорий қор уюми устига отини ҳайдаб:

— Текис йўлдан бошлисанг-чи, — деди.

Ўликлар, далага қўнгъан гўнгъаргалар каби ондасонда қорайиб кўринарди. Йироқда эгасиз бир от чопиб юрар, кичкина бўлиб кўринарди.

Григорий дабдаласи чиққан ва сийраклашган Чернецов отрядининг асосий қисми жангдан қочиб, Глубокая томон чекинаётганини кўрди. У жийрои отини чоптириб кетди. Узоқда тўп-тўп казаклар кўринар эди. Григорий улардан бирининг олдига от чоптириб бориб, Голубовни кўрди. Голубов эгар устида кўкрагини кериб ўтиради. Этакларига шерозий қоракўл тери тутилган нимча пўстинининг олди очиқ, папоги чаккасига дол қўйилган, пешонаси терлаган эди. У вахмистрларнидек диккайган узун мўйловларини бураб, хириллаб деди:

— Мелехов, оғарин! Ия, яраландингми? Чатоқ бўлти-ку! Суягинг бутунми? — Мелеховнинг жавобини кутмасдан; — мажақлаб ташладик! Дабдала қилдик!.. — деди. — Офицерлар отрядини шундай тўзфитиб юбордикки, энди уларни йиғиб ололмайдилар! Думларини хода қилиб қочишиди!

Григорий папирос сўради. Ҳар томондан казаклар ва қизил гвардиячилар келиб тўплана бошладилар. Энг узоқда қорайиб кўринган бир тўп аскарнинг олдида бир казак от чоптириб келарди.

— Голубов, қирқ одамни асир олдик! — деб қич-қирди у узоқдан туриб. — Қирқ офицер билан Чернечовнинг ўзини қўлга туширдик.

— Ростданми? — деб Голубов юраги шиф этиб кетди, эгар устида қимирлаб қўйди ва оёфи оқ, новча отини аямай қамчилаб чоптириб кетди.

Григорий бир оз кутиб турди да, кейин у ҳам отини елдириб кетди.

Асир қилиб олинган офицерлар тўдасини 44-нчи полк ва 27-нчи полк сотняларидан бирининг ўттизатча казаги қуршаб олиб келарди. Энг олдинда Чернечов келарди. У таъқибдан қўрқиб қочганда нимча пўстинини ечиб ташлаган, енгилгина чарм курткада қолган эди. Чап елкасидаги погони узилиб тушган, чап кўзининг ён томони калтак зарбидан қон талашиб қолган эди. У оёқларини тўғри ташлаб, тез-тез юриб келарди. Пешонасига дол қўйилган папоғи уни беғам, тетик одамга ўхшатиб кўрсатарди. Қип-қизил юзида қўрқув асари йўқ: афтидан, бир неча кундан бери юзига устара тегмаган бўлса керак, чаккаларини ва иягини малла ранг соқол босган эди. Чернечов олдига чопиб келган казакларга ялт этиб қаҳрли назар ташлади; нафрат ва ғазабидан қошлиарининг ораси буришиб кетганди. У кета туриб гугурт чақиб, папиросини тутатди да, қимтилган қип-қизил лабларининг бурчига қистириб чека бошлади.

Офицерларнинг кўпчилиги ёшлар бўлиб, бир нечасининггина сочи оқарган эди. Оёғидан яралангандан бир офицер орқароқда қолган эди, паканагина хумкалла, чўтирир казак қўндоқ билан орқасидан туртди. Чернечовнинг ёнида новча, дадил бир ясовул келарди. Икки офицер (бири хорунжий, иккинчиси юзбонши) қўлтиқлашиб кулимсираб келишар; уларнинг орқасидан бош яланг, соchlари қўнғироқ, ғўлабир юнкер келарди. Бири елкасига погон чатилган солдатча шинель ташлаб олган эди. Бошқа бири шапкасиз, қип-қизил офицерча бошлиғини қизларнидек чиройли қўзлари устига тушириб олган эди. Шамол елкасига ташланган бошлиғининг учини ҳилпиратарди.

Голубов энг орқада от устида борар эди. У орқароқда қолиб, казакларга:

— Хой, менга қаранг!.. Асиirlарнинг соғ-саломатлиги учун сиз ҳарбий-революцион давр талабига мувофиқ жавобгарсиз! Уларни штабга эсон-омон обориб топширинг! — деб қичқирди.

У отлиқ казаклардан бирини олдига чақириб олиб, эгар устида ўтирган жойида бир хат ёзди-да, уни ўраб казакка узатди:

— От чоптириб бориб, буни Подтелковга топшири.

У Григорийга юзланиб:

— Сен ўша ёқقا борасанми, Мелехов? — деб сўради.

Голубов ҳа, деган жавоб олгандан кейин Григорийнинг ёнига келиб деди:

— Подтелковга айт, Чернецовни мен кафилликка оламан! Англадингми?.. Шундай деб айт. Ҳайда.

Григорий асиirlар тўдасидан ўзиг кетиб, аллақайси бир хутор яқинида жойлашган штабга от чоптириб келди. Подтелков фидиракларидағи лойлари яхлаб қотиб қолган, кўк гилоф билан ёпуғлиқ пулемёт ўрнатилган кенг тавричан араваси ёнида у ёқ-бу ёқقا юриб турарди. Штаб ходимлари, чопарлар, бир неча офицер ва казак ординарецлар ҳам шу ерда ўралишиб юришарди. Минаев ҳам Подтелков сингари, ҳозиргина позициядан келган эди. У араванинг пештахасида ўтириб, яхлаб қолган қоқ нонни тишлаб, курсиллатиб чайнар эди.

— Подтелков! — деди Григорий отини бир чекка-га суриб. — Ҳозир асиirlарни ҳайдаб олиб келишади. Сен Голубовнинг хатини олиб ўқидингми?

Подтелков бор кучи билан қамчини силкитди-да, қонга тўлган қўзларини ердан олмай:

— Голубов бекор айтиби!.. — деди. — Кўнгиллари тагин нимани тусар экан? Мен ҳаммани қўйиб Чернецовдек босқинчи, аксилинқилобчини унга кафилликка берар эканманми? Бермайман!.. Ҳаммасини шартта отиб ташлаш керак — вассалом!

— Голубов уни кафилликка оламан деб айтди.

— Бермайман!.. Бермайман дедим бермайман. Гап битта. Уни революцион судга бериб, дарҳол жа-

золаш зарур.. Тоинки бошқаларга ҳам ибрат бўлсин!.. — Кейин у яқинлашиб келаётган асиirlар тўдасига тикилиб туриб, хотиржамлик билан гапира бошлади.. — Сен унинг қанча қон тўkkанини биласанми? Денгиз қадар!.. Қанчадан қанча шахтёрларнинг ёстигини қутирган, биласанми?.. — у яна қизишиб кетиб, кўзларини олайтириди.. — Кафилликка бермайман!..

— Бекорга кекирдагингни чўзаверма! — деди Григорий жеркиб: унинг бутун вужуди титрар, Подтелковнинг ғазаби унга ҳам таъсир қилган эди.. — Узларинг хон, ўзларинг бек бўлиб кетибсанлар-ку. Сен яхшиси анови ёқقا бор! — деди у бурнининг катакларини кериб. — Асиirlар устидан хўжайнлик қилалигандар кўпайиб қолибди-ку!

Подтелков қамчинини сиқимлаб нари кетди ва узоқдан туриб:

— Мен у ерда ҳам бўлдим! — деб қичқирди.. — Уйламагинки, аравада қочиб жон сақлаб қопти деб. Сен Мелехов, овозингни ў chir! Тушундингми?.. Ким билан гаплашаётганингни биласанми? Ҳа!.. Офицерларча олифтагарчилик қилма! Уларни фақат революцион комитет суд қилади...

Григорий унинг устига оти билан бораверди, ярасини унутиб эгардан ўзини ерга ташлади-ю, шу заҳоти ўқ еган қушдай ер парчин бўлди-қолди. Ярасини жизиллатиб қон кета бошлади. Кейин ўрнидан турди-да, арава олдигача судралиб борди-ю, кейнги тагирчигига суюниб қолди.

Асиirlар ҳам етиб келишди. Пиёда соқчиларнинг бир қисми ординарецлар ва штабни қўриқлаётган казаклар билан аралашиб кетди. Урушда бўлган казаклар ҳали совумаган, қизишиб, кўзларини ялтиратиб, жанг тафсилоти ва натижаси ҳақида чувиллашиб гаплашардилар.

Подтелков қатта-катта қадам ташлаб, қорга бота-бота асиirlар олдига келди. Энг олдинда турған Чернецов ғазаб ўти билан чақнаган кўкиш кўзларини қисиб унга қарап, олдинга ташланган сўл оёғини қимирлатиб, оқ тишлари билан астари қип-қизил лабини тишлаб турарди. Подтелков унга яқин келди.

У дағ-дағ титрап, кўзларини чақчайтириб, оёқ изи тушган қорга қараб турарди, кейин бошини кўтариб, еб қўйгудек бўлиб қараб турган Чернецов билан кўз уриштириди, тикандек ўткир кўзлари билан унинг кўзини қочирди.

— Кўлга тушдинг-ку, лаънати, — деди секин хирқироқ овоз билан Подтелков, сўнgra бир қадам орқага тисарилди; у оғзини қийшайтириб кулган эди, юзида худди қилич изидек чизиқ пайдо бўлди.

— Казакларга хиёнат қилган хоин! Аблаҳ! Сотқин! — деб жингиллади Чернецов тишлари орасидан.

Подтелков юзига келиб тушган шапалоқдан ўзини опқочмоқчи бўлгандек, бошини чайқатиб қўйди, — икки бети қизариб кетди, оғзини очиб ютоқиб нафас олди.

Бундан сўнг рўй берган ҳодисалар одамни ҳайрон қолдирадиган даражада тезлик билан ўтди. Тишларини иржайтирган, рангида ранг қолмаган Чернецов муштларини кўкрагига босиб, олдинга энгашиб, Подтелковнинг устига бостириб келаверди. Унинг титраб турган лаблари орасидан сўкиш аралаш сўзлар чиқди. Унинг нима деганини фақат астасаста орқага тисарилаётган Подтелковнинг ўзигина эшилди.

— Биласанми... сени нима қиладилар? — деб бирдан шангиллаб гапирди Чернецов.

Унинг оғзидан чиққан сўзларни асир офицерлар ҳам, конвой ҳам, штаб ходимлари ҳам эшилдилар.

— Овозингни ў-чир! — деди хириллаб Подтелков бўғилиб ва қиличининг дастасига чанг солди.

Бирдан ҳамма жим бўлиб қолди. Минаев, Кри вошликов ва яна бир неча киши Подтелковнинг олдига чопиб келдилар, уларнинг оёқлари остида қорғичирларди. Бироқ Подтелков улар келиб етмасданоқ, бутун гавдаси билан ўнгга бурилди-ю, сал энгашиб, қиличини қинидан шартта суғуриб олди ва олдинга ташланиб, залвори билан Чернецовнинг қалласига солди.

Григорий Чернецовнинг қалтираб кетиб, ўзини ҳимоя қилиш учун сўл қўлини боши узра кўтарганини, сўнgra қўлининг суяги синиб, қийшайиб.

узилиб кетганини, орқага ташлаган боши устига қилич келиб тушганини кўрди. Энг олдин Чернецовнинг папофи ерга тушиб кетди, сўнгра ўзи пояси қирқилган буғдой бошоридек шилқ этиб тушди, унинг оғзи қийшайиб, кўзлари яшиндан қамашгандек қиси-либ қолди.

Подтелков яна бир карра қилич солди, сўнгра кекса кишидек оёқларини аранг босиб нари кетди, йўл-йўлакай қонга беланган қиличининг икки ёнини артди.

У аравага ўзини уриб олиб, конвойларга юзланди-да, бўғилган овоз билан:

— Чопиб ташланглар уларни... оналарини!.. Битасиниям тирик қўйманг!.. Асир олиш йўқ... Оғзидан қонини келтиринг!! — деб бақирди.

Кетма-кет ўқ узила бошлади. Офицерлар турти-нишиб, ҳар тарафга ўзларини урдилар. Қизларникидек кўзлари чиройли, офицерча, қизил бошлиқ кийгани офицер бошини чангллаб қочди. Бир ўқ келиб теккач, у баланд тўсиқдан ҳатлаб ўтгандек бир ирғиди-ю, кейин гурс этиб йиқилиб, ер тишлиб қолди. Новча, азамат ясовулни икки киши чопиб ташлади. У қилични тифидан ушлар, кесилган қўлларидан енгига тирқираб қон оқарди; у боладек чинқириб, чўккалаб олди, кейин чалқанчасига йиқилиб, қор устида бошини тўлғади; чеҳрасида қонга тўлган кўзлари билан тинмай чинқирган оғзигина қорайиб кўринар эди. Унинг юзига ва қорайиб кўринган оғзига устма-уст қилич тушар, у ҳамон даҳшат ва аламга чидолмай чинқиради. Шинелининг бел камари узилган бир казак ижирғаниб, бир ўқ билан унинг жонини олди. Қўн-фироқ сочли юнкер оз бўлмаса казаклар орасидан ўтиб кетай деган эди, аллақандай атаманли казак орқасидан етиб бориб, гарданига қилич билан уриб ўлдирди. Шу казак шинелининг этаги шамолдан кўтарилиган бир юзбошининг икки кураги орасига ўқ отиб йиқитди. Юзбоши чўнқайиб ўтириб қолди ва жони чиққунча қўкрагини тимдалади. Соchlари оқара бошлаган ясовул ёрдамчисини турган жойида ўлдиришди. Жон бераркан, у оёғи билан қорда чуқур қазиди, агар раҳми келган казаклар уни дарҳол ўл-

дирмасалар, қозиқдаги аргумоқдек анчагача, оёғи билан ер қазиб турарди.

Уч олиш бошлангани ҳамоно Григорий аравадан нари кетди, нурсизланган кўзларини Подтелковдан олмай, оқсоқланиб унинг устига тез-тез юриб кела-верди. Минаев орқадан келиб, қўлини орқасига қа-йирди-да, наганини тортиб олди ва хираланган кўз-ларини унинг кўзига тикиб:

— Сен нима деб ўйловдинг? — деди.

XIII

Сиртини қандек оппоқ қор босган тепалик қуёш шўъласи ва булатсиз кун ёғдусида кўзни қамаштир-гудек жимиirlар эди. Тепалик ён бағрида Олховий Рог шаҳарчаси қуроқ кўрпадек чўзилиб ётар, сўл томонида Свииюха, ўнг томонида кичик хуторлар ва немис қолониялари узоқдан худди туман парчасидек кўзга чалинар, дарё қайрилиб оққан жойнинг нариги томонида Терновская станицаси кўм-кўк бўлиб кўринар эди.

Шаҳарчанинг кун чиқиш томонида жарликлар билан бир-биридан ажralиб турган паст-баланд тепалар юқорига қараб чўзилиб кетган, бу тепалар устида қозикқа ўхшаб диккайиб турган сим ёғочлар Кашаригача чўзилиб бораарди.

Ҳаво очиқ ва аёз эди, бундай кунлар камдан-кам бўларди. Қуёш атрофини камалак сингари ҳола ўраб олган, шимолдан шамол эсар, чўлда изғирин қорларни учириб юарарди. Аммо уфққача чўзилган қорли дашт оппоқ, фақат кун чиқиш тарафда, уфқнинг бир бурчида дашт кўкиш туманда товланиб турарди.

Григорийни Миллероводан олиб кетаётган Пантелеј Прокофьевич Ольховий Рогда тўхтамасдан, биратўласи Кашаридан дам олишга қарор қилди. У Григорийдан телеграмма олгач, январнинг 28 ида Миллеровога етиб келган эди. Григорий уни кар-вонсаройда кутиб ётарди. Улар эрта билан йўлга чиқдилар ва соат ўн бирга яқин Ольховий Рогдан ўтиб кетдилар.

Григорий Глубокая яқинида ярадор бўлгандан кейин Миллероводаги кўчма лазаретда бир ҳафта ётди; оёғи бир оз тузалгандан кейин уйга кетишга жазм қилди. Ўз ҳамқишлоқлари унинг отини келтириб бердилар. Григорий кетаётганидан ҳам норози, ҳам хурсанд эди, — бир томондан, Донда ҳокимият учун кураш қизиган пайтда ўз отрядини ташлаб кетаётганидан норози бўлса, иккинчи томондан, ўз оиласини, ўз хуторини кўришидан хурсанд бўлар эди; Аксиня билан кўришиш орзусида эканига ўзи иқрор бўлмаса-да, бутун фикри-хаёли унда эди.

У отасини худди бегона одамдек қаршилади. Пантелеј Прокофьевич Григорийга шубҳа кўзи билан қарди (Петро қулогига бир гапни шипшишиб қўйган эди). Унинг қаттиқ тикилиб қарашида норозилик, ташвиш аломати кўринарди. У станцияга етганларидан кейин кечқурун Григорийдан областда рўй берган ҳодисаларни сўраб-сурештирди; ўғлининг жавоблари, афтидан, уни қаноатлантирумади. У оқарган соқолининг учини тишлаб, тагига чарм солиб тикилган пий масига қарап, бурнини тортар эди. Тортишишга тоби йўқроқ кўринарди, аммо Калединнинг ёнини олар экан, қизишиб кетди ва аввалгидек, Григорийга жекириб, чўлоқ оёғини ерга тап-тап этиб уриб қўйди.

— Мени лақиллатма. Шу бу йил куз Каледин хуторимизга келган эди. Майдонда йиғилиш бўлди, у стол устига чиқиб, чолларга нутқ сўзлади ва тавротда айтилгандек, мужикларнинг бостириб келишини, уруш бўлишини ва агар биз иккиланиб турсак — ҳамма нарсамизни тортиб олишларини ва областга келиб жойлашишларини гапирди. Ўша вақтдаёқ уруш бўлишини билган эди. Сиз, итваччалар нималарни ўйлайсиз? Ё бўлмаса, у сизлардан камроқ биладими? Ўқимишли, бутун армияга бошлиқ қилган генерал сенларда оз биладими? Ка-менскда сендақа нодонлар йиғилиб олиб, халқнинг калласини қотираётир. Потделковинг ким? Вахмистри? Э-ҳа, мен билан мансаби бир экан-ку. Балли-е!.. Шу кунларга қолдикми?.. Тамом, вассалом.

Григорий отаси билан истар-истамас баҳслашар, чунки отасининг феълини билгани учун баҳслашувдан

фойда чиқмаслигини тушунар эди. Бир томондан яқинда рўй берган ҳодиса уни ҳижил қилас: у Чернечовни ўлдирилиши ва асир офицерларни судсиз отилишини кечира олмас, эсидан чиқармас эди.

Ўртадаги ёғочнинг икки томонига қўшилган отлар чанани баҳузур тортиб бораради. Григорийнинг чана орқасига боғлаб қўйилган эгарлоғлиқ оти йўртиб келарди. Болалик ҷоғидан бери Григорийга таниш бўлган шаҳарча ва хуторлар: Кашари, Поповка, Каменка, Нижне-Яблоновский, Грачев, Ясеновка йўл устида ястаниб ётар эди. Хуторга етиб олгунларича Григорий яқиндагина бўлган ҳодисалар устида ўйлаб ўйига етолмасди, келажакда нима қилишини умуман белгилаб қўймоқчи бўлар эди-ю, лекин унинг фикри ўйига бориб дам олишдан нарига ўтмас эди: «Ўйга етиб олиб, бир оз дам оламан, ярамни даволайман, у ёғи... — деб ўйлар, сўнгра қўл силтаб қўйиб:— у ёғи бир гап бўлар. Бошга тушганни кўрармиз» — дер эди.

Уруш уни тоза чарчатган, мадордан кеткизган эди. Душманчилик, адоват билан қайнаб тошган, тушуниб бўлмайдиган дунёдан юз ўғиргиси келарди. Орқада қолган нарсаларнинг ҳаммаси зиддият билан тўлган муаммо эди. Тўғри йўлни топиш жуда қийин, оёғи остидаги замин ботқоқлик устига ташланган тахтадек қимиirlаб тураг, кетаётган йўли икки томонга айрилиб кетган, қайси биридан бориш кераклигини аниқ билмас эди. Аввал большевикларга майли бор эди, — у большевиклар кетидан борди, бошқаларни ҳам эргаштириди, кейин фикри ўзгариб, юраги совиди. «Наҳотки Изварин ҳақли бўлса? Қимга эргашиш керак?» — деб хаёл сурарди Григорий чана орқасига суюниб. Аммо баҳорга молаларни, араваларни қандай тайёрлашни, тол чивиқларидан охур ясашини, ернинг қори кетиб қуригандан кейин даштга чиқишини, меҳнатни соғинган қўллари билан плуг дастасини ушлаб, ер ҳайдайдиганида силкиниб, қалқиб-қалқиб кетишини тасаввур қилганда, сабзаларнинг ва палаҳса-палаҳса қилиб ағдарилган, рутубат анқиб турган ернинг ёқимли ҳидини ҳидлаб, нафас олишини кўз олдига келтирганда кўнгли юм-

шаб кетарди. Шу топда мол тагини тозалагиси, пичан ўргиси, қуриган явшан, ёввойи арпа, чириган гўнг ҳидини қўмсади. Григорий тинчлик ва осойишталикни истар эди, шунинг учун у атрофдаги нарсаларга: отларга, пўстин кийган отасининг кенг яғринига қарап экан, ўткир кўзларида шодлик ва яширин уятчанлик ифодаси намоён бўларди. Ҳамма нарса: қўй терисидан тикилган пўстин ҳиди ҳам, қашланмаган отларнинг кўриниши ҳам, омборхона устида қичқираётган хўроздлар ҳам унга ёдидан кўтарилаёзган аввалги ҳаётини эслатарди. Шу пайт бу даштлардаги ҳаёт шарбат каби ширин кўринарди.

Эртаси куни кечка томон хуторга яқинлашдилар. Григорий тепаликдан туриб Донга қаради: ана этаклари қамишзор Хотин чакалак; ана, қуриган терак, Дондан кечиб ўтиладиган йўл бошқа ердан тушибди. Ана хутор, ўзига таниш бўлган тўрт бурчак маҳаллалар, черков, майдон... Ўз уйига кўзи тушгач, Григорийнинг кўнгли бир хил бўлиб кетди. Хотиралар унинг хаёлини тўлдирли. Мол қўрадаги қудуқ устидаги ҳавоза, гўё қўлни кўтариб уни чорлаётгандек эди.

— Кўзларингга ёш келмадими? — деб сўради Пантелей Прокофьевич унга қараб. Григорий қувлик қилмай, ростини айтди:

— Ёш келганда қандай!..

— Шунинг учун ватан дейдилар-да, — деди Пантелей Прокофьевич мамнунлик билан.

У чанани хуторнинг ўртасига ҳайдади. Отлар тепаликдан чопиб тушар, чаналар гоҳ у томонга, гоҳ бу томонга қийшайиб кетар эди. Григорий отасининг ниятини пайқаган бўлса ҳамки:

— Нега чанани хуторнинг ўртасига ҳайдаяпсан? Ўз кўчамизга бур, — деди.

Пантелей Прокофьевич ўгирилиб қаради ва қиров босган соқол-мийигида кулиб, кўзини қисди:

— Ўғилларим урушга кетаётганда оддий казак эди, офицер бўлиб қайтишди. Нима, ўғлимни хутор ўртасидан олиб ўтиб мағрурланмайми? Дўст-душман кўриб ҳаваси келсин. Ахир ўғлим, биласанми, кўкрагим тоғдек кўтарилади-я!

Катта кўчага етгандада у отларга аста «чув» деб қўйиб, пештахтага қийшиқ ўтириб олди, учи шокилали қамчисини ўйнатди. Отлар уйлари яқинлашганини сезиб (гўё юз қирқ чақирим йўлни босиб ўтмагандек), ўйноқлаб чопиб кетди. Дуч келган казаклар энгашиб салом берар, мол қўралар ва ўйларнинг деразаларидан аёллар кафтларини пешоналарига қўйиб қарап, товуқлар қақолашиб кўчанинг у юзидан бу юзига чопиб ўтар эдилар. Ҳамма нарса кутганиларидек бўлиб чиқди. Хутор майдонидан ўтиб кетдилар. Григорийнинг оти аллакимнинг Моховлар четан деворига боғланган отига қараб кишинади ва бошини баланд кўтариб йўртиб кетди. Хуторнинг энг четидаги ўйлар, Астаховнинг томи кўринди... Аммо бу ерда, биринчи муюлишда кўнгилсиз бир ҳодиса юз берди: кўчанинг у бетига чопиб ўтиб кетаётган чўчқача, фалокат босиб, отларнинг оёғи сстига тушиб қолди-да, синган белини аранг кўтариб, чийиллаганича қочди.

— Э, ҳаром ўлгур, — деб сўкинди Пантелей Прокофьевич чана тагида қолган чўчқани қамчи билан уриб.

Аксига бу чўчқа ўлгудек заҳар ва тили бир қарич Аютканики, — Афонька Озеровдан тул қолган хотинники экан. Аютка шу заҳоти қўрасидан чопиб чиқди-ю, рўмолини бошига ўраб шундай қарғиш ёғдира бошладики, Пантелей Прокофьевич отнинг бошини тортиб, орқасига қайрилиб қаради.

— Овозингни ўчир, манжалақи! Мунча бақирасан? Қўтир чўчқангнинг пулини тўлаймиз!..

— Имонсиз чол!.. Шайтон!.. Сен ўзинг қўтирсан, чўлоқ ит! Ҳозир устингдан атаманга додлаб бора-ман!.. — деб Аютка қўлларини ўйнатиб вайсаб кетди.—Мен сендақа нокасга бева-бечоранинг молини бостириб кетиш нималигини кўрсатиб қўяман!..

Унинг гапи Пантелей Прокофьевичга жуда алам қилиб кетди, ранги бўзариб:

— Шарманда! — деди.

— Лаънати тўрквачча!.. — деб узиб олди Озерова.

— Мочагар, туққан онангта минг лаънат! — деб дўриллаб жеркиб берди Пантелей Прокофьевич.

Аммо Анютка Озерова оғзига келганини қайтармайдиган манжалаки эди.

— Келгинди!.. Еган чол! Ўғри! Мола ўғриси! Бева казак хотинларга модобозлиқ қилишингни бил!— деб валдираб кетди у.

— Ҳозир қамчи билан сопқоламан, қанжиқ!.. Тувакка ўҳшаган оғзингни юм!

Лекин Анюютка шундай бир гап айтдики, ҳатто кўпни кўриб, кўп гапни эшишиб қулоғи пишиган Пантелей Прокофьевич ҳам, уялганидан қулоғигача қизариб, ҳамма ёғини тер босиб кетди.

— Ҳайдасанг-чи!.. Нима қиласан ғижиллашиб?— деди Григорий жаҳл билан, кўчага аста-секин одам тўпланаётганини ва кекса Мелехов билан номусли бева хотин Озерованинг ғижиллашибига қулоқ берәётганини кўриб.

— Тилини қара... бир қарич-а!— деб Пантелей Прокофьевич тупуриб қўйди ва Аниюткани бостириб кетмоқчи бўлгандек отини қаттиқ ҳайдаб кетди. Кўчанинг бошига етганда қўрқа-писа аланглаб:

— Оғзига келганини қайтармай акиллайди-я!.. Вой, падар лаънати-е.. Ҳув қорнинг ёрилгур, хўппа семиз!— деб сўқинди чол.— Сени чўчқанг билан бирга босиб ўлдириш керак эди! Бунақа шармсиз мочагаларга рўпара бўлсанг, икки ямлаб бир ютади.

Үйларининг кўк панжарали деразалари ёнидан ўтдилар. Бош яланг, гимнастёрка устидан камар боғланган Петро дарвозани очди. Зинапоя устида оқ рўмол ўраган, қора кўзлари кулиб турган Дуняша кўринди.

Петро иниси билан ўпишиб кўришаркан, унинг кўзига тикилиб:

— Омонмисан?— деб сўради.

— Ярадор бўлдим.

— Қаерда?

— Глубокая яқинида.

— У ерларда тентираб юришга нима ҳожат бор эди-я! Аллақачон уйга қайтиш керак эди.

Петро Григорийни меҳр билан қучоқлагандан кейин, уни Дуняшка томон туртди. Григорий синглисинг тўлишган елкаларидан қучоқлаб., унинг лабла-

ри, қўзларидан ўпди, кейин орқага тисарилиб ҳайрат билан:

— Вой, Дуняха, кап-катта бўлиб, жуда етилибсан-у, мен бўлсам хунуккина, кўримсизгина бўласан деб ўйловдим,— деди.

Дуняшка чимчилаб олмоқчи бўлган акасидан ўзини опқочиб:

— Э, қўйсанг-чи!..— деди. Сўнгра Григорийнига ўхшаш садаф тишларининг оқини кўрсатиб кулди-да, нари кетди.

Ильинична болаларини қўлида кўтариб келарди, Наталья чопиб ундан ўзиб кетди. У гулдек очилган, бир ҳуснига ўн ҳусн қўшилган эди. Сип-силлиқ қилиб таралган ва Эрқасига турмакланган қора сочи хурсандликдан лоладай очилган юзига тароват берарди. У Григорийнига пинжига суқилиб, бир неча марта ёноқлари, мўйловларидан ўпди ва Ильиничнанинг қўлидан ўғлини олиб, Григорийга узатди.

— Ўғлинг азамат бўпқолди қара,—деди у шодлик аралаш мағрурлик билан.

— Бу ёққа тур, мен ўз ўғлимни кўрай,— деб Ильинична ҳовриқиб уни нари итарди.

Кампир Григорийнига бошини эгуб, унинг пешонасидан ўпди, унинг юзини силаб туриб, беҳад хурсанд бўлганидан йиглаб юборди.

— Гри-и-ша!.. Қизингни кўр!.. Ма, ол!..

Наталья рўмолга ўралган қизини Григорийнига иккинчи қўлига тутқизди. Григорий шошганидан Натальягами, онасиғами, болаларигами қарашни билмай қолди. Қоши чимирилган, кўзи ўқрайган ўғли Мелеховларга тортган эди: унинг ҳам жиддий қийиқ қўзлари қоп-қора, қошлари қалин, ўзи қорачадан келган эди. Бола кир бўлиб кетган муштумчасини оғзига тутиб, отасига тиқ қараб турарди. Григорий қизининг ҳам диққат билан қараб турган митти қўзларинигина кўйарди,— қизчанинг юзи рўмолга ўроғлиқ эди.

Григорий иккаласини кўтариб, зинапоя томон юрди, лекин оёғи зирқираб оғриб кетди.

— Наташа, буларни ол...— Григорий айбдор кишидек, лабларини буриб кулди.— Бўлмаса зинадан чиқолмайман...

Даръя ошхонанинг ўртасида соchlарини тузатиб турарди. У кулимсираб, такаллуфсизлик билан Григорийнинг олдига келди ва кулиб турган кўзларини юмиб, иссиқ лабларини унинг лабига босди.

— Гуп-гуп тамаки ҳиди келади-я!— деди у қаламдек қоп-қора қайрилган қошларини ўйнатиб.

— Кел, яна бағримга босиб, дийдорингга тўйй, ўфлим! Бўйларингдан айланай!

Григорий онасининг пинжига суқилиб кулимсирап, юраги орзиқар эди.

Пантелей Прокофьевич ҳовлида отларни чиқарар, чана атрофида оқсанб юрар, пушти камари билан папорининг устига сирилган қизил алвон йилгираб кўринарди. Петро Григорийнинг отини отхонага обориб боғлаб қўйди, даҳлизга эгарини олиб кирав экан, йўл-йўлакай, чанадан керосин идишини олиб келаётган Дуняшкага бир нима деб шивирлади.

Григорий ечиниб, нимча пўстини билан шинелини каравот бошига илди-да, соchlарини таради. Кейин скамейкага ўтириб, ўғлини чақирди:

— Бу ёқка кел, Мишатка. Нима, мени танимаяпсанми?

Мишатка оғзидан муштумини олмай, ёни билан юриб, қўрқа-писа стол ёнига келиб тўхтади. Печка ёнида турган онаси мағрурлик билан кулиб тикилиб турарди. У қизининг қулоғига бир нима деб шипшиди-да, қўлидан ерга тушириб, орқасидан секин туртиб қўйди.

— Бора қол!

Григорий иккаласини ҳам қучоғига олди; кейин тиззасига ўтқазиб сўради:

— Танимаяпсизларми мени, тирмизаклар? Полюшка, сен ҳам адангни танимаяпсанми?

— Сен адамиз эмассан,— деб шивирлади Миша (синглиси ёнидалигига юраги дадил бўлар эди).

— Бўлмаса кимман?

— Бошқа казаксан.

— Гапингни қара-я,— деб Григорий қаҳқаҳлаб кулиб юборди.— Бўлмаса сенинг аданг қаерда?

— У хизматда,— деди қиз бошини эгиб дадиллик билан (у, юраклироқ эди).

— Бўш келманглар, болаларим, уялтиринглар! Ўз уйи—ўлан тўшаги борлиги эсига тушсин. У ойлаб-йиллаб қаёқлардадир санқиб юргандан кейин уни қандай қилиб таниб бўлади!— деди Ильинична, гинахонлик қилгандай, Григорий кулган эди, у ҳам кулиб юборди.— Бундай қилсанг хотининг сендан юз ўгиради. Биз уни узатиб юбормоқчи ҳам бўлувдик.

— Ия, бу қанақа гап, Наталья! Шунақами ҳали?— деди Григорий хотинига ҳазил аралаш.

Наталья уй ичидагилардан уялиб қип-қизариб кетди, кейин ўзини тутиб олиб, Григорийнинг олдига келиб ёнига ўтириди-да, севинч тўла кўзларини тикиб, унга қараб қолди, кейин қадоқ босган иссиққина қўллари билан эрининг қуруқ сарғиш қўлини силади.

— Дарья, дастурхон ёз!

— Хотини ёssин,— деб кулди Дарья ва ликиллаб, енгил қадам ташлаб печка ёнига кетди.

Дарья аввалгисидек таниз ва ясанган-тусанган эди, нозик, бежирим оёқларида гунафша ранг жун пайпоқ, худди атайи тикилгандек ўтиришган этикча бўр эди; тўқ қизил бурма юбкаси белини сиқиб турар, кашта солиб тикилган кўкракчаси қордек оппоқ эди. Григорий юзини хотинига ўгириди, унинг ҳам ташқи қиёфаси бир оз ўзгарганини кўрди. Наталья эрининг келишини кутиб ясаниб олгак эди; енгларига энсиз тўр тутилган ҳаво ранг сатин кофтаси хипча белига ёпишиб, юмшоқ, баланд кўкрагини дўппайтириб кўрсатар, этаклари гулдор бурма юбкасининг пастаномони кенг, юқориси белини сиқиб турарди. Григорий ён томондан унинг тўла йўниб ясалгандек келишган болдиirlарига, кишини мафтун қилувчи хипча, нозик белига ва боқувда ётган биянинг сағрисидек кенг орқасига қараб: «Қазак аёlinи юз хотин ичидан ҳам таниб оласан, шундай кийинадики, қомати кўзга ташланиб туради, ҳадеб қарагинг келаверади. Мужик хотинларда эса на бел бор, на думба,— худди қопда юрганга ўхшайди...» деб ўйлади.

Ильинична ўғлининг қараб турганини кўриб:

— Бизнинг офицер хотинлари мана шундай кийинади! Шаҳар хотинларини ҳам йўлда қолдириб кетади,— деди.

— Онажон, нималар деяпсиз? — деб гапини бўлди Дарья. — Шаҳардагилар билан тенглаша олармилик! Бир исирғам бор эди, у ҳам синди, ўзиям бир пулга киммат нарса эдию, — деб сўзини тамомлади ҳасрат билан.

Григорий қўлини хотинининг кенг ва ишда пишган кифтига қўйди-да, биринчи марта: «Чиройли жўон, кўзга яқин, — деб ўйлади. — Мен йўғимда қандай тур» ган экан? Казаклар уни кўрганда кўзлари ўйнагандир, эҳтимол, бу ҳам улардан бирига кўз сузгандир. Агар биронтаси билан ўйнашиб юрган бўлса-чи?» Тўсатдан миясига келган бу фикрдан юраги сиқилиб, кўнгли хира бўлди. У Натальянинг тўлишган, гулдек муаттар юзига синчков назар ташлади. Наталья унинг тикилиб турганини кўриб қизариб кетди-да, ўзини босиб:

— Нега мұнақа қарайсан? Соғиндингми? — деб сўради.

— Соғинганда қандоқ!

Григорий миясидан ярамас фикрларни қувиб юборди, лекин шў он унда хотинига нисбатан қандайдир бир адоват пайдо бўлди.

Пантелей Прокофьевич ўталиб эшикдан кириб келди, иконага қараб чўқиниб:

— Эсон-омон дийдор кўришганларинг муборақ бўлсин! — деди.

— Худога шукур. Ҳа, нима, совқотдингми? Биз сени кутиб ўтирувдик: шўрвани ҳозир сузувдик, қайноқ, — деб Ильинична қошиқларни шақирлатиб келириб қўйди.

Пантелей Прокофьевич бўйнидан қизил шарфини олди-да, тагига чарм солиб тикилган муздек пиймасини тўқиллатиб, пўстинини ечди, мўйлови билан соқолидаги яхларни юлиб олиб ташлаб, Григорийнинг ёнига ўтиаркан:

— Тоза совқотган эканман, хуторга келиб қизиб кетдим... Анютканинг чўчқасини босиб олдик, — деди.

— Қайси Анютканинг? — деб сўради Дарья бир буханка оппоқ нонни тўғрашдан тўхтаб.

— Озерованинг чўчқасини. Жувон ўлгур югуриб чиқиб айюҳаннос солса бўладими! Сен фалонсан,

писмадонсан, фалончининг моласини ўғирлагансан, деб вайсаб кетди. Қанақа мола?— буни худо билади.

Пантелей Прокофьевич Анютканинг ўзи тўғрисида нима деб вайсаганини гапириб беришга берди-ю, лекин ёш беваларга модабозлик қилгани тўғрисидаги сўзини оғизга олмади. Григорий стол ёнига келиб ўтирас экан мийигида кулиб қўйди. Пантелей Прокофьевич ўғли олдида ўзини оқлаш учун қизишиб:

— Шундай беҳаё гапларни айтдики, ҳеч оғизга олиб бўлмайди!— деб гапини тугатди.—Орқамга қайтиб, қамчи билан солиб қолмоқчи эдим-ку, лекин ёнимда Григорий бор эди, унинг ёнида бундай қилишга қўлим бормади.

Петро эшикни очди, Дуняша бўйнига белбоғ боғланган, пешонасида қашқаси бор қизил бузоқни етаклаб ичкари олиб кирди.

Петро бузоқни оёғи билан турткилаб:

— Масленица байрамига юпқани қаймоқ билан еймиз,— деди қувониб.

Овқатланиб бўлишгандан кейин Григорий қопчиғининг оғзини очиб, уй ичида гиларга атаган совғаларини улаша бошлади.

— Ойи, манови сенга,— деб жун рўмол узатди.

Ильинична ёш жувонлардек қизариб, тортиниб рўмолни олди-да, елкасига ташлаб ўзини ойнага солиб, кифтларини ўйнатиб қўйди. Буни кўриб Пантелей Прокофьевичнинг энсаси қотди:

— Шум кампирнинг қилиғини томоша қилинг, ўзини ойнага соляпти-я. Туф-э!..— деди.

Григорий ҳамманинг кўз ўнгига гардиши қип-қизил баланд фуражкани чиқара солиб:

— Манови сенга ота,— деди.

— Худо хайрингни берсин! Тузукроқ фуражкам йўқ эди. Бу йил дўконларда ҳам фуражка тополмадим... Бўлмаса нима киярдим... Эски фуражкада черковга бориш уят. Манови кўхнаси беғдаги қўриқчига кийгизишдан бошқага ярамайди...—дер эди чол жаҳли чиққандек; гўё бирор ўғлининг совғасини тортиб олиб қўядигандек, аланглаб.

У ойна олдига бориб кийиб кўрмоқчи бўлди, лекин Ильинична ундан кўзини олмай турганини пайқаб, оқсай-оқсай самовар олдига келди. Фуражкаси ни пешонасига дол қўйиб, самоварга қарай бошлади.

— Нима қиляпсан, эсини еган чол? — деб узиб олди Ильинична.

Пантелей Прокофьевич дарров гап топиб:

— Вой, шум кампир-э, тариқча ақлинг йўқ-а, бу ойнами? Самовар-ку, вой сени қара-я! — деб қўйди.

Григорий хотинига юбкалик жун мато берди, болаларга бир қадоқ ширин отон улашди, Дарьяга ҳақиқ тошли кумуш исирға узатди, Дуняшкага кофта учун мато, Петрога бир қути папирос ила бир қадоқ тамаки совға қилди.

Аёллар чуғуллашиб, совғаларни кўздан кечираркан, Пантелей Прокофьевич гердайиб емакхонада у ёқдан-бу ёқса юрар ва:

— Мана Лейб-гвардия Казак полкининг казаги! Император кўригиди биринчи мукофотни олган казак! Эгар, юган-жабдуқ олган! Томоша қилинг!.. — деб кўкрагини кериб қўярди.

Петро қизғиш мўйловининг учини тишлаб, отасига завқланиб қарап, Григорий мийифида қуларди. Кейин папирос чекишиб олдилар, Пантелей Прокофьевич хавотирланиб деразадан қаради-да:

— Қавм-қариндош, уруғ-аймоқлар келмасдан бурун... У ерларда нима бўлаётганини Петрога гапириб бер,— деди.

Григорий қўл силтаб қўйиб:

— Урушяптилар-да,— деди.

— Ҳозир большевиклар қаерда? — деб суради Петро жойлашиб ўтириб олиб.

— Уч томондан: Тихорецкая, Таганрог, Воронеж томондан келяптилар.

— Яхши, сизнинг ревком нима қилмоқчи? Нима учун уларни бизнинг ерларга қўяяптилар? Христоня билан Иван Алексеевич келишди, қаёқдаги бўлмаган гапларни айтишади, лекин уларга мен ишонмайман. У ерда ишлар бошқачадир...

— Революцион комитет кучсиз. Казаклар уй-уйларига қочиб кетяптилар.

— Шу сабабдан ҳам комитет Советларга сұянаёт-
ган экан да?

— Албатта, шу сабабдан.

Петро жимиб қолди, яна папирос чекиб, укаси-
нинг кўзига қараб:

— Сен қайси томондасан? — деб сўраб қолди.

— Мен совет ҳокимияти тарафдориман.

— Аҳмоқ! — деди Пантелей Прокофьевич бирдан
тутоқиб кетиб.— Петро, ҳеч бўлмаса сен ақлини кир-
гизиб, кўзини очиб қўй!

Петро кулимсираб, Григорийнинг елкасига қоқиб
кўйди.

— Бу ҳали минишга ўргатилмаган отек асов. Ун-
га гап уқдириб бўладими, дада?

— Менга ақл ўргатишнинг ҳожати йўқ,— деб
Григорий қизишиб кетди.— Ўзимнинг ҳам ақлим бор...
Фронтдан келганлар нима дейишяпти?

— Фронтдан келганлар билан бизнинг нима иши-
миз бор! Ёки сен эси паст Христоняни билмайсанми?
У нимани тушунади? Халқ бошдан оёқ йўлдан адаш-
ган, қаёққа боришини билмайди... Мусибат! — деб
Петро мўйловининг учини тишлиди.— Сен қараб тур.
баҳорда нима бўларкин,— ит эгасини танимай қола-
ди... Биз фронтда большевик бўлиб ҳам кўрдик, энди
ақлимизни йиғишириб олишимиз зарил. Устимизга
бостириб келганларга казаклар: «Бизга бирорнинг чў-
пи ҳам керак эмас, бизникига ҳам тегманг», дейиш-
лари лозим. Каменскдаги ишларинг ярамайди. Боль-
шевиклар билан оғиз ўпишасиз,— шунинг учун ҳам
большевиклар ўз тартибларини қабул қилдиряптилар.

— Гриша, сен танангга бир ўйлаб кўр. Шуни яхши
билиб қўйки, казак казаклигicha қолади. Мурдор
Русь бизга хўжайнлик қилиши керак эмас. Келгин-
дилар ҳозир нима деб вақиллашяпти, биласанми? Бу-
тун ерларни жон бошига қараб бўлиш керак деяпти-
лар. Бунга нима дейсан?

— Эскидан Донга келиб ўрнашиб қолганларга ер
берамиз.

— Шимилтириқни олсинлар! Мановини олсин-
лар!..— Деди Пантелей Прокофьевич бармоқлари
орасидан бошмалдоғини чиқариб.— У тирнофи ўсиб

кетган, бошмалдоғини· анчагача Григорийнинг қирралы бурни тагида қимирлатиб турди.

Зина поядә оёқ товуши эшилди. Совуқда музлаб қолган зина босқичлари қисирлаб кетди. Аникушка, Христоня ва қүён терисидан тикилган узун папоқ кийгани Томилин Иван кириб келишди.

— Хуш келибсан, аскар бола Пантелеј Прокофьевич, топган-тутганингни олиб чиқ! — деб шанғиллади Христоня.

Иссиқ печка ёнида мудраб ётган бузоқча унинг шанғиллаган товушидан чўчиб маъраб юборди. Бузоқча титраб турган оёқлари устига босиб ўридан турди-да, ақиқ кўзларини тикиб афрайиб қолди, қўрққаниданми, полга тизиллатиб сийиб юборди. Дуняшка унинг орқасига бир туртиб тўхтатиб қўйди; хўл бўлган жойни латта билан артиб, тагига чўян тувак тутди.

— Шанғиллаб бузоқни қўрқитвординг-а! — деди Ильинична жаҳл аралаш.

Григорий казакларга қўл бериб кўришди-да, ўтиришга таклиф қилди. Кўп ўтмай хоторнинг у томонидаги казаклар ҳам келдилар. Гаплашиб ўтириб, шу қадар кўп папирос чекдиларки, тутундан чироқ милтиллаб қолди, бузоқ қаттиқ-қаттиқ йўталди.

— Жин урсин сенларни! — деб пўнғиллади Ильинична ярим кечада меҳмонларни чиқариб юбориб. — Ташқарига чиқиб чексаларинг бўлмайдими! Боринглар! Ўғлимиз йўлдан чарчаб келган, дам олсин. Худо хайрингизни берсин, боринглар.

XIV

Эртасига эрталаб Григорий ҳаммадан кеч уйғонди. Баҳордаги қингари, бўғот тагига ва ромларнинг чорчўпларига қўнган чумчуқлар қаттиқ чирқиляшиб уни уйғотиб юборди. Дераза қопқоқларининг тирқишлиридан офтобнинг заррин нурлари тушиб турарди. Тушки ибодатга занг ураётган эдилар. Бугун якшанба экани Григорийнинг эсига тушди. Наталья ёнида эмасди, лекин пар ёстиқ иссиққина эди. Афтидан, у яқиндагина ўридан турган бўлса керак,

— Наташа! — деб чақирди Григорий.

Дуняшка кириб келди.

— Нима дейсан, ака?

— Деразани очиб, Натальяни чақир. У нима қиляпти?

— Ойимлар билан овқат пиширяпти, ҳозир кела-ди.

Наталья ичкари кириб, қоронғидан күзларини қисди.

— Уйғондингми?

Унинг қўлидан ҳозиргина қорилган ҳамир ҳиди келарди. Григорий ётган жойида унинг белидан қу-чоқлади ва кечани хотирлаб кулди.

— Ухлаб қопсанми?

— Ҳа. Кечаси... ёмон чарчабман, — деб кулиб қип-қизариб кетди-ю, бошини Григорийнинг сержун кўкрагига беркитди.

Ярасини бошқатдан боғлаётган Григорийга ёрдам-лашди, сандиқдан байрамларда киядиган чалворини олиб:

— Крест тақилган мундириингни киясанми? — деб сўради.

Григорий қўрқиб кетгандек:

— Қўйсанг-чи, деб қўл силтади.

Аммо Наталья уни ўз ҳолига қўймай:

— Кийиб ол. Дадам хурсанд бўладилар. Нима, сен уларни бекорга олибсанмики, сандиқда бекор ёт-син, — деди.

Григорий унинг сўзини ўлдирмаслик учун кийиш-га рози бўлди. Урнидан турди-да, Петронинг устара-сини олиб соқолини олди, юзини ва бўйини ювди.

— Гарданингни қирдингми? — деб сўради Петро.

— Йўқ, эсимдан чиқибди-я!

— Ўтири, қириб қўяман.

Совиб қолган чўткача бўйнига муздек тегди. Григорий ойнага қараб, Петронинг худди болалардек тилини чиқариб, устара solaётганини кўрди.

— Қўшдан чиққан ҳўқизнинг бўйнидек, сенинг ҳам бўйнинг қилтириқ бўпқопти, — деб кулди у.

— Ҳукумат берган овқаг билан семириб бўлар-миди.

Григорий елкасига хорунжийлик погони тикилган, кўкрагига бирталай крестлар осилган мундирини кийди, терлаган ойнага қараб, ўзини танимай қолди: новча, қотмадан келган, қоп-қора лўли башара офицер ойнадан унга қараб турарди.

— Сен худди полковникка ўхшайсан-а! — деди Петро инисиға қараб фахрланиб.

Бу сўзлар беихтиёр Григорийга ёқиб кетди. У емакхонага чиқди. Даръянинг завқи келиб ундан кўзини ололмай қолди. Дуняшка бўлса ичини тортиб:

— Вой, мунча ярашмаса-я! — деб юборди.

Ильинична ҳам ийиб кетиб кўзларига ёш олди. Кир-чир фартуғи билан кўз ёшини артар экан, ўзини масхара қилаётган Дуняшкага қараб:

— Ҳой, қақилдоқ, сен ўзинг шунаقا ўғиллар туғиб кўр, иннайкин мақтан. Иккала ўғлим ҳам одам бўлди-я! — деди.

Наталья севги тўла хумор кўзларини эридан ололмасди.

Григорий елкасига шинелини ташлаб, ҳовлига чиқди. У зинадан тушишга қийналди — оғриқ оёғи халал берарди. Зина панжарасини ушлаб тушаркан: «Қўлтиқтаёқсиз юролмай қоладиганга ўхшайман», деб ўйлади.

Миллервода сонини кесиб ўқни олишган, ярасининг ўрни чандиқ бўлиб битиб қолган эди, шу чандиқ терини тортиб, оёқни истаганча букишга йўл қўймас эди.

Супача устида мушук исиниб ётарди. Зинапоя тагида офтобрўяда қор эриб, сув кўлмак бўлиб қолган эди. Григорий хурсандлигини ичига сиғдиролмай, диққат билан қўрани кўздан кечирди. Зинапоя ёнидаги устунга чамбарак осиб қўйилган эди. Григорий болалик чоғидан бери бу чамбарак аёлларга жуда керакли нарса эканини биларди: аёллар зинапоя устида туриб, кечқурун сут тўла товоқларини илиб қўяр, кундуз куни идиш-товоқларини кўвачаларини офтобда қўритишарди. Қўрадаги баъзи ўзгаришлар кўзга ташланиб турар: омборхонанинг ранги ўнгига кетган, эшиги сариқ балчиқ билан сувалган, бостири-манинг томи янги похол билан ёпилган эди; қалаб

қўйилган ўтилар ҳам назарида ёзек кўринди, афтидан, четан деворни ямаш учун унинг бир қисмини ишлатиб юборишган бўлсалар керак. Ертўланинг дўппайган кул ранг томи устида гўнгўаргадек қонқора хўрот бир оёғини кўтариб турар, атрофини тўхумга кирган ўнтача олачипор товуқлар ўраб олган эди. Дехқончилик асбоб-ускуналарини ёғингарчиликдан асраш учун бостирма тагига қўйган эдилар: арава шотисига қоқилган қозиқлар қобирғадек саналиб турар, ўроқ машинасининг пўлатдан қилинган бир қисми томнинг туйнуғидан тушиб турган офтоб ёруғида ялт-юлт қилиб турарди. Отхона ёнидағи иссиқ гўнг тепа устида фозлар ўтиради. Голланд зотли кокилдор нар фоз, ёнидан оқсаб ўтаётган Григорийга менсимагандай қараб қўйди.

Григорий қўрани кўздан кёчириб емакхонага қайтиди. Бу ердан сариёф, янги ёпилган нон ҳиди келиб турарди. Дуняшка нақшли талинкада тузланган олмаларни ювіб турарди. Григорий олмаларга қараб, оғзининг суви келди-да:

— Тузланган тарвуз борми?— деб сўради.

Ильинична унинг гапини эшитиб:

— Наталья, тушиб, тузланган тарвуз опчи!—деб буюрди.

Пантелеј Прокофьевич ҳам черковдан қайтиб келди. Бир чеккаси ушалган табаррук черков нонини, уй ичидагиларнинг сонига қараб, тўққизга бўлди-да, дастурхон ёнида ҳаммага улашиб берди. Ҳаммалари нонушта қилгани ўтирилар. Ясаниб, мўйловларини нима биландир мойлаб олган Петро Григорий ёнига келиб ўтирди. Уларнинг рўпараларидаги табурётканинг бир чеккасида Дарья ўтирас, офтоб шўъласи унинг ёғпа суртиб йилтиратган қип-қизил юзига тушиб турарди. У ғаши келиб кўзларини қисар, қайрилма қора қошларини чимиради. Наталья болаларига пишган қовоқ едирад, ўхтин-ўхтин кулимсираб Григорийга қараб қўярди. Дуняшка дадасининг ёнида, Ильинична эса тўрда, печкага яқинроқ жойда ўтиради.

Ҳамиша байрам вақтидагидек, жуда кўп овқат едилар. Қўй гўштидан лиширилган карам шўрвадан

кейин, угра, сўнг яхна қўй гўшти, товуқ гўшти, калапоча, қовурилган картошка, сариёққа пиширилган сўк бўтқаси едилар, сўнгра юпқани қаймоққа ботириб еб, устидан тузланган тарвуз тамадди қилдилар. Овқатдан қорни шишган Григорий аранг ўрнидан туриб, мастишидек чўқинди-да, пишиллаб каравотга келиб ётди. Пантелей Прокофьевич ҳамон бўтқани туширас: қошиқ билан ўртасини чуқур қилиб, унга қаҳрабодай мой қуяр, бўтқани мой билан аралаштириб туриб оғзига тиқар эди. Болаларни жонидек кўрадиган Петро Мишаткага овқат едирар; ҳазил қилиб, юзинга, бурнига қатиқ суркаб қўярди.

— Амаки, жиннилик қилма!

— Ҳа, нима?

— Нега юзимга қатиқ сурасан?

— Нима қипти?

— Ойимга айтаман.

— Нима қиларди?

Мишатканинг Мелековларга тортган ўткир кўзлари ғазабдан чақнаб кетар, аламидан кўзларига ғилт-ғилт ёш келарди: мушти билан бурнини артиб, яхшиликча гапини ўтказа олмагандан кейин, бақириб:

— Суртма деяппан!.. Аҳмоқ!.. Тентак!— деди.

Петро хурсанд бўлиб, қаҳқаҳлаб кулди. У ҳамон жиянига овқат едирар, бир қошиқни оғзига тиқса, бир қошиқни бурнига тиқарди.

— Худди ёш боладек тирғилади,— деб пўнғилларди Йльинична.

Дуняшка Григорийнинг ёнига ўтириб олиб гапира кетди:

— Петро жудаям ҳазилкаш, доим бир балони ўйлаб топади. Тунови куни Мишатка билан қўрага чиқувди, бола фақирнинг каттаси қистаб қолди: «Амак, зина тагига ўтирсам бўладими?» деб сўраган эди, Петро: «Йўқ, бўлмайди, нарироқ бориб ўтир» деди. Мишатка сал нарироқ борди: «Шу ергами?»— «Йўқ, бориб омборхона ёнига ўтир». Омборхонадан отхонага, отхонадан хирмонхонага ҳайдади. Утдан бетга, бетдан ўтга ҳайдайверди, бола бечора иштонига.. Натальянинг жони чиқиб, тоза қарғади!

— Менга бер, ўзим ейман! — деди Мишатка қўн-
фироқдек овози билан.

Петро кўнмай, мўйловларини ғалати қилиб қимири-
латиб қўйди:

— Йўқ, йигитча! Сенга ўзим овқат едираман.

— Мен ўзим!

— Ўзим-ўзим деяверсанг, оғилхонага обориб боғ-
лаб қўямиз. Бувинг ювинди билан боқади.

Григорий уларнинг гапига қулоқ солиб, кулим-
сираб, тамаки ўради. Пантелей Прокофьевич унинг
олдига келиб:

— Шу бугун Вёшкига бориб келмоқчиман,—
деди.

— Нима ишинг бор у ерда?

Пантелей Прокофьевич қаттиқ кекирди-да, соқо-
лини силаб:

— У ерда саррожга бир ишим бор эди,— деди,—
иккита хомутимизни тузатиб қўйгандир.

— Битта ўзинг борасанми?

— Нима қипти? Қечқурун қайтиб келаман.

У дамини олиб бўлиб, шу бу йил кўр бўлиб қол-
ган қари бияни япалоқ чанага қўшиб жўнаб кетди.
Йўл пичанзорнинг ичидан ўтарди. Икки соатда у
Вешенскаяга бориб етди. Почтахонага кириб чиқди,
кейин хомутларни олиб, янги черков ёнида турадиган
эски ошнасининг уйига жўнади. Жуда меҳмондўст
бўлган уй эгаси уни дастурхонга ўтиргазиб овқат
қўйди.

— Почтага кирудингми? — деб сўради у рюмка-
га бир нима қуятуриб.

— Ҳа, кирудим,— деди Пантелей Прокофьевич
чўзиб, сўнгра аланг-жаланг графинга қараб, бирор
жониворнинг пайига тушган итдек ҳавони исказ
қўйди.

— Янги гапни эшитмадингми?

— Янги гап? Йўқ, ҳеч нарса эшитмадим.

— Каледин, Алексей Максимович қазо қилиб-
ди-ку.

— Нима деяпсан?!

Пантелей Прокофьевичнинг ранги қув ўчиб, шуб-
ҳали графикни ҳам, ҳидни ҳам унутди, стулнинг

суюнчиғига суюниб серайиб қолди. Уй эгаси тумта-йиб, кўзларини пирпиратиб:

— Телеграмма келибди, бугун Новочеркасскда ўзини ўзи отибди,— деди.— У бутун областга татий-диган генерал эди. Нишондор эди, армияга қўмондон-лик қилар эди. Қандай соф қўнгил одам эди-я! Бундай одам казакларни ҳимоят қила биларди.

— Менга қара, биродар, энди нима бўлади?— деб сўради эсанкираб қолган Пантелей Прокофьевич, рюмкани итариб.

— Нима бўлишини худо билади. Бошимизга оғир кунлар келадиганга ўхшайди. Замона яхши бўлса, у ўзини ўзи отиб ўлдирамиди?

— Нима сабабдан бундай қилибди?

Эски мазҳабдагилар сингари чайир одам бўлган уй эгаси жаҳл билан қўл силтаб қўйди.

— Фронтчилар ундан юз ўгирибдилар, бизнинг областга большевикларни киритибдилар,— ана шу важдан атаман ўзини ўлдирган. Энди ундей одам топиладими, йўқми? Энди бизни ким ҳимоят қиласди? Каменскда қандайдир ривком тузилибди, фронтчи казаклар шуни ўйлаб-ўйлаб топибдилар. Бизда ҳам... эшитгандирсан ахир? Улардан буйруқ келибди: атамнлар битсин, ҳалиги ривком тузинглар деб. Буни кўриб мужикларга жон кириб қопти? Бемаза қовуннинг уруғи кўп бўлгандай, Вёшенскаяда ҳам дурадгорлар, тақачилар, қаланғи-қасанғи одамлар кўп!

Пантелей Прокофьевич хийла вақтгача бошини эгиб, чурқ этмай ўтирди; у бошини кўтарганда унинг кўзлари жиддий ва қаҳрли эди.

— Графиндаги нима?

— Спирт. Жияним Кавказдан опкепти.

— Опке, марҳум атаман Қалединнинг хотираси учун кўтарайлик. Худо раҳмат қилсин!

Улар ичишиб олдилар. Уй эгасининг новчадан келган, юзига сепкил тошган қизи тамадди келтирди. Пантелей Прокофьевич бошда уй эгасининг чанаси ёнида бошини солинтириб турган биясига қараб-қараб қўярди, аммо уй эгаси:

— Отинг тўғрисида ташвишланма. Ҳозир буораман, сугориб, ем берадилар,— деб қўйди.

Пантелей Прокофьевич ичкилик ва сұхбатга қизиқиб кетиб, отни ҳам, дүнёning бутун ишларини ҳам унудти. У Григорийнинг келганини пойма-пой гапириб берди, сўнгра маст бўлиб қолган уй эгаси билан бир нарса устида тортишиб қолди, кейин нима тўғрисида талашганини ҳеч эслаёлмади. Кечқурун кетиш эсига тушиб қолди. Шу ерда тунаб қолишини ялиниб сўрашса-да, кетаман деб туриб олди. Уй эгасинийг ўғли бияни қўшиб берди; уй эгаси уни чанага ўтқазиб қўйди. У меҳмонни кузатиб қўймоқчи бўлди; улар қучоқлашиб чана ичига ётиб олдилар. Чана эшикка урилиб кетди, кейин ҳар муюлишга урила-урила, ниҳоят ўтлоққа чиқиб олди. Шунда уй эгаси йиғлаб юборди-да, чанадан қулаб тушди. У анча вақтгача ўрнидан туролмай мук тушиб ётди. Пантелей Прокофьевич эса биясини йўртдириб кетди. Уй эгаси бурнини қорга тегизиб, қор устида эмаклаб кетаётганини кўрмади, хурсанд бўлиб, хохолаб:

— Қитиқлама!.. Қитиқламасанг-чи,— деган сўзларини эшитмади.

Пантелей Прокофьевичнинг бияси бир неча қамчи егандан кейин қизишиб йўртиб кетди, лекин кўр бўлгани учун чўчиб, қадам ташларди. Узоққа бормай маст бўлиб қолган Пантелей Прокофьевични мудроқ босди, у чананинг ёнидаги тахтага бошини қўйиб ухлаб қолди-ю, овози ўчди. Отнинг жилови тасодифан эгасининг тагида қолди. Ҳеч ким ҳайдамагани учун бия секин-секин юра бошлади. Биринчи чорраҳада у адашиб, Малий Громченокка борадиган йўлга тушиб олди-ю, тўғри кетаверди. Бир неча минутдан кейин шу йўлни ҳам йўқотиб қўйди. От энди бир умр ҳайдалмаган, ҳеч ким оёқ босмаган бўз ердан кетаверди-да, бориб-бориб, ўрмон ёқасидаги қорга ботиб қолди, кейин пишқириб жарликка тушиб кетди. Чана бир дарахтга илашиб қолгандан кейин тўхтади. Чана силкиниб кетиб Пантелей Прокофьевични уйғотиб юборди. У бошини кўтариб:

— Чу, ҳаром ўлгур!— деб хириллади-да, яна бошини қўйди.

Бия эсон-омон ўрмондан ўтиб, Дон бўйига тушиб олди, шарқдан тезак ҳидини олиб келган шамол

томонга бурилиб, Семеновский хутори томон юриб кетди.

Хутордан ярим чақирим берида, Доннинг сўл томонида ўпқон бор; баҳорда эриган қор сувлари шу ўпқонга қуйилади, унинг четидаги қумлоқ ер тагидан булоқлар қайнаб чиқади, бу ерда сув музламай, халқоб бўлиб ётади. Дон устидан тушган йўл уни четлаб, бошқа ёққа бурилиб кетади. Баҳор тошқин сувлари чекилиб Донга қуйилаётган пайтда бу ер сув чинқириб, гирдоб бўлиб айланади, остидаги қумларни ювиб кетади. Бутун ёз бўйи чуқурлиги бир неча саржин келадиган бу ерда зогора балиқлар бўлади, улар қирғоқдан тушган хас-чўплар орасига кириб беркиниб ётади.

Мелеховнинг кўр оти Доннинг сўл томонидаги шу ўпқон томонга қараб кетмоқда эди. Пантелей Прокофьевич у ёнбошига ағдарилиб кўзини очган вақтда ўпқонга йигирма саржинча жой қолган эди. Худди пишиб етилмаган гилосларга ўшшаган сарғиш кўкимтирик юлдузлар қоронги осмондан милт-милт қилиб қараб туради Мияси говлаган Пантелей Прокофьевич: «Кеч бўпқопти-я» деб ўйлади-да, жиловни силтаб:

— Чу, чу!.. Ҳаром ўлгур... — деди.

Бия йўртиб кетди. Яқин қолган сувнинг рутубатли ҳиди отнинг димогига келиб урилди. У қулоқларини чимириб, ҳайрон бўлгандай, эгасига кўр кўзларипинг қирини ташлаб қўйди. Шу пайт сув тўлқинларининг шовиллашини эшитди, бирдан пишқириб, ён томонга бурилди-да, тисарила бошлади. Устини сув қоплаб ётган муз парчаси унинг оёқлари остида қирс этиб. Қор босган зеҳи синиб кетди. Бия ўлгудек қўрқиб кетиб, қаттиқ пишқириб юборди. У бор кучи билан кейинги оёқларига оғирлигини солди, лекин олдинги оёқлари сувга кириб кетган эди, у кейинги оёқларининг бирини олиб, бирини қўяр, оёқлари остида муз синиб парчаланаар эди. Муз қарс этиб жойидан кўчиб кетди. Упқон бияни қаърига тортиб кета бошлади, у типирчилаб кейинги оёғини шотига қаттиқ уриб олди. Шу пайт бир фалокат бўлганини пайқаб, Пантелей Прокофьевич чанадан сакраб тушди-ю, орқасига

тисарилди. У чўкиб кетаётган биянинг оғирлигидан чана тўнкарилиб тушганини, юлдузлар ёруғида қўшқороги йилтираб кейин қоп-қора қўкиш сув қаърига чўкиб кетганини, бетида муз парчалари сузиб юрган сув шалоплаб, тўлқинлари оз бўлмаса ўзини ҳам ютиб юборай деганини пайқади. У ҳайрон қоларли тезликда кети билан судралиб қирғоққа чиқиб олдида, ўрнидан туриб:

— Дод, ёрдам беринглар!.. Чўка-яп-миз!.. — деб бақири.

Унинг мастилиги бирдан тарқалиб, кўзи мошдек очилиб кетди. У ўпқон ёнига чопиб борди. Янги кўчган муз ялтираб туарди. Шамол билан тез оқаётган сув муз парчаларини гирдобга қараб ҳайдар, яшил тўлқинлар кўпикланиб шалоплар эди. Теварак-атрофга қабристон сукунти чўккан эди. Узоқдаги хутор чироқлари қоронғида милт-милт қилиб кўринарди. Бахмал каби осмондаги юлдузлар ишқалаб тозаланган тангалардек йилтиради. Енгил шамол қорни учириб туар, қор учқунлари гирдоб сув устига тўкиларди. Устини буғ қоплаб олган ўпқон аввалидек ўйнаб, совуқ ялтиради.

Пантелей Прокофьевич энди додлаб ўтиришдан наф йўқлигини, пайқади. У теварак-атрофига қараб, мастилик билан билмасдан қаерга келиб қолганини англади ва ўзидан жаҳли чиқиб, рўй берган ҳодисадан ғазабга келиб, титраб кетди. Чанадан сакраб тушганда қўлида қамчиси қолган эди. Сўкиниб, ўзининг орқасига қамчи билан сола бошлади, лекин орқаси оғримасди, чунки қўсқа пўстини қалин, уни ечиб ташлаш бемаънилик бўларди. Соқолининг бир тутамини шартта юлиб олди-да, харид қилган нарсалари, бияси, чанаси ва хомутларнинг баҳосини ҳисоблаб, қанча зарар кўрганини билгач, хуноб бўлиб сўкина бошлади, ўпқонга яқинроқ келиб:

— Ҳой, кўр байтал!.. — деб чийиллаб, чўкиб кетган бияга хитоб қилди, унинг овози қалтирас эди.— Мочағар! Ўзинг ботганинг етмагандек, мени ҳам ботираёздинг! Алвости сени қаерга олиб кириб кетди?!.. Ажиналар у ерда сени аравага қўшиб ҳайдайдилар, лекин савалашга қамчилари йўқ!.. Мана,

қамчини ҳам олинглар!— деб жон-жаҳди билан гир-
лобнинг ўртасига гилос шохидан қилинган қамчисини
улоқтириди.

Қамчи шув этиб сувга тик тушди-да, чўкиб
кетди.

XV

Калединчилар революцион казак қисмларини
тўзғитиб юборгандан кейин, Миллеровога кўчишга
мажбур бўлган Дон революцион комитети Калединга
қарши, Украина контрреволюцион радасига қарши
жанг олиб бораётган қисм раҳбарига қўйидаги маз-
мунда декларация юборди.

Харьков. 19 январь 1918 йил. Луганскдан, № 449, соат
18 дан 20 минут ўтган.— Дон казак ҳарбий-революцион комите-
ти, Дон областининг қўйидаги қарорини Петрограддаги Халқ
Комиссарлар Советига етказишингизни илтимос қиласди.

Казак ҳарбий-революцион комитети Каменскдаги фронтчи-
лар қурултойининг резолюциясига асосан қарор қиласди:

1. Россия Совет республикасининг марказий давлат ҳокимия-
ти, казак, деҳқон, солдат ва ишчилар вакилларининг марказий
ижроия комитети ва унинг томонидан тайинланган Халқ Комис-
сарлари Совети тан ғолинсин.

2. Казак, деҳқон ва ишчи вакилларининг қурултойида Дон
область ҳукумати тузилсин.

Эслатма. Дон обlastida ер масаласи мазкур область
қурултойида ҳал қилинади.

Бу декларацияни олгандан кейин қизил гвардиячи
қисмлар революцион комитет қўшинларига ёрдам бе-
риш учун этиб келдилар, уларнинг ёрдами билан
Чернецовнинг жазо отряди тор-мор қилинди ва тар-
тиб қайтадан тикланди. Зверево, Лихая ишғол қилин-
гандан сўнг Саблин ва Петровнинг қизил гвардиячи
қисмлари революцион комитетнинг казак қисмлари
ёрдами билан ҳужумга ўtdи, душманни суриб, Ново-
черкасскка тақаб қўйди.

Үнг қанотда, Таганрог томонда, Неклиновка яқинидан полковник Кутеповнинг кўнгилли отряди томонидан мағлубиятга учраган Сиверс бир тўп, 24 пулемёт ва бир броновикдан айрилиб Амвросиевкада қолди. Аммо Сиверс мағлубиятга учраб чекинган куни Таганрогдаги Болтиқ заводида қўзголон кўтарилди. Сиверс ўзини ўнглаб олиб ҳужумга ўтди ва ҳужумий кучайтириб, кўнгиллиларни Таганрогдан қувиб чиқарди.

Омад совет қўшиллари томонига оққани аниқ кўриниб қолган эди. Улар Кўнгилли армияни ва Калединнинг «қурама» отрядларини уч томондан ўраб олган эдилар. Январнинг 28 ида Корнилов Калединга телеграмма юбориб, Кўнгилли армиянинг Ростовдан чекиниб, Кубанга кетишини билдириди.

29 январда эрталаб соат тўққизда атаман саройида Дон ҳукумати аъзоларининг ошғич кенгаши чақирилди. Каледин ўз квартирасидан ҳаммадан кейин чиқди. У стол ёнига келиб, гурс этиб ўзини стулга ташлади-да, қофозларни олдига суриб қўйди. Унинг ранги-рухсори уйқусизликдан сарғайиб кетган, нури кетиб ўқрайиб қолган кўзларининг ости кўкариб кетганди; гёё унинг қотма юзини ел ялаб сарғайтириб юборгандек эди. У Корниловнинг телеграммасини, Новочеркаскнинг шимол томонила қизил гвардиячилар ҳужумига қаршилик кўрсатаётган қисм командирларининг маълумотларини шошилмай ўқиб чиқди. Бир даста телеграмма устига энди оппоқ қўлинни қўйганча таглари кўкарган, шишинқираган кўзларини ердан олмай, бўғиқ овоз билан:

— Кўнгилли армия кетяпти. Область ва Новочеркаскни мудофаа этиш учун бир юз қирқ етти нафар аскар қолди...— деди.

Сўл кўзи пир-пир учиб, қимтилган лаблари титраб, тиришиб кетди; овозини баландлатиб, сўзини давом эттириди:

— Аҳволимиз жуда ёмон. Аҳоли бизни қўллаб-қувватлаш у ёқда турсин, бизга ҳатто душманлик кўзи билан қарайди. Бизда ортиқ куч йўқ, шу сабабдан қаршилик кўрсатиш фойдасиз. Мен ортиқ қурбон беришни, ортиқча қон тўкишни истамайман. Ўз ваколат-

ларингиздан воз кечиб, ҳокимиятни бошқа одамлар қўлига берішингизни тавсия этаман. Мен ўзим қўшин атамани вакиллиги ҳуқуқидан воз кечаман.

Катта дераза часпагидан ташқарига қараб турған Бogaевский ҳам пенснесини тўғрилаб қўйди-да, бошини ўгирмай:

— Мен ҳам ўз ваколатимдан воз кечаман, — деди.

— Бутун ҳукумат аъзолари ҳам, албатта, ўз ваколатидан воз кечади. Бас, шундоғ экан, ҳокимиятни кимга топширамиз, деган масала туғилади.

— Шаҳар думасига,— деб қуруққина жавоб қилди Каледин.

— У ҳолда бу ишни расмийлаштирмоқ лозим,— деди дудмал қилиб ҳукумат аъзоси Карев.

Ҳамма бир минутча ноқулай аҳволга тушиб жим бўлиб қолди. Булатли январь тонгининг сут ранг ёғдуси терлаган дераза ойналаридан тушиб турарди. Туман қоплаган, қиров тушган шаҳар пинакка кетган, тиқ этган товуш эшитилмас эди. Тўпларнинг гумбурлаши (қаердадир, Сулин станцияси яқинида бораётган жангларнинг акс садоси) шаҳар ҳаракатини тўхтатиб қўйган, балойи-офат сингари шаҳар устида қанот ёзган эди.

Ташқарида у ёки бу ёққа учиб ўтган қарғаларнинг қағиллаши аниқ-таниқ эшитиларди. Улар ўлакса уст�다 айлангандай, оқ черков жомхонаси атрофида учиб юради. Катта черков ёnidаги майдонда эrimай ётган қор кўкиш тусга кириб товланарди. Майдонни кесчб ўтган одамлар ёки чаналар қорда қоп-қора из қолдириб кетар эди.

Богаевский сукунатни бузиб, ҳокимиятни шаҳар думасига топшириш тўғрисида акт тузишни таклиф этди.

— Ҳокимиятни топшириш учун улар билан бирга мажлис қуриш керак эди.

— Қачон йигилсак қулай бўларкин?

— Кечроқ соат тўртларда.

Ҳукумат аъзолари оғир сукунатдан қутулганларига хурсанд бўлганлариdek, ҳокимиятни топшириш, мажлисни қачонга чақириш масаласини муҳокама

қила бошладилар. Каледин миқ этмай, столни тирноқлари билан чертиб ўтиради. Солинган қовоқлари остидаги кўзлари тер босган шиша парчасидай йилтираб турарди. Ҳаддан ташқағи чарчаганидан, зардаси қайнаганидан кўзларининг қарашлари ҳам хунуклашган эди.

Ҳукумат аъзоларидан бири кимгадир қарши узоқ гапириб, ҳаммани бездири. Каледин жаҳл билан унинг гапини бўлиб секин деди:

— Жаноблар, қисқароқ гапиринглар! Вақт зиқ. Россия шунаقا бемаъни гапдонлик касофатидан ҳалок бўлди. Ярим соатлик танаффус эълон қиласман. Муҳокама этинг-да... сўнгра ишни тезроқ бартараф қилинг.

Каледин ўрнидан туриб, ўз квартирасига кириб кетди. Ҳукумат аъзолари тўп-тўп бўлиб, аста гаплашиб турар эдилар. Аллаким, Калединнинг ранги-рўйи бир ҳолатда эканлигини айтди. Богаевский дераза олдида турарди, аллакимнинг:

— Алексей Максимович каби одам учун ўз-ўзини ўлдиришдан бошқа чора йўқ,—деб шипшигани қулоғига чалинди.

Богаевский бир сесканиб тушди-ю, тез-тез қадам ташлаб Калединнинг квартирига қараб кетди. Кўп ўтмай атаман билан яна қайтиб келди.

Ҳокимиятни топшириш ва акт учун шаҳар думаси билан бирликда соат тўртда йиғилишга қарор қилдилар. Каледин ўрнидан туриши билан ҳамма оёқка босди. Ҳукуматнинг кўзга кўринарли аъзоларидан бири билан хайрлашаётганда Каледин, Қарев билан бир нима тўғрисида шивирлашиб турган Яновга кўз қирини ташлаб:

— Нима гап? — деб сўради у.

Янов бир оз тортиниб унинг олдига келди.

— Казаклардан бўлмаган ҳукумат аъзолари йўл харжи учун пул берилишини сўрайтилар.

Каледин пешонасини тириштириб, ўшқирди:

— Менда пул-мул йўқ... Жонимга тегдиларинг?

Ҳамма тарқала бошлади. Қейинги гапни эшишиб қолган Богаевский Яновни бир чеккага чақириб олди:

— Менинг хонамга юринг. Светазаровга айтинг, вестибюлда кутиб турсин.

Улар бир оз букилиб, тез-тез юриб кетаётган Калединга эргашиб залдан чиқдилар. Богаевский ўз хонасига кириб, Яновга бир пачка пул берди.

— Ўн тўрт минг сўм. Уларга улашиб берарсиз.

Яновни вестибюлда кутиб турган Светозаров пулни олиб, ташаккур билдириди-да, хайрлашиб эшик томон юрди. Янов швейцарь қўлидан шинелини олаётганда зинапояда аллакимнинг шовқинлаётганини эшитиб, ўғирилиб қаарарди. Калединнинг адъютанти — Молдавский зинадан сакраб-сакраб тушаётиб:

— Доктор чақиринг! Дарров! — деди.

Янов шинелини улоқтириб, унинг олдига чопиб борди. Навбатчи адъютант билан вестибюлда тўплашишиб турган ординарецлар пастга чопиб тушган Молдавскийни ўраб олдилар.

— Нима бўлди? — деб қичқирди Янов докадек оқариб.

— Алексей Максимович ўзини ўзи отиб қўйди! — Молдавский ҳўнграб йиғлаб юбориб, зина панжара-сига кўкрагини қўйиб олди.

Богаевский ўз хонасидан чопиб чиқди; унинг лаблари совқотгандай дириллар эди, тили тутилиб:

— Нима? Нима? — деди.

Ҳамма бир-биридан ўзиб, зинадан юқорига чопиб чиқа бошлади. Дукур-дукур оёқ товушлари эшитиларди. Богаевский оғзини каппа-каппа очиб, хириллаб нафас оларди. У эшикни тарақлатиб очиб, ҳаммадан олдин даҳлиздан кабинетга чопиб кирди. Кабинетнинг бир четидаги ҳужранинг эшиги ланг очиқ эди. У ердан аччиқ кўкиш, тутуп, порох ҳиди чиқиб турарди.

Калединнинг хотинининг даҳшатли фарёди эшитиларди:

— Вой! Вой! Оҳ, Алё-о-оша! Вафо-до-р ё-рим!..

Богаевский бўғилгандек, кўйлагининг ёқасини ииртиб, ҳужрага чопиб кирди. Карев деразанинг тилла суви югуртирилган тутқичидан ушлаб, букчайиб қолди. Унинг суюртуги остидан кураклари қимирлаб, бир-бирига яқинлашиб яна очилгани кўриниб турар,

ўзи қалт-қалт қиласарди. Бу кап-катта одамнинг дод-фарёд солиб ҳўнграб йиглаши Богаевскийни эсанкиратиб қўйди.

Каледин офицерча сафар каравотида қўлларини кўкрагига қўйиб, чалқанчасига тушиб ётарди. Юзи ён томонга, деворга қаратиб қўйилган эди; ёстиғининг оппоқ жилди унинг оқариб кетган пешонаси билан ёстиққа қапишиб ётган юзини чиройли қилиб кўрсатарди. Кўзлари сал-пал очиқ, қимтилган оғзининг бир бурчи азоб чекаётгандек қийшайиб қолган эди. Унинг оёғи учидаги тиз чўккан хотини ўзини юлқиб йигларди. Унинг ваҳшиёна фарёди қулоқни тешиб юборай дер эди. Каравот устида қолъя система-даги тўппонча ётар, қоп-қора қон Калединнинг кўйлаги устидан ариқча бўлиб жилдираб оқиб тушар эди.

Каравот ёнидаги стул бошига френчи осиб қўйилган, столча устида қўл соати ётарди.

Богаевский қалтираб, бир ёнига қийшайди-ю, тиз ҷўкиб олиб, Калединнинг ҳали совимаган юмшоқ кўксига қулоғини қўйди. Ундан эркакларга хос, сиркадек ўткир тер ҳиди келиб турар, юраги урмай қўйган эди. Шу топда Богаевский бутун вужуди билан қулоқ сола бошлаган эди, бироқ стол устидаги қўл соатининг чиқиллаши-ю, ўлик атаманинг хириллаб қолган хотинининг бўғиқ фарёдидан бўлак товуш эшитилмади. Ташқаридан эса қарғаларнинг хунук овоз билан бўғилиб қағиллагани қулоққа урилди,

XVI

Бунчук биринчи марта кўзини очганда Аннанинг севинч ёшларига тўлган қора кўзларини кўрди.

Уч ҳафтадан бери у ҳушсиз ётар эди. Уч ҳафта-дан бери бошқа бир оламда, хаёл оламида кезиб юради. Йигирма тўртинчи январь оқшом пайтида ҳуши ўзига келди. У туманлашган жиддий кўзлари билан Аннага узоқ тикилди, уни ва у билан боғлиқ бўлган хотираларни хотирасида тикламоқчи бўлди; бунга унча муваффақ бўлолмади, чунки хотираси ўт-

маслашиб қолган, унга итоат әтмас, қўп нарсадар қалбининг чуқур жойида қолиб қетган эди.

— Сув, сув бер... — деяр экан унинг товуши ўзиға узоқдан эшитилар, бундан суюниб кулимсиради.

Анна югуриб унинг олдига келди. Билинар-билинмас табассумдан юзи ёришиб кетди. У Бунчук-нинг кружкага зўрга узатган қўлини итариб:

— Менинг қўлимдан ич, — деди.

Бунчук бош кўтариш учун бор кучини сарф қилиб, титраб-қақшаб сув ичди-да, чарчаб, яна ёстиҳқа ўзини ташлади. Анчагача ён томонга қараб ётди, бир нарса демоқчи бўлди-ю, аммо мадори келмади, кейин қўзи уйқуга кетди.

Яна қўзини очганда, биринчи галдагидек, Анна-нинг ташвиш билан ўзига тикилиб турган қўзларини, сўнгра лампанинг сарғиш шўъласи, бўялмаган шифт тахтасига лампадан тушиб турган тўгарак ёғдуни кўрди.

— Аня, бу ёққа кел.

Анна унинг ёнига келиб, қўлидан ушлади. Бунчук унинг қўлини билинар-билинмас қисиб қўйди.

— Қалай, руҳинг енгилми?

— Тилим ҳам, бошим ҳам, оёқларим ҳам ўзимнига ўхшамайди, ўзим гўё икки юз йил яшаганга ўхшайман, — деди у дона-дона қилиб. Бир оз жим туриб: — Тиф бўлмани? — деб сўради.

— Ҳа, тиф бўлгансан.

Бунчук уйни бошдан оёқ қўздан кечириб:

— Биз қаердамиз? — деб сўради.

Анна саволни тушуниб жилмайди.

— Царициндамиз.

— Сен... қандай қилиб?

— Сен билан ёлғиз ўзим қолдим, — деди у, гўё ўзини оқламоқчи ёинки у айтмаган бир гапга эътиroz қилмоқчи бўлгандек, шошилиб: — Сени бегона одамлар қўлида қолдириб бўлмас эди. Абрамсон билан бюро аъзолари сенга қараб туришимни илтимос қилишди... Кўриб турибсанки, сен билан бирга қолишга тўғри келди, ҳеч кутмаган эдим.

Бунчук қўзлари ва қўлларининг заиф ҳаракати билан унга миннатдорчилик билдириди.

- Крутогоров қани?
- Воронеж йўли билан Луганска кетди.
- Геворкянц-чи?
- У... билсанг тифдан ўлди.
- Э!..

Гўё марҳумнинг хотирасини ёд этгандай, бирпас жим турдилар.

— Мени қўрқитиб юбординг. Сен қаттиқ ётувдинг, — деди Анна паст товуш билан.

- Боговой-чи?

— Ҳеч қайсисидан хабар йўқ. Баъзилари Каменска кетиб қолди. Ҳой, менга қара, сенга гаплашиш зарар-ку? Ҳа, айтгандек, сут ичгинг келаётгани йўқми?

Бунчук «йўқ» дегандек бошини сарак-сарак қилди; тили ғўлдираб:

- Абрамсон-чи? — деб сўради.

— Бундан бир ҳафта илгари Воронежга жўнаб кетди.

Бунчук зўр-базўр у ёнбошига ағдарилди, боши айланиб, кўзларига қон тўлди. Пешонасига муздек қўйл текканини сезиб, кўзларини очди. Уни бир масала қийнар эди: беҳуш бўлиб ётганида остини ким тозалади? Наҳотки Анна бўлса? Унинг юзи билин-билинмас қизариб кетди.

- Менга ёлғиз ўзинг қараб турдимги?

— Ҳа, ёлғиз ўзим.

Бунчук юзини деворга ўгириб олиб шивирлади:

— Айб-э... Пасткашлар? Мени ёлғиз ўзингга ташлаб кетибдилар-а...

Тиф қулоқларида ёмон таъсир қолдирган эди: Бунчукнинг қулоғи оғир бўлиб қолганди. Царицин партия комитети томонидан юборилган доктор Аннага, бемор тузалиб оёққа босгандан кейин қулоғини даволашга киришиш мумкин, деган эди. Бунчук аста-секин тузала бошлади. Унинг иштаҳаси карнай бўлса ҳам, Анна парҳезга қаттиқ риоя қиласади. Шу важдан улар ўртасида тўқнашув бўлиб турарди.

- Менга яна сут бер, — деб ялинарди Бунчук.
- Бундан ортиқ бериб бўлмайди.

— Илтимос қиласаң — бер! Нима, мени очликдан ўлдирмоқчимисан?

— Илья, ўзинг биласан, меёрдан ортиқ овқат беролмайман.

Бунчук кўнгли оғриб, индамай деворга ўгирилиб олди, хўрсиниб анча вақтгача гаплашмади. Анна юраги ачиб турса-да, лекин парҳезга қаттиқ риоя қилди. Орадан бир неча вақт ўтгандан кейин Бунчук тумтайиб (шунинг учун аввалгидан ҳам баттар аянчли бир қиёфада), ялиниб-ёлвориб:

— Тузлаган қарам берсанг бўлмайдими? Аня, барака топкур, менга раҳм қилсангчи... Заарли?.. Бу докторларнинг сафсатаси! — деди.

Бунчук қатъий рад жавоб олган пайтларида баъзан қаттиқ гапириб Аняни хафа қиласарди.

— Сен мени бундай хўрлашга ҳақинг йўқ! Мен ўзим уй бекасини чақириб, сўраб оламан. Сен бағри тош, палид аёл экансан!.. Ростини айтсам, кўзимга балодек кўриняпсан.

— Сенга қарайман деб тортган азоб-уқубатларимнинг оқибати шу бўлдими! — деб юборди Анна ўзини тутиб туролмай.

— Мен, ёнимда қол, деб сенга ялиниб-ёлворганим йўқ эди-ку! Хизматингни пеш қиласериш ноин-софлик. Сен ўз устунлигиндан фойдаланяпсан. Ҳа, майли... Менга ҳеч нарса бермай қўя қол. Майли очимдан ўлай... Үнча катта зарап кўрмайсиз.

Анянинг лаблари гитради, лекин ўзини босиб олиб, индамай қўя қолди; аччиқ-тизиқ гапларига чидади.

Бир марта, Анна унга ортиқча бир сомса беришга унамаганда яна жанжал чиқди, Бунчук юзини тескари ўгириб олди. Анна унинг кўзларида олмосдек икки томчи ёшни кўриб, юраги жазиллаб кетди.

— Сен худди боласан-а! — деди у.

Ошхонага чопиб бориб, бир талинка тўла сомса олиб келди.

— Е, Илюша, е, айланай! Бас, энди хафа бўлма! Мана буниси яхши қизарибди! — дея у титраган қўллари билан қўлига сомса тутқазди.

Бунчук егиси келиб ўлиб турса ҳам, сомсанинг баҳридан ўтмоқчи бўлди, лекин ўзини тиёлмади; кўз

ёшини артиб, туриб ўтируди-да, сомсани олди. Унинг жингалак майин соқол босиб кетган юзи ёришиб, гуноҳкор кишидек кулимсиради. Кўзлари билан узр сўраб:

— Мен боладан бадтар бўпқолдим... Кўриб турибсанки, оз қолса йиғлаб юборардим,— деди.

Анна унинг қилтириқ бўйнига, ёқаси очиқ кўйлагати остидан кўриниб турган қоқшол кўкрагига, қоқ суяқ қўлларига қаради; шу вақтгача сезмаган чуқур муҳаббат билан юраги эзилиб, биринчи дафъа унинг сарғайган қуруқ пешонасидан ўпди.

Бунчук икки ҳафтадан кейингина бирорвнинг ёрдамисиз уй ичидаги юра бошлади. Чиллакдек бўлиб қолган оёқлари қийшайиб кетарди; у юришга янгидан ўргана бошлади.

— Менга қара, Аня, юряпман!— деб бирорвнинг ёрдамисиз, тез-тез юришга уринар, лекин оёқлари оғирлигини кўтара олмас, чалишиб кетарди.

Бунчук биринчи дуч келган нарсага суяниб олишга мажбур бўлгач, кексалардек оғзини қулоғига етказиб кулар, шунда рангпар юзларининг териси тортишиб, тиришиб кетарди. Чоллар сингари қиқирлаб кулар, кейин зўриқиб, кулгидан чарчаб, каравотга ўзини ташлар эди.

Улар турган квартира пристанга яқин эди. Деразадан қор босиб ётган Волга дарёси, унинг нариги томонида ярим доира шаклидаги бўз рангли ўрмон, узоқдаги паст-баланд тепаларнинг шарпаси кўринарди. Анна дераза олдида узоқ туриб қолар, ўзининг ажойиб ва кескин ўзгариб кетган ҳаёти тўғрисида ўйлар эди. Бунчукнинг касали уларни ажиб суратда бир-бирига яқинлашитирди.

Бошда, узоқ ва машақцатли йўл юриб, икковлари Царицинга келганларидан кейин озмунча азоб-уқубат тортмади. Анна биринчи марта севикли кишиси билан яқин алоқада бўлишнинг сирли томонларини очиқ-ойдин кўрди. У тишларини тишларига қўйиб, Бунчукнинг кўйлагини алишитирар, қайноқ бошини тараб, битларини туширар, зил-замбил гавдасини у ёнбошдан бу ёнбошга айлантириб қўяр, пўст-устихон бўлиб қолган эркак гавдасига кўзи тушар эди. Унинг

Кўнгли бир хил бўлиб кетса ҳам, Бунчукнинг ташқи қиёфаси юрагида томир ёйган чуқур ҳисларга доғ туширолмасди. Бу ҳис амри билан изтироб ва иккиланиш ҳисларини енгишга ўрганди ва енгди. Энди фақат ачиниш ҳисси қолган, муҳаббат булогининг кўзи очилиб, қайнай бошлаган эди.

Бир куни Бунчук:

— Бутун бу ишлардан кейин мендан жирканарсан... Шундайми? — деб сўради.

— Бу бир имтиҳон бўлди.

— Ниманинг имтиҳони? Сабр-тоқатнингми?

— Йўқ, ҳислар имтиҳони.

Бунчук юзини ўгириб, анчагача лабларининг титрашини босолмади. Бу тўғрида энди гаплашмадилар. Сўзлар энди ортиқча ва маъносиз эди...

Январнинг ўрталарида улар Царициндан Воронежга жўнаб кетдилар.

XVII

Ун олтинчи январда Бунчук билан Анна Воронежга етиб келишди. У ерда икки кун туриб, Миллеровога жўнашди, чунки Дон революцион комитети ва унга содиқ қолган, лекин калединчиларнинг таъзийки билан Каменскни ташлаб кетишга мажбур бўлган қисмлар Миллеровога кўчиб келган эди.

Миллерово одам билан гавжум ва ғала-ғовур эди. Бунчук бу ерда бир неча соат туриб, кейинги поезд билан Глубокаяга жўнади. Эртаси куни пулемёт командасини қабул қилиб олди, индинига эрталаб Чернецов отрядига қарши жангда қатнашди.

Чернецовни тор-мор қилишгандан кейин улар кутилмаганда бир-бирларидан жудо бўлдилар. Анна эрта билан штабдан ҳовлиқиб келди-ю, кўнгли бузилиб:

— Билсанг,— Абрамсон шу ерда экан. У сени кўришга муштоқ,— деди.— Яна бир янгилик бор, бугун жўнаб кетяпман.

— Қаёққа? — деб сўради Бунчук ҳайратланиб.

— Абрамсон, мен ва яна бир неча ўртоқ Луганська ташвиқот ишларини олиб бориш учун кетяпмиз.

— Отрядни ташлаб кетасанми? — деб сўради Бунчук совуққина қилиб.

Анна кулиб, лоладай қизарган юзини унинг бағрига босди-да:

— Ростини айт: отрядни ташлаб кетаётганим учун эмас, сени ташлаб кетаётганимга хафа бўляпсан, а? — деб сўради. — Аммо бу вакъинчалик иш. Сенинг ёнингда бўлгандан кўра ўша ишда кўпроқ фойда келтираман. Ташвиқот иши пулемётчиликка қараганда менга яқинроқ соҳа... — сўнгра у кўзларини шўх-шўх ўйнатиб, — гарчи пулемётни Бунчук сингари тажрибали командир раҳбарлигига ўрганганд бўлсам ҳам... — деб қўшиб қўйди.

Бир оздан кейин Абрамсон келди. У илгаригидек серғайрат, ишchan ва серҳаракат, худди мой суртилгандай қоп-қора соchlари ўртасидаги тепакал бошини аввалгидек ярқираб турарди. Бунчук уни кўриб, жуда суюниб кетди.

— Соғайиб кетдингми? Жуд-да соз! Аннани биз олиб кетамиз, — деди ва бир нарсани пайқагандек кўзларини қисиб гапирди. — Сен қарши эмасдирсан? Шундайми? Ҳа-ҳа... Ҳа, жуд-да соз! Царицинда бирга туриб, бир-бирингизга қадрлон бўлиб қолгандирсиз, шунинг учун ҳам суриштирипман.

— Ундан жудо бўлаётганимга ачинайтганимни яширмайман, — шуни деб, Бунчук қовоғини солиб, зўрма-зўраки кулиб қўйди.

— Ачиняпсан?! Шу гапнинг ўзи ҳам кифоя...
Анна, эшитяпсанми?

У хона ичида у ёқдан бу ёқقا юрди, тўхтамай эгилиб, сандиқ орқасидан Гарин-Михайловскийнинг чанг босган бир томлик китобини олди-да, бошини силкиб қўйиб, хайрлаша бошлади.

— Қачон тайёр бўласан, Анна?

— Сен бориб тур. Мен — ҳозир, — деди Анна тўсиқ орқасидан.

У кўйлагини алиштириб бўлиб, тўсиқ орқасидан чиқди. Анна бели камар билан танғилган, кўкраги баланд, пистоқи ранг солдатча гимнастёрка, у ер, бу ери ямалган, аммо топ-тоза эски қора юбка кийиб олган эди. Янги ювилган қалин соchlари рўмолининг

остидан чиқиб турарди. У шинелини кийиб, камарини боғлар экан сўради:

— Сен бугунги ҳужумда иштирок этасанми? (Бироқ аввалги хушчақчақлигидан асар қолмаган, ёлвораётган кишидек паст овоз билан гапирар эди).

— Албатта. Ахир мен қўлларимни чўнтақка суқиб, бекор юролмайман.

— Илтимос... Гапимга қулоқ сол, ўзингга эҳтиёт бўй! Мени десанг шундай қиласан, хўпми? Мен сенга бир жуфт жун пайпоқ қолдиряпман. Шамоллаб қолма, оёғингни иложи борича қуруқ сақла. Луганскдан сенга хат ёзаман.

Анна кўзларининг ўти негадир бирдан сўнди; хайрлашаркан:

— Кўриб турибсанки, сендан айрилиш менга жуда оғир,— деб иқрор бўлди.— Бошда, Абрамсон Луганскка боришни менга таклиф этганда жонланиб кетдим, ҳозир бўлса, сенсиз у ер мен учун зимистон бўлишини ҳис этиб турибман. Ҳис-туйғулар ортиқча бир нарса экани шундан кўриниб турибдики, у қўл оёғимизни боғлаб қўяяпти... Нима бўлса, бўлди, хайр!..

Улар совуққина хайрлашдилар, аммо Бунчук бунинг маънисини тўғри тушунди: Анна, шаҳтимдан қайтиб қоламан деб қўрқарди.

Бунчук уни узатишга чиқди. Анна шошиб-пишиб борар, елкаларини тез-тез қисиб қўяр, лекин орқасига қайрилиб қарамасди. Бунчук уни чақиргиси келди, лекин хайрлашаётган вақтда унинг қийғоч, намли кўзлари мўлтираб турганини пайқаган эди, шунинг учун зўрма-зўраки ясама бир тетиклик билан:

— Ростовда кўришамиз деб умид қиласан! Оқ йўл!— деди.

Анна унга бир қайрилиб қаради-ю, қадамини тезлаштириб юриб кетди.

Аннани жўнатгандан кейин Бунчук ўзининг ёлғиз қолганини сезиб даҳшатга тушди. Қўчадан ўз хонасига қайтиб келди, аммо ўт тушган уйдан қочиб чиққандай, чопиб ташқарига чиқди... Хона ичидаги нарсаларнинг ҳаммаси Аннани эслатар, ҳар бир буюм: унинг эсдан чиқариб қолдирган дастрўмоли, сол-

датча сумкача билан мис сувдон ҳам,— Аннанинг қўли теккан ҳар бир нарса унинг муаттар ҳидини сақлаб қолган эди.

Бунчук безовталаниб, кечгача станцияда сандирақлаб юрди, у ўзини бир нарсасини йўқотиб қўйган-дек ҳис этар, янги шароитга ўргана олмас эди. У ўз хаёли билан бўлиб, нотаниш қизил гвардиячилар ва казакларга қарап, баъзиларини танир, баъзилари уни танир эди.

Бир жойда Германия урушида бирга хизмат қилинган казак уни тўхтатди. У Бунчукни ўз квартирасига слив бориб, карта ўйнашни таклиф этди. Стол ёнида Петров отрядининг қизил аскарлари ва яқиндагина келган Мокроусов отрядидан бўлган матрослар «Йигирма бир» ўйнар эдилар. Тутунга тўлган хона ичидаги булар картани столга уриб, Қеренский пулларини шилдиратишар, сўкинишар, бекордан-бекорга бақиришарди. Бунчук тоза ҳаво олгиси келиб, ташқарига чиқди.

Бир соатдан кейин бошланган ҳужум унинг жонига оро кирди.

XVIII

Қаледин ўлгандан кейин Новочеркасск станицаси ҳокимиятни Дон қўшини сафар атамани генерал Назаровга топширди. Йигирма тўққизинчи январда Қенгашга йигилган вакиллар томонидан у қўшин атамини қилиб сайданди. Қенгашга вакилларнинг жуда оз қисми, асосан қўйи Дон округлари вакиллари йигилдилар. Қенгашга Қичик қенгаш деб ном берилди. Қенгаш томонидан қўллаб-қувватланган Назаров ўн саккиз ёшдан эллик ёшгача бўлган казакларни сафарбар деб эълон қилди, аммо казакларни сафарбар қилиш учун станицаларга қуролли отрядлар юборилишига ва таҳдидларга қарамай, казаклар ўлганларининг кунидан қўлларига қурол олар эдилар.

Қичик қенгаш иш бошлаган куни генерал Красношчековнинг б-нчи Дон казак полки қўшин старшинаси Тацин қўмондонлиги остида Руминия фронтидан саф тортиб Новочеркасскка етиб келди. Полк Ека-

теринославдан бу ерга ҳар өр-ҳар ерда большевиклар ҳалқасини ёриб, жанглар билан етиб келган эди. Уни Пятихатка, Межева, Матвеев Курганда ва бир кўп ерларда қаттиқ савалаган бўлсалар-да, бунга қарамай, полк бутун составда, ҳамма офицерлари билан етиб келди.

Полкин тантанали суратда қарши олдилар. Черков майдонида дуойи-такбир ўқилгандан сўнг, казаклар интизомни сақлаб, тартибга қаттиқ риоя қилган ҳолда қўлда қурол билан Донни ҳимоя қилишга келганлари учун Назаров уларга ташаккур билдири.

Кўп ўтмай, полк Сулин станцияси яқинидаги фронтга жўнатилди, аммо орадан икки кун ўтгач, Новочеркасскка: полк большевиклар ташвиқоти таъсирига берилиб, ўзбошимчалик билан позицияни ташлаб кетибди ва қўшин ҳукуматини ҳимоя қилишдан бош тортибди, деган қора хабар келди.

Кенгаш ишлари суст борар эди. Большевикларга қарши олиб борилаётган курашнинг нима билан туғашини ҳамма пайқаб қолган эди. Жуда ғайратли, серҳаракат генерал Назаров мажлис вақтида тирсагига суюниб, пешонасини кафтига тираб ўтиар, гўё бир нарсани ўйлаб изтироб чекаётгандек кўринар эди.

Сўнгги умидлар ҳам пучга чиқди. Ҳатто Тихо-рецкой яқинида тўп овозлари эшитилмоқда эди. Ўша ерлик қизил командир хорунжий Автономов Царичиндан Ростовга қараб ҳаракат этмоқда деган мишишлар юрар эди. Сиверс томонидан суреб келинаётган капитан Чернов отряди Ростовга кириб келди, Гниловская станицаси казаклари уни орқасидан ўққа тутган эдилар. Қизилларнинг бирлашишига оз масофа қолган эди, шу важдан генерал Корнилов Ростовда қолиш хатарли эканини пайқаб, ўша куниёқ Ольгинская станицасига чекиниш тўғрисида буйруқ берди.

Ўша куни кечгача ишчилар Темерникдан вокзални ва офицер патрулларни ўққа тутдилар. Кечга яқин Ростовдан қўшин колонналари гуж бўлиб чиқа бошлиди. Кўшин Дон дарёси устидан қора илон сингари чўзилиб ўтиб, Оқсойга томон кетди. Думи

юлингаң рогалар юмшоқ, ҳўл қорни босиб, оғир-оғир қадам ташлаб кетмоқда эдилар. Гимназистларнинг ялтироқ тугмалари, шинеллари, реальний мактаб ўқувчиларининг яшил шинеллари ора-сира кўзга чалинарди, аммо солдатча, офицерча шинель кийганлар кўпчиликни ташкил қиласарди. Взводларга полковниклар ва капитанлар командирлик қиласарди. Сафларда юнкерлар ва прaporшчиклардан тортиб, полковникларгача бор эди. Қочқинлар—ёши қайтган, басовлат одамлар пальто ва калош кийиб олиб, қатор-қатор юк аравалари кетидан, баланд пошнали туфли кийган хотинлар қорга бота-бота аравалар ёнида борар эдилар.

Евгений Листницкий Корнилов полкидаги роталардан бирида эди. Қомати келишган қўшин офицери, штабс-капитан Старобельский, суворовчи Фанагория гренадёр полкининг кичик офицери Бочагов ва қариб қолган, тишлари тушиб кетган, ҳамма ёғини қари урғочи тулкиникideк сариқ тук босиб кетган подполковник Ловичев Листницкий билан бир қаторда борар эди.

Қош қорайиб келмоқда. Кун аёз. Доннинг қўйи томонидан шўртак ва рутубатли ел эсмоқда. Листницкий одати бўйича юришини бузмасдан, билчиллаб кетган қорни кечиб борар, ротанинг олдида кетаётган одамларга тикилиб қарап эди. Корнилов полкининг командири капитан Неженцев ва шинелининг олди очиқ, фуражкаси гарданига сурис қўйилган, собиқ Преображенский гвардия полкининг командири полковник Кутепов йўлнинг бир четидан келмоқда эдилар.

Полковник Ловичев милтигини эпчиллик билан тутамлаб:

— Жаноб командир! — деб Неженцевни чақирди.

Пешонаси кенг, қора кўзларининг ораси очиқ, патак соқол Кутепов ҳўқиз нусха юзини ўгириб қаради; Неженцев овоз келган томонга унинг елкаси оша кўз ташлади.

— Биринчи ротага буйруқ беринг, илдамроқ юришсин! Бундай юрсак совқотиб қолишимиз турган гап. Оёқларимиз ҳўл бўлди, сафарда бундай юриш...

— Расвогарчилик! — деб дўриллади шанғи Старобельский.

Неженцев жавоб қилмасдан унинг ёнидан ўтиб кетди. У Кутепов билан бир нарса устида тортишарди. Бир оздан сўнгра Алексеев улардан ўзиб кетди. Извошчиси думлари туғилган тўқ отларни ҳайдаб ўтди; отларнинг туёқлари остидан атрофга қор ва муз парчалари сачарди. Шамолдан қизариб кетган, оқ мўйловлари диккайган, оппоқ қошлари ўсиқ Алексеев фуражкасини қулоқларигача бостириб кийиб олиб, колясканинг суюнчиғига ёнбоши билан таяниб, совқотганидан чап қўли билан ёқасини ушлаб ўтиради. Офицерлар унинг таниш юзига қараб, кулимсирадар эдилар.

Мингларча оёқлар остида юмшаб кетган йўлнинг у ер, бу ерида сариқ кўлмак сувлар ҳосил бўлган эди. Юриш жуда қийин, оёқлар тийғаниб кетар, этиклар ичига сув кирав эди. Листницкий қадам ташлаб кетар экан, олдиндагиларнинг гапига қулоқ соларди. Нимча пўстин ва казакча оддий папоқ кийган аллақандай офицер дўриллаб гапирав эди.

— Кўряпсизми, поручик? Давлат думасининг раиси — кекса Родзянко ҳам пиёда кетяпти.

— Россия Голгофага¹ кетяпти.

Аллаким йўталиб, хириллаб балғам ташлади-да, пичинг қилди:

— Голгофага... фарқи шуки, шағал йўл эмас, қорли билчиллаган йўлдан, қаҳратон совуқда кетяпти.

— Жаноблар, қаерда туnаймиз, билмайсизми?

— Екатеринодарда.

— Бир марта биз Пруссияда худди шунаقا шароитда юриш қилган эдик...

— Кубань бизни қандай қаршилар экан-а?.. Нима?.. Албатта, у ерда вазият бошқа.

— Сизда папирос-мапирос борми? — деб поручик Головачев Листницкийдан сўради.

Жун қўлқопини ечиб, папирос олди-да, ташаккур билдириди, сўнгра солдатчасига бурун қоқиб, бармоқларини шинелининг этагига артди.

¹ Голгофа — Исо дорга тортилган ер. (Тарж.)

— Авомнинг қилиқларини ўзлаштиряпсиз дейман, а, поручик?..— деб пичинг қилди подполковник кулимсираб.

— Истасанг-истамасанг ўрганасан. Назаримда сиз... бирталай дастрўмол запас қилиб олганга ўхшайсиз.

Ловичев жавоб қилмади. Унинг оқара бошлаган қўнғир мўйловларида кўкиш сумалакчалар осилиб ётарди. У ўқтин-ўқтин бурнини тортиб қўяр, шамол ҳиллиратган шинелидан совуқ ўтиб, уни дилдира-тарди.

Листницкий йўлда қингир-қийшиқ саф тортиб кетаётган сафларга, колонна олдида кетаётганларга қараб, юраги эзилиб кетиб, «Россиянинг сара одамлари» деб ўйлади.

Бир неча суворий от чоптириб ўтди, улар орасида баланд Дон арғумоги минганд Қорнилов ҳам бор эди. Унинг оч яшил рангли ва икки ёнида қийшиқ чўнтағи бўлган нимча пўстини билан оқ папоги анча маҳалгача қаторлар орасида липиллаб кўриниб турди. Офицерлар батальони уни қаттиқ «ура» овози билан қаршиладилар.

— Ҳаммаси ҳам майли-ю, лекин бола-чақа...— деб Ловичев кексалардек йўталди-да, гапимни маъқулармикин, дегандек қилиб, Листницкийнинг кўзига тикилди:— Бола-чақам Смоленскда қолди...— деб гапини такрорлади у.— Хотиним билан қизалоғим — бўйи етган қизим. Рождествода ўн етти ёшга тўлди... Кўряпсизми, ясовул?

— Ҳа-а-а...

— Сиз ҳам оиласимисиз? Новочеркасскданмисиз?

— Йўқ, мен Донец округиданман. Менинг ҳам отам қолган.

— Билмадим, уларга нима бўлдийкин... Менсиз ҳоллари нима кечётган экан?— деб гапида давом этди Ловичев.

Старобельский жаҳл билан унинг гапини бўлди.

— Ҳамманинг ҳам бола-чақаси қолган. Билмайман, нега ҳадеб фингший берасиз, подполковник? Қизиқ одамлар? Ростовдан энди чиқиб, йўлга тушишимиз билан...

— Старобельский! Петр Петрович! Сиз Таганрог ёнидаги жангда бўлганмисиз?— деб қичқирди бирор қатор орқадаги сафдан.

Старобельскийнинг зардаси қайнаб ўгирилиб қаради-ю, зўрма-зўраки илжайди.

— Э... Владимир Георгиевич, қайси шамол сизни бизнинг взводга учирив олиб келди? Ўзингиз ўтдингизми? Ким билан чиқишолмадингиз? Ҳаҳ-ҳа... ма-сала равшан... Сиз Таганрог жангни тўғрисида сўра-япсизми? Ҳа, бўлдим... нимайди? Гапингиз тўғри... Үқ еб ўлди.

Уларнинг гапи Листницкийнинг у қулоғидан ки-риб, бу қулоғидан чиқиб кетар, у ўзининг Ягодное-дан чиқсан кунини, отасини, Аксиньяни эслади. Эслади-ю, бирданига юраги ғаш бўлиб, ўзини қаерга қўйишини билмай қолди. У оғир-оғир қадам таш-лаб, милтиқларнинг учидаги найзаларнинг тебра-ниб боришига, одамларнинг қадам ташлашига монанд қимирлаётган папоқларга, фуражкаларга, бошлиқларга қараб борар экан, ўйлар эди.

«Қувфинди бўлган мана шу беш минг кишининг ҳар бири, худди мен каби, юрагида нафрат ва бе-ҳад қаҳри-ғазаб олови билан ёниб кетяпти. Аблаҳ-лар бизни Россиядан қувиб чиқардилар, шу ерда поймол қилмоқчилар. Қўрамиз? Корнилов бизни Москва устига бошлаб олиб боради!»

Шу он у, Корниловнинг бир вактлар Москвага келганини эслади ва ўша кунининг ширин хотиралари ёдига тушиб кетди.

Қаердадир орқароқда, эҳтимол, ротанинг кетида батарея келарди. Отлар пишқирап, араванинг тегар-чиклари шақирлар, у ердан ҳатто отларнинг тер ҳиди келарди. Листницкий бу таниш ва юрагини орзиқтирувчи ҳидни сезиб, ўгирилиб орқасига қара-ди; олдинда келаётган суворий, ёшгина прaporshchik унга қараб, танигандек кулиб қўйди.

* * *

Мартнинг ўн бирида Кўнгилли қўшин Ольгинская станицаси районида тўплланган эди. Корнилов Новочеркасскдан чиқиб, Дон орқасидаги чўлларга

чекинган ва 1600 отлиқ аскари, 5 тўпи ҳамда 40 пулемёти бўлган Дон Қўшини сафар атамани генерал Поповнинг етиб келишини кутиб, йўлга чиқишни кечиктироқда эди.

13-мартда Попов, ўз штабининг бошлиғи полковник Сидорин ҳамроҳлигига, бир неча қазак офицерлари ҳимояси остида Ольгинскаяга шитоб билан етиб келди.

Корнилов турган уйнинг олдидаги майдонда Попов отининг бошини тортди; бир қўли билан эгарнинг қошини ушлаб, оёғини эгар устидан аранг ошириб отдан тушди. Ёшгина, қораҷадан келган, кўзлари одамга тикандек қадаладиган қора соч казак — чопар югуриб келиб қўлтиғидан ушлади. Попов унга отнинг жиловини бериб, сипогарчилик билан зинапоя томон юрди. Сидорин билан офицерлар отдан тушиб, унга эргашдилар. Чопарлар отларни дарвозадан қўрага киритдилар. Ёши қайтган, чўлоқ, чопар отларнинг бошига тўрва илаётган маҳалда қора соч кўзлари тикандек уй эгасининг хизматкор қизига гап отди. Йигит қизга тегишиб бир нарса деди шекилли, дуррасини сатангча ўраган, яланг оёқларига чуқукалиш кийган, икки бети қип-қизил қиз хиринглаб, кўлмак сувларни шопиллатиб, унинг ёнидан ўтди-ю, омборхонага кириб кетди.

Ёши қайтган, басовлат Попов уйга кирди. Даҳлизда апил-тапил шинелини ечиб, уни эпчил чопарга узатди-да, қамчисини қозиқقا илиб, бурнини қаттиқ қоқди.

Чопар йўл-йўлакай сочини тараб бораётган Сидоринни Попов билан залга олиб кирди.

Кенгаш мажлисига чақирилган генералларнинг ҳаммаси йиғилган эди. Корнилов стол устига ёзилган харитага тирсагини қўйиб ўтиради; соchlари оқарган, қотмадан келган, соқолини янги қирдирган Алексеев қоматини тик тутиб, унинг ўнг томонида ўтиради. Ақлли кўзлари чақнаб турган Деникин Романовский билан нима тўғрисидадир суҳбатлашарди. Деникинга сал ўхшаш кетган Лукомский, хона ичидан у ёқдан, бу ёққа секин юрар, соқолини чимдир эди. Марков эса ҳовли томонга қараган дерар

за ёнида туриб, отлар атрофида юрган чопарларнинг хизматкор қизга гап отиб кулишларини томоша қи-ларди.

Келганилар саломлашгандан кейин столга яқинлашдилар. Алексеев йўл тўғрисида, Новочеркасскнинг таслим қилиниши тўғрисида бир неча аҳамиятсиз савол берди. Корнилов томонидан кенгашга чақирилган бир неча офицерлар билан бирликда Кутепов кириб келди.

Корнилов, ўзига бино қўйган сипогарчиликни қўлдан бермай ўтираётган Поповга тик қараб туриб сўради:

— Қани айтинг-чи, генерал, отрядингизда қанча аскар бор?

— Бир ярим минг отлиқ аскар, батарея, командаси билан қирқ пулемёт.

— Кўнгилли армиянинг Ростовдан чиқиб кетишга мажбур қилган сабаблар ўзларингизга маълум. Кеча бизда маслаҳат мажлиси бўлган эди. Теваракатрофида кўнгилли отрядлар жанг қилаётган Екатринодар томондан Кубанга киришга қарор қилинди. Биз шу маршрут билан кетамиз... — Корнилов қаламининг йўнилмаган учи билан харитани чизиб кўрсатди: — Йўлда Кубань казакларини орқамиздан эргаштириб, ҳаракатимизга моне бўлишга интилган бир ҳовуч, тарқоқ ва урушга лаёқатсиз қизил гвардия отрядларини тўзғитиб юборамиз. — Шуни деб у, кўзларини қисиб, ён томонга қараб турган Поповга тикилиб, гапини тамомлади: — Биз ўз отрядингиз билан Кўнгилли армияга қўшилиб, биргаликда Екатеринодар устига юришингизни тавсия этамиз.

— Мен боролмайман, — деб Попов қатъий ва кескин жавоб берди.

Алексеев унга томон энгашиб:

— Сабабини сўрашга рухсат этинг, нима учун? — деб сўради.

— Чунки мен Дон обlastини ташлаб, Кубань деган аллақайси гўрга боролмайман. Шимол томондан Дон дарёси тўсиб турган, қишлоғ районида воқиаларнинг нима билан тугашини кутиб ётамиз. Душман актив ҳаракат бошлайди деб гумон қилиб

бўлмайди, чунки бугун бўлмаса эрта, эрувгарчилик бошланади, — Дондан артиллерия тугул, отлиқ аскарларни олиб ўтиш ҳам мумкин бўлмай қолади, аммо ем-хашак ва ғаллага бой бўлган қишлоғ районидан эса биз истаган вақтда, истаган томондан партизанлик урушини бошлиб, кучайтириб юборишимиз мумкин.

Попов дадиллик билан Корниловнинг таклифини рад этувчи далиллар келтирди. Чуқур нафас олиб, Корниловнинг бир нима демоқчи бўлганини кўриб, ўжарлик билан бош чайқади:

— Сўзимни тамомлашга рухсат этинг. Бундан ташқари, яна бир жуда муҳим фактор борки, биз, яъни қўмондонлик уни ҳам назарда тутамиз: бу — казакларимизнинг руҳий кайфиятларидир. — Шуни деб у кўрсаткич бармоғига тилла узук таққан юмшоқ оқ қўлини бигиз қилиб кўрсатди, овозини бир оз баландлатиб, ҳаммани бошдан оёқ кўздан кечириб чиқди-да, гапида давом этди: — Мабодо биз Кубанга қараб бурилсақ, отрядимиз тарқалиб кетади. Қазаклар бормаймиз деб туриб олишлари мумкин. Яна шуни эсдан чиқармаслик керакки, менинг отрядимнинг доимий ва энг мустаҳкам қисми казаклардир, улар маънавий жиҳатдан... чунончи сизнинг қисмларингиздек матонатли эмаслар. Улар онгли эмаслар дейиш мумкин. Бормайдилар, вассалом. Шу важдан таваккал қилиб, бутун отряднинг тарқалиб кетишига йўл қўя олмайман, — деб Попов яна Корниловнинг сўзини оғзидан олди: — Афв этинг биз сизга ўз қароримизни билдирик, шуни ҳам айтайки, биз бу қароримизни ўзгартира олмаймиз. Албатта, кучларимизни майдалаб юбориш биз учун зарарлидир, аммо мавжуд вазиятдан қутулиш учун биргина йўл бор. Менинг фикримча, мен ҳозир айтиб ўтган мулоҳазаларга кўра, Кўнгилли қўшин Кубанга эмас (Кубань казакларининг кайфиятлари мени ташвишга solaётir), балки Дон отряди билан Доннинг нариги томонидаги даштларга кетса маъқул бўларди. У ерда қўшин дам олиб ўзини ўнглаб олади, баҳорда эса Россиядан келган кўнгиллилар билан ўз сафини тўлдиради...

— Йўқ! — деди Корнилов кекирдагини чўзиб. Ҳолбуки кечагина ўзининг Доннинг нариги томонидаги даштларга юришга майли бор эди ва бунинг аксини иддао этган Алексеевнинг фикрини ўжарлик билан рад этган эди. — Қишлоғ районига чекилцшининг маъноси йўқ. Бизнинг олти минг чоғлиқ аскаримиз бор...

— Ҳурматли генерал жаноблари, агар гап озиқовқат устида кетаётган бўлса, амин бўлингки, қишлоғ райони жуда болта. Бундан ташқари, сиз хуссий от заводларидан от олиб, аскарингизнинг бир қисмими отлантира биласиз. Маневрли дала жанглари олиб боришда сизнинг қўлингиз баланд келади. Сиз учун отлиқ аскар жуда зарур. Кўнгилли армия эса отларга бой эмас.

Бугун Алексеевга нисбатан сертакаллуф бўлган Корнилов унга қараб қўйди. У икки томоннинг қайбирини танлашни билмай тараффудланиб қолгани учун нуфузли бир одамнинг ёрдамига муҳтоҷлик сезарди. Алексеевнинг гапига диққат билан қулоқ солдилар. Масалани қисқа, аниқ ва очиқ-ойдин ҳал қилишга ўрганган кекса генерал, бир неча маъноли сўз билан Екатеринодарга қараб юриш бошлаш фикрида эканлигини айтди.

— Шу томонга қараб юрсак, большевиклар ҳалқасини ёриб ўтишимиз ва Екатеринодар яқинида жанг қилаётган отряд билан қўшилишимиз осон, — деб гапини тамомлади у.

— Михаил Васильевич, агар биз бу режани амалга ошира билмасак нима бўлади? — деб сўради Лукомский эҳтиётлик билан.

Алексеев тамшаниб, қўли билан харитани чизиб кўрсатди.

— Агар бу режани амалга ошира билмасак ўхолда бизда Кавказ тоғларига чекиниб, у ерда армиямизни тарқатиб юбориш имкони бор.

Романовский унинг гапини маъқуллади. Марков қизишиб, бир неча оғиз сўз айтди. Алексеевнинг асосди далилларига қарши бир фикр айтиш мумкин эмасдек кўринса ҳам, лекин Лукомский сўз олиб, посангини тенглаштирди.

— Мен генерал Поповнинг таклифини қувватлайман, — деди у салмоқлаб. — Кубань устига юриш жуда қийин, бу қийинчилликларни ҳисобга олиш имкон хорижида. Аввало, бизга темир йўлни икки марта кесиб ўтишга тўғри келади...

Кенгашда ўтирганларнинг кўзлари унинг харита устида юрган бармоқларига тикилди. Лукомский ишонч билан сўзини давом этдиради.

— Большевиклар бизни қучоқ очиб кутиб олмайдилар, албатта,— улар зирҳли поездларни устимизга юборадилар. Бизнинг эса юк ортилган араваларимиз ва ярадорларимиз кўп; уларни қолдириб кетолмаймиз. Буларнинг ҳаммаси армиянинг ишини оғирлаштиради ва тезроқ ҳаракат қилишига тўсқинлик қиласди. Иннайкейин, Кубань казаклари бизга хайриҳоҳ деган ишонч қаердан келиб чиққанини тушунолмайман. Дон казаклари большевиклардан норози деган асоссиз гапларни ёдимида тутиб, Кубань казаклари ҳақидаги миш-мишларга жуда эҳтиёт бўлиб, шубҳа кўзи билан қарашимиз керак. Кубанликларга ҳам эски рус армияси келтирган мараз юқсан.. Улар душманлик кайфиятида бўлишлари мумкин. Сўзимнинг охирида шуни такрорлаб ўтайки, мен шарқдаги чўлларга қараб юриш керак ва куч йиғиб туриб, у ердан большевикларга таҳдид солиш керак деган фикрдаман.

Ўз генералларининг кўпчилиги томонидан қўллаб-қувватланган Корнилов Великокняжескаядан фарбга қараб юришга, сафарбар вақтида армиянинг сафдан ташқари хизмат қилувчи қисмини отлиқ аскарлар билан тўлдиришга ва у ердан Кубанга бурилишга қарор берди. У мажлисни беркитгандан кейин Попов билан уч-тўрт оғиз гаплашиб олиб, хайрлашди-да, ўз хонасига чиқиб кетди. Алексеев унинг орқасидан эргашди.

Дон отряди штабиқинг бошлиғи полковник Сидорин, шпорларини жиринглатиб, зинапояга чиқида, севингандек шангиллаб, чопарларга:

— От келтиринг!— деб қичқирди.

Ёшгина, сариқ мўйловли юзбоши қилич қинини ушлаб, кўлмак сувлар устидан ҳатлаб, зинапоя ол-

дига келди. У зинанинг биринчи поғонасида туриб, шивирлаб:

— Нима бўлди, жаноб полковник? — деб сўради.

— Ёмон бўлмади,— деди сёкин, кўтарики руҳ билан Сидорин.— Бизнинг генерал Кубань томонга юришдан бош тортди. Ҳозир йўлга чиқамиз. Сиз тайёрмисиз, Изварин?

— Ҳа, отларни келтиришяпти.

Чопарлар отларини минио келдилар. Қора соч, бақа кўз чопар ўз ўртоғига қараб:

— Қалай, ҳусни жойидами? — деб сўради-да, кулиб қўйди.

Ёши қайтган чопар мийигида кулди.

— Бе, тавъя-ку.

— Агар имлаб чақирса йўқ демассан.

— Қўйсанг-чи, тентак! Бугун рўза-я.

Илгари Григорий Мелехов билан бир қисмда хизмат қилган Изварин ўзининг сағриси катта, оқ тумшуқ қашқа отига сакраб миниб олди-да, чопарларга буюрди:

— Отларга миниб кўчага чиқинг.

Попов билан Сидорин генералларнинг баъзи бирлари билан хайрлашиб, зинадан тушдилар. Чопарлар бири отнинг жиловидан ушлаб турди, генералнинг оёғини узангига киргизиб қўйди. Попов казакча оддий қамчисини ўйнатиб, отини йўрттириб кетди, унинг кетидан чопарлар, офицерлар ва Сидорин оёқларини узангига тираб, сал олдинга эгилиб, отларни ҳайдадилар.

Кўнгилли армия икки кечада қўниб, Мечетинская станциясига етиб келди. Бу ерда Корнилов қишлоғи тўғрисида қўшимча маълумот олди. Бу маълумотлар махфий характерда эди. У сафдаги қисмлар командирларини чақириб, Кубанга томон йўл олиш тўғрисида қарор қабул қилинганини эълон этди.

Поповга ординарец юборилди, бизга қўшилинг. деб иккинчи марта таклиф қилинди. Ординарец-офицер армияни Старо-Ивановский участкаси яқинида қувиб етди. У Поповдан худди аввалги жавобни келтирган эди: Попов назокат билан совуққина қилиб,

Қорниловнинг таклифини қабул қилишдан бош тортган ва ўз қароримни ўзгартира олмайман, ҳозирча Сальский округида қоламан, деб ёзиб юборган.

XIX

Новочеркасски забт этиш учун айланима йўл билан ҳаракат этаётган Голубов отряди билан Бунчук ҳам йўлга тушган эди. Йигирма учинчи февралда улар Шахтнаядан чиқдилар, Раздорская станицасидан ўтиб, кечаси Мелиховская станицасига етиб келдилар. Эртаси куни тонг ёришганда станицадан чиқиб кетдилар.

Голубов ўз отрядини тез юргизиб олиб бораради. Чорпаҳлдан келган командир отряднинг олдидаги борар, қўлидаги қамчиси отнинг сағрисига тез-тез тушиб турар эди. Кечаси Бассергеневская станицасидан ўтгандан кейин отларга бир оз дам бериб, юлдузсиз, булути кечада отлиқлар яна йўлга тушдилар, музлаб қолган йўл от туёқлари остида тарақлар эди.

Кривянская станицасига яқинлашганда йўлни ўйқотиб қўйдилар, лекин дарров уни топиб олдидар. Кривянскаяга кирганларида тонг ёриша бошлаган эди. Станица кўчалари ҳувиллаб ётарди. Станица майдони яқинидаги қудуқ ёнида бир кекса қазак тоғарадаги яхни чопиб кўчиради эди. Голубов унинг ёнига борди, отряд тўхтади.

— Салом ота.

Чол қўлқопли қўлини папогига тегизиб, нохушлиқ билан:

— Алайкум ассалом,— деди.

— Буважон, станицангиздаги казаклар Новочеркасскка кетиб қолдиларми? Қазакларни сафарбар қилишдими?

Чол дарҳол болтасини елкасига қўйиб, индамай дарвоза томон қараб кетди.

Голубов отини буриб сўқинди-да.

— Юринглар!— деб бақирди.

Худди шу куни Кичик қўшиң қенгаши Константиновка станицасига кўчишга ҳозирланадиган эди. Дон

қўшинининг янги сафар атамани, генерал Попов, қўроли кучларини Новочеркасскдан олиб чиқсан, қўшиннинг қимматли ашёларини ташитдириб олган эди. Эрта билан, Голубовнинг Мелиховскаядан чиқиб, Бессергеневскаяга томон кетаётгани тўғрисида маълумот олинди. Кенгаш Новочеркасски таслим этиш шартлари тўғрисида Голубов билан музокара олиб бориш учун ясовул Сиволововни юборди. Қаршиликка учрамаган Голубовнинг отлиқ аскарлари унинг кетидан Новочеркасска бостириб кирди. Голубовнинг ўзи бирталай казаклар билан бирга, терлаб, кўпирисиб кетган отини Кенгаш биноси томон ҳайдади. Дарвоза олдида бир неча бекорчи одам тўпланиб туради, бир чопар Назаровнинг эгарлоғлиқ отининг жиловидан ушлаб, генерални кутарди.

Бунчук отдан сакраб тушиб, қўл пулемётини кўтариб олди. Голубов кетидан бошқа казаклар билан бирга Кенгаш биносига чопиб кирди. Эшик тарақлаб очилгандаги залдаги вакиллар бошларини ўгириб қарадилар. Уларнинг юзи докадек оқариб кетди.

Голубов кўрик вақтидагидек кескин овоз билан:

— Ўрнингиздан тур-инг!— деб бақирди-да, шошганидан қоқилиб кетди, казаклар қуршовида, президиум столи томон юрди.

Амирона бақириқни эшитгач, Кенгаш аъзолари стулларини тақирлатиб ўринларидан турдилар; Назаров ўридан турмай ўтираверди.

— Кенгашнинг мажлисини тўхтатишга сизнинг қандай ҳақингиз бор?— деб чинқирди у ғазаб билан.

— Сиз қамоққа олиндингиз! Овозингизни ўчиринг!— ғазабидан юзи бўриқиб кетган Голубов Назаровнинг олдига чопиб борди, тужуркасининг елкасидан погонини юлиб олди-да, хириллаб:— Турдэяпман, сенга! Оборинг уни.. Ҳой! Қимга гапирияман!? Олтин погонли!..— деб бақирди.

Бунчук эшик оғзига пулемёт ўрнатди. Кенгаш аъзолари қўй сурусидек фуж бўлиб олдилар. Казаклар Назаровни, қўрқанидан кўкариб кетган Кенгаш раиси Волошиновни ва бир неча одамни судраб Бунчук ёнидан олиб ўтдилар.

Юзи қизариб, бўртиб кетган Голубов қиличини

қўли билан ушлаб, улар кетидан борарди. Кенгаш аъзоларидан бири унинг енгидан тортиб:

— Жаноб полковник, марҳамат қилиб айтсангиз, биз қаёққа борамиз?— деб сўради.

Қувлиги юзидан билиниб турган бошқа бир аъзо унинг елкаси оша қараб:

— Биз кетаверсак бўладими?— деди.

— Менга деса жаҳаннамга кетинг!— деб бақирди Голубов қўл силтаб. Бунчукнинг олдига келгандан кейин Кенгаш аъзоларига юзини ўгириб, ер тепиндида:— Жўна-жўна! Сенлар билан пачакилашиб ўтиришга вақтим йўқ. Боринг!— деди.

Унинг шамоллаб, хириллаб қолган овози анча вақтгача залдан эшитилиб турди.

Бунчук онасининг олдига бориб ётди. Эртаси куни, Сиверс Ростовни олибди, деган хабар келганди, Голубовнинг рухсати билан эрталаб отига миндида, Ростовга жўнади.

У Сиверснинг штабида икки кун ишлади. Сиверс «Окопная правда» газетасининг редактори бўлган маҳалда уни танир эди. Бунчук ревкомга кирди, бу ерда Абрамсон ҳам, Анна ҳам йўқ эди. Сиверс штаби қошида революцион трибунал ташкил этилган эди. Ревтрибунал қўлга тушган оқ гвардиячиларга омон бермай, улар устидан қатъий ҳукм чиқариб турарди. Бунчук бир кун ишлаб суд ишларига ёрдамлашди, облаваларда қатнашди, эртаси куни Аннани кўришга умиди бўлмаса ҳам, бирров кириб ўтиш учун ревкомга жўнади. Зинадан чиқаётганида унинг таниш овозини эшилди. Секин юриб Аннанинг товуши ва кулгиси эшитилган иккинчи хонага кирди-ю, юраги дукурлаб уриб кетди.

Авваллари комендант жойлашган хонанинг ичи тутунга тўлган эди. Бурчакдаги мўъжаз столча ёнида шинелининг тумалари тушиб кетган, солдатча папогининг қулоқлари ечилган одам бир нарсаларни ёзарди, солдатлар ва нимча пўстин ҳамда пальто кийган гражданлар унинг атрофини ўраб олган эдилар. Одамлар тўп-тўп бўлиб чекишар, гурунглашардилар. Анна дераза ёнида эшикка орқасини ўгириб турар, Абрамсон эса панжаларини бир-бири билан

чалмаштирган ҳолда тиззасини ушлаб дераза токчасида ўтиар, унинг олдида латишга ўхшаган новча бир қизил гвардиячи бошини ёнига хиёл эгиб турарди. У папиросини оғзидан олиб, жимжилогини кўтараарди, қандайдир кулгили бир ҳикояни сўзлаётганга ўхшарди. Анна ўзини орқага ташлаб, қаҳ-қаҳлаб кулар, Абрамсон афтини бужмайтириб илжаяр, унинг ёнида ўтирганлар жилмайшиб қулоқ солишар эди. Қизил гвардиячининг эса худди болта билан йўниб ишлангандек елпичтовоқ юзида ақлли, ўткир, кинояли ифода бор эди.

Бунчук қўлини Аннанинг елкасига қўйди.

— Салом, Аня!

Анна қайрилиб қаради. Юзига қон югуриб, қулоқларининг тагигача қизариб кетди.

— Қайси шамол учирди? Абрамсон, мановингга қара! Соппа-соғ, юзи янги баркашдай ярқираб турибди, сен бўлсанг ундан хавотир олиб юрибсан,— деб бидирлади Анна, кўзларини ердан олмай. Кейин уялиб, ўзини йўқотиб қўйганини яширолмагани учун эшик олдига кетди.

Бунчук Абрамсоннинг иссиқ қўлини қисиб кўришди-да, у билан бир оз сухбатлашди, суюнчини ичига сиғдиролмай, юзида бемаъни илжайиш пайдо бўлганини ўзи сезиб турарди, Абрамсоннинг бир саволига жавоб бермасдан (саволнинг маъносини тушуммаган эди), Аннанинг олдига борди.

— Ҳа, яна сўрашиб қўйайлик, қалайсан?— деди Анна.— Соғ-саломат юрибсанми? Қачон келдинг? Новочеркаскданми? Сен Голубовнинг отрядидамидинг? Э, шундоғ дегин... Хўш, нима гап?

Бунчук ундан кўзини олмай, қаттиқ тикилиб, саволларига жавоб қиласарди. Анна унинг кўзларига тик қарай олмай, аланглаб турарди.

— Кел, бир лаҳзага кўчага чиқайлик,— деди Анна.

Шу пайт Абрамсон уларни чақириб қолди.

— Дарров қайтиб келасизми? Ўртоқ Бунчук, сенда зарур бир ишим бор. Сенга бир топшириқ бермоқчимиз.

— Бир соатдан кейин қайтиб келаман.

Кўчага чиққанларида Анна меҳр билан Бунчук-

нинг юзига қаради-ю, ўзидаң хафа бўлгандай қўл силтаб:

— Илья, уялиб кетганим яхши бўлмади-да, худди қиз боладай қизариб-бўзариб кетдим-а. Бунинг сабаби, аввало, кутилмаганда учрашувимиз, иккинчидан, орамиздаги муносабатнинг ноаниқлигидир,— деди.— Аслини суриштирилса, бир-биримизга нима бўламиз? Фойибона севишган «келин ва куёвми». Биласанми, нима бўлди, бир куни Абрамсон Луганскда: «Бунчук билан бирга турсанми?» деб сўраб қолди. Мен «йўқ» дедим, аммо у жуда сергак одам, кўзга ташланиб турган нарсани кўрмаслиги мумкин эмасди. У менга ҳеч нарса демади, лекин кўзларидан сўзимга ишонмаётгани кўриниб турарди.

— Хўш, гапни сендан эшитайлик, ишлар қалай?

— Э, биз бу ерда катта иш бошлаб юбордик! Икки юз ўн бир аскардан иборат отряд туздик. Ҳам ташкилий, ҳам сиёсий ишлар олиб бордик... Ҳам масини икки оғиз сўз билан гапириб бериб бўладиги? Мен кутилмаган учрашувдан эсанкираган эканман, ҳалиям ўзимга келолмаяпман. Сен қаерда... кечаси қаерда ётибсан?—деб сўраб қолди Анна гапни бўлиб.

— Шу ерда... бир ўртоғимницида.

Бунчук алдагани учун уялиб кетди: у Сиверснинг штаби жойлашган хонада тунаб қолган эди,

— Сен шу бугуноқ бизнисига кўчиб келасан. Уйим қаердалиги эсингдами? Бир зақтлар сен мени узатиб қўйган эдинг.

— Уйингни топаман. Аммо... уйингдагилар қиси-либ қолмасмикан?

— Бунақа гапларингни қўй, ҳеч ким сиқилмайди, бу тўғрида энди оғиз очма.

Кечқурун Бунчук лаш-лушкини кенг бир солдатча сумқага жойлаб, Аннанинг шаҳар чеккасидаги уйига келди. Мўъжазгина фиштин уйнинг эшиги оғзида уни бир кампир қарши олди. Кампирнинг юзи Аннаникига сал-пал ўхшарди: унинг ҳам кўзлари тўм-қора, бурни қиррали, аммо юзини ажин босиб, сарғайнib кетган, гишлари тушган, ўрадек бўлиб қолган эди.

— Сиз Бунчукмисиз? — деб сўради ў.

— Ҳа.

— Кира қолинг, айланай. Қизим сиз тўғрингизда гапирувди.

Кампир Бунчукни тор бир ҳужрага олиб кирди, буюмларини қўйишга жой кўрсатиб, шишинқираган бармоқлари билан ҳужрани кўрсатди ва:

— Сиз шу ерда турасиз. Бу каравот ҳам сиз учун қўйилган,— деди.

Кампир сўзларни яҳудийлардек сал-пал бошқача талаффуз этарди. Ўйда ундан бошқа бўйи етмаган, ориққина, кўзлари Аннаники сингари чуқур ўришган бир қиз бор эди.

Бир оздан сўнг Анна ҳам келди. У келиши билан ўй ғовур-ғувурга тўлди, ҳамма жонланиб кетди.

— Бизни ҳеч ким йўқламадими? Бунчук келмадими?

Онаси унга ўз тилида бир нима деб жавоб қилди. Шундан кейин Анна шипиллаб юриб эшик олдига келди.

— Қираверсам бўладими?

— Ҳа.

Бунчук ўрнидан туриб, уни қаршилади.

— Ҳўш, қалай? Жойлашиб олдингми?

Анна кулиб турган кўзлари билан унга қараб, сўради:

— Ҳеч нарса едингми? Юр, бу ёқقا.

Анна Бунчукнинг енгидан ушлаб, биринчи хонагз олиб кирди-да:

— Ойижон, бу менинг ўртоғим,— деб жилмайиб қўйди.— Сиз уни хафа қилманг.

— Гапингни қара-я, нега хафа қиларканман?.. У бизнинг меҳмонимиз-ку.

Кечаси Ростовда бодроқ қовургандай патир-путур ўқ овозлари эшитилди. Ўқтин-ўқтин пулемёт тариллаб, кейин жим бўлиб қолди. Зим-зиё февраль кечаси яна сукунати билан кўчаларни ўз қучогига олди. Бунчук билан Анна шинамгина ҳужрада узоқ гаплашиб ўтирилар.

— Бу ҳужрада мен билан синглим туардик,— деди Анна.— Кўриб турисанки, уйимиз саҳобалар

үйига ўхшайди. На арzon баҳо суратлар, на foto суратлар бор? Гимназистканинг уйига ярашадиган ҳеч нарса йўқ.

— Қандай тирикчилик ўтказар эдингиз?— деб сўради гап орасида Бунчук.

Анна фуур билан жавоб берди:

— Мен Асмолов фабрикасида ишлардим, ҳам дарс берар эдим.

— Ҳозир-чи?

— Ойим кийим тикадилар. Икки киши учун кўп нул керак эмас.

Бунчук Новочеркасскнинг олиниши, Зверево ва Каменск яқинида бўлган жанглар тафсилотини гапириб берди. Анна эса Луганск билан Таганрогда ишлаган пайтларидағи таассуротларини сўзлаб берди.

Соат ўн бирда онаси ўз хонасидаги лампани ўчириши билан Анна чиқиб кетди.

XX

Март ойида Бунчукни Дон ревкоми қошидаги революцион трибуналга ишга юборишиди. Новчадан келган, кўзлари хиралашган, иш ва уйқусизликдан ранг-рўйи кетган трибунал раиси уни дераза ёнига тортиб:

— Нечанчи йилдан бери партиядасан? Э, жуда соз. Шундай қилиб, сен бизда комендант бўласан,— деди қўл соатини силаб қўйиб (у мажлисга шошилаётган эди)— ўтган кеча биз ўз комендантимизни пора олгани учун «Духонин штабига» жўнатдик. Ўзиям одамга озор беришдан лаззатланадиган, беадаб, ярамас одам эди,— бунақалари бизга керак эмас. Бу— ифлос иш, аммо бунда ҳам партия олдидаги масъулиятингни тамомила сақлашинг зарур. Гапимни тушуниб ол, бу ишда,— раис шу кейинги гапни чертиб гапирди,— одамгарчиликни сақлаш керак. Биз зарурат юзасидан контрреволюционерларни мавҳ этамиз, аммо бу ишни ўйинга айлантириб юбормаслик керак. Гапимни уқдингми? Жуда соз. Бор, ишни қабул қилиб ол.

Бунчук шу кечаси ўн олти кишидан ибрат қизил гвардиячилар командаси билан ярим кечада, ўлимга ҳукм қилинган беш кишини шаҳардан уч чақирик нарига олиб чиқиб отиб ташлади. Улардан иккитаси Гниловская станицалик казак, қолганлари Ростов шаҳри гражданлари эди.

Деярли ҳар кун ўлимга маҳкум қилинганларни ярим кечада юк машиналарига солиб, шаҳар ташқарисига олиб чиқардилар, улар учун наридан-бери гүр қазиларди. Бу ишни ўлимга ҳукм қилинганлар, қисман қизил гвардиячилар бажарап эдилар. Бунчук қизил гвардиячиларни сафга тизиб, бўғиқ овоз билан:

— Революция душманларига...— деб наганини силтарди,— ўт очилсин?..

Бир ҳафта ичида у қорайиб, озиб, чўп бўлиб қолди. Кўзлари чуқур тушиб кетган, лип-лип учган қовоқлари кўзларидаги ғам ва ҳасрат ифодасини яширолмасди. Анна уни фақат кечалари кўрарди. Анна ревкомда ишлар, уйига жуда кеч қайтар, аммо ҳар вақт Бунчук келиб, деразани тиқиллатгунча ухламай пойлаб ўтираси эди.

Бир куни Бунчук, одати бўйича, ярим кечадан ешгандан кейин келди. Анна эшикни очиб:

— Овқатланиб оласанми?— деб сўради.

Бунчук жавоб қилмади: маст кишидек гандираклаб, ўз ҳужрасига ўтди-да, шинели, шапкаси, этигини ечмасдан каравотига ўзини ташлади. Анна олдига келиб, юзига тикилди: унинг кўзлари ярим очиқ қолган, қаришиб қолган тишлари орасидан тупуги оқиб тура, тифдан кейин сийраклашиб қолган сочлари пешонасига ёпишган эди.

Анна ёнига ўтирди. Унга раҳми келиб юраги эзилиб кетди. Шивирлаб:

— Илья, бу иш сенга оғирлик қиляптими?— деб сўради.

Бунчук унинг қўлини қисиб қўйди-да, тишларини фирчиллатиб юзини деворга ўгириб олди, чурқ этмай уйқуга кетди. Кейин уйқусираб, бир нима деб фўлдиради, ётган жойида сапчиб-сапчиб тушди. Анна унинг ҳолини кўриб, тепа сочлари тикка бўлиб кет-

ди. Бунчукнинг ярим очиқ қолган кўзлари орқасига тортиб кетган, киприклари орасидан кўзларининг сарғиши оқ соққаси кўриниб турарди.

Эрталаб Анна унга ёлвориб:

— Бу ишни ташла! — деди. — Ундан фронтга кетган яхши. Ранги-рўйинг бир ҳолатда, Илья! Бу иш сени ҳалок қиласди.

Ғазабидан кўзининг пактаси чиқиб кетган Бунчук:

— Бас қил!.. — деб бақириб юборди.

— Бақирмасангчи. Кўнглингга қаттиқ тегдимми?

Бунчук бирдан жим бўлиб қолди, гўё бир бақириш билан юрагини бўшатгандай бўлди. Қўлларига ҳорғин назар ташлаб, деди:

— Мурдор инсонларни ўлдириш — ифлос иш. Одамни отиб ташлаш соглиқ учун ҳам, юрак учун ҳам зарарли... Вой сени... — У Анна олдида биринчи марта беҳаё сўзлар билан сўкинди. — Бундай ифлос ишга ё аҳмоқлар ёки ваҳший одамлар, ёинки мутаассиб одамлар киради. Шундай эмасми? Ҳамманинг ҳам гулзор ичидаги сайдар этгиси келади, аммо савил қолгур гуллар ва дараҳтларни экишдан олдин ерни ахлатлардан тозалаш керак! Ерга ўғит солиш керак! Қўлингни тупроқча булғаш керак? — деди у овозини баланд чиқариб, ҳолбуки Анна ундан юзини ўғириб, миқ этмай ўтиради. — Ахлатларни йўқотиш керак, аммо бу ишдан ҳазар қиласдилар!.. — Бунчук борган сари қизишиб, столни муштлаб, қон тўлган кўзларини пирпиратарди.

Анџанинг онаси эшикдан бош суқиб қаради. Бунчук ўзига келиб, секин гапира бошлади:

— Мен бу ишдан кетмайман. Үзимнинг фойдали иш қилаётганимни кўриб турибман, ҳис этиб турибман? Ахлатларни чиқариб ташляяпман! Ер унумдор бўлсин деб ўғитляяпман? Серҳосил бўлсин деб! Бир вақт келиб, бу ер устида баҳтли одамлар кезади... Эҳтимол, ҳали туғилмаган ўғлим кезади... — деб кулади у хириллаб. — Мен у газандалар... каналарнинг қанчадан-қанчасини отиб ташладим. Кана шундай ҳашаротки, баданинг ичига кириб кетади... Мен бу ифлосларни ўнлаб ўз қўлим билан ўлдирдим... —

Бунчук калхат панжасидай тирноқли, қора тук босган, маҳкам юмилган муштини узатиб кўрсатди; кейин қўлларини тиззаси устига қўйиб, шивирлаб деди:—Умуман, ер ютсин уларни! Ёнадиган бўлсанг гуриллаб ён, сасиб ёнма... Лекин чарчаганим рост... Бир оз вақт ўтсин, кейин фронтга кетаман... сен ҳақлисан.

Анна унинг гапига индамай; қулоқ солиб турдида, аста деди:

— Ё фронтга кет, ёки бошқа ишга ўт... Кет, Илья, бўлмаса... миянг айниб қолади.

Бунчук унга орқасини ўгириб, ойнани чертди.

— Йўқ, мен қалин-қаттиқ одамман... Сен, албатта, темирдек одамлар бор деб ўйлама. Биз ҳаммамиз бир хил материалдан қилингандик... Урушда қўрқмайдиган, одам ўлдирганда азоб... руҳий азият чекмайдиган одам йўқ... Аммо погонларга кишининг юраги ачишмайди. Улар сен билан биздек онгли одамлар. Менга қара, кеча отиб ўлдирилган тўқизиши ичидан уч меҳнаткаш... казаклар бор эди... Бирининг қўлини еча бошладим...— Бунчук гўё боргандек, сари узоқлашиб кетаётгандек, товуши секин ва ноаник эшитила бошлади:— Қўлини ушласам — чармадек... қаттиқ... қўлини қадоқ босган... Қоп-қора қафти ғадир-будур... қавариб кетган... Хайр, мен кетдим, деди у гапини шартта бўлиб. Аннага билдиримай, худди жун арқон билан бўғилгандек томирлари тортишиб қолган бўйини ишқалаб қўйди.

У этигини кийди, бир стакан сут ичиб чиқиб кетди. Анна унинг кетидан югуриб, коридорда етиб олди. Унинг оғир қўлини ўз қўллари орасига олиб турди-да, қизариб, ловиллаб кетган юзига маҳкам босди-ю, сўнгра чопганча ҳовлига чиқиб кетди.

* * *

Кун исиб кетди. Баҳор Доннинг этагидан бошлаб юқорисига томон силжимоқда. Мартнинг охирларида гайдамаклар ва немислар томонидан мағлубиятга учраган украин қизил гвардиячи отрядлар Ростовга кела бошладилар. Шаҳарда одам ўлдириш, таланчилик, ўзбошимчалик билан бирорларнинг молиди:

мусодара қилиш ҳодисалари юз бера бошлади. Ревком сўнг даражада интизоми бузилган отрядларни қуролсизлантиришга мажбур бўлди. Бу иш тўқнашиз, отиш-тутишсиз ҳал бўлмади. Новочеркасск яқинидаги казаклар бош кўтара бошладилар. Март ойида теракларнинг куртаклари бўртиб қолгандек, станицаларда ҳам казаклар билан келгинди дехқонлар ўртасидаги зиддият зўрайиб кетди, баъзи жойларда исён кўтарилиди, контрреволюцион фитналар очилди. Ростов эса қизғин бир ҳаёт кечирмоқда эди: кечалари Большая Садовая кўчасида солдат, матрос, ишчилар кезиб юрар эдилар. Улар митинг қилишар, писта чақишар, пўчогини йўлкаларнинг четида оқиб турган ариқларга туфлаб ташлашар, хотинларга тегишар эдилар. Илгаригидек ишлар, овқат ейир, ичар, ухлар, ўлар, туфар, севар, душманлашар, денгиздан эсган шўртак ҳаводан нафас олар, каттакичик эҳтиросларга берилар эдилар. Ростов устига фалокатли кунлар келмоқда эди. Ҳаводан эриган қора тупроқ ернинг ва яқинлашиб келаётган жангларнинг қонли ҳиди келмоқда эди.

Шундай серқуёш, ажойиб кунларнинг бирида Бунчук уйига ҳар вақтдагидан эртароқ келди ва Аннани кўриб ҳайрон қолди.

— Сен-ку ҳамиша кеч келардинг, бугун нега эрта келдинг? —

— Бугун тобим йўқроқ.

Анна унга эргашиб ҳужрасига кирди. Бунчук ечинди-да, хурсандлигидан титраб, илжайиб туриб:

— Аня, бугундан бошлаб трибуналда ишламайман,— деди.

— Ростдан-а? Сени қаёққа юборишмоқчи?

— Ревкомга. Бугун Кривошликов билан гаплашдим. У мени бирор округга юборишга сўз берди.

Улар кечки овқатни бирга едилар. Бунчук ухлагани ётди. У ҳаяжонлангани учун узоқ вақтгача ухлаёлмади, папирос чекди, қаттиқ тўшак устида тўлғаниб, хурсандлигидан чуқур-чуқур нафас оларди. У, трибуналдан кетаётганига жуда хурсанд эди, чунки яна бир оз ишласа мазаси кетиб қолишини биларди. У тўртинчи папиросни чекиб тутатганда

Эшик ғичиллаб очилди. Бошини кўтариб қараса, Анна экан. У яланг оёқ, ич кўйлакда, бўсағадан ҳатлаб ўтиб, аста унинг каравоти ёнига келди. Дераза қопқоғининг тирқишидан унинг яланғоч елкасига кўкиш ой нури тушиб турарди. У энгашди да, қайнок кафтини лаблари устига қўйди.

— Нарроқ сурил. Жим...

Анна Бунчукнинг ёнига ётди-ю, сабрсизлик билан самбиттол новдасидек оғир соchlарини пешонасидан олиб ташлади, хумор кўзлари чақнаб кетди-ю, ўзини зўрлаб, дангал гапирди.

— Бугун бўлмаса, эртага сендан айрилиб қоламан... Мен сени жону таним билан севишни истайман? — Анна ўзининг журъатидан қўрқиб кетиб: — Тезроқ бўла қол! — деди.

Бунчук уни ўпди-ю, лекин ўзининг ожизлигини ҳис этиб даҳшатга келди, уялганидан ерга кириб кетгудек бўлди.

Бунчукнинг боши қалт-қалт қиласар, икки бети ловуллашиб ёнарди. Анна унинг қучоғидан чиқиб, жаҳл билан итариб ташлади, нафрatiдан, жирканганидан нафаси тиқилиб, шипшиш билан сўради.

— Сен... сенинг эрлик қувватинг йўқми? Ёки сен... касалмисан? Э-воҳ, қандай шармандалик?.. Қўлингни торт, мендан!

Бунчук Аннанинг панжасини шундай қисдики, бармоқлари сал-пал қирсиллаб кетди, унинг катта очилган адоват тўла кўзларига тикилиб, дудуқланиб, бошини қалтиратиб туриб сўради:

— Нима айбим бор? Нега мени мазамат қиласан? Ҳа, илигим қуриган!.. Ҳатто шу ишга ҳам ҳозир қодир эмасман... Қасал эмасман... гапимга қулоқ сол! Мен адой-тамом бўлганман... Оҳ-ҳ...

У бўғиқ овоз чиқариб ингради, каравотдан сакраб тушиб, папирос чекди. Қалтак еган кишидек, анчагача дераза ёнида букчайиб турди.

Анна ўрнидан турди-ю, уни қучоқлаб, она каби пешонасидан ўпди.

Бир ҳафтадан кейин Анна ўтдек ёнган юзларини унинг қўллари остига яшириб:

— ... Мен, қувватингни сарф қилиб қўйгансан деб

ўйловдим... Иш илигингни қуритганини билмаган эканман,— деди.

Шундан кейин Бунчук ёлғиз севгили хотиннинг навозишини эмас, балки унинг тўлиб-тошган, илиқ оналик меҳрини ҳам ҳис этди.

Бунчукни четга жўнатмадилар. Подтелковнинг талаби билан уни Ростовда қолдирдилар. Дон ревкомининг иши бошидан ошиб ётган пайт эди. Ревком вилоят Советлар съездига ва Доннинг нариги томонида яна бош кўтарган контреволюцияга қарши курашга ҳозирланмоқда эди.

XXI

Сой бўйидаги самбиттолларнинг орқа томонида қурбақалар қуриллашади. Қуёш тепа орқасига ўтиб олган. Сетраков хуторига кечки салқин тушган. Қуруқ ўйлустига уйларнинг узун эгри-буғри соялари тушиб турибди. Даشتдан йилқилар қайтиб келган. Казак аёллар бир-бирларига янгиликларни гапириб бериб, қўлларида чивиқ билан сигирларини ўтлоқдан ҳайдаб келишмоқда. Тор кўчаларда яланг оёқ, офтобда қорайган казак болалари бир-бирларининг устларидан сакрашиб ўйнашади. Чоллар эшик оғзидағи супачаларда виқор билан ўтиришибди.

Қишлоқ экин-тикиндан қутулган, баъзи жойлардагина тариқ ва кунгабоқар экаётган эдилар.

Энг чеккадаги ҳовли олдидаги эман ёўлалари ўстида бир неча казак ўтиради. Уй эгаси, чўтири тўпчи герман урушида бўлган бир воқиани ҳикоя қиласар эди. Суҳбатдошлари — чол қўшниси билан куёви бўлган ёш, қўнғироқ соч казак унинг гапига индамай қулоқ солиб ўтиришарди. Уй эгасининг бояр хотинига ўхшаган баланд бўйли, кўркам, тўлагина хотини зинадан тушди. Этаги юбка ичига тиқилган, пушти ранг кўйлагининг енги шимарилган, қорача, дўмбоқ билаклари ялангоч эди. У чеълак кўтариб казак аёлларга хос эркинлик билан олифтачасига қадам ташлаб оғилхонага ўтиб кетди. Синъкаланган оқ рўмол билан танғилган сочи тўз-

ғиган (ү ҳозиргина таппи қалаб, печкани эртага овқат пиширишга тахт қилиб қўйган эди), яланг оёғига илиб олган кавшлари шалоплар, ҳовлида ўсиб, кўрпа бўлган кўқатларни аста босиб юарди.

Ғўла устида ўтирган казакларнинг қулоғига челакка соғилган сутнинг чиртиллаган овози эши-тилди. Уй бекаси сигирини соғиб бўлиб, челакни кўтарган чап қўли томонга бир оз эгилиб, уйига қараб қадам ташлади. Остонадан туриб, ёқимли овоз билан:

— Сёма, бузоқни қидириб топиб келсанг-чи!— деди.

— Митяша қаёқда?— деб сўради уй эгаси.

— Қайси гўрга кетган, ким билади дейсан.

Эри эран-қаран ўрнидан турди-ю, муюлиш томонга қараб кетди. Чол билан куёви ҳам уйларига жўнай. деб турганларида, уй эгаси:

— Дорофей Гаврилич, баққа кел!— деб чақириб қолди.

Чол билан куёви унинг олдига келишди. Қазак индамай қўли билан даштни кўрсатди. Йўл устини қоллаган қўнғир чанг-тўзон яқинлашиб келмоқда эди. Унинг орасидан саф-саф бўлиб келаётган пиёда, отлиқ аскарлар, аравалар кўринди.

Чол ҳайрон бўлиб, кўзларини қисиб қаради-да, кафтини оппоқ қошлари устига қўйиб:

— Булар аскар эмасмикан?— деди.

— Булар ким бўлдийкин?— деб безовталанди уй эгаси.

Унинг хотини дарвозадан чиқиб олдиларига келди, энди у кофтасини кийиб олган эди. Аёл даштга қараб турди-да, ҳанг-манг бўлиб:

— Вой, булар кимлар? Э худойим, еру кўкни одам босиб кетибди-я!— деди.

— Афтларидан яхши одамларга ўхшамайди..

Чол жойида депсиниб туриб, кейин ўз уйи томон жўнади, куёвига:

— Бор уйингга, бу ерда пишириб қўйибдими?— деб ўшқирди.

Болалар ва аёллар төр кўчанинг бошига қараб югуришиди, казаклар тўп-тўп бўлиб уй томонга бо-

рар эдилар. Даشتда, қишлоқдан бир чақирим нарида аскарлар колоннаси келар; шамол ғовур-ғувур товушлар, отларнинг кишнаши, ғилдиракларнинг гумбурлашини келтирас эди.

— Булар казаклар эмас... Бизникларга ўхшамайди,— деди казак аёл эрига.

У елкасини қисиб қўйди.

— Албатта казаклар эмас. Немислар келаётган бўлмасин тағин. Йўқ, руслар... Қара, яловлари қизил!. Э, бундан чиқди улар...

Новча атаманли казак улар олдига келди. Кўринишдан безгаги тутиб турганга ўхшарди: ранги сомондек сап-сариқ, эгнида пўстин, оёғида пийма бор эди. У ҳурпайган папогини сал кўтариб.

— Кўряпсанми, байроқларини? Большевиклар,— деди.

— Ҳа, большевиклар.

Колоннадан бир нечада отлиқ ажралиб чиқди. Улар қишлоққа қараб от чоптириб келавериши. Казаклар бир-бирларига қараб қўйиб, индамай тарқалишиди, қизлар ва болалар чекка-чеккага тўзиб кетишиди. Беш минутдан кейин кўчада ҳеч зоғ қолмади. Отлиқлар ёпирилиб тор кўчага киришди, отларини ниқтаб, чорак соат илгари казаклар ўтирган ғўлалар олдига келишди. Ўй эгаси бўлган казак дарвоза олдида қаққайиб турарди. Энг олдиндаги отлиқ (афтидан, уларнинг бошлиғи бўлса керак) човкар оғминган, кубанка кийган, белини камар билан танғиган, пистоқи ранг қўйлагига катта қизил лента таққан киши отини дарвоза олдида тўхтатиб:

— Салом бердик, хўжайин. Дарвозангни оч,— деди.

Тўўчининг чўтири юзи оқариб кетди:

— Сизлар ким бўласизлар?

— Дарвозани очсанг-чи!— деб бақирди кубанка кийган солдат.

Човкар от, бетоқатлик билан кўзларини чақнатиб, кўпирлиб кетган оғзидаги сўлигини чайнаб, олдинги оёғи билан четан деворни тепа бошлади. Казак дарвозани очди, отлиқлар бирин-кетин қўрага кирдилар.

Кубанка кийган отлиқ эпчиллик билан эгардан тушди, от минавериб қийшайиб қолган оёқлари билан катта-катта қадам ташлаб зинапоя томон юрди. Қолган отлиқлар эгардан тушгунларича зина босқичига ўтириб, портсигарини чиқарди. Папиросини тутатаётіб, уй эгасига чекишни таклиф этди. Казак чекишдан бош тортди.

— Чексанг-чи!

— Раҳмат.

— Бу ердагилар эски мазҳабдами?

— Иўқ, православ динида... Ўзингиз ким бўла-сиз?— деб сўради казак қовоғини солиб.

— Бизми? Иккинчи социалистик армиянинг қизил гвардиячилари.

Қолганлар ҳам отдан тушгандан кейин отларини етаклаб зинапоя олдига келишди. Улардан бири — сочи отнинг ёлидек пахмайиб кетган дароз солдат қўйхонага қараб юрди. У гўё шу уйнинг эгасидек, қўйхонанинг эшигини очди, бошини энгаштириб тўсиқ тагидан ичкари кирди-да, қўйруғи катта дўнан қўчкорни шохидан судраб олиб чиқди.

— Петриченко, бу ёққа кел, қарашвор! — деб қичқирди у кескин товуш билан.

Калта австрицца шинель кийган қичкинагина солдат югуриб келди. Уй эгаси бўлган казак, гўё бироннинг қўрасига кириб қолган кишидек, соқолини силаб турар эди. У фиринг демади. Фақат қилич билан бўғизланган қўчкор ингичка оёқларини питирлаётганда томогини қириб қўйиб, зинапоя томон юрди.

Кубанка кийган солдат билан яна икки киши: бири — хитой, бошқаси камчаткаликка ўхшаган солдат казак орқасидан эргашиб уй ичига киришди.

— Хўжайнин, хафа бўлма,— деди кубанлик осто-надан ҳатлаб ўтаркан тагдор қилиб,— биз ошиғи билан тўлаймиз.

У шимининг чўнтағига уриб, қиқиrlаб кулиб қўйди, кейин бирдан кулгидан тўхтаб, уй эгасининг хотинига тикилиб қолди. Аёл тишини тишига қўйиб, печка ёнида турар, унга жовдираб қаарди.

Кубанлик хитойга ўгирилиб, олазарак бўлиб:

— Сен, хўжайин билан (у бармоғи билан уй эга, сини кўрсатди) бирпастга чиқиб тур,— деди,— у билан бирга чиқ, отларга беда беради... Бор, беда бер. Эшиятсанми? Биз ортиғи билан тўлаймиз! Қизил гвардия таланчилик қилмайди. Бор, казак, тезроқ бўл!— Кубанликнинг овозида таҳдид оҳанги эшитилди.

Казак хитой билан яна битта солдатнинг олдиға тушиб, орқасига бир қараб қўйди-да, уйдан чиқиб кетди, лекин зинадан тушиши билан хотинининг йиғлаган товушини эшилди. Орқасига қайтиб, югурганича даҳлизга кириб, эшикни қаттиқ тортди. Қичкина илгакнинг зулпуни чиқиб кетди. Кубанлик тўлагина аёлнинг яланғоч билагидан ушлаб, ним-қоронғи даҳлизга судрамоқда эди. Аёл тихирлик қилиб, унинг кўкрагидан итарарди. Кубанлик унинг белидан қучоқлаб, даст кўтариб даҳлизга олиб кириб кетмоқчи бўлиб турганда, эшик тароқлаб очилниб кетди. Қазак катта-катта қадам ташлаб бориб, хотинининг олдини тўсади. У паст елимшиқ овоз билан деди:

— Сен уйимга меҳмон бўлиб келдинг... нега энди хотинимни хафа қиласан? Бу нима қилиқ? Қоч! Қурол-яроғингдан қўрқадиган одам йўқ! Олганингча ол, тала, лекинига бировнинг хотинига шилқимлик қилма! Үлигимнинг устидан ҳатлаб, бу ишни... Нюрка, сен ҳам... у бурун катакларини кериб, хотинига ўғирилди:— чиқ бу ердан, Дорофей тоганинг уйига бор. Бу ерда қиладиган ишинг йўқ.

Кубанлик кўйлак устидан боғлаган камарини тўғрилаб, оғзини қийшайтириб қўйди:

— Войбўй, жудаям сержаҳл экансан-у, хўжайн... ҳазиллашиб ҳам бўлмас экан-да... Менинг ҳазилкашлигимни ротадагиларнинг ҳаммаси билади. Мен бу ишни жўртталикка қилдим. Кел, бу аёлни бир синаб кўрай дедим, у бўлса чивин тегмай чириллайди... Сен отларга беда бердингми? Беда йўқми? Қўшниларда-чи?

У ҳуштак чалиб, қамчисини ўйнатиб, уйдан чиқди Кўп ўтмай, бутун отряд қишлоқقا етиб келди. Отрядда саккизта отлиқ ва пиёда аскар бор эди. Қизил гвардиячилар тунаш учун қишлоқдан нари-

роқда манзил қурдилар. Отряд командири турли халиқлардан ташкил топган бебош солдатларига ишонмаганидан, қишлоқда тунашни истамади.

Гайдамаклар ва Украинани оёқ ости қылган немислар билан бўлган урушда шикаст еган 2-нчи социалистик армиянинг Тирасполь отряди жанг билан душман ҳалқасини ёриб ўтиб, Донга етиб келди. Улар Шептуховка станциясида вагонлардан тушди, лекин олдинда немислар бўлгани учун, шимолга, Воронеж губерниясига етиб олиш мақсадида, саф тортиб Мигулин станицасига қаравали қишлоқлардан босиб ўтди. Отрядга кириб олган бирталай жиноятчи унсурларнинг таъсири остида ахлоқлари бузилган қизил гвардиячилар йўлда ўзбошимчалик қилиб келди. 17 апрелга ўтар кечаси Сетраков қишлоғи яқинида тунаш учун манзил қурган солдатлар, командирлар составининг таҳди迪 ва ман қилишига қарамай, тўп-тўп бўлиб, қишлоққа келиб, қўйларни бўғизлай бошлишди, қишлоқ чеккасида икки казак аёлини зўрлашибди майдонда бекордан-бекорга милтиқ отишиб, ўз одамларидан бирини ярадор қилишди. Кечаси қоровулга қўйилган солдатларнинг ҳаммаси ичкилик ичиб маст бўлиб қолди (ҳар бир аравада спирт топилар эди). Шу пайт хутордан атрофдаги қишлоқларга юборилган уч отлиқ казак ҳаммани оёққа турғизди.

Казаклар тун қоронфисида отларини эгарлаб, қуролланиб олишди-да, фронтчилар ва чоллардан отрядлар тузишди ва қишлоқларда яшаган офицерлар ёинки вахмистрлар бошчилигида Сетраковга йиғилишди, қизил гвардиячилар отрядини ўраб олиб жарликларда, дўнглар орқасида биқиниб ётишди. Мигулиндан, Колодезнийдан, Богомоловдан кечаси яrim-ёрти сотнялар етиб кела бошлади. Верхнечирликлар, наполовликлар, калиновликлар, ейликлар, колодзянликлар оёқланди.

Осмонда Ҳулкар юлдузининг нури ўчди. Тонг ёриша бошлагач, казаклар сурон кўтариб, ҳар тарафдан қизил гвардиячилар устига от солдилар. Пулемёт тариллай бошлади, лекин дарров овози ўчди, палапартиш отилган ўқларнинг овози ҳам

тинди, қиличларнинг визиллаган овозигина эшитиларди.

Бир соатдан кейин иш тামом бўлди: отряд бутунлай тор-мор қилинди, икки юздан ошикроқ одам қиличдан ўтказилди, отиб ўлдирилди, беш юзтасаси асир олинди. Тўрт тўпдан иборат икки батарея, йигирма олти пулемёт, мингта милтиқ бирталай анжом ва аслаҳа казаклар қўлига тушди.

Эртасига бутун округ бўйлаб катта тош йўллар ва сўқмоқларда қизил байроқчаларини ҳилпиратиб хабарчилар от чопгириб юрар эдилар. Станицалар ва қишлоқлар ари инидек ғувиллар эди. Маҳаллий Советларни йиқитиб, дарҳол атаманлар сайлашарди. Казанск ва Вешенская станицаларининг сенялари Мигулинга кечикиб келишиди.

Апрелнинг йигирмаларида Донец округининг юқори қисмидаги станицалар ажралиб чиқди. Улар ўз округларини тузиб, унга юқори Дон округи деб ном беришди. Вилоятда аҳолисининг сони, ўзига қарашли бўлган қишлоқларнинг кўплиги жиҳатидан Михайловскдан кейин иккинчи ўринда турган Вешенская округ маркази қилиб белгиланди. Кўп ўтмай, аввали ги қишлоқлар станицаларга айлантирилди. Шумилин, Каргин, Боков станицалари пайдо бўлди. Йигирма станица ва битта украин волостини ўзига қаратиб олган Юқори Дон округи марказдан ажралиб, мустақил бўлиб олди. Юқори Дон округи составига собиқ Донец округининг қўйидаги станицалари: Казанск, Мигулин, Шумилин, Вешенская, Елан, Каргин, Боков, Пономарев волости; собиқ Усть-Медведица округидан: Усть-Хопер, Краснокустк, Хопер округидан: Букановск, Слашчевск, Федосеев станицалари кирди. Елан станицасининг казаги, ҳарбий академияни битирган генерал Захар Акимович Алферов бир оғиздан округ атамани қилиб сайдланди. Алферов тўғрисида шундай гаплар юрарди; ҳеч нарсаси қолмаган бу казак офицери серфайрат ва ақлли хотинининг ҳаракати билан одам қаторига кирган; бу истеъдодсиз офицер уч марта имтиҳондан йиқилибди, тўртинчи имтиҳондан аранг ўтиб, академияга киргандан кейингина, хотини уни тинч қўйибди.

Лекин бу кунларда Алферов орқасидан кўп гапиришмас эди. Одамларнинг мияси бошқа нарсалар билан банд эди.

XXII

Тошқин сувлар камая бошлади. Полиз четанлари ёнидаги ўтлоқзорда соз тупроқли қўнгир ерлар ялан-ғочланиб қолди. Сув билан оқиб келган хас-чўп, қуруқ қамишлар, шох-шаббалар, қўгалар, бултурги хазонлар тошқин жойлар четига лентадай тизилиб қолган. Дарё бўйидаги толзор сув ичида қолиб, толларнинг учи кўкариб кўринар, попуклари сувга осилиб турарди. Тераклар куртак чиқара бошлаган, қишлоқдаги қўралар атрофида тошқин ичида қолган қизил толларнинг новдалари сувга энгашган. Ўрдак жўжалариға ўхшаган сап-сариқ момиқ кучалалар шамолда чайқалиб, сув бетида сузуб юрарди.

Ёввойи ғозлар, ўрдак галалари тонг ғира-ширасида овқат излаб, полизларга сузуб келарди. Дарёнинг адогидаги чакалакзорда саҳар пайтида ўрдаклар ғафалашиб юрарди. Кундузлари, туш пайтида ҳам, шамолда тўлқинланган Доң устида ола-була чурраклар чайқалиб сузуб юрарди.

Ўша йили қушлар жуда кўп учиб келган эди. Балиқчи казаклар қайнұларда тўрлар ёнига йўл олишар экан, тонг пайти, офтоб қизариб чиқиб сувда акс этган маҳалда, сув босган чакалакзор ичида яшириниб дам олаётган оққушларни бир неча марта кўрганлар. Аммо Христоня билан Матвей Қашулин бобо қишлоққа келтирган янгилик ҳаммадан ҳам ажиброқ эди. Улар иморатбоп ёғоч кесиб келиш учун хазинага қарашлик ўрмонзорга борган эканлар. Ўрмон ичига кираётганда чакалакзор ичида ётган болалик ёввойи эчкини ҳуркитиб юборибдилар. Тўнғизтароқ ва тиканаклар ўсган чакалакзор ичиндан сарғиш-қўнгир, ориқ эчки чопиб чиқибди-да, баландликда туриб, дараҳт кесувчиларга бир неча секунд қараб қолибди, кейин ингичка, чиройли оёқлари билан депсиниб турибди, боласи пинжига суқулиб турган экан. Христонянинг ҳайрат ичида «уҳ!»

деганийни эшитиши биланоқ, урасолиб чакалакзэр ичига кириб кетибди, казаклар кумушсимон туёғини-ю, калтагина сарғиш думини кўриб қолишибди.

Матвей Кашулин болтани қўлидан тушириб юбориб:

— Қанақа жонивор экан бу? — деб сўрабди.

Бирдан завқланиб кетган Христоня сеҳрлангандай сукут ичидаги турган ўрмоннинг тинчлигини бузиб:

— Эчки бўлса керак! Ёввойи эчки! Вой қурматур-э! Бизлар бунақасини Карпат тоғларида кўрган эдик, — деди.

— Бундан чиқди бу жониворни биз томонларга уруш ҳайдаб кепти-да.

Христонянинг бу гапга қўшилмай иложи йўқ эди.

— Шундоғ. Кўрдингми, бобо, эчкини? Вой, ҳаром қоттур-э! Қурғур бирам яхшики! Ёшгина-я!

Улар қайтишда Дон вилоятида кўрилмагаң жонивор тўғрисида гаплашиб келдилар.

Матвей бобо кейин шубҳаланиб:

— Эчки бўлмаса-чи? — деди.

— Эчки, худо урсин, эчки! Бўлак нарсамас.

— Балки... башарти эчки бўлса, нега шохи йўқ.

— Шохини бошингга урасанми?

— Тўғрику-я. Агар у эчки наслидан бўлса... нега аслига тортмаган деяппан-да. Шохсиз эчки кўрганинг борми? Ҳа. Балки ёввойи қўйдир?..

— Матвей бобо, эсингни еб қўйганга ўхшайсан, — деб ўпқаланди Христоня. — Ишонмасанг, Мелеховникига бориб кўргин. Ўғли Гришканинг қамчи дастаси эчки оёғидан қилинган. Ишонасанми, йўқми?

Уша куни Матвей бобо Мелеховларникига борди. Ростдан ҳам, Григорийнинг қамчи дастасига ёввойи эчкининг оёқ териси қоплама қилинибди. Ҳатто дастанинг учидаги кичкина туёқчалик ҳам бор. Туёқчага жуда усталик билан чиройли мис тақа ҳам қоқи-либди.

Рўзанинг олтинчи ҳафтасида чоршанба куни Мишка Кошевой ўрмон ёқасида сувга ташлангани тўрни текшириш учун барвақт борди. Уйдан тонг старда чиққан эди. Тонг совуғида ерлар музлаб, лой-

лар қотиб қолган эди. Қалта пахталик нимча, чориқ, оқ пайпоги ичига почаси тиқилган чалвор кийган Мишка фуражкасини гарданига суреб қўйган, рутубатли сув ҳиди анқиган муздек ҳаводан нафас олиб, елкасига узун эшкак қўйиб кетмоқда. У катта қайиқни ечди-да, эшкакни қаттиқ эшиб, тик турган ҳолда сузиб кетди.

Сувга ташлаб қўйган тўрларини нари-бери текшириб, энг четдагисидан битта балиқни олди-ю, тўрни яна тўғрилаб, тузатиб сувга ташлади. Сал нарироқ бориб, чекмоқчи бўлди. Кун ёришиб келаётган эди. Кун чиқарда бўзарган осмон этагига гўё қон сачрагандек эди. Қон уфққа сингишиб, заррин тус олган эди. Мишка секин парвоз қилиб кетаётган ўрдакнинг учишини томоша қилиб, тамаки чекди. Паға-паға тутунлар буталар орасига кириб кетар эди. Тўрга тушган учта тангабалиққа, саккиз қадоқ келадиган зоррабалиқ, бир тўда оқбалиққа қараб, ўйланиб қолди:

«Бир қисмини сотса ҳам бўлади. Лукешка ғилай олади. Нок қоқига алишаман. Ҳаммасини онам пишириб улгуролмас».

Папиросини чекиб, пристанга қараб сузиб кегди. Қайиқ боғлайдиган полиз четани ёнида бир одам ўтиради. Мишка абжирлик билан эшкак эшиб қайиқни ҳайдар экан: «Ким бўлдийкин бў?» деб ўйлади.

Четан девор ёнида чўнқайиб Валет ўтиради. У газета қофозига катта қилиб ўралган тамаки чекарди. Сичқонникига ўхшаган митти кўзлари уйқусираган, соқоли тиканакдек ўсган эди.

— Нима қилиб ўтирибсан?!— деб бақирди Мишка. Унинг овози сув устида янграб эшитилди.

— Бу ёқقا кел-чи.

— Балиққа келдингми?

— Бошимга ураманми балиқни?

Валет қаттиқ йўталиб, балғам тупурди-да, истаристамас ўрнидан турди. Қўргичга кийинтирган чопондек катта узун шинель устида осилиб турар эди. Фуражкасининг салқи айвони қулогининг кемирчагини беркитиб турарди. У қишлоққа яқиндагина келган, қизил гвардиячи деб ёмон ном чиқарган эди.

Қазаклар ундан, армиядан бўшагандан кейин қаерда бўлдинг, деб сўрашган, аммо Валет дудмол жавоб қилган, ўзи учун хатарли бўлган гапни бошқа ёққа бурган эди. Иван Алексеевич билан Мишка Кошевойга тўрт ой Украинаадаги қизил гвардиячи отрядда бўлдим, гайдамакларга асир тушдим, ундан қочиб Сиверс отрядига қўшилдим, у билан Ростов атрофида жавлон урдим, кейин ўзимга ўзим отпуска бериб, жўнаб қолдим, деган эди.

Валет бошидан фуражкасини ечиб, тикандек сочларини силади. Аланглаб, қайиқ олдига яқинлашдила, хириллаб:

— Йашлар чатоқ... чатоқ... Балиқ овлашни йиғишири. Балиқ билан овора бўлиб, ҳамма нарсани бой бериб қўямиз,— деди.

— Нима янгиликлар бор, айт!

Мишка унинг қоқсуяк қўлини балиқ ҳиди уриб қолган қўли билан ушлаб кўришида-да, илжайди. Йккиси қадрдон дўст эди.

— Мигулин ёнида кеча қизил гвардияни тор-мор қилдилар. Расо олиш-тутиш бўлди, оғайнни. Қирғин бўлди.

— Қайси нисини? Нега Мигулинда?

— Станицадан ўтиб кетишатувди, казаклар савалаб қолиши... Бирталай асирларни Каргинга ҳайдаб кетиши! У ерда ҳарбий-дала суди патиллатиб ҳукм чиқариб турибди. Ҳозир мобилизация. Қарабтур, эртага эрталаб жом чалиб қолишади.

Кошевой қайиқни боғлаб, балиқларни тўрвасига солди-да, эшкакни ҳасса қилиб, катта-катта қадам ташлаб кетди. Валет эса унинг ёнида майда қадам ташлаб борар, гоҳ олдинга ўтар, шинелининг этакларини йиғишириб олиб, қўлини қаттиқ силкитиб кетарди.

— Менга буни Иван Алексеевич айтди. У шу топдагина мендан навбатчиликни олди. Тегирмон бутун кечаси билан гупиллаб ишлаб чиқди, фалла тўлиб ётибди. Иван Алексеевич унинг ўзидан эшишибди. Сергей Платоновичнинг олдига Вешенскаядан алла-қандай бир офицер от чоптириб кепти.

— Энди нима бўлади? — Уруш йилларида бало-

ғатга етиб, силлиқлашган Мишканинг юзида саросималик пайдо бўлди. У Валетга кўз қирини ташлаб:— Энди нима бўлади?— деб сўради яна.

— Қишлоқдан кетиш керак.

— Қаёққа?

— Каменска.

— У ерда ҳам казаклар бор-да.

— Чапроққа.

— Қаёққа?

— Обливига.

— Қандай ўтса бўлади?

— Астойдил хоҳласанг — ўтасан. Бўлмаса, қолавер. Баттар бўл! — деб пўнғиллади Валет, — «Қаёққа, қаёққа» дейди. Мен қаёқдан билай? Исканжага олса, сичқоннинг ўйини ижарага оласан.

— Сен кўпам қизишма. Қизишган киши нима бўлишини биласанми? Иван нима дейди?

— Сенинг Иванингни қўзғатгунча...

— Кўп шангиллама. Ҳув анови хотинни кўряпсанми, қараб турибди.

Улар хавотирланиб, Авдеич Лопчининг оғилдан мол ҳайдаб чиқаётган ёшгина келининга қаравади. Биринчи муюлишга етганда Мишка орқага қайтди.

— Қаёққа? — деб ҳайрон бўлиб сўради Валет.

Кошевой орқасига қарамай:

— Тўрларни опкеламан, — деди.

— Нега?

— Бекорга қолиб қетмасин.

— Демак кетамиз,— деди суюниб Валет.

Мишка эшкакни силкиб, узоқдан:

— Сен Иван Алексеевичниги бор. Мен тўрларни уйга элтиб ташлаб, дарров келаман,— деди.

Иван Алексеевич ўзига яқин казакларни хабардор қилиб қўйган эди. Унинг ўғли Мелеховларникига бориб, Григорийни бошлаб келди. Христоня эса бир фалокатни сезгандай ўзи етиб келди. Кўп ўтмай Кошевой ҳам келди. Маслаҳат бошланди, Ҳаммалари шошиб, бараварига гапиришар, минут сайн жом чалинишини кутишарди.

— Ҳозироқ жўнаб қолиш керак! Шу бугуноқ жуфтакни тўғрилаш керак,— деди Валет ҳаяжонланиб.

— Сен сабабини айт. Нега кетишимиз керак?— деб сўради Христоня.

— Негамиш-а! Мобилизация бошланади. Ҳаялласанг, илинасан.

— Бормайман-қўйман-да.

— Судраб оборишади.

— Обориб бўпти. Мен бузоқмидимки судрасалар.

Иван Алексеевич филай хотиники уйдан чиқариб юбориб, зарда билан гапирди:

— Олишга олади. Валет рост айтятти. Қаёққа кетсак экан? Ҳамма гап шунда.

— Мен унга буни айтувдим,— деб хўрсинди Мишка Кошевой.

— Ҳамманг менга зарил кепсанми? Ўзим ёлгиз кетавераман. «Қанақа? Нима учун? Нимага?» деб суришираверадиганлар керак эмас. Ҳаммангнинг адабингни беришади, большевизмда айблаб турмага тиқиб қўйишади. Ҳазил қиляпсанларми? Замон қанақалигини кўриб турибсанлар-ку. Бу ерда ҳамма нарсанинг расвоси чиқади.

Девордан суғуриб олган зангили михни қўлида айлантириб турган Григорий Мелехов зарда билан Валетнинг гапини бўлди.

— Сен кўп важирлай берма! Сенинг йўрифинг бошқа. Ҳеч оғирлигинг йўқ, жўнайсан-кетаверасан. Биз эсак хўп ўйлашимиз керак. Меним хотиним, икки болам бор. Мен сендан битта кўйлакни ошиқ йиртганман.— Григорий ўқрайган қора кўзларини ялтиратиб, зич тишларини иржайтириб ўшқирди:— Сен вақиллайверасан. Валетлигингча қолгансан. Устингдаги камзулчангдан бўлак ҳеч нарсанг йўқ.

— Нега оғзингни карракдек очасан? Офицерлигинги кўрсатмоқчи бўласанми? Бақираверма. Туф сендақаларга!— деб қичқирди Валет. Қирпиникидек ингичка юзи ғазабдан оқариб кетди, бир-бирига яқин қаҳрли кўзлари олазарак бўлди. Ҳатто кўкиш соқоли ҳам қимирлаб кетди.

Иван Алексеевичнинг қизил гвардиячилар отряди округга киргани ҳақидаги гапини эшлиб ҳаяжонланган; тинчлиги бузилгани учун жаҳли чиққан Григорий аламини Валетдан олди. Валетнинг қичқириб га-

пиргани унинг жаҳлини чиқариб юборди. Бир ерини уриб майиб қилиб олган одамдай ирғиб ўрнидан турди ва табуретка устида қимирлаб ўтирган Валетнинг устига бостириб келди-да, мушт солишни истаб, қичишиб турган қўлини аранг тўхтатиб, деди:

— Овозингни ўчир, газанда, ифлос кал! Таги паст! Бўйруқ беришни сенга ким қўйибди? Кетадиган бўлсанг, кетавер, сени ҳеч ким... ушлаб тургани йўқ! Бор, йўқол, қоранг ўчсин! Оғзингни очма, бўлмаса, кетмасингдан бурун ерга жо қилиб қўяман...

— Қўй, Григорий! Яхши эмас! — деди Кошевой Валетнинг жиийирилган бурни тагидан Григорийнинг муштумини четлатиб.

— Казакча қилиқларингни тарк эт! Айб эмасми?.. Уят! Мелехов! Уят!

Валет ўрнидан турди; аразлагандек йўталиб, эшик томон юрди. Остона олдига етганда ўзини тутиб туролмай, қайрилиб қаради-да, заҳарханда қилиб турган Григорийни узиб олди:

— Тағин Қизил гвардияда бўлган эмиш... Сен жандармсан!.. Сендақаларнинг биз томирини қуритганимиз!

Григорий ҳам чидаб туролмади, сапчиб туриб, Валетни даҳлизга итариб чиқарди, унинг майишган этигининг дастагига тепиб, ўдағайлади:

— Бор, йўқол! Бутингни йириб, деворга ёпаман!

— Ярашмаган қилиқ! Худди болаларга ўхшайсиз-а!

Иван Алексеевич маъқулламагандек бош чайқади, нохушланиб Григорийга кўз қирини ташлаб қўйди.

Мишка чурқ этмай, лабларини тишлаб ўтирас, афтидан, ёмон бир сўзни айтишдан ўзини тийиб турар эди.

— Нега у ўзига алоқаси бўлмаган ишга аралашади? Нега мунча кекирдагини чўзади,— деб Григорий уялмай-нетмай ўзини оқлади. Христоня унинг тарафини олгандек қараб қўйди. Буни кўриб, Григорийнинг оғзи қулогига етди, боладек кулиб қўйди.— Оз бўлмаса, уни дўппослардим!.. Нима жони бор, бир урсам... чиқиб кетади.

— Хўш, нима дейсизлар? Бир чора кўриш керакку, ахир.

Иван Алексеевич бу саволни берган Мишка Кошевоининг диққат билан тикилиб қараб турганини кўриб, хуноб бўлди-да:

— Нима ҳам қилардик, Михайл?.. Григорий қисман ҳақли: ҳозирланмай йўлга чиқиб бўлармиди? Оиламиз бор. Сен шошма,— деди у Мишканинг сабрсизланиб қимирилаб қўйганини кўриб.— Балки ҳеч нарса бўлмас... Қаёқдан биламиз? Сетраков ёнида отрядни тор-мор қилишибди, бошқалари бурунларини суқмас... Биз бир оз сабр қилиб турамиз. Кейин бир гап бўлар. Ўрни келганда шуни айтиб ўтайки, менинг хотиним, болаларим бор, кийим-кечаги йиртилиб соб бўлган, уйда ун йўқ... қандай қилиб, дарров кетиб бўлади? Улар ёнида ким қолади?

Мишканинг жони чиқиб, қошларини чимириб, кўзини ерга тикди.

— Кетгинглар йўқми?

— Менинг фикримча, бир оз кутиб туриш керак. Кетиш ҳеч маҳал қочмайди... Сиз нима дейсиз, Григорий Пантелеев, сен-чи, Христан

— Бундан чиқди... кутиб турамиз.

Кутилмаганда Иван Алексеевич билан Христоня фикрини маъқуллаганини кўриб Григорий жонланиб кетди:

— Менам шуни айтяппан-да. Шунинг учун ҳам Валет билан сўкишиб қолдим. Ахир, йўлга чиқиш — ўтин ёриш эмас. Бўёқчининг нилими бу?.. Ўйлаш... ўйлаш керак, деяппан-да.

Черков жомхонасидан қўнғироқнинг даранг-дарангни эшитилди, бу товуш ҳамма ёқни — майдонни, кўчалар, тор кўчаларни тўлдирди; тошқин сувлар устида, бўр тоғнинг қуrimаган этаклари устида янграб, ўрмонга сингиб кетгандай бўлди. Қўнғироқ яна чалина бошлади, бу сафар тўхтамасдан, ҳаммани ташвишга солиб даранглай берди!

— Ана, чорлашяпти!— деб Христоня кўзларини пирпиратди.— Ҳозир қайиққа ўтириб, бу ёқقا, тўқайзорга уриб кетаман. Думимни тутқизиб бўпман!

— Хўш, нима қиламиз?— деб Кошевой чоллардек аранг ўрнидан турди.

— Ҳозир ҳеч қаёққа кетмаймиз,— деб жавоб қилди Григорий ҳамма учун.

Кошевой яна қошларини чимириб, пешонасига тушган қўнғироқ малла сочини қўли билан орқасига таради.

— Яхши қолинглар... Афтидан, йўлимиз айрилиб кетадиганга ўхшайди.

Иван Алексеевич илтифот билан кулиб қўйди.

— Сен, Мишатка, ҳали ёшсан, фўрсан... Йўллари-миз бирлашмайди деб ўйлайсанми? Бир-ла-шади! Кўнглингни тўқ қил!

Кошезой хайрлашиб чиқиб кетди. Қўрадан ўтиб, қўшни омборхонага кирди. Валет ариқ ичидаги. У Мишканинг шу ерга келишини аввалдан билгандек эди; Мишка келиши билан ўрнидан туриб:

— Хўш, нима бўлди?— деб сўради.

— Кетмаймиз, дедилар.

— Мен буни аввалдан билардим. Мазалари йўқ... Гришка, сенинг оғайнинг, мазаси йўқ унинг! У ўзининг қонига ташна одам. Итвачча, мени ёмон хафа қилди-да! Зўрман деб керилаверади! Винт кесадиган асбобим қўлимда бўлганда, уриб ўлдиардим,— деди у ғижиниб.

Мишка унинг ёнида кетаётуб, тикандек соқолига қаради-да: «Ростдан ҳам ўлдириб қўйиши мумкин эди» деб ўйлади.

Улар тез-тез юриб кетдилар. Қўнғироқнинг ҳар данғиллаши тўқмоқ билан ургандек бўларди.

— Юр бизникига, овқат-повқат оливоламиз-да, кейин жўнаймиз! Пиёда кетамиз, отни ташлаб кетаман. Сен ҳеч нарса олмайсанми?

— Олиб кетадиган нарсам йўқ,— деб жавоб қилди Валет.— На уйим бор, на ер-мулким. Ярим ойлик моянамниям олганим йўқ. Майли, бизнинг қоринбой Сергей Платонович бойисин. Ҳисоб-китоб қилмай кетганимни билса, хурсанд бўлади.

Қўнғироқ овози тинди. Субҳидамнинг оромбахш сукунатини ҳеч нарса бузмас эди. Йўл устидаги кулини товуқлар титкилар, четан деворлар ёнида кўкат еб қорни шишган бузоқлар юрарди. Мишка орқасига қайрилиб қаради: казаклар қишлоқ майдонига шо-

шиб-пишиб кетмоқда эдилар. Баъзилари ҳовлиларидан чиқиб, йўл-йўлакай куртка ва мундирларининг тугмасини солар эдилар. Майдон саҳнида бир отлиқ киши отини гижинглатиб юрарди. Мактаб ёнида тумонат одам тўпланган, аёлларнинг рўмollари билан юбкалари оқариб кўринар, казакларнинг қора кийимлари кўзга чалинарди.

Бўш чеълак кўтариб кетаётган аёл йўлни кесиб ўтишни истамай тўхтаб қолди ва жаҳл қилиб:

— Юрсаларинг-чи, ахир, мен йўлни кесиб ўтман,— деди.

Мишканинг у билан сўрашди. Аёл энди қошлари остидаги кўзлари билан кулиб, сўради:

— Казаклар майдонга кетяпти, сизлар қаёққа? Нега майдонга бормайсан, Михайла?

— Уйда ишим бор эди.

Тор кўча оғзига келдилар. Мишканинг томи, қуриган олча шохига боғлаб қўйилган, чайқалиб турган майна уяси кўринди. Тепа устидаги ел тегирмон парраги зўр-базўр айланар, паррагига сирилган матонинг шамолда йиртилган бир парчаси ҳилпиллар, қиррали томнинг кўчган тунукаси даранг-дурунг қиларди.

Офтоб хира бўлса ҳам иссиқ нур сочар эди. Дондан шабада эсиб туради. Барваста, эски мазҳабга эътиқод қилувчи, бир вақтлар гвардия батареясида хизмат қилган чол Архип Богатиревнинг муолишидаги ҳовлисида аёллар катта уйнинг деворини суваб, оқлаб пасхага тайёрланардилар. Аёллардан бири лой билан гўнгни аралашиб пишитарди. У юбкасини баланд кўтариб, пайпоқ боғичининг қип-қизил изи тушиб қолган болдири оппоқ, йўғон оёғини зўрға кўтариб, лойни айланасига тепиб юрарди. Аёл юбкасини бармоғининг учи билан кўтариб юрар, матодан қилинган боғичи тиззасидан юқорида, сонини қаттиқ қисиб туради.

Бу сатанг аёл, офтоб ҳали унча кўтарилмаган бўлса ҳам, рўмолини юзига тушириб олган эди. Архипнинг келинлари бўлган икки ёш аёл нарвондан чиқиб, усти қамиш билан чиройли қилиб ёпилган томнинг бўғоти остини оқлаётган эдилар. Тирсакла-

ригача шимарилган қўлларидаги чипта чўтка у ёқ-
бу ёққа бориб келиб турарди, кўзларигача беркитиб
олган юзларига оҳак сачаради. Аёллар бараварига
ашула айтар эдилар. Архипнинг катта келини, Миш-
ка Кошевой билан рўй-рост юрадиган бева Марья,
юзи сепкилли бўлса ҳам келишган жувон эди. Бу аёл
бутун қишлоққа донғи кетган эркакларнидек паст
ва ёқимли овози билан ашула бошлади:

Азоб чекмас ҳеч ким мендек...

Бошқалари унга қўшилиб, бу содда, мунгли хо-
тинлар ашуласини уч овоз билан айта бошлади-
лар.

Урушда азиз ёrim
Тўпни ўзи ўқлайди.
Доим мени йўқлайди.

Мишка билан Валет четан девор ёнида кетаётib
бу ашулага астойдил қулоқ солар, ўтлоқдаги отлар
кишнаб ашулани бўлиб турар эди.

Бир кун менга хат келди,
«Ёринг жангда ўлди» деб.
Вафодоринг ўлиги
«Тол тагида қолди» деб.

Рўмоли остидаги қуралай кўзлари чақнаб турган
Марья аланглаб, кўчадан ўтиб кетаётган Мишкани
кўргач, кулиб қўйди, сепкилли юзи ёришиб кетди-ю,
паст хушовози билан ашулани бошлаб юборди.

Унингmall сочини
Тонг шамоли тараиди.
Қуралай кўзларини
Қарға чўқиб талайди.

Хотинлар билан хушмуомала бўлган Мишка ун-
га қараб кулиб қўйди; лой қориб турган уй эгасининг
қизи Пелагеяга:

— Юбкангни баландроқ кўтарсанг-чи, девордан
кўринмаяпти,— деди.

Қиз кўзларини сузуб:

— Астойдил хоҳласанг — кўрасан,— деб қўйди.

Марья муштини белига тираб, нарвон устида ту-
рарди; атрофга аланглаб қараб қўйиб, чўзиб сўради:

— Қаёққа борувдинг, ўргилай?

— Балиқ овлагани.

— Узоққа кетма, юр омборга, ишрат қилайлик.

— Қайнатанг шу ерда-я, уятсиз!

Марья тилини тақиллатиб қўйди, ҳўл чўткани
Мишкага қараб силкитди-ю, хохолаб кулиб юборди.
Оҳак томчилари Мишканинг курткаси ва фуражка-
сига сачради.

Кичик келин садафдек тишларининг оқини кўрса-
тиб кулиб туриб:

— Валетки оғдимизга юбор, уйни сувашга ёрдам-
лашсин,— деб қичқирди.

Марья бир нарса деб шивирлаган эди, аёллар қаҳ-
қаҳлаб кулиб юборишиди.

— Бузуқ хотин!— деб Валет қадамини тезлатди,
лекин Мишка муштоқона мулойим кулги билан
унинг гапини бўлди:

— Бузуқ эмас, хушчақчақ хотин. Мен кетяпман,
жононам қоляпти.— У ўз ҳовлисининг эшигидан ки-
рар экан:—«Сен мени кечиргин гўзалим, жоним»
деб ашула сўзларини такрорлаб қўйди.

XXIII

Кошевой чиқиб кетгандан кейин казаклар анчага-
ча чурқ этмай ўтирилар. Занг садоси қишлоқ усти-
да янграр, уй деразалари дириллар эди. Иван Алексеевич
деразадан қаради. Омборхонадан ерга ҳа-
фиф тонг кўланкаси тушиб турарди. Кўрпа бўлган
ўт-ўланларнинг устига оппоқ шудринг тушган. Ҳат-
то дераза ойнаси орқали ҳам осмон қуббаси зангори
тусда кўринарди. Иван Алексеевич пахмоқ сочли бо-
шини эгиб турган Христоняга қаради.

— Балки шу билан иш бир ёқлиқ бўлар? Мигу-
линликлар уларни мажақлади-ку, энди улар бош
суқмаслар.

— Йўғ-э...— деди Григорий бир сесканиб.— Бу
ҳали учқун, қор бўронини энди кўрасиз! Хўш, нима
қилдик, майдонга кетдикми?

Иван Алексеевич қўлни фуражкасига узатди; шубҳадан қутулиш учун:

— Йигитлар, ростдан ҳам ақлимиз ўтмаслашиб қолган бўлса-я? Михаил қизиқон бўлса ҳам, лекин ишбиларманд бола... бизни таъна қилиб кетди,— деди.

Унга ҳеч ким жавоб қилмади. Индамай кўчага чиқиб, майдонга жўнадилар.

Иван Алексеевич хаёл суреб, ердан кўзини олмай бораради. У виждонсизлик қилиб, ўз фикрига хилоф иш қилди. Валет билан Кошевой ҳақли эдилар; иккиланиб ўтирумай жўнаб қолиш керак эди. У хаёлида баҳона излаб ўзини оқламоқчи бўлса-да, лекин баҳоналари уч пулга арзимас, ичида бир овоз уни масхара қилаётгандай туюларди, далилларининг ёлғон эканлигини исбот этарди. Иван Алексеевич, биринчи тўқинишдаёқ большевиклар томонига қочиб ўтишга қарор қилди. У майдон томон кетаётгандай шу фикрга келди, лекин Григорийга ҳам, Христоняга ҳам бу ҳақда оғиз очмади, чунки уларнинг фикрлари бошқача эканини пайқаб тураг, ичида улардан ҳадисирав эди. Учаласи ҳам Валетнинг таклифини рад этишди, оиласарини ташлаб кетишга кўзлари қиймаганини сабаб қилиб кўрсатишиди, аммо уларнинг ҳар бири бу сабаб асосли эмаслигини ва ўзларини оқлаш учун далил бўлолмаслигини билар эдилар. Энди уларнинг ҳар бири уятли, ёмон бир иш қилиб қўйгандек бир-бирларидан хижолат тортар эдилар. Шу сабабдан чурқ этмай боришаарди; Моховнинг уйига етганда Алексеевич бу сукунатдан юраги фаш бўлиб, ўзига ҳам, шерикларига ҳам дакки берди:

— Айбимизни бўйнимизга олишимиз керак; фронтдан большевик бўлиб қайтган эдик, энди эса ўзимизни панага олиш пайдамиз! Үрнимизга бирорлар урушса-ю, биз хотинларимиз ёнида қолсак деймиз...

— Мен урушиб бўлдим, энди бошқалар урушиб кўрсин,— деди Григорий юзини ўгириб.

— Нима... улар босқинчилик қилаётган бўлсалар, биз бориб қўшилишимиз керакми? Қизил гвардия нима қиляпти? Аёлларни зўрлайпти, талончилик қил-

ялти. Оёқни билиб босиш керак. Кўр одам ҳамиша; ўзини деворга уриб олади.

— Христан, сен ўз кўзинг билан кўрдингми? — деб сўради Иван Алексеевич фижиниб.

— Одамлардан эшийтдим.

— Э... одамлардан дегин...

— Бас қилинглар! Тағин бирор эшитиб қолмасин.

Ёнига қизил ҳошия тикилган шим, гардиши қизил фуражка кийган казакларга майдон лиқ тўлган эди, онда-сонда сержун папоқ кўзга чалинарди. Бу ерга бутун қишлоқ йиғилган, лекин аёллар йўқ эди. Тўпланганларнинг ҳаммаси чоллар, фронт ёшидаги казаклар ва ёшлар эди. Энг олдинда қари-қартанглар: фахрий судьялар, черков кенгаши аъзолари, мактаб назоратчилари, черков мутаваллиси ҳассаларига таяниб турар эдилар. Григорий кўз югуртириб, соқолига оқ оралаган отасини қидириб топди. Кекса Мелехов қудаси Мирон Григорьевич ёнида эди. Кўксига нишонлар тақилган пистоқи ранг парад мундир кийган Гришак бобо улар олдида ғадир-будур ҳассасига таянганича букчайиб қолган эди. Чертса икки бетидан қон томадиган Авдеич Лофчи, Матвей Кашулин, Архип Богатирев, казакча фуражка кийиб олган Атепин-Цаца Мирон Григорьевич ёнида туришарди. Нарироқда таниш казаклар: серсоқол Егор Синилин, Яков Тақачи, Андрей Кашулин, Николай Кошевой, дароз Борщев, Аникушка, Мартин Шамиль, лайлакдек оёқлари узун тегирмончи Громов, Яков Коло-вейдин, Меркулов, Федот Бодовсков, Иван Томилин, Епифан Максаев, Захар Королёв, Авдеич Лофчининг ўғли — танқа бурун, паканагина Антип давра қуриб олишганди. Григорий майдоннинг нариги томонига ўтаётганда давранинг бир чеккасида акаси Петро турганини кўриб қолди. Кўйлагига тўқ қизил георгий лентаси тақиб олган Петро қўли чўлтоқ Алёшка Шамиль билан гаплашарди. Унинг чап томонида яшил кўзлари чақнаган Митька Коршунов турарди. У папиросини Прохор Зиковнинг папиросидан тутатиб олаётган эди. Прохор бўта кўзларини бақрайтириб, лабларини чўччайтириб пуллар, унга ёрдамлашарди. Ёшроқ казаклар орқароқда эди, давранинг

ўртасида, тўрт оёғи билан қуримаган юмшоқ ерга кириб кетган лиқилдоқ стол ёнида қишлоқ ревкомининг раиси Назар ўтирас, Григорийга нотаниш бўлган бир юзбоши унинг ёнида қўлини столга тираб турарди. Юзбоши пистоқи ранг, жез тамғали фуражка, погонли куртка ва қаҳво ранг тор шим кийған эди. Ревком раиси қизарип-бўзарип юзбошига бир нарса деяр, юзбоши эса бир оз энгашиб, унинг соқолига шалпангқўлоқларини яқинлаштириб тингларди. Майдон худди ари инидек ғувилларди. Казаклар бир-бирларига гап отар, ҳазиллашар эдилар, бироқ ҳаммаларининг юзида ташвиш аломати бор эди. Аллакимнинг тоқати тоқ бўлиб:

— Бошланглар, ахир! Нимани кутасиз? Ҳамма тўпланди-ку!— деб қичқирди.

Офицер бамайлихотир қоматини ростлаб, фуражкасини ечди-да, уйидагилар билан гаплашаётгандек, сўз бошлади:

— Ҳурматли қариялар ва сиз фронтчи казак оғайнилар! Сетраков қишлоғига нималар бўлганини эшилдингизми?

— Бу ким ўзи? Қаёқлик?— деб дўриллаб сўради Христоня.

— Вешенскаялик, Черная речкадан, оти Солдатов шекилли,— деб жавоб қилди аллаким.

Юзбоши сўзини давом эттириди:

— Яқинда Сетраков қишлоғига Қизил гвардия отряди келибди. Украянани ишғол қилган немислар Дон қўшин вилояти томон силжиб, қизил гвардиячиларни темир йўлдан улоқтириб ташлабдилар. Қизил гвардиячилар Мигулин юртидан ўтиб бу томонга йўл олибдилар. Қишлоққа кириб, казакларнинг мол-мулкини талай бошлабдилар, казак аёлларни зўрлабдилар, одамларни қонунсиз қамабдилар ва ҳоказо. Атрофдаги казаклар бу воқиалардан хабардор бўлгач, қўлларига қурол олиб, талончиларни босибдилар. Отряднинг ярмиси қирилибди, ярмиси асир қилиб олинибди. Мигулинликлар катта ўлжа туширибдилар. Мигулин ва Казанск станицалари большевиклар зулмига барҳам берибдилар. Етти ёшдан етмиш ёшгача казаклар ўзимизнинг Тинч Донни ҳимоя қилиш учун

бел боғлабди. Вешенскаяда ревком тарқатилиб юбо-рилибди, станица атамани сайланибди, кўпчилик ху-торларда аҳвол шу.

Юзбошининг нутқи шу ерга етганда чоллар ғовур-ғувур кўтара бошладилар.

— Ҳар ерда отрядлар тузиляпти. Станицангизни ёввойи босқинчилар гуруҳларидан ҳимоя этиш учун сиз ҳам фронтчилардан отряд ташкил этишингиз лозим. Биз ўз маҳкамаларимизни тиклашимиз зарур! Қизиллар ҳокимиятининг бизга кераги йўқ — у бизга озодлик эмас, бузғунлик келтиради! Ахир мужиклар хотинларимиз ва сингилларимизнинг номусига тегса, бизнинг православ динимизни таҳқирласа, муборак ибодатхоналаримизни оёқ ости қиласа, мол-мулкларимизни таласа, биз қараб тура олмаймиз... Шундоғ эмасми, ҳурматли қариялар?

Майдондагилар бараварига «тўғ-ре!» деб бақиришди. Юзбоши шапирографда чол этилган хитобномани ўқий бошлади. Ревком раиси баъзи қоғозларини эсдан чиқариб, стол ёнидан туриб қочди. Оломон бир сўзни ҳам тушириб қолдирмай қулоқ соларди. Орқадаги фронтчилар бўшашиб гаплашардилар.

Юзбоши хитобномани ўқий бошлагандада Григорий оломон ичидан чиқиб, уйига жўнаб қолди. Поп Вис-сарионнинг уйи бурчагига етганда, унинг кетаётганини кўриб қолган Мирон Григорьевич Пантелей Прокофьевичнинг биқинига тирсаги билан туртди.

— Кенжа ўғлинг кетяпти-ку, қара!

Пантелей Прокофьевич оқсай-оқсай даврадан чиқиб юмшоқ, лекин амирона товуш билан:

— Григорий! — деб чақирди.

Григорий отасига қарамай, ён томонига бурилди.

— Қайт, ўғлим!

— Нега кетяпсан! Қайт! — деган овозлар эшитилди. Ҳамма қайрилиб Григорийга қаради.

— Офицерлик даражасига кўтарилиган одамнинг аҳволини кўринг!

— Кўп керилаверма!

— Унинг ўзи большевиклар ичida бўлган!

— Бу ҳам казак қонини ичган...

— Ҳой, қизил оёқ!

Бақириб айтилған бу гаплар Григорийнинг қулоғыга чалинарди. Бу сўзларга тишини тишига қўйиб қулоқ солар, иккиланиб тураради; бир минут ўтса, орқасига қайрилиб қарамай кетиб қолар эди ҳам. Лекин у гандираклаб кетиб, кўзини ердан олмай, олононга томон юрди. Пантелей Прокофьевич билан Петро буни кўриб, енгил нафас олдилар.

Чоллар қизишиб, ҳадларидан ошиб кетишди. Мисли кўрилмаган тезлик билан шу ердаёқ Мирон Григорьевич Коршуновни атаман қилиб сайлашди. Коршунов оппоқ, чўтири юзини бўзартириб ўртага чиқди, уялинқираб аввалги атаманинг қўлидан ҳокимият белгиси бўлган — мис дастали атаманлик ҳассасини олди. Шу маҳалгача у атаман бўлмаган эди; уни сайлаймиз деганларида ноз қилиб, бундай шарафга ноил бўлишга лойиқ эмаслигини ва ўзининг чаласаводлигини айтиб, кўнмаган эди. Аммо уни сайлагилари келиб турган чоллар бақиришди:

- Ҳассани ол! Бўйин товлама, Григорич!
- Сен хоторда биринчи бой деҳқонсан.
- Қишлоқ мол-мулкига тегмайсан.
- Кўзингга қара, Семён сингари хотор пулларига ароқ олиб ичиб қўйма!
- Ҳа, бу ичиб қўяди!
- Қўрасида олиб чиқиб сотадиган нарсаси кўн!
- Қўйдек терисини шилиб оламиз-а!..

Сайловнинг тез ўтгани шу қадар ғайри табиий, ярим ҳарбий ҳолат шу қадар жиддий эдики, Мирон Григорьевич кўп ялинтирмай, кўна қолди. Сайлов аввалги сайловларга сира ўхшамас эди. Илгари станица атамани келиб, оила бошлиқларини чақирав, номзодлар бирма-бир овозга қўйиларди, бу гал эса, сайлов бошқача бўлди. Дабдурустдан: «Ким Коршунов сайлансин деса, ўнг томонга ўтсин» дедилар. Оломон ёпирилиб ўнг томонга ўтди, фақат Коршуновда хусумати бўлган ямоқчи Зиновий қоққан қозиқдай жойида туриб қолди.

Терлаб-пишиб кетган Мирон Григорьевич ўзига келмасдан бурун унга ҳассани тутқизиб қўйдилар, узоқ-яқиндан:

- Зиёфатини берасан!

— Ҳамма сени бир оғиздан сайлади!
— Ювиш керак!
— Атаманиң қўлма-қўл кўтариб олқишлийлик! —
деб бақира бошладилар.

Юзбоши шовқинларни тўхтатиб, устомонлик билан жамоатнинг фикрини муҳим масалаларга жалб этди. У отряд командирларини сайлаш масаласини ўртага қўйди, эҳтимол, Вешенскаяда Григорийнинг номи машҳур бўлгани учун қишлоқ жамоасига хушиомадгўйлик қилиб:

— Командир, офицерлардан бўлса, тагин ҳам яхши бўлади, — деди. — Бундай одам бошчилигида жангда ҳам енгиб чиқасиз, талафот ҳам кам бўлади. Сизнинг қишлоқда қаҳрамонлар беҳисоб. Казаклар, ўз истагимни сизларга зўрлаб қабул қилдиришга ҳақим йўқ, аммо мен ўзим сизларга хорунжий Мелеховни тавсия эта оламан.

— Қайси бирини!

— Мелеховлар иккита-ку.

Офицер оломонга кўз юргутириб, орқароқда бoshини эгиб турган Григорийни топди-да, кулимсিраб:

— Григорий Мелеховни!.. Сизлар нима дейсиз? —
деб, шангиллади.

— Маъқул!

— Бўла қолсин!

— Григорь Пантелеевич! Барака топ!

— Давранинг ўртасига чиқ! Чиқ!

— Қариялар сени кўришмоқчи!

Орқасидан итариб, ўз ҳолига қўймаганларидан кейин Григорий қизариб-бўзариб давранинг ўртасига тушди ва ит қувлаган соқовдай атрофига аланг-лаб қарайверди.

— Үғилларимизга раҳнамолик қил,— деди Матвей Кашулин ва ҳассасини ерга бир уриб қўйиб, қулочкашлаб чўқинди: — Уларга раҳбарлик қил, раҳнамо бўл, ишнинг кўзини биладиган чўпон қўйларни қандай сақласа, сен ҳам уларни шундай сақла! Чўпон ўз қўйларини бўрига олдирмагандек, сен ҳам уларни олдирма! Худо насиб қилса, иш кўрсатиб, яна тўртта крест оласан!

— Пантелеий Прокофьевич хўп назамат ўғлинг бор-да!..

— Боши олтин! Ақлли йигит, ҳувори!

— Ҳой, чўлоқ, ҳеч бўлмаса бир чирпит ароқни бўйнингга ол!

— Ҳа-ҳа-ҳа! Юви-иш ке-ера-а-к!..

— Мұхтарам чоллар! Жим! Кўнгиллилар ёзилсин деб ўтирасдан, икки ёки уч рўйхат тузсак бўлмас-микин! Йигитларнинг бири кўнгилли бўлиб ёзилади, бири ёзилмайди.

— Уч йилга!

— Беш!

— Кўнгиллилар ёзилсин!

— Ўзинг бор, кўлингдан бирор ушлаб турибдими?

Янги атаман билан гаплашиб турган юзбошининг олдига хуторнинг юқори томонида турадиган чоллардан тўртаси келди. Улардан бири жиккак, тишлари тушиб кетган Бужур лақабли чол эди. Бужур бутуа умрини аризабозлик ва судлашиш билан ўтказгани эди. У суд маҳкамасига тез-тез бориб турганидан, ўзининг рўзгорида бўлган битта-ю битта оқ бияси йўлни шундай яхши ўрганиб олган эдики, маст бўлиб қолган эгаси аравага ўзини ташлаб, чийиллаб: «Судга!» деса, биянинг ўзи йўл топиб, станицага етиб бораради... Бужур шапкасини очиб, юзбошининг олдига келди. Қолган чоллар ҳам келиб унинг ёнига келиб тўхтадилар. Улардан бири ўзига тўқ ва бообрў Болдирев эди. Ёмоннинг бир қилиғи ортиқ дегандек, ўлгудек маҳмадана бўлган Бужур офицерга гап қотди.

— Жаноб офицер!

— Нима гап, ҳурматли қариялар? — офицер мулоим супургидек эгилиб, гўштдор қулоғини уларга тутди.

— Жаноб офицер, сиз командирликка тавсия қилганингиз — ҳамқишлоғимиз тўғрисидаги гапларни эшитмаганга ўхшайсиз. Биз, қариялар бу қарорингизни рад этамиз, бизнинг ваколатимиз бор. Биз бу одамга қаршимиз.

— Нега қаршисим? Узи нима гап?

— Гап шундаки, у Қизил гвардияда бўлгаи, уларга командирлик қилган, ярадор бўлиб, икки ой ил-

гари қайтиб келган, бас, бу одамга қандай ишонамиз?

Юзбоши қулоқларигача қизариб кетди.

— Бўлмаган гап! Мен буни эшитмаган эдим-ку... Менга бу хусусда ҳеч ким ҳеч нима дегани йўқ-ку...

— Большевиклар орасида бўлгани рост, — деб гасдиқлади Герасим Болдирев қаҳр билан, — биз унга ишонмаймиз!

— Ўрнига бошқаси сайлансин! Ёш казаклар ни ма деяптилар, қулоқ солинг! «У бизни биринчи урушдаёқ сотиб кетади!» деяптилар.

— Ҳурматли қариялар!—деб қичқирди юзбоши оёғининг учига босиб. У фронтчиларга эмас, чолларга мурожаат қилиб гапирди. — Ҳурматли қариялар! Биз Григорий Мелеховни отряд командири қилиб сайланган эдик, бунга қаршилик йўқми? Менга ҳозир, Григорий Қизил гвардияда бўлган деб айтдилар. Сиз унга ўз ўғил ва невараларингизни ишониб топшира оласизми? Сиз фронтчи оға-инилар, шундоқ отряд командирига итоат этишни виждонингиз қабул қила дими?

Казаклар ҳанг-манг бўлиб шошиб қолдилар. Бирданчуввос кўтарилди; қичқириқлар ва нидолардан ҳеч нарса англаб бўлмас эди. Халойиқ бақиришдан тўхтагандан кейин қошлари ўсиқ Богатирев давранинг ўртасига тушиб, бошидан шапкасини олди-да, атрофга кўз югуртирди.

— Менинг ожизона фикримча, Григорий Пантелеевичга бу вазифани топширмаслик керак. Унинг шундай бир гуноҳи борлигини ҳаммамиз эшитганимиз. Энг олдин у гуноҳларини ювиб, ишончимизга сазовор бўлсин, кейин кўрамиз. У ботир йигит, биламиз... аммо батъсан чанг-тўзон офтобни тўсиб қўяди: биз ундан яхшилик кўрганимиз йўқ, аммо унинг большевикларга хизмат қилгани ҳаммамизга маълум!..

Ёш Андрей Кашулин қизишиб кетиб:

— У оддий аскар бўлиб хизмат қилсин,— деди.

— Командирликка Петро Мелехов сайлансин!

— Гриша олдин уюр ичидан юрсин.

— Уни сайлаб бошимизга бало ортдирамизми?
— Мен командир бўламан деб ўлиб турганим йўқ. Менга керагинг йўқ ҳамманги,— деб жаҳл билан қичқириди орқада турган Григорий қизариб-бўзариб; кейин қўлини пахса қилиб, яна тақрорлади:— мен ўзим ҳам командирликни олмайман! Кўзим учиб тургани йўқ!— Шуни деб у қўлларини чалвори-нинг чўнтағига тиқди-ю, букчайиб олиб, катта-катта қадам ташлаб уйига жўнади.

Унинг орқасидан бақириб қолиши:

— Ҳой, ҳаддингдан ошма!
— Вой сассиқ тақа-е! Димоғидан эшак қурт ёғади-я!

— Ү-хў!
— Таги турк-да, қазисан, қартасан, ўз аслингга тортасан!

— Индамай ютиб кетолмайди! Позицияда ҳам офицерларнинг гапини кўтаролмасди. Бу ерда ҳеч ҳам...

— Қайт!..

— Ҳе-е-е-й!..

— Ушла! Вус-киш!

— Қўйинг, нима қиласиз ҳадеб осилавериб! Қа-әққа кетса кетаверсин!

Оломон дарров тинчий олмади. Аллаким гап та-лашиб биронни тутиб юборди, аллакимни уриб бур-нини қонатишиди, ёшлардан аллакимнинг кўз ости ғурра бўлиб чиқди. Ҳамма тинчигандан кейин отряд командирлигига Петро Мелеховни сайладилар, у терисига сиғмай қизариб кетди. Лекин юзбоши ба-ланд тўсиқقا дуч келган югурук отрай, кутилмаганда қаршиликка учради: Кўнгиллиларни хатга олишга навбат келди. Аммо ҳеч кимнинг ёзилишга раътий йўқ. Бутун воқиаларга сиполик билан қараб турган фронт-чилар мижғовланиб, ёзилгилари келмади, гапни ҳазилга олиб:

— Сен, Аникеј, ёзилмоқчимасмисан?— дейиши.

Аникушка эса:

— Мен ҳали ёшман, соқол-мўйловим чиққани йўқ,— деб пўнгиллади.

— Ҳазилингни йиғишириб қўй, нима, бизни

майна қиляпсанми?— деб шанғиллади унинг қулоғи остида Қашулин чол.

Аникеј гүё ғинғиллаб турган пашшани қўригандай, қўл силтади:

— Ўғлинг Андрюшани ёздира қол.

— Ёздиридим.

— Прохор Зиков!— деб бақиришди стол ёнидаги-лар.

— Лаббай!

— Ёзиласанми?

— Қайдам.

— Ёзиб қўйдик!

Митъка Коршунов жиддий қиёфада стол ёнига бориб, буйруқ бергандай қилиб:

— Мени ёз!— деди.

— Хўш, яна ким истайди? Бодовсков Федот, сен-чи?

— Чуррам тушган, муҳтарам оталар,— деди Федот минғиллаб қалмоқча қийиқ кўзларини ерга тикиб туриб.

Фронтчилар қоринларини ушлаб хохолаб кулдилар, ҳазил қилишиб:

— Хотинингни ҳам оливол, башарти чурранг тушса, солиб қўяди,— дер эдилар.

Орқадагилар йўталишиб, тишларининг оқини кўрсатишиб, кўзларидан ёш чиқаришиб хохолаб кулишиди.

Бошқа томондан аллаким қочириқ қилди:

— Биз сени ошпаз қилиб қўямиз. Бемаза карам шўрва пиширсанг, оғзингдан қўямиз, токи нарёғингдан чурранг оқиб тушсин.

— Қаттиқ чополмайсан, сендақалар билан қочиб бўлмайди.

Кексалар бу гаплардан хафа бўлиб, койиб беришиди.

— Бўлди, бўлди. Сенларга куладиган нарса то-пилиб қолди-да. Аҳмоқлик қилишга вақт топғанларини қаранг.

— Уялсанглар-чи, йигитлар,— деди бир кекса.— Худони унутманглар. Худо кечирмайди. У ёқда одамлар қириляпти, сизлар бўлса... худо-чи?..

— Томилин Иван,— деб юзбоши орқасига ўгирилиб қаради.

— Мен тўпчиман,— деб жавоб қилди Томилин.

— Ёзиласанми? Бизга тўпчилар ҳам керак.

— Ёзавер...

Захар Королёв, Аникушка, яна бир неча киши тўлчини кулги қилдилар.

— Биз сенга толни ковок қилиб, тўп ясад берамиз, қовоқ солиб отасан, картошкани картечъ ўрнига...

Ҳазил ва кулги остида олтмиш казак ёзилди. Энг сўнг Христоня келди. У стол ёнига келиб, салмоқлаб:

— Мениям хатга бит... Айтиб қўяй: мен урушмайман,— деди.

— Ундан бўлса, ёзилиб нима қиласан?— деди жаҳл билан юзбоши.

— Бориб томоша қиласан, офицер жаноблари, томоша кўрмоқчиман.

— Ёзид қўйинглар уни ҳам,— деди юзбоши елкасини қисиб.

Чоштгоҳда майдондан тарқалишди. Мингулинликларга мадад учун эртасига ёқ кетишга қарор берилди.

Эртасига эрталаб олтмиш кўнгиллидан атиги қирқтачаси тўпланди. Олифта, шинель қўнжи узун этик кийган Петро казакларни бирма-бир кўздан кечирди. Кўпларида бурунги полкларнинг номерлари ёзилган кўк погонлар бор эди. Баъзилари погонсиз эди. Сафар анжомлари эгар устига ортилган, хуржун ва халталарга озиқ-овқат, кўйлак-лоэм. Фронтдан ортирган ўқлар жойланган. Кўпчиликда милтиқ йўқ, қиличлари бор эди, холос.

Казакларни жўнатиш учун майдонга хотин-халаж, болалар, кексалар тўпланишди. Қантариқ еган от устида Петро ярим сотняни сафга тизди, рангбаранг тусдаги отларни мингандан чавандозларни кўздан кечирди. Казакларнинг баъзиси шинель, баъзиси мундир, баъзиси брезент плашч кийган эди. Петро жўнашга команда берди.

Отряд отини ҳайдаб тегага чиқиб кетди. Казак-

лар тумтайишиб, хуторга ўгирилиб қараб-қараб қўйишарди. Орқадаги қатордан кимдир ўқ узди. Тепа устига чиққанда Петро қўлқоп кийиб, сарғиши мўйловини бураб қўйди. Сўнгра отини бурган эди, у майдада қадам ташлаб, ёни билан юриб кетди. Петро чап қўли билан фуражкасини ушлаб, жилмайди-да:

— Сотня, командани эшит!... Отлар йўртдирилсин, марш!— деб бақирди.

Узангига оёқтираб туриб олган казаклар қамчиларини ўйнатиб, отларини йўртдириб кетишиди. Рўпарадан юзларига шамол ураг, отларнинг думини, ёлини ўйнатар, ёмғирдан дарак берарди. Гапсўз ҳазил-мутойиба бошланди. Христоня мингандан бўйдор арғумоқ от қоқилиб кетди. Эгаси унга бир қамчи солиб, сўкинди. Арғумоқ бўйини эгди-да, сапчиб сафдан чиқиб кетди.

Каргин станицасигача казакларнинг димоғлари чоғ эди. Улар, ҳеч қанақа уруш бўлмайди, Мигулин можароси большевикларнинг казаклар тупроғига қилган ногиҳон ҳужуми, деган ишонч билан бормоқда эдилар.

XXIV

Кечқурунга яқин Қаргинга етиб келдилар. Станицада фронтчилар йўқ, Мигулинга кетиб қолишиган эди. Петро майдонда, Левочкин деган савдогарнинг дўкони ёнида отрядини отларидан тушириб, станица атаманининг уйига кетди. Новча, барваста, қорача офицер унга пешвоз чиқди. Офицер погонсиз узун кўйлак кийиб, белини кавказча камар билан боғлаб, ҳошияли казакча чалворининг почаларини оқ жун пайпоқлари ичига тиқиб олган эди. Юпқа лабларининг четида трубка тутаб турар, сарғиш, ўткир кўзлари ер остидан хўмрайиб қааради. У зинапоя устида трубкасини чекиб, яқинлашиб келаётган Петродан кўзини олмай турарди.

Офицернинг тўлишган бадани, кўйлаги остидан бўртиб чиқиб турган тўшининг, билакларининг мускуллари унинг жуда бақувват эканини кўрсатиб турарди.

— Станица атамани сиз бўласизми?

Офицер салқи мўйловлари остидан бурқситиб тутун чиқарди-да, йўғон овоз билан:

— Ҳа, станица атамани мен бўламан. Ўзларининг кимлигини билсан бўладими?— деди.

Петро отини айтди. Атаман унинг қўлини қисиб, бош эгиг қўйди.

— Лиховидов Федор Дмитриевич.

Гусино-Лиховидово хуторининг казаги Федор Лиховидов чакана одам эмасди. У юнкерлар мактабида ўқиган ва бу мактабни битиргандан кейин бир неча муддат кўздан гойиб бўлган эди. Орадан бир неча йил ўтгандан кейин бирдан хуторда пайдо бўлиб қолади ва бош ҳукумат идораларининг рухсати билан ҳарбий хизматдан бўшаган казаклардан кўнгиллилар тўпламоққа бошлайди. Ҳозирги Каргин станицасида юзтacha довюрак, ҳеч нарсадан қайтмайдиган казакларни тўплаб, уларни Эронга олиб кетади. Ўз отряди билан Эронда бир йил туради ва шоҳнинг шахсий соқчиси хизматини ўтайди. Эрон инқилоби кунлари шоҳ билан бирга у ердан қочади, ўз отрядидаги казакларни йўқотиб қўяди ва яна аввалгидек, Каргинда пайдо бўлади: ўзи казакларнинг бир қисми билан қайтиб келади; Эрон шоҳининг отхонасидан учта зотли араб тулпари ва бирталай ўлжа: қиммат баҳо гиламлар, нодир зеб-зийнатлар, ранго-ранг шойи-атласлар олиб келади. Федор Лиховидов бир ой қишлоқда гашт қилиб юради, чалворининг чўнтағидан бирталай эрон тиллаларини чиқариб сарфлайди, қишлоқ кўчаларида қордек оппоқ, суқсурдек, оёқлари ингичка тулпари ни гижинглатиб юради. У отини Левоочкин магазинининг остонасидан ҳатлатиб ўтиб, эгардан тушмаёқ мол харид қиласар, пулини тўлаб нариги эшикдан чиқиб кетарди. Федор Лиховидов қандай келган бўлса, шундай тўсатдан ғойиб бўлади. Унинг айрилмас йўлдоши — чопари гусиновлик казак, ўйинчи Пантелейюшка ҳам у билан бирга ғойиб бўлади; отлар ҳам Эрондан келтирилган бошқа нарсалар ҳам бир кечада йўқ бўлади.

Ярим йилдан кейин Лиховидов Албанияда пайдо бўлиб қолади. У ердан, Дурациодан Қаргиндаги

таниш·билишлари номига Албания яшил төғларинг сурати тушган, ғалатиштами босилган почта карточкалари юборади. Кейин Италияга кетади, бутун Балкан мамлакатларини кезади, Руминияда, Фарбий Европада бўлади. Испанияга қадар боради. Федор Дмитриевичнинг номи сирли парда билан қопланади, қишлоқларда унинг тўғрисида турли тахмин ва тасаввурлар пайдо бўлади. Ҳаммага маълум бўлган нарса — унинг монархистлар доирасига яқинлиги эди. Питерда катта аъёнлар билан танишлигини, «Рус халқи Иттифоқи»¹ да муҳим мавқега эга эканлигини ҳамма биларди, лекин чет элларда нима ишни бажариб юргани ҳеч кимга маълум эмас эди.

Чет эллардан қайтиб келгандан сўнг, Федор Лиховидов Пензада, у ернинг генерал-губернатори ёнида тура бошлади. Қаргиндаги танишлари унинг фотосуратини кўриб, анчагача бош чайқаб, ҳанг-манг бўлиб: «Вой хумпар-е» дердилар.—«Федор Дмитриевич борган сари кўтариляпти!»—«Кимлар билан бирга юрганини қаранг, а?»

Фотосуратда сербга ўхшаш қушбурун, қорача Федор Дмитриевич кулимсираб, губернатор хотинин извошга қўлтиқлаб чиқараётган эди. Губернаторнинг ўзи эса яқин одамидек унга илжайиб қарап, яғрини кенг извошли эса отларнинг жиловини аранг тортиб туарар, отлар эса ҳозир опқочиб кетадигандек типирчиларди. Федор Дмитриевич бир қўлини ҳурпайган папоғига тегизиб, назокатла честь берар, иккинчи қўли билан губернатор хонимнинг тирсанидан ушлаган эди.

Бир неча йил бўлиб юргандан кейин 1917 йилнинг охирида Федор Лиховидов Каргинда кўринди. Узоқ вақтгача қоладигандек у ерда маскан қурди. Ўзи билан бирга украинликми, польшаликми

1 «Рус халқи Иттифоқи»— чор Россиясида энг ашаддий қора гуруҳчи ташкилот эди. Бу ташкилот яҳудийларга қарши ташвиқот олиб борар, яҳудий погромлари ташкил қилас, сиёсий дуниманларни ўлдиритирада давлатдан катта-катта маблағлар олиб турарди.

эканини билиб бўлмайдиган хотини ва боласини олиб келади да, майдондаги тўрт хонали кичик бир уйга кўчиб кириб, қишини ўша ерда ўтказади ва қандайдир мажхул планлар тузади. Бутун қиш бўйи (ўша қиш Донда жуда қаттиқ соvuқ бўлган эди) деразалари очиқ турди, у ўзини ҳам, оиласини ҳам соvuққа ўргатар, бу билан казакларни ҳайратда қолдиради.

1918 йилнинг баҳорида, Сетраков ёнидаги воқиадан кейин уни атаман қилиб сайдилар. Федор Лиховидовнинг зўр истеъдод эгаси экани шунда маълум бўлди. Станица шундай қаттиққўл остига тушиб колган эдики, ҳатто чоллар ҳам ҳайратланиб бош чайқар эдилар. У казакларни ўзига шундай ром қилиб олган эдики, станица йиғинида нутқ сўзлаганда (Лиховидов фасоҳат билан сўзларди, табиат унга куч-қувват билан бирга, зўр ақл-истеъдод ҳам берган эди), чоллар бўтадек бўзлаб йиғлар эдилар: «Азизлар мададкор бўлсин, атаман жаноблари! Барака топинг!»—«Рост!» деб бақиришарди.

Янги атаман қаттиққўллик билан иш олиб борди; Сетраков ёнидаги жанг тўғрисидаги хабар Каргинга келиб етгач, эртасига ёқ станицадаги фронтчиларнинг ҳаммаси ўша ерга жўнади. Четдан кўчиб келганлар (улар станицада аҳолининг учдан бирини ташкил қилар эдилар) бошда боришини истамадилар, фронтчи солдатлар норозилик билдирилар, аммо Лиховидов Донни мудофаа этишда қатнашмаган барча «мужиклар»ни кўчиртириб юбориш тўғрисида қарор чиқартирди, кексалар бу қарорга имзо чекдилар. Эртаси куни ўнлаб араваларга тушиб олган солдатлар гармошка чалиб, ашула айтиб, Наполовга Чернецк қишлоғига жўнадилар. Булардан бир неча солдатгина, 1-нчи пулемёт полкida хизмат этган Василий Стороженко бошлилигига қизил гвардиячилар томонига қочиб ўтди.

Петронинг қадам ташлашидан унинг пастдан кўтарилигинини атаман фаҳмлади. Шунинг учун уни ўз уйига таклиф этмади, унга такаллуфсизлик билан муомала қилди.

— Йўқ, азизим, сизнинг Мигулинда қиласидиган

ишингиз йўқ. Сизсиз ишни бартараф қилишибди, кечаке кечқурун телеграмма олдик. Ўйингизга қайтинг, фармонимизни кутинг. Лекин казакларни ишга солинг! Шундай катта қишлоқ атиги қирқта жангчи берса-я!? Сиз ўша абраҳамларнинг қулоғини пишигинг! Ахир масала уларнинг мол-жонлари устида кетяптику! Соғ-саломат боринг, оқ йўл!

Шундай оғир гавдали одам енгил қадам ташлаб, шиппакларини шалоплатиб уйига кириб кетди. Петро майдонга, казаклар ёнига қайтиб келди. Ҳар тарафдан савол ёғила бошлади.

- Нима бўлди?
- У ерда нима гаплар бор?
- Мигулинга борамизми?

Петро севинчини ичига сиғдиролмай:

— Уйга кетамиз. Бизга эҳтиёжлари йўқ экан,— деди.

Казакларнинг оғизлари қулоқларига етиб, девор ёнига боғлаб қўйилган отлари ёнига кетдилар. Христония, елкасидан тоғ тушиб кетгандек, енгил нафас олди-да, Томилиннинг елкасига бир уриб қўйиб:

— Бундан чиқди, уй уйига, тепа тўйига экан-да, тўпчи!— деди.

— Хотинларимиз ҳам, дейман, бизни роса соғиниб қолишгандир.

— Ҳозир жўнаб кетамиз.

Маслаҳатлашиб, бу ерда тунаб қолмай, дарҳол йўлга тушишга қарор қилдилар. Тартибсиз ҳолда, тўп-тўп бўлиб, станицадан чиқдилар. Агар Каргинга оёқлари тортмай, ҳар замонда бир отларини йўртдириб келган бўлсалар, уйларига отларини ниқтаб, йўртдириб кетдилар. Баъзан отларини чоптириб кетар, қатқалоқ йўл отларнинг туёқлари остида тарақлар эди. Қаердадир, Доннинг нариги томонида, узоқдаги тепаларнинг орқасида чақмоқ чақарди.

Қишлоққа ярим кечада етиб келдилар. Тоғдан тушаётганда Аникушка ўзининг австрия милтиғидан ўқ чиқарди, казаклар қайтиб келаётганларини маълум қилиш учун бараварига ўқ уздилар. Буни эшитиб,

итлар ҳура бошлади, кимнингдир оти уйига яқинлашганини сезиб, титроқ овоз билан кишнаб юборди. Қишлоққа етиб олгач, ҳаммалари ҳар томонга қараб тарқалиб кетишиди.

Мартин Шамиль, Петро билан хайрлашар экан, енгил нафас олиб томоғини қириб қўйди-да:

— Урушиб бўлдик. Шукурки, осонгина қутулдик,— деди.

Петро ҳам қоронғида кулимсиради-да, отини ўз уйига ҳайдади. Пантелеј Прокофьевич чиқиб, отнинг бошидан ушлади. Эгарини олиб, отхонага олиб кирди. Петро билан бирга уйга кирди.

— Сафарга чиқмайдиган бўлдингизми?

— Ҳа.

— Хайрият. Худо урушнинг юзини тескари қилисин.

Даръя ухлаб ётган иссиқ ўрнидан туриб, эрига овқат тайёрлади. Григорий наридан-бери кийиниб хонасидан чиқди, қора жун босиб кетган кўкрагини қашиб, акасига кўзларини қисиб туриб пичинг қилди:

— Душманни бартараф қилдингиз, шекилли?

— Қарам шўрвани бартараф қиляпман.

— Бу ишинг маъқул. Агар мени ҳам ёнингга олсанг, қарам шўрвадан ном-нишон қолмайди...

* * *

Пасха байрамигача уруш тўғрисида ҳеч гап йўқ эди, пасхадан олдинги шанба куни Вешенскаядан от чоптириб келган чопар, совундек кўпириб кетган тулпарини Коршунов дарвозаси олдига қўйди-да, қилич-қинини зина босқичларига ура-ура зинапоя устїга чиқди.

Уни оstonада кутиб олган Мирон Григорьевич:

— Нима хабар?— деб сўради.

— Менга атаман керак, сизмисиз?

— Биз.

— Ҳозир казакларни отлантиринг. Подтелков қизил гвардия билан Наголин волостидан бу ёққа келяпти. Мана фармон,— чопар пакетни бериб, фуражкасининг терга пишган астарини ағдарди.

Уларнинг гапини эшитган Гришак бобо кўзойна-

гини тақиб чиқди. Митъка ҳам ҳовлидан югуриб келди. Округ атаманинг фармонини биргалашив ўқидилар. Чопар зинапоянинг нақшинкор қанотига суюниб, шамолдан қорайған юзининг чангини енги билан артди.

Пасханинг биринчи куни парҳездан оғизларини очган казаклар хутордан чиқиб жўнадилар. Генерал Алферовнинг фармони қатъий эди, у урушга бормаганларни казаклик унвонидан маҳрум этиш билан қўрқитган эди. Шунинг учун Подтелковга қарши юриш бошлаганларнинг сони биринчи сафардагидек қирқ киши эмас, бир юз саккизта эди. Булар қаторида қизиллар билан жанг қилиш ҳаваси билан ёнган чоллар ҳам бор эди. Қуш бурун Матвей Кашулин ўғли билан бирга жўнади. Авдеич Лофчи ҳам тўққиз пулга қиммат отини миниб, олдинги сафда борар, кета-кетгунча ўзининг ғаройиб саргузаштларини айтиб, казакларни хурсанд қиласди; кекса Максеев билан бирга бир неча оқ соқол чоллар кетаётган эди... Ёшлар ўлганларининг кунидан, чоллар эса зўр иштиёқ билан кетмоқда эдилар.

Григорий Мелехов ёмғирда киядиган бошлиғини фуражкасининг устидан тушириб, энг орқадаги сафда борарди. Туман қоплаб олган осмондан ёмғир қуйиб турарди. Ям-яшил кўкат билан қопланган дашт устидаги булутлар сузиб юради. Баландда, булутлар остида бир бургут парвоз қиласди. У ҳар замон-бир замонда қанотларини силкитиб, шамолнинг қаёққа эсаётганини билиб олишга уринар, шамол оқимиға кириб олгач, бир қанотини кўтариб, қизғиш, хира патларини йилтиратиб, шарққа тўғри учар, борган сари кичраяди.

Ўтлар ёмғирдан кўм-кўк бўлиб кетган. Ондасонда бултурги явшан кўзга ташланар, илонўт қизариб кўринар, тепа сиртида кул ранг қоровулхоналар йилтиради.

Тепадан тушиб Каргинга яқинлашганда казаклар ҳўқизларни ўтлатгани ҳайдаб кетаётган казак болага дуч келдилар. Яланг оёқ бола тийғана-тийғана қўлидаги қамчисини ўйнатиб келарди. У отликларни кўриб, тўхтаб қолди, уларнинг лойга булған-

ган, думлари тугилган отларини диққат билан кўздан кечирди.

— Қаерликсан?— деб сўради Иван Томилин.

— Каргинлик,— деб жавоб қилди бошига куртасини ташлаб олган бола кулиб.

— Сизнинг казаклар кетишдими?

— Кетишди. Қизил гвардиячиларни ҳайдагани кетишди. Ҳой амаки, сизда бир ўрам тамаки топилмайдими?

— Тамаки керакми?— деб Григорий отининг бoshини тортди.

Казак бола унинг олдига келди. Почаси шимарилган чалвори шалаббо, ҳошияси қип-қизил бўлиб ажралиб турарди. Чўнтағидан тамаки халтани олаётган Григорийга у тап тортмай қараб, ингичка овоз билан бидирлаб гапира кетди:

— Ҳозир шу ердан пастга тушсангиз, ўлдирилган одамларни кўрасиз. Қеча бизнинг казакларимиз асир тушган қизилларни Вёшкига ҳайдаб кета туриб, шу ерда қирдилар... Мен, амакижон, ҳув анови Қум тепа ёнида мол боқаётувдим, уларни чопгандарини кўриб турдим. Жудаям ваҳимали. Қазаклар қилич ўйнатиши билан улар додлашиб қочдилар... Қейин бориб кўрдим... Бирининг елкасидан чопган эканлар, тез-тез нафас олиб ётибди, қонга тўлган кўкраги ичиде юраги уриб турибди, буйраги кўмкўк... Жудаям ваҳимали!— деб шу сўзни такрорлар, казакларнинг бу ҳикояни эшитиб қўрқмаганларига ҳайрон қоларди. У Григорий, Христоня ва Томилиннинг бепарво, совуқ башараларига қараб шу хулосага келган эди.

Бола тамакини ёндириб олиб, Григорий остидаги отининг ҳўйл бўйини силади-да: «Раҳмат», деб ҳўқизлари томон чопди.

Қилич билан чопиб ташланган қизил гвардиячиларнинг мурдалари йўл чеккасида сел сувлари ювиб кетган чуқурча ичиде ётар, устларига наридан бери қумоқ тупроқ тортиб қўйилган эди. Кўкариб, мўматалоқ бўлиб кетган, лабида қон қотиб қолган бир чеҳра, кўк паҳталик шим ичидан бир оёқ кўриниб турарди.

— Итваччалар, яхшилаб кўммабдилар ҳам,— деб ғўлдиради Христоня; у отига бир қамчи солиб, Григорийдан олдинга ўтди-да, тепадан от чоптириб тушиб кетди.

— Дон тупроғига ҳам қон тўкилибди, кўрдик,— деб илжайди Томилин. Унинг юзи пириллаб учиб турарди.

XXV

Бунчукнинг пулемёт командасида Татарск қишлоқлик Максимка Грязнов деган бир казак бор эди. У Кутепов отряди билан бўлган жангда отидан айрилан, ўшандан бери ичкиликдан бош кўтармай, қарта ўйнагани ўйнаган эди. Белининг ўртасида тасмадек оқ йўли бўлган жийрон тулпарини отиб ўлдиришгандан кейин Максимка эгарни орқалаб олиб, тўрт чақирим йўл юрди, орқаларидан қувиб келаётган оқлардан қутулиш мушкул эканини кўриб, эгарни ташлаб, қиммат баҳо ўмилдириқ билан юганни олди-да, ўзбошимчалик қилиб жанг майдонидан чиқиб кетди. Ростовга келгандан сўнг ўзи чопиб ташлаган ясовулнинг кумуш қиличини «йигирма бир»га бой берди, қўлида қолган от жабдугини, чалворини, шигирин этигини ютқизиб, қипяланғоч қолгач, Бунчук командасига келиб қўшилди. Бунчук уни кийинтириб, одам қиёфасига келтирди. Максимка одам бўлиб кетарди-ю, лекин Ростов ёнида бўлган жангда унинг бошига ўқ тегиб, мовий кўзи кўйлагига оқиб тушди, миясидан тизиллаб қон отилиб чиқа бошлади. Илгари от ўғриси бўлган, яқиндагина пиянисталик қилиб юрган вешенскаялик казак Грязнов ёруғ дунёдан кўз юмди.

Бунчук ўлим талвасасида қийналаётган Максимкага қараб қўйди-да, унинг миясидан пулемёт устига сараган қонни яхшилаб артди.

Дарҳол чекиниш керак эди. Бунчук пулемётни судраб кетди. Қайноқ ерда Максимканинг мурдаси совуб қолди, жон талвасасида кўйлагининг орқа этаги билан бошини ёпиб олган казакнинг елкаси офтобда қорайиб кўринарди.

Туркия фронтидан қайтган солдатлардан иборат бўлган қизил гвардиячилар взводи биринчи чорраҳадаёқ маҳкам жойлашиб олди. Боши ярғоқ, тулаган папоқ кийган солдат пулемётни ўрнатишга ёрдам берди, қолган солдатлар кўчанинг ўртасини баррикадага ўхшатиб тўсишиди.

— Энди келиб кўр-чи! — деди серсоқол бир солдат яrim доира шаклидаги тепа орқасидагиларга қараб.

— Энди устларига ўқ ёғдиррамиз.

Девор тахталарини кўчираётган норғил йигитча:

— Буз деворни, самарский! — деб бақирдилар.

Ароқ складининг томига чиқиб олган кенг пешона солдат:

— Ана улар! Шу ёққа келишяпти,— деди.

Анна Бунчукнинг ёнига етиб олди. Қизил гвардиячилар омонат истеҳком панасига келиб ётдилар.

Шу пайт ўнг томондаги тор кўчадан тўққизта қизил гвардиячи пуштада йўрғалаган беданадай чопиб чиқиб, муюлишдаги уйнинг орқасига ўтиб олдилар. Улардан бири:

— От чоптириб келишяпти! Қочинг! — деди.

Чорраҳа бир он сукунат ичидаги қолди, орадан бир минут ўтгач, чанг-тўзон орасидан фуражкасига оқ лента боғлаган, елкасига милтиқ осган казак от чоптириб чиқди. У отнинг бошини қаттиқ бурган эди, от кейинги оёқларига ўтириб қолди. Бунчук унга нагандан ўқ ўзди. Бироқ казак отнинг бўйнига ётиб олиб, орқасига қараб қечди. Пулемёт олдида турган солдатлар нима қилишларини билмай типирчилаб қолдилар, улардан иккитаси девор тагидан чопиб бориб, дарвоза олдида ерга ётиб олди.

Хозир ҳаммаси қўрқиб қочадиганга ўхшарди. Солдатларнинг нафаслари ичига тушиб кетиб, жовдираб туришлари аҳвол чатоқлигини кўрсатарди... Шундан кейин юз берган ҳодисалардан фақат биттасигина Бунчукнинг хотирасида яққол сақланиб қолди. Рўмоли гарданига тушиб, сочи тўзғиб кетган, ҳаяжонидан таниб бўлмайдиган ҳолга келиб, рангги оқариб кетган Анна сакраб ўрнидан турди-ю, милтигини ўрта белидан ушлаб, орқасига қайрилиб қаради, сўнгра ка-

зак бекинган уйни қўли билан кўрсатиб, таниб бўлмайдиган овоз билан «Орқамдан!» деб бақирди-да, қоқиниб-суқиниб чопиб кетди.

Бунчук ўрнидан турди, унинг оғзидан тушуниб бўлмайдиган бир фарёд отилиб чиқди. Ёнидаги солдатнинг милтигини қўлидан олиб, тиззалари қалтираган, нафаси тиқилиб, зўр бериб бақириб-чақирганидан бўриқиб кетган ҳолда Аннанинг кетидан чопди. У орқасидан чопиб келаётган бир неча кишининг нафасини эшитди, лекин бутун вужуди билан тузатиб бўлмайдиган даҳшатли бир ҳодиса рўй беришини сезиб турарди. Шу он у Аннанинг шижоати бошқаларни жасоратлантирмаслигини, бемаъни ва натижасиз бўлишини англади.

Муюлишдан сал нарироқда чопиб келаётган казакларга дуч келишди. Казаклар бараварига пала-партиш ўқ уздилар, ўқлар визиллади. Анна қуёндай аянчли товуш билан чинқириб юборди. У тиз чўкиб, қўлларини олдинга узатди, кўзлари қишидан чиқиб кетаёзди. Бунчук казакларнинг орқага бурилиб қочгандарини, унинг пулемёти ёнида бўлган ўн саккизта солдат Аннанинг журъатидан жасоратланиб казакларни қувиб кетганини кўрмай қолди. Унинг кўзига ҳозир оёқлари остида типирчилаб ётган Аннадан бошқа ҳеч нарса кўринмасди. Кўтариб, бошқа ёққа олиб бориш учун уни ёнбошига ағдарди, шу он чап биқинидан қон оқаётганини ва кўк кофтасининг ўқ тешиб ўтган жойи титилиб кетганини кўрди-ю, Аннанинг портловчи ўқ билан яраланганини, ўлиши аниқлигини англади, Аннанинг хиралашиб кетган кўзларида ўлим соясини кўрди.

Аллаким уни туртди. Аннани яқин ўртадаги ҳовлига олиб кириб, салқин бостирма тагига ётқизиб қўйдилар.

Яргоқ бош солдат ярага пахта босар, қонни шимиб, жиққа ҳўл бўлган пахтани отиб ташлар эди. Бунчук ўзини босиб олиб, Аннанинг эгнидаги кофтанинг ёқасини очди, ўзининг ич кўйлагини ечди-да, уни ғижимлаб ярага босди, яра ичига ҳаво кирганидан қон билқиллаб, кўпириб чиқар эди. Аннанинг юзи бўзариб, қорайиб кетган лаблари азобдан титрарди.

Анна оғзини калпа-калпа очиб нафас олар, бироқ ҳаво оғзидан ҳам, ўқ теккан жойдан ҳам киар, ўзи қаттиқ инграрди. Бунчук унинг кўйлагини кесиб, жон талвасасида терлаган танасини яланғочлаб қўйди. Ярасига дока ўраб боғлаб қўйишди. Бир неча минутдан сўнг Анна ҳушига келди. Ичига чўккан қора кўзлари билан Ильяга боқди-да, пирпираган киприклирини яна юмди.

— Сув! Ичим ёняпти!— деб қичқириб тўлғанди. Сўнгра:— Ўлгим келмайди, Илья-а-а! Жоним... А-а-а,— деб йиғлади.

Бунчук шишинқираган лабларини унинг оловдек ёниб турган юзларига босди-да, кўкрагига кружкадан муздек сув қўйди. Сув елка чуқурини тўлдириб, бирпасда яна қуриди. Аннани ажал олови куйдирарди. Бунчук унинг кўксига сув қўйган сари Анна типирчилаб, қўлдан чиқиб кетмоқчи бўларди:

— Кўйиб кетяпман, ёняпман!..

Мадордан кетиб, бир оз совунгач:

— Илья, нега унақа қиласан? Нега? Қўриб тубибсан-ку, ҳаммаси шунчаки бир... Тентаквой! Қийин... Илья... жоним, сен ойимга бир амаллаб... билсанг...— деди у аниқроқ гапириб: сўнгра қисилган кўзларини кулгандагидек сузиб, дард ваҳимасини енгмоқчи бўлиб, бўғзига бир нарса тиқилгандек тўлдиради:— Бошда сезмовдим... Бир нарса урилиб, куйдирди... Ҳозир бутун вужудим ёняпти... ўлишимни билиб турибман.— Бунчукнинг «қўйсанг-чи» деб қўл силтаганини кўриб ижирғанди.— Ёлғиз қўй! Насасим бўғиляпти.

У ўз дардларини изҳор қилмоқчи бўлгандек, дамба-дам, ўқтин-ўқтиҳ гапириди. Бунчук Аннанинг юзлари ва чаккаси оқ мумдай сарғайиб кетаётганини кўриб, қаттиқ ваҳимага тушди. Танаси ёнида шалвираб ётган қўлларига назар ташлади. Кўкариб, мўматалоқ бўлаётган тирноқларига кўзи тушди.

— Сув... кўкрагимга... Ёняпман!

Бунчук сувга чопди. Қайтар экан Аннанинг бостирма тагидан хириллаган овози эшитилмасди. Бөтаётган қуёш талвасада тортишиб қолган лабларини, ярасига босиб олган сарғиш ва ҳали илиқ каф-

тини ёритарди. Бунчук унинг елкасидаң авайлаб кўтариб, қорайиб қолган сепкилли бурунчасига бир лаҳза қараб қолди. Қора қошлари остидаги кўзларининг қисилиб, мўлтираб турганини кўрди. Боши борган сари орқасига шилқиллаб осилиб тушар, ингичка бўйинчасидаги кўкиш томирчалари сўнгги марта тепиб қўярди.

Бунчук лабларини қизнинг қорайган ва керилиб-роқ қолган қовоқларига босиб:

— Жоним! Аня!— деб чақирди. Сўнгра ўрнидан туриб, ғайри табиий бир ҳолда, қўлларини икки ёнига қилиб, шартта бурилиб тўғрига қараб кетди.

XXVI

Шу кунлари у алаҳсигандек бўлиб юрди. Юрап, нимадир қиласар, овқат еяр, ухлар, лекин буларнинг ҳаммасини гўё тушидагидек, эс-ҳуши йўқдек бир аҳволда қиласарди. Шишинқираган, жавдираган кўзлари билан теварак-атрофига довдираб қаарар, ёр-биродарларини танимас, худди маст-алаастдек ёки оғир касалдан янги турган кишидек боқарди. Анна ўлгандан бери ҳислари ўтмаслашиб қолган, кўнглига ҳеч нарса сиғмас, ҳеч нарсани ўйламасди.

— Ол, е, Бунчук!— дейишарди ўртоқлари. У жағларини зўрға қимирлатиб овқат еяр, бир нуқтадан кўзини узмасди.

Унга кўз-қулоқ бўлиб юрдилар, касалхонага жўнатиш тўғрисида маслаҳатлашдилар.

Эртасига пулемётчилардан бири ундан:

— Бетобмисан?— деб сўради.

— Йўқ.

— Бўлмаса нега ғамбодасан?

— Йўқ, ундей эмас.

— Кел, бўлмаса бир чекишайлик. Оғайни, энди уни қайтариб бўлмайди. Бунинг учун азобланиб юрма.

Ухлаш пайти келганда унга:

— Энди ётиб ухла,— дейишарди.

Бунчук ухлагани ётарди.

У шу кўйи, эс-ҳушини йўқотганича тўрт кун юрди.

Бешинчи кун деганда кўчада уни Кривошликов учратиб, қўлидан маҳкам ушлади:

— Ҳа, ҳа, сенмисан? Ахтариб юрибман,— деди.

Кривошликовнинг Бунчук аҳволидан хабари йўқ эди. Ўнинг елкасига қоқиб қўйиб, ғалати кулиш қилди:

— Сенга нима бўлди? Мастмисан? Шимолий окружларга экспедиция жўнатилишидан хабаринг йўқми? Беш кишилик комиссия сайланган. Федор бошчилик қилиб кетяпти. Ҳамма умид шимол казакларидан. Бўлмаса иш чатоқ. Ишлар чатоқ. Сен борасанми? Бизга агитаторлар керак. Борасанми?

— Ҳа,— деди Бунчук қисқа қилиб.

— Жуда соз. Эртага жўнаймиз. Орлов бобога учраш, у бизнинг маслаҳатгўйимиздир.

Бунчук аввалги руҳий тушкунлик ҳолатида йўл ҳозирлигини кўрди, эртасига, 1 май куни экспедиция билан йўлга чиқди.

Бу вақтда Дон Совет ҳукумати таҳликали аҳволга тушиб қолган эди. Немис босқинчи аскарлари Украинадан бостириб келмоқда, қуи Дон станицалари ва округларини контролреволюцион исёнчилар босиб олган эди.

Попов ўз отряди билан қишлоқ районларида изғиб юрар ва у ердан Новочеркасск таҳдид соларди. 10—13 апрелда Ростовда бўлаётган вилоят советлар қурултойи бир неча марта ўз мажлисини тўхтатишга мажбур бўлди, чунки исён кўтарган черкасскликлар Ростовга яқинлашиб, шаҳар атрофидаги кварталларни ишғол қилган эди. Фақат шимолда, Хопер ва Усть-Медведица округларида революция машъаллари ёниб турар, шу сабабдан, қуи Дон казакларининг ёрдамидан умид узган Подтелков ва бошқалар беихтиёр шимолдаги бу революция машъалларига толпинарди. Мобилизация натижা бермади, шундан кейин яқиндагина Дон Комиссарлар Советининг Раиси қилиб сайланган Подтелков Лагутиннинг ташаббуси билан. фронтчилардан уч-тўрт полк тузиш, уларни ҳам немислар, ҳам қуи Дон аксилиңқилобчилари устига юбориш учун шимолга жўнади.

Подтелков бошчилигига беш кишидан иборат мо-

билизация комиссияси тузилди. 29 апрелда мобилизация эҳтиёжлари учун хазинадан тилла билан ўн миллион сўм ва Николай пули олиб кетдилар, пул яшикларини қўриқлаш учун асосан собиқ Каменск маҳаллий командасида хизмат қилган казаклардан иборат отряд туздилар, бир неча агитатор казакни ўзларига қўшиб олдилар. Экспедиция 1 майда, немис аэропланлари ўқи остида Каменск томон жўнади.

Йўллар Украинадан чекинаётган қизил гвардиячилар тушган эшелонлар билан тўлган эди. Исёнчи казаклар кўприкларни қўпорар, поездларни ағдарар эдилар. Ҳар кун эрталаб Новочеркасск-Каменск темир йўли устида немис аэропланлари пайдо бўлар, гала-гала калхатлардай айланиб юриб, пастга шўнғир, пулемётлардан тариллатиб ўқ отар, вагонлардан қизил гвардиячилар қочиб чиқар эдилар; ўқлар дўлдек ёғилар, станциялар устида шлак ва урушнинг аччиқ ҳиди қон ҳиди билан аралашиб кетарди. Аэропланлар жуда баландлаб кетса ҳам мерганлар ўқ отиб, яшикларидан ўқларни исроф қиласар, поездлар ёнида юрган кишилар этиклари билан бўш гильзаларни ғичирлатиб босиб юрасар, қум устини кузги япроқдек гильзалар босиб кетарди.

Ҳамма ёқда вайронагарчилик асари кўзга ташланар: ёндирилган ва парчаланган вагонлар йўл четидаги қияликларда кўмир бўлиб ётар, сим ёғочлардаги қанддек оппоқ чиғаноқларга ўралган симлар узилиб осилиб қолган эди. Бирталай уйлар бузилиб вайрон бўлган, темир йўллар четидаги тўсиқларни бўрон учирив кетгандай эди...

Экспедиция беш кундан бери Миллеровога етиб олишга уринарди. Олтинчи куни Подтелков комиссия аъзоларини ўз вагонига чақириб олди.

— Шу кепатада йўл юролмаймиз! Келинг, бутун анжомларимизни ташлаб, поход тартиби билан жўнайлик.

— Нима?— деб юборди Лагутин ҳайрон бўлиб.— Биз Уст-Медведицагача поход тартиби билан етиб боргунимиэча, оқлар бизни мажақлаб ташлайдилар-ку.

— Жуда узоқ,— деди Мрихин мижғовланиб.

Отрядни яқиндагина қувиб етган Кривошликов, ёқасидаги ленталарининг ранги ўнгиг кетган шинеллига бурканиб, индамай ўтиради. Унинг безгаги тутиб қолган, хинин ичгани учун қулоқлари шинғирлар, зирқираб турган боши иситмада ёнар эди. У музокараларга аралашмай шакар қоп устида буқчайиб ўтирад, кўзлари иситманинг зўридан хидалашган эди.

Подтелков картадан кўзини олмай:

— Кривошликов! — деб чақириди.

— Нима дейсан?

— Нима тўғрисида гаплашаётганимизни эшитмаяпсанми? Поход тартиби билан кетиш керак деяпман, бўлмаса орқамиздан қувиб етадилар, хароб бўламиз. Сен нима дейсан? Биздан кўпроқ ўқигансан, гапири.

— Поход тартиби билан кетса ҳам бўларди, — деб тўхтаб-тўхтаб гап бошлади Кривошликов. Аммо безгаги тутиб, тишларини бўридек такиллата бошлади. — Агар юкимиз енгил бўлганда майли эди.

Подтелков эшик олдига келиб, вилоят картасини очди. Мрихин картанинг бир учидан ушлаб турди. Фарб томондан эсган шамолда карта шалдираб қўлдан чиқиб кетай дер эди.

Подтелков тамакидан сарғайған бармоғини карта устида юргизиб:

— Мана, қара, манови йўл билан кетамиз, — деди. — Масштабни кўряпсанми? Юз эллик чақирим, нари борса икки юз чақирим келади. Хўш!

— Рост гап,вой фалокат-э! — деб унинг гапига қўшилди Лагутин.

— Сен Михаил, нима дейсан?

Кривошликовнинг ғаши келиб, елкасини қисиб қўйди.

— Мен қарши эмасман.

— Ҳозир бориб казакларга айтаман, вагонлардан тушсинлар. Фурсатни бекорга ўтказишдан фойда йўқ.

Мрихин нима дер эканлар деб ҳаммага назар ташлади, ҳеч ким эътиroz қилмаганини қўриб, вагондан сакраб тушди.

Подтелков экспедицияси тушган эшелон шу булутли, ёмғирли кунда Белая Калитва яқинидаги стан-

цияда турар эди. Бунчук ўз вагонида, шинелига бурканиб ётарди. Қазаклар шу ернинг ўзида чой қайнатар, бир-бирларига ҳазил қилиб хохолашарди.

Ҳазилкаш ва қизиқчи казак — мигулинлик Ванька Болдирев пулемётчи ўртоғини калака қиласади. Тамаки чекавериб бўғилиб қолган овоз билан хириллаб:

— Сен Игнат, қайси губерналиксан? — деб сўради.
— Тамбовсклик,— деб дўриллаб жавоб қилди Игнат.

— Моршанскийдандирсан?
— Йўқ, Шатскийдан.
— Э... Шатскийдан — юрак ютганлардансан: муштлашганда еттитанг бир одамга бас келолмайсан. Сизнинг қишлоқда черков байрамида бир танани бодринг билан бўғизлаган эдилар, а?

— Бас қилсанг-чи, бўлди энди!
— Ҳа, эсимдан чиқибди, бу воқиа сизнинг қишлоқда бўлмаган экан. Қишлоғингизда черков томини юпқа-чалпак билан ёпган, тагига нўхат сепиб, қияликдан итариб туширишган экан. Шу гап ростми?

Шу пайт чой қайнаб қолди, бу эса Игнатнинг жонига оро кириб, уни Болдировнинг ҳазилидан вақтинча бўлса ҳам қутқарди. Аммо нонушта қилишга ўтириш билан Ванька яна ҳазилини бошлади:

— Игнат, сенга нима бўлди, чўчқа гўштини иштана билан емаётибсан? Яхши кўрмайсанми?

— Нега ёмон кўрай.

— Ма, сенга чўчқа думғазаси, жуда мазалиқ-да!

Ҳамма баравар кулиб юборди. Аллаким қалқиб кетиб, ўйтали тутиб қолди. Қий-чув кўтарилиди, этиклари билан полни тепиб дукурлатишиди. Бир минутдан кейин Игнат бўғилиб, зарда билан:

— Ўзинг ей қол, шайтон! Нега думғазангни тумшугимга тиқаверасан? — деди.

— Бу меники эмас, чўчқаники.

— Ҳаммаси бир гўр, ҳаром.

Болдирев сиполикни қўлдан бермай, хириллаб:

— Ҳа-ро-м? Эсинг жойидами? — деди.— Уни пашада табаррук сув сепиб поклаганлар. Ундан кўра парҳезимни очишдан қўрқаман деб қўя қол...

Болдиревнинг ҳамқишлоғи, тўртта георгий нишони олган, кўркам, малла соч казак насиҳат қилғандай:

— Қўй, Иван! Мужик билан талашиб балога қоласан,— деди.— Думғазани еб бўлиб, чўчқа қўйруғини кўнгли тусаб қолади. Чўчқа қўйруғи бу ерда топилмайдиган матоҳ.

Бунчук кўзларини юмиб ётар эди. Бу гаплар унинг қулоғига кирмас, яқиндагина бошига тушган ишни хотирлаб, аввалгидаи, ҳатто аввалгидан баттар юраги ёнарди. Қор билан қопланган дашт, узоқ-узоқларда қорайиб кўринган ўрмонзор хиралашган кўзлари олдида гир айланарди, шу пайт муздек шамол келгандек бўлди, Аннани, унинг қора кўзларини, қимтилган хушбичим оғзини, бурни устидаги майда сепкилларини, пешонасидаги ажинларни кўз олдидағидек кўрди; лаблари орасидан чиққан сўзларни эшитгандек бўлди. Бироқ бу сўзлар ноаниқ, аллақандай бегона одамларнинг сўзлари, кулгилари билан аралашиб кетарди. Ҳарқалай, кўзларининг пирпирашидан, қайрилма киприкларининг пирпирашидан нима деяётганини фаҳмларди... Мана, унинг кўз олдида бошқа бир Анна гавдаланди: унинг ранги заъфарон: бетларига оқиб тушган кўз ёшлари қотиб қолган, бурни ингичкалашган, изтироб ичида лабларини қимтиб олган.

У энгашиб ичига тушиб кетиб, қотиб қолган қора кўзларни ўпади... Бунчук инграб юборди, ҳўнграб йифлаб юбормаслик учун кафти билан оғзини маҳкам беркитди. Бир лаҳзага бўлса ҳам, Анна унинг ёидан кўтарилимас эди. Замон ўтса ҳам Аннанинг қиёфаси хаёлидан кетмас эди. Унинг чеҳраси, қадди-қомати, юриши, имо-ишоралари, керилган қошлари — буларнинг ҳаммаси бирга қўшилиб, бутун бир жонли Аннани кўз олдида гавдалантиради. Бунчук унинг навозиши билан гапирган сўзларини ва у билан бирга кечирган кунларини хотирларди. Бу жонли хотираларни қайтадан тасаввур этиш унинг азобларига азоб қўшарди.

Вагонлардан тушиш тўғрисидаги буйруқ уни уйғотиб юборди. Үрнидан турди-ю, ҳафсаласи келмай йиғиширинди-да, вагондан тушди. Кейин юкларини

туширишга ёрдамлашди. Яна боягидек лоқайдлик билан аравага ўтириб жўнаб кетди.

Ёмғир шивалаб ёғиб туарар, йўл чеккасидаги ўтлар ҳўл бўлган эди.

Дашт. Тепалар устида, жарликларда шамол изғиб юради. Узоқ ва яқиндаги қишлоқлар, айrim қўрғонлар кўзга ташланади. Тутун чиқариб турган паровозлар, станциядаги чорбурчак қизил гиштин иморатлар орқада қолиб кетди. Белая Калитвада қира қилинган қирқтacha арава бирин-кетин йўл бўйлаб кетмоқда. Отлар секин қадам ташлар, ёмғирдан билчиллаб кетган қўмлоқ қора тупроқ ер отларнинг юршини қийинлаштираш эди. Фиддиракларга балчиқ елимдек ёпишиб, кегайларда осилиб қоларди. Белая Калитва районидаги кўмир қазувчилар олдинда ва орқада тўп-тўп бўлиб келар эдилар. Улар казаклардан қочиб, бола-чақалари, бор-йўқларини олиб шарқ томонга қараб кетишаётган эди.

Грачи разъездсида Романовский билан Шчаденко нинг тўзиган отрядлари уларни қувиб етди. Уруш, уйқусизлик ва муҳтоҷлик жангчиларнинг юзини сарғайтирган, ҳоритган эди. Шчаденко Подтелковнинг ёнига келди. Унинг мўйловлари калта қилиб дукартланган, бурни қиррали, юзи чиройли, сўлғин эди. Бунчук улар ёнидан ўтар экан, Шчаденко қошларини чимириб, ҳорғин қиёфада жаҳл аралаш гапирганини эшитиб қолди:

— Сен нималар деяпсан? Нима, мен ўз йигитларимни билмайманми? Ишлар чатоқ эди, бунинг устига лаънати немислар чиқиб қолди! Энди одамларимни қаёқдан тўплаб оламан?

Ў билан гаплашгандан кейин Подтелковнинг қовоғи солиниб кетди, эсанкираб ўз аравасини қувиб етди ва ёнига келган Кривошликовга ҳаяжон билан бир нималар деб гапирди. Уларга диққат билан қараб турган Бунчук Кривошликов қўлинни пахса қилиб, тез-тез гапирганини, Подтелковнинг қош-қовоғи очишиб, аравага сакраб чиқиб олганини кўрди, олти пудча келадиган тўпчининг оғирлигидан араванинг ён тахтаси қирсиллаб кетди.

Подтелков кўзларини кисиб, чарм камзулининг

ёқасини очиб юборди ва кўкрагини шамолга бериб:

— Ҳайда! — деб қичқирди.

Подтелков отряди Донец округининг ичкарисига қараб, Краснокутск станицаси томон силжиб борарди. Украина қишлоқларининг аҳолиси отрядни доим хурсандлик билан қарши олар, озиқ-овқат ва ем-хашакларни жон деб сотар, тунаш учун бошпана берар, лекин Краснокутсккача отларни кира қилиш масаласи кўтарилигдан мижғовланиб, гарданларини қашиб қолар ва от беришдан бош тортар эдилар.

— Биз яхши ҳақ тўлаймиз, нега кўнмайсиз? — деб сўради Подтелков бир украинликдан.

— Менинг бошим пулдан азиз.

— Сенинг бошинг бизга керак эмас, бизга от билан аравангни кирага берсанг бўлади.

— Йўқ беролмайман.

— Нега энди?

— Сиз казаклар устига бостириб кетяпсиз-ку.

— Нима қипти?

— Ишнинг оқибати хунук бўладиганга ўхшайди.

Ўз жоним кўзимга кўринади. Отим нобуд бўлса, қандай қилиб ишлайман! Йўқ, амаки, менга тирғилма, беролмайман!

Краснокутскка яқинлашган сари Подтелков ва бошқалар безовталана бошладилар. Аҳолининг кайфияти ҳам ўзгара борди: агар сафарларининг аввалида босиб ўтган қишлоқларнинг аҳолиси уларни хурсанд бўлиб, меҳмондўстлик билан қаршилаган бўлсалар, кейинги қишлоқларда отрядни нохушлик билан, ҳадиксираб қарши ола бошладилар. Озиқ-овқатни ўлганларининг кунидан сотар, савол берилганда тапни четга буриб юборар эдилар. Отряд араваларини илгаригидек ясанган-тусанган ёшлар қуршаб олмас эди. Аравалар ўтиб кетаётганда хўмрайиб, нохушлик билан деразадан қараб қолар ва ўзларини опқочишга уринар эдилар.

Отряддаги казаклар хафа бўлиб:

— Ҳой, ўзларингиз христианмисиз ахир? — дер эдилар. — Нега бизга душман кўзи билан қарайсизлар, арпангизни хом ўрдикми?

Наголинск волостига қарашли қишлоқларнинг бирда ўзларини совуқ кутиб олганларидан хуноб бўлган Ванька Болдирев қишлоқ майдонида шапкасини ерга бир уриб:

— Ҳой, инсонмисизлар ё жинмисизлар! Нега чурқ этмайсизлар, фалону пиставон?— деб хириллади. Катталардан бирортаси келиб қолмасин деб алангланиб қаради.— Ҳақингизни олиб берамиз деб қон тўқяпмиз ахир, сизлар бўлсангиз буни кўрмайсиз! Энди, ўртоқлар, ҳамма баробар, казак ҳам йўқ, хоҳол ҳам, ҳеч ким ўзини катта олмаслиги керак. Дарров товуқ ва тухум олиб келинг, Николай пули билан тўлаймиз!

Болдиревнинг хуноб бўлиб бақиришига қулоқ солган олтита украин қўшдан чиққан отек, бошларини қуйи солиб тураг эдилар.

Унинг куйиб-пишиб гапирган сўзларига ҳаям демасдилар, йўқ ҳам.

— Сизлар илгари ҳам хоҳол эдингиз, ҳозир ҳам шундоғлигича қолгансиз. Илоё, ер билан яксон бўлинглар! Кошкийди ер ютса сизларни, қорни катта буржуйларни! — Болдирев оҳори кетган шапкасини яна бир марта ерга уриб, нафратидан қип-қизариб кетди:— Сизлар сув бўйида ўтирасиз-у, лекин чўллаган кишиига бир пиёла сувни раво кўрмайсиз!

— Кўп акиллайверма!— дейишиди украинлар уйуяларига жўнашиб.

Шу қишлоқда ёши қайтиб қолган бир украин аёли қизил гвардиячи казаклардан:

— Сиз ҳамманинг бор-йўғини талаб, одамларни қириб юбормоқчи эмишсиз, ростми?— деб сўраб қолди.

Уша казак кўзларини бақрайтириб туриб:

— Рост,— деди.— Ҳаммани эмас, чолларни бўғизлаймиз, холос.

— Вой худойим! Чолларни бўғизлаб нима қиласиз?

— Биз гўштларини шовлага солиб еймиз: ҳозирги қўйларнинг гўшти унча мазалик эмас, фақат ўт ейди, биронта чолни икки нимта қилиб қозонга солинса борми, овқат мазалик бўлади...

— Қўй-э, мени калака қилма.

— Ҳой хола бунинг гапига ишонма, сени лақиллатяпти! Тентак-да, оғзига келганини қайтармайди!— деб гапга аралашди Мрихин.

Ёлғиз қолишганда Мрихин ҳазилкаш казакнинг таъзирини берди:

— Дўстим, сен билиб ҳазиллаш, одамини топиб ҳазиллаш. Бунақа ҳазил учун Подтелков терингга сомон тиқади-я! Нега фитначилик қиляпсан! Бу хотин ростдан ҳам қизиллар чолларни қириб ташлар экан, деб гап тарқатадику!

Подтелков манзиллар ва бекатларда кўп тўхтамас, безовта бўлиб, юришини жадаллаштиарди. Краснокутск станицасига киришдан илгари у Лагутин билан узоқ маслаҳатлашиб олди.

— Иван, узоққа бориб ўтиришнинг ҳожати йўқ. Усть-Хопер станицасига етиб олиб, ишни бошлаб юборрамиз! Кўнгилли аскарлар тўплаймиз, деб эълон қиласмиз, юз сўмдан маош берамиз деймиз, лекин ҳар бир казак ўз оти ва эгар-жабдуғи билан келсин, халқ пулини бекорга совуриш керак эмас. Усть-Хопердан юқори тарафга: сенинг Буказов станицанг, Слашчевск, Федосеев, Кумилжен, Глазунов, Скуришенск томон кетамиз. Михайлловкага боргунча бир дивизия аскар тўплаймиз! Шундайми?

— Агар у ерлар тинч бўлса, тўплаймиз.

— У ерларда ҳам фитна бошланган деб ўйлайсанми?

— Ким билади дейсан?— деб Лагутин сийрак соқолини сийпади, кейин зорлангандай ингичка овоз билан гапирди:

— Биз бир оз кечикдик... Федя, мен қўрқаманки, биз фурсатни қўлдан бердик. У ерларда офицерлар иш олиб боряптилар. Шошилиш керак.

— Шундоғ ҳам шошиляпмиз. Сен қўрқма! Қўрқсанг — иш пачава бўлади,— деб кўзларини чақчайтирди Подтелков.— Шунча одамни орқамиздан эргаштириб кетяпмиз-ку, қўрқамизми! Кечикқанимиз йўқ! Душман ҳалқасини ёриб ўтамиш! Икки ҳафтадан кейин оқларни ҳам, германларни ҳам савалайман! Уларни Дон ерларидан суриб чиқарамиз, қузғунларга

ем қиламиз.— У бир оз жим туриб, папиросини ютоқиб чекди-да, юрақдаги гапини айтди.— Кечиксак — биз ҳам, Дондаги Совет ҳокимияти ҳам ҳалок бўлади. Оҳ; кошкийди кечикмаган бўлса! Агар офицерлар қўзғолони у ерларга ёйилган бўлса — ишимиз хараб!

Эртаси куни кечқурун отряд Краснокутск станицасига қаравши қишлоқларга кирди. Лагутин ва Кривошликов билан олдиндаги аравалардан бирида кетаётган Подтелков Алексеевск хуторига етмасдан бурун чўлда ўтлаб юрган подани кўрди.

— Кел, подачидан сўраб-суринтирайлик,— деди у Лагутинга.

— Боринглар, суринтиинглар,— деб гапини маъкуллади Кривошликов.

Лагутин билан Подтелков аравадан сакраб тушиб, пода томон кетдилар. Офтоб даштнинг ўтини қовжиратиб юборган эди. Ўт яхши битмаган, топталган эди, фақат йўлнинг четида сариқ гулли ўтлар ва шохлаб кетган ёввойи сули шамолда шилдиар эди. Подтелков қовжирай деб қолган шувоқ ўтнинг уругини кафтида эзғилаб, унинг ўткир ҳидини ҳидлаб подачи олдига борди.

— Ҳорманг, ота!

— Бор бўлинг.

— Мол боқяпсизми?

— Ҳа, боқяпмиз.

Чол оқариб кетган ўсиқ қошлари остидан хўмра-йиб қараб, бош чайқади.

— Тирикчилик қалай?— деб сўради Подтелков одат бўйича.

— Ёмон эмас, худога шукур.

— Қишлоқда нима гаплар бор?

— Ҳеч гап йўқ. Ўзингиз ким бўласизлар?

— Аскармиз, хизматдан бўшаб, уй-уйимизга кетяпмиз.

— Қаерликсизлар?

— Усть-Хоперлик.

— Подтелкин дегани ҳам орангизда борми?

— Ҳа.

Подачи қўрқди шекилли, ранги оқариб кетди.

- Нега қўрқиб кетдингиз, бобо?
- Нега қўрқмай, биродар, эшитишимча, сизлар православ динидагиларнинг ҳаммасини қирав эмишсизлар.
- Бекорчи гап! Бунақа гапларни ким тарқатяпти?
- Ўтган куни йигилишда атаман шундог деган эди. Билмадим, бир хабар эшитганми, ёинки ҳукуматдан қофоз олганми, Подтелкин қалмоқлар билан келяпти ҳаммани, сўяяпти деди.
- Сизлар атаман сайладингизми?— деб сўради Лагутин Подтелковга қараб қўйиб.
- Подтелков сарғайган тишлари билан ўт чайнаб турарди.
- Тунови куни атаман сайладик. Советни беркитиб қўйдик.
- Лагутин яна бирніма сўрамоқчи эди, нарироқда юрган катта қашқа буқа бир сигир устига сакраб, уни буқчайтириб юборди.
- Белини синдиради, ҳаром ўлгир!— деб подачи йигитлардек чаққонлик билан подага югурди; йўл-йўлакай:— Настенъканинг сигири!.. Белини синдиради! Ҳаром қотур, қашқа!— деб бақирди.
- Подтелков қўлларини қаттиқ силкитиб, арава олдига келди. Рўзгорпараст бўлган Лагутин тўхтаб, буқа тагида буқчайиб қолган ориққина сигирга ачиниб қаради, шу топда беихтиёр: «Ростданам белини синдириб юборса-я! Вой, эганг ўлсин!» деб ўйлади.
- У, дирдов сигир буқа остидан бели синмай, эсономон чиққандан кейингина, хотиржам бўлиб, арава томон кетди. «Энди нима қиласми? Наҳотки Доннинг бу ёғидаям атаманлар ҳукм сураётган бўлсалар?» деб ўзига-ўзи савол берди. Аммо шу топда йўлнинг чеккасида турган кўркам буқа хаёлини бўлди. Буқа катта ва сағриси кенг қора сигирни исказ, дўнг пешонали бошини чайқарди. Унинг бўйни тиззасигача осилиб тушган, гавдаси узун ва миқтидан келган, таранг эди. Калтагина оёқлари қозиқдек юмшоқ ерга ботиб кетганди. Лагутин бу наслдор буқага истар-истамас ҳавас билан қараб, қизғиши тукли сиртини завқ билан

томуша қилди. Гарчи күнгли нотинч бўлса ҳам, йўл-йўлакай шундай бир фикр хаёлига келди: «Станица-мизда шунақадан битта бўлсайди»,— деб ўйлади хўрсиниб. Лагутин арава олдига яқинлашар экан, казакларнинг маъюс чеҳрасига боқиб, энди йўл маршрутини белгилаш тўғрисида бош қотирди.

* * *

Безгаги хуриш қилган, хаёлпаст, шоир табиат Кривошликов Подтелковга айтди:

— Биз аксилинқилоб тўлқинидан қочиб қутула-миз десак, у биздан ошиб ўтяпти. Уни қувиб етиш қийинга ўхшайди. Даштдаги қуюндеқ ғизиллаб кетяпти.

Комиссия аъзоларидан Подтелковгина юз берган вазиятнинг мушқуллигини назарга олаётган эди. У энгашиброқ ўтирганича аравакашга дамба-дам:

— Ҳайдасанг-чи!— деб бақиради.

Кейинги аравадагилар ашула бошлаб юбориши-ю, кейин бирдан жимиб қолишди. Уша ёқдан, ғилди-ракларнинг овозини босиб, кулги, қийқириқ овозлари эшитилди.

Подачи айтган гаплар тўғри чиқди. Йўлда отрядга хотини билан Свешников хуторига кетаётган фронтчи казак тўқнаш келди. У погон тақиб олган, фуражкаси тамфали эди. Подтелков ундан аҳволни сўраб-суринтиргач, яна баттар тутақиб кетди.

Алексеев қишлоғидан ўтиб кетдилар. Майдалаб ёмғир ёғарди. Осмон тумтайган. Фақат шарқ томонда булат орасидан қуёш нуридан қизарган осмон парчаси кўриниб туради.

Тепаликдан тушиб, Тавричан участкасидаги Рубашкино қишлоғига киришлари биланоқ, у ердан бир неча аравали одамлар ура солиб қоча бошладилар.

— Қочишиятӣ, биздан қўрқишаётганга ўхшайди,— деди Лагутин паришон ҳолда, ёниверидагиларга қараб. Подтелков бақириб:

— Уларни қайтаринг! Ҷақирсангиз-чи, ахир!— деди.

Аравалардаги казаклар шапқаларини силкитиб чопқиллашиб кетишли. Қимдир қаттиқ бақириб:

— Ҳой, қаёққа? Шошманглар! — деди.

Отряд араваларини чоптириб қишлоққа кириб борди. Ҳувиллаб қолган катта күчада шамол айланарди. Қўралардан бирида украмналик кампир қичқириб аравага ёстиқ улоқтириди. Унинг ялангоёқ, бош яланг эри отларнинг тизгинидан ушлаб турарди.

Рубашкинога келиб билсалар, Подтелков юбортирган квартирыерни казак разведкачилари асир олиб, тепанинг нариёғига олиб кетибдилар. Афтидан, казаклар узоқлашиб кетмаганга ўхшарди. Бирпас маслаҳатлашиб олганларидан кейин қайтиб кетишга қарор берилди. Бошда олдинга юраверамиз деб қистаган Подтелков энди иккиланиб қолди.

Кривошликов индамади, уни яна безгак тутиб қолган эди.

Подтелков маслаҳатда қатнашаётган Бунчукдан:

— Ё олдинга қараб юраверамизми? — деб сўради. Бунчук лоқайдлик билан елкаларини қисиб қўйди. Унинг учун олдингами, орқагами юриш барibir эди. Ишқилиб юрилса бас, орқадан изма-из қувиб келаётган ғам-ғуссадан узоқлашса бўлгани эди. Арава ёнида у ёқдан бу ёққа юриб турган Подтелков, Усть-Медведицага юриш яхшироқ бўлмасмикан, деди. Аммо унинг гапини агитатор казаклардан бири шартта бўлди:

— Жинни-пинни бўлдингми, сен? Бизни қаёққа бошляйпсан? Аксилинқилобчилар олдигами? Оғайнини, кўп майнабозчилик қилма. Орқага қайтамиз, ўлиб кетишини хоҳламаймиз, кўряпсанми анавини? — деб гепалик томонни кўрсатди.

Ҳамма ўша томонга қаради. Пастак қўрғон тепа устида уч отлиқнинг қораси аниқ кўриниб турарди.

— Уларнинг разведкачилари,— деб юборди Лагутин.

— Ҳув, ана тағин?

Тепа устида отлиқлар кўринди. Улар тўда-тўда бўлиб тепаликка чиқар, кейин яна ғойиб бўлар эдилар. Подтелков қайтиш тўғрисида буйруқ берди. Алексеевск қишлоғидан ўтдилар. Казаклар томонидан огоҳлантириб қўйилган ерлик аҳоли эса яқинлашиб

келаётган отряд араваларини кўриб, тумтарақай бўлиб яширина бошлади.

Қоронги туша бошлади. Савалаб майда ёмғир ёға кетди. Одамлар шалаббо бўлиб, совуқдан титраб қақшаши. Улар милтиқларини ўқталишиб, арава ёнида кетишарди. Йўл бурилиб пастликка тушиб кетар, кеъин пастликдан яна бориб-бориб тепаликка чиқиб кетарди. Тепалик устида казак разведкачилари дам пайдо бўлиб, дам яширинарди. Улар отрядни кузатиб юар, асабларни баттар қақшатарди.

Водийни кўндалангига кесиб ўтган жарларнинг бирида Подтелков аравадан сакраб тушди-да: «Шайланиб туринг!» деб буйруқ берди ва эҳтиётдан кавалеристча карабинини қўлга олиб, арава ёнида пиёда кетаверди. Жарликнинг олди тўғон билан тўсилган, тошқин суви кўм-кўк бўлиб турарди. Кўл қирғондаги балчиққа сув ичгани келган молларнинг туёқ изи тушиб қолган эди. Кўл олдидаги тепалик устини шувоқ, шўра ўт босиб кетган, пастда, сув бўйида сарғайиб кетган қўфа ўсиб ётар, барглари ўткир қиёқ ўт устига шитирлатиб ёмғир ёғарди. Подтелков шу ерга казаклар пистирма қўйган деб гумон қиласарди, аммо олдинга юборилган разведкачилар ҳеч кимга рўпара келмай қайтиб келди.

Кривошликов Подтелковни арава ёнига чақириб олиб, аста деди:

— Федор, сен бу вақтда уларни кутма. Улар ҳозир ҳужум қиласарди, кечаси босгидилар.

— Ўзим ҳам шундай деб ўйлайман.

XXVIII

Кун ботар томондаги булутлар қуюқлашиб борар, қоронгилек босиб келарди. Жуда узоқларда, Доннинг нариёғидаги даштларда чақмоқ чақар, яшин осмон бағрини ханжардек тилиб ерга кириб кетар эди; у тарафда қоп-қора булутларнинг этаги остидаги уфқ кечки шафақ нурида яллигланарди. Сув қўйгандек жимжит даштдаги жарлар ичига кечки шафақ акси тушиб турарди. Ҳатто гулга кирмаган ўтлардан ҳам ғалати чирик ҳид келарди.

Подтелков намиққан ўтларнинг билинар-билинмас турли-туман ҳидларини ҳидлаб, қадам ташлаб боради. Ўқтин-ўқтин тўхтаб, пошнасига ёпишиб қолган лойларни артарди. У қоматини тик тутиб, оғир гавдасини зўрга кўтариб борар, олди очиқ чарм курткаси фирчиллар эди.

Поляков-Наголинск волостига қарашли Калашников қишлоғига кечаси кириб келишди. Отряддаги казаклар араваларни ташлаб тунагани уйма-уй тарқалиб кетишиди. Подтелков ташвишга тушиб, қуролли соқчилар қўйишини буюрди, лекин казаклар истар-истамас йиғилишди. Учта казак соқчи бўлиб туришдан бош тортди.

— Ўларни ўртоқлик суди билан суд қилиш керак! Ҳарбий бўйруқни бажаришдан бош тортганлар отилсин! — деди қизишиб Кривошликов.

Ташвишдан безган Подтелков қўл силтаб қўйдидা:

— Йўлда бузилишди. Улар энди ўзларини ўзлари мудофаа қилмайдилар. Ишимиз хароб, Мишатка!.. — деди.

Лагутин бир амаллаб бир неча кишини тўпладида, қишлоқнинг нарёғига кузатувчилар юборди.

Подтелков уйма-уй юриб, ўзига яқин казакларга:

— Ухлаб қолманг, йигитлар! Бостириб келиб қолишади-я, — дер эди.

У кечаси билан мижжа қоқмай чиқди, стол ёнида ўтириб, бошини қўллари устига қўйиб, оғир-оғир хўрсинарди. Тонг отишга яқин кўзи илинди, аммо қўшни ҳовлидан келган Роберт Фрашенбрудер уни ўйғотди. Йўлга чиқишига ҳозирлик кўра бошладилар. Қун ёришиб кетган эди. Подтелков уйдан чиқди. Даҳлизда унга сигирни соғиб кираётган уй бекаси дуч келди.

— Тепа устида отлиқлар изғиб юрибди, — деди у беларвогина.

— Қаерда?

— Ҳов, хуторнинг нарёғида.

Подтелков югуриб ҳовлига чиқди: тепа устида, қишлоқ ва боғлардаги толлар устини қоплаган оппоқ туман орасидан бирталай казак отрядлари кўринди.

Улар отларини йўргалатиб чоптириб хоторни ҳалқадек ўраб олмоқда эдилар.

Орадан кўп ўтмай Подтелков тунаган ҳовлига, унинг пулемёт ўрнатилган араваси ёнига казаклар тўплана бошладилар.

Гирдиғум, кокилдор казак бўлган мигулинлик Василий Мирошников келиб, Подтелкорни бир чеккага чақириб олди-да, шоша-пиша деди:

— Нима гаплигидан хабарингиз борми, ўртоқ Подтелков... Ҳозир улар олдидан вакил келди,— деб қўли билан тепани кўрсатди,— ҳозир қуролларимизни топшириб, таслим бўлишимиз кераклигини сенга етказишни буюрдилар. Бўлмаса улар ҳужумга ўтар-мишлар.

— Ҳой итвачча! Менга нималар деяпсан?— деб Подтелков Мирошниковнинг шинели ёқасига чанг солди-да, уни итариб юборди ва арава ёнига чопиб келди. Милтиғининг қувиридан чанглаб олиб, жириллаган йўғон овоз билан казакларга:

— Таслим бўбўпмиз!.. Аксилинқилобчилар билан қандай музокара олиб бориш мумкин?— деди.— Биз улар билан жанг қиласиз! Орқамдан юринг! Сафга тизилинг!

Ҳовлидан югуриб чиқишли. Тўп-тўп бўлишиб, қишлоқнинг чеккасига чопиб боришли. Энг четдаги ҳовли ёнида комиссия аъзоси Мрихин нафаси тиқилган ҳолда Подтелковнинг орқасидан етиб келди.

— Бу нима шармандагарчилик, Подтелков! Нима, ўз қардошларимиз билан урушиб қон тўкамизми? Қўй-э! Урушмай, муроғага келоламиз!

Подтелков отряддаги казакларнинг озгина қисми ўз орқасидан эргашишини ва агар жанг қилишса албатта енгилишларига ақли етгани учун, индамай милтиқнинг затворини тушириб қўйди-да, сусткашлик билан фуражкасини силкитди:

— Тўхтанг, йигитлар! Орқага, қишлоққа юринг!

Ҳаммалари қишлоққа қайтиб келишиди. Бутун отряд бир-бирига туташган уч ҳовлига тўпланди. Кўп ўтмай, қишлоқда казаклар пайдо бўлди. Тепадан қирқ отлиқли отряд тушди.

Подтелков Милютин қишлоқ чолларининг таклифи билан таслим бўлиш шартлари тўғрисида музокара олиб бориш учун қишлоқ ташқарисига чиқди. Қишлоқни қуршаб олган душманнинг асосий кучи позицияларини ташлаб кетмади. Бунчук югуриб бориб, қишлоқнинг чеккасида Подтелковни қувиб етдида, уни тўхтатди:

— Таслим бўламизми?

— Ахир улар кучли бўлса, нима қиламиз? Қани айтчи!

— Улгинг келяптими? — деди Бунчук ижирғаниб.

Бунчук Подтелковни бошлаб олиб кетаётган чолларга эътибор қилмасдан баланд ва дўриллаган овоз билан:

— Қурол-яроғларимизни топширмаймиз, дегин!.. — деб бақирди. Шуни деб шартта орқасига бурилди-ю, наганини чанглаб олганича орқасига қараб кетди.

У қишлоққа қайтиб келиб, душман сафини ёриб ўтиш ва жанг билан темир йўлга чиқиб олиш мумкинлигига казакларни ишонтиromoқчи бўлди, бироқ кўпчилик муросасозлик кайфиятида эди. Баъзилари Бунчукдан юз ўгирап, баъзилари ғазаб билан:

— Бор ўзинг уруш, Аника, биз қон-қардошларимиз билан жанг қилмаймиз, — деди.

— Биз уларга қуролсиз ҳам ишонамиз.

— Муқаддас пасха байрамида биз қон тўқамизми?

Бунчук омбор ёнида турган араваси ёнига келди, унинг остига шинелини тўшаб тўппончасининг ғадир-будур дастасини маҳкам чангллаганича ётиб олди. Бошда у қочмоқчи ҳам бўлди. Лекин биқиниб қочиш, дезертирилик қилишдан ор қилди, қочишдан воз кечиб, Подтелковнинг келишини кутди.

Подтелков уч соатдан кейингина қайтиб келди. У билан бирга бирталай бегона казаклар оломони етиб келди. Баъзилари от устида, баъзилари отларини етаклаб олган, бошқалари Подтелков ва ясовул ёрдамчиси Спиридонов билан орқама-орқа пиёда келаётган эдилар. Спиридонов илгари Подтелков билан бир батареяда хизмат қилган эди. Энди у Под-

төлков экспедициясини қўлга тушириш учун тузилган қўшма отряднинг бошлиғи эди. Подтелков бошини гоз кўтариб, ортиқроқ ичиб қўйган кишидек қоматини тик тутишга ҳаракат қиласарди. Спиридонов нозик ва кинояномуз кулги билан унга бир нима деб гапиради. Улар орқасидан отлиқ бир казак катта оқ байроқнинг наридан-бери йўнилган дастасини кўкрагига тираб келарди.

Подтелков отряди турган кўчалар ва ҳовлиларни ҳозир келган казаклар ўраб олган эди. Бирдан фоур-фувур кўтарилди. Келганларнинг кўпі Подтелков командасидаги казаклар билан бирга хизмат қиласан эди. Улар суюнишиб бақиришар, кулишар эди.

— Вой, адаш, қайси шамол сени учирди?

— Омон-эсон юрибсанми, Прохор!

— Худога шукур.

— Бир-биrimiz билан жанг қилишимизга өз қолди-я. Львов ёнида австриецларни қувганимиз эсингдами?

— Данило, отахон! Байрамлар қутлуғ бўлсин.

— Сеники ҳам қутлуғ бўлсин! — шундан кейин чўпиллатиб бир-бирларини ўпдилар: икки казак мўйловларини силаб бир-бирига қараб турар, кулишар, бир-бирларининг елкаларига уриб қўйишар эди.

Уларнинг ёнидаги казаклар ўртасида шундай суҳбат бораради:

— Биз ҳали рўза оғизмиз, оғиз очганимизча йўқ.

— Ие, сизлар большевикларсиз-ку, оғиз очишни сизга ким қўйибди?

— Нима қибди, большевикликка большевикмиз, аммо худога ишонамиз.

— Қўй-э! Ростингми?

— Худо ҳақи!

— Бўйнингда крестинг борми?

— Мана, крест.— Юзи товоқдек норғил қизил гвардиячи казак, лабларини чўччайтириб гимнастёркасининг ёқасини ечди-да, қизил сержун кўкрагидан занг босиб, кўкариб кетган жез крестни олиб кўрсатди.

— «Фитначи Подтелковни» тутиш учун тузилган

отряддаги паншаҳа ва болта кўтариб келган чоллар ҳайрон бўлиб бир-бирларига қараб олишди.

— Сизларни Йсо динидан юз ўгирган деб айтиб эдилар-ку!

— Шайтонга сажда қиласизлар деб эшитиб эдик...

— Миш-мишларга қараганда, гўё сизлар черковларни талаб, попларни ўлдирап эмишсизлар.

— Бекорчи гаплар,— деб жавоб берди юзи баркашдек қизил гвардиячи.— Беҳуда гаплар билан бошингизни айлантиришган. Мен Ростовдан чиқишидан аввал, черковга бориб, дуо олдим.

— Ие, жа қизиқ бўп... ти-ю!— деди дастаси ярми-гача арраланган найза ушлаган хумкалла бир чол. У хурсанд бўлгандек чапак чалиб юборди.

Кўча-кўйларда, ҳовлиларда ғўнғир-ғўнғир гапла-шаётганларнинг овози эшитиларди. Лекин орадан яrim соат ўтгандан кейин бир неча казак, жумладан Боков станицалик бир вахмистр ғуж бўлиб тўпланган одамларнинг орасини ёриб, кўча бўйлаб кела-верди.

— Подтелков отрядида бўлганлар йўқламага ҳозирлансинлар!— деб қичқирдилар улар.

Пистоқи ранг кўйлак кийган ва погон таққан ясо-вул ёрдамчиси Спиридонов пешонасига қандек оп-поқ офицерча кокарда таққан фурожкасини ечди-да, атрофга аланглаб қараб:

— Подтелков отрядидан бўлганлар чапга, четан девор томонга ўтсин! Қолганлар ўнг томонга! Биз, яъни фронтдош қардошларингиз, сизнинг вакилла-рингиз билан бирликда шундай қарорга қелдик: сизлар барча қуролларингизни топширишингиз лозим, чунки қурол кўтариб юришингиздан халқ қўрқяпти. Милтиқ ва бошқа яроқларингизни араваларингизга қўйинг, биз уларни сиз билан бирга қўриқлаймиз. Отрядингизни Краснокутскка жўнатамиз, сиз ўша ердаги Советдан қуролларингизни батамом қайтариб оласиз.

Қизил гвардиячи казаклар орасида норозилик бошланди. Ҳовли томондан кимдир қичқириб гапирди. Кумшатск станицалик казак бақириб:

— Топширмаймиз! — деди.

Одамларга лиқ тўлган кўчалар ва ҳовлиларда, ғовур-ғувур кўтарилиди.

Келган казаклар ўнг томонга ўтиб олишди; Подтелков отрядидаги қизил гвардиячилар ажралиб кўчанинг ўртасида сўппайиб қолишиди. Шинелининг олди очиқ Кривошликов жавдирааб атрофига аланглаб қаради, Лагутин лабини бурди, одамлар ҳайрон бўлиб, ғовур кўтаришиди.

Қурол топширмасликка аҳд қилган Бунчук, милифиини қўлга олди-ю, тез-тез юриб, Подтелков ёнига келди:

— Қурол-яроғни топширмаймиз! Эшитяпсанми? — деди.

— Энди вақт ўтди... — деб шивирлади Подтелков, қўлидаги отряд рўйхатини асабий ҳолда ғижимлаб.

Рўйхат Спиридоновнинг қўлига ўтди. У рўйхатга кўз югуртириб чиқди-да:

— Бу ерда бир юз йигирма саккиз одам бор... Қолганлари қаерда? — деб сўради.

— Йўлда қолишиди.

— Э, шундай дегин... Ҳай, майли. Буюр, қуролларини келтирсинлар.

Подтелков биринчи бўлиб, наганини ғилофи билан ечиб топшираркан, эшитилар эшитилмас:

— Қилич билан милиқ аравада,— деди.

Қурол-яроғ топшириш бошланди. Қизил гвардиячилар бўшашиб, милиқларини араваларга қўйишар, тўпкончаларини эса четан деворлар устидан ирғитиб юборишар, ҳовлиларга тарқалишиб беркитишар эди.

Спиридонов тишининг оқини кўрсатиб, хушчақчақ овоз билан:

— Қурол топширмаганларни тинтиймиз! — деди.

Бунчук бошчилигидаги қизил гвардиячиларнинг бир қисми милиқларни беришдан бош тортди; уларни куч билан қуролсизлантирдилар.

Қишлоқда пулемёт замогини олиб қочган отлиқ казак ҳаммани ташвишга солди. Тўс-тўполондан фойдаланиб, бир неча одам беркиниб олди. Аммо Спи-

ридонов соқчилар қўйиб. Подтелков билан қолган казакларни қуршаб олди-да, уларнинг ёнларини тинтиди, йўқлама қилди. Асиirlар ноҳушлик билан жавоб берар, баъзилари бақириб:

— Текширишнинг нима ҳожати бор, ҳамма шу ерда! — дерди.

— Бизларни Краснокутскка ҳайдаб оборинг!

— Ўртоқлар, тезроқ бўлинг!

Спиридонов пул қутисини муҳрлаб, кучли соқчилар ҳимоятида Каргинга жўнатди, сўнgra асиirlарни сафга тизди-да, бирданига муомала ва сўз оҳангини ўзгартириб:

— Икки қатор бўлиб тур! Сўлга ай-лан! Сўлга бурил, марш! Овозларингни ўчир! — деб команда берди.

Қизил гвардиячи қаторларида норозилик товуши эшитилди. Кейин тартиб сақламай жимгина юриб кетишиди, бир оз ўтгач, қаторлар бир-бирига аралашиб кетди.

Энг охир ўз одамларини қурол топширишга кўндирган Подтелков, эҳтимол ҳали ҳам бу ишнинг оқибати хайрли бўлар деб гумон қиласади. Аммо асиirlарни қишлоқдан ҳайдаб чиқишилари билан уларни назорат қилиб келаётган казаклар отлари билан иккни томондан сиқиб келавердилар. Қизил соқолли, қулоғидаги исирғаси эскириб қорайиб кетган кекса казак сўл томонда келаётган Бунчукни, ҳеч нимадан ҳеч нима йўқ, қамчи билан солиб қолди. Бунчукнинг юзига қамчи изи тушди. Бунчук муштумини сиқиб унга томон ўгирилган эди, боягидан ҳам кучли иккинчи зарба уни ўзини оломон ичига опқочишга мажбур этди. Бунчук ўзини ҳимоя этиш учун беихтиёр, шундай қилган эди. Зич бўлиб кетаётган ўртоқларининг орасида сиқилиб кетар экан, Анна ўлгандан кейин биринчи марта унинг лабларида асабий кулги пайдо бўлди ва ҳар бир инсонда яшаш истаги нақадар кучли эканига ҳайрон қолди.

Асиirlарни савалай бошладилар. Душманларини қуролсиз ҳолда кўрган чоллар қутуриб, улар устига оти билан бостириб борар, эгилиб, уларни қамчи билан, қиличларининг орқаси билан урар эдилар.

Қалтақ еғанларнинг ҳар бири беихтиёр сиқилиб ўртага кириб олишга уринарди; ур-сур, тўполон бошланди, чинқириқлар эшитилди.

Қўйи станицалик, новчадан келган азamat бир казак, юқори кўтарилиган қўлларини силкитиб:

— Ўлдирадиган бўлсанглэр, дарҳол ўлдиринглар!.. Бу нима расвогарчилик! — деди.

— Қани аҳди-паймонингиз? — деб жингиллади Кривошликов.

Чоллар писиб қолишиди. Асиrlардан бирининг: «Бизни қаерга ҳайдаб кетяпсиз?» деган саволига, ёш бир фронтчи, афтидан большевикларга хайриҳоҳ бўлган соқчи, аста деди:

— Пономарев қишлоғига оборинг, деб буйруқ берилган. Биродарлар, қўрқманг! Сизларга ёмонлик қилмаймиз.

Асиrlарни Пономарев қишлоғига ҳайдаб кетдилар.

Спиридонов икки казак билан торгина бир дўконнинг эшиги олдида туриб, одамларни бирин-кетин ичкарига киритар экан:

— Отинг? Фамилиянг? Қаерликсан? — деб сўрар, олинган жавобларни ғижимланиб кетган дала дафтарига ёзиб қўярди.

Навбат Бунчукка келди.

— Фамилиянг нима? — деб сўради Спиридонов қаламининг учини қофозга тираб; сўнgra пешонаси кенг қизил гвардиячининг тумтайган юзига назар ташлади; унинг лабларини чўччайтириб, туфлашга тайёрланаётганини кўрди-ю, ўзини четга опқочиб: — Ўт, аblaҳ! Фамилиясиз ҳам ажал топасан! — деди.

Тамбовлик Игнат ҳам Бунчукдан ўrnak олиб, Спиридоновга жавоб бермади. Яна кимдир учинчи бир киши ўзини танитмасдан ўлишни истади, индамай оstonадан ҳатлаб ичкари кирди.

Спиридонов дўконни қулфлаб қоровул қўйди.

Отряд араваларидан туширилган озиқ-овқат ва қурол-яроғларни дўкон ёнида бўлишиб олаётган пайтда, Подтелковни қўлга туширишда иштирок этган хуторларнинг ვакилларидан шошилинч суратда

ташкіл этилган ҳарбий-дала суді мажлис қилаёт-
гән эди.

Мажлисга Боков станицалик, чорпахлдан келган, сапсариқ қошли ясовул Василий Попов раислик қи-
ларди. У фуражкасини ясси энсасига суриб қўйиб, четларига дастрўмол осиб қўйилган тошойна таги-
даги стол ёнида тирсакларини кериб ўтирган эди. Суд аъзоси бўлган казакларнинг юзига у мой босган мулойим-жиддий қўзларини тикиб ўтиради. Берила-
диган жазо чоралари музокара қилинарди.

— Ҳурматли қариялар, буларга қандай чора кў-
рамиз? — деб саволини такрорлади Попов.

Сўнгра ёнида ўтирган ясовул ёрдамчиси Сенинга энгашиб бир нима деб шипшиди. Сенин дарҳол бош ирғаб, розилик билдириди; Поповнинг кўз қорачиқла-
ри кичрайди, қўзларининг бурчидаги шодлик ажин-
лари йўқолди ва сийрак киприклари остидаги кўз-
ларida қаҳр-ғазаб ўтлари чақнаб кетди.

— Мол-мулкимизни таламоқ ва казакларни маҳв
этмоқ учун келган ватан хоннларига биз нима чора
кўрамиз?

Милютин станицалик, эски мазҳабдаги Февралев
биров тутиб юборгандек жойидан сапчиб турди ва:

— Отиб ташлаш керак! Ҳаммасини! — деди тел-
балардек бошини қалтиратиб; қонга тўлган ғилай
қўзларини ҳаммага югуртириб, туфугини сачра-
тиб: — Исони сотган бу нобакорларга раҳм-шафқат
йўқ! Ораларидаги жуҳудларни ўлдириш керак!.. Ўл-
дириш!.. Дорга тортиш!.. Оловда куйдириш керак! —
деб бақириб юборди.

Унинг зифирпоя толасидек сийрак соқоли силки-
нарди, оқарган қизғиши соchlари пахмайиб кетган
эди. У ҳарсиллаб жойига ўтирди, юзи бўриқиб кет-
ган, лаблари кўпирган эди.

Суд аъзоларидан бири бўлган Дьяченко:

— Сургунга юборсак... қандай бўларкин, а? —
деди дудмалланиб.

— Отилсин!

— Ўлимга маҳкум этилсин!

— Шуларнинг гапини қувватлайман!

— Халқ олдида жазолаб ўлдирилсин!

— Шумғияларни юлиб ташлаш керак!

— Үлдирилсин!

— Отиб ташлаш керак, албатта! Бошқа гап бўлиши мумкин эмас! — деди ғазабланиб Спиридонов.

Ҳар қичқириқдан кейин ясовул Поповнинг лаблари сўлжайиб кетар, бир оз аввалги, ўзидан ва атрофдагилардан мамнун бўлган меҳрибон кишига хос ифода юзида йўқола бориб, лаб-даҳани осиларди.

— Отилсинлар!.. Ёз!.. — деб буюрди у котибга қайрилиб қараб.

Дераза тагида ўтириб, лампанинг пилигини ҳадеб чиқазаётган ғўлабир чол казак:

— Подтелков билан Кривошликовни ҳам... бу душманларни ҳам отиш керакми? Бу озлик қиладику! — деди тутоқиб.

— Бошлиқ бўлганлари учун уларни дорга осиш керак! — деб қисқа жавоб қилди Попов, сўнгра котибга қараб тақрорлади: — Ёз: «Қарор. Биз тубанда қўйл қўювчилар...»

Котиб ясовулнинг узоқ қариндоши бўлиб, унинг ҳам фамилияси Попов эди. У малла соchlари силлиқ қилиб тараалган бошини энгаштириб, перони қиртиллатиб ёза бошлади.

— Лампа мой соб бўлганга ўхшайди... — деб хўрсипди аллаким ачиниб.

Лампа лип-лип қилиб пилиги сасиб ёнарди, сукунат ичидаги шифтдаги ўргимчак инига илинган пашша ғинғиллар, қоғоз устида перо қиртиллар, суд аъзоларидан кимдир пишиллаб нафас оларди.

ҚАРОР

1918 йил 27 апрель (10 май)да Каргин, Боков ва Красноқутск станицаларининг қуийдаги қишлоқларидан сайланган вакиллар:

Василевскдан	Максаев Степэн
Боковдан	Кружилин Николай
Фоминдан	Кумов Федор
Верхне-Яблоновскдан	Кухтин Александр
Нижне-Дуленскдан	Синев Лев
Ильинскдан	Волоцков Семён
Копьковскдан	Попов Михаил
Верхне-Дуленскдан	Родин Яков
Севастьяновдан	Фролов Алекс

Милютин станицасидан . . .	Февралев Максим
Николаевдан	Грошев Михаил
Краснокутск станицасидан . .	Еланкин Илья
Пономарев қишлоғидан . . .	Дьяченко Иван
Евлантьевдан	Кривов Николай
Малаховдан	Емельянин Лука
Ново-Земцевдан	Коновалов Матвей
Поповдан	Попов Михаил
Астаховдан	Шчегольков Василий
Орловдан	Чекунов Федор
Климо-Федоровскдан	Чукарин Федор

В. С. Попов раислиги остида

ҚАРОР ҚИЛДИЛАР:

1. Тубандаги рўйхатда номлари қайд этилган 80 одам, меҳнаткаш халқни талаган ва алдаган бу қишилар отиб ўлдирилсин, бу гурӯҳнинг бошлиғи бўлган Подтелков билан Кривошниковдорга тортилсин.

2. Михайлова қишлоқлик казак Антон Калитвенцов жиноятини исбот этадиган далил бўлмаганидан оқлансан.

3. Подтелков отрядидан ючтан ва Краснокутск станицасида қамоқца олинган Константин Мельников, Гаврила Мельников, Василий Мельников, Аксенев ва Вершинин ушбу қарорнинг биринчи моддасига мувофиқ жазолансин (ўлим жазоси).

4. Жазо эртага, 28 апрель (11 май), соат 6 да ижро этилсин.

5. Қамоқца олингандарни кузатиб туриш учун ясовул ёрдамичиси Сенин қоровул қилиб белгилансин, унинг ихтиёрига бўгун кеч соат 11 гача иккитадан қуролли казак юборилсин: бу моддада кўрсатилган жазо чорасини ижро этиш суд аъзолари масъулиятига юклатилсин: жазони ҳар бир қишлоқдан юборилган қоровул ижро этади; маҳбуслар отиладиган жойга бештадан казак юборилсин.

Асл нусхасини имзолаганлар:
Ҳарбий бўлим раиси *В. С. Попов*.
Котиб *А. Ф. Попов*.

Ҳарбий-дала суди томонидан 1918 йил 27 апрелда ўлимга ҳукм қилинган Подтелков отряди аъзоларининг рўйхати

№№	Станицалар	Исми ва фамилияси	Ҳукм
1	Усть-Хопер	Федор Подтелков	Осилди
2	Еланск	Михаил Кривошников	Осилди
3	Казанск	Авраам Какурин	Отилди

№№	Станицалар	Исми ва фамилияси	Хуқм
4	Букановск	Иван Лагутин	Отилди.
5	Нижегород	Алексей Ив. Орлов	Отилди.
6	Нижегород	Ефим Мих. Вахтель	Отилди.
7	Усть-Бистрянск	Григорий Фетисов	Отилди.
8	Мигулин	Гаврил Ткачов	Отилди.
9	Мигулин	Павел Агафонов	Отилди.
10	Михайлов	Александр Бубанов	Отилди.
11	Луганск	Калинин	Отилди.
12	Мигулин	Константин Мрихин	Отилди.
13	Мигулин	Андрей Коновалов	Отилди.
14	Полтава ш.	Константин Крита	Отилди.
15	Котовской	Павел Позняков	Отилди.
16	Мигулин	Иван Болдирев	Отилди.
17	Мигулин	Тимофея Количев	Отилди.
18	Филим-Челб.	Дмитрий Володаров	Отилди.
19	Чернишевский	Георгий Карпушин	Отилди.
20	Филим-Челб.	Илья Калмыков	Отилди.
21	Мигулин	Савелий Рибников	Отилди.
22	Мигулин	Поликарп Гуров	Отилди.
23	Мигулин	Игнат Земляков	Отилди.
24	Мигулин	Иван Кравцов	Отилди.
25	Ростов	Никифор Фроловский	Отилди.
26	Ростов	Александр Коновалов	Отилди.
27	Мигулин	Петр Бихлянцев	Отилди.
28	Клещкой	Иван Зотов	Отилди.
29	Мигулин	Евдоким Бабкин	Отилди.
30	Михайловск	Петр Свинцов	Отилди.
31	Добринский	Илларион Чилобитчиков	Отилди.
32	Казанск	Климентий Дронов	Отилди.
33	Иловлинск	Иван Авилов	Отилди.
34	Казанск	Матвей Сакматов	Отилди.
35	Нижне-Курмоярск	Георгий Пупков	Отилди.
36	Терновск	Михаил Февралев	Отилди.
37	Херсон ш.	Василий Пантелеимонов	Отилди.

№№	Станицалар	Исми ва фамилияси	Хукм
38.	Казапск	Порфирий Любухин	Отилди.
39.	Клецкой	Дмитрий Шамов	Отилди.
40.	Филоновск	Сафон Шаронов	Отилди.
41.	Мигулин	Иван Губарев	Отилди.
42.	Мигулин	Федор Абакумов	Отилди.
43.	Луганск	Кузьма Горшков	Отилди.
44.	Гундоровск	Иван Изварин	Отилди.
45.	Гундоровск	Мирон Калиновцев	Отилди.
46.	Михайловск	Иван Фарафонов	Отилди.
47.	Котовской	Сергей Горбунов	Отилди.
48.	Нижне-Чирск	Петр Алаев	Отилди.
49.	Мигулин	Прокопий Орлов	Отилди.
50.	Луганск	Никита Шеин	Отилди.
51.	Ст. Механик РПТК	Александр Ясенский	Отилди.
52.	Ростов	Михаил Поляков	Отилди.
53.	Раздорск	Дмитрий Рогачев	Отилди.
54.	Ростов	Роберт Фрашенбрудер	Отилди.
55.	Ростов	Иван Силендер	Отилди.
56.	Самара ш.	Константин Ефимов	Отилди.
57.	Чернишевск	Михаил Овчинников	Отилди.
58.	Самара ш.	Иван Пикалов	Отилди.
59.	Иловлинск	Михаил Корецков	Отилди.
60.	Кумшатск	Иван Коротков	Отилди.
61.	Ростов	Петр Бирюков	Отилди.
62.	Раздорск и/м	Иван Кабаков	Отилди.
63.	Луковск	Тихон Молитвинов	Отилди.
64.	Мигулин	Андрей Швецов	Отилди.
65.	Мигулин	Степан Аникин	Отилди.
66.	Кремнск	Кузьма Дичкин	Отилди.
67.	Баклановск	Петр Кабанов	Отилди.
68.	Михайловск	Сергей Селиванов	Отилди.
69.	Ростов	Артем Иванченко	Отилди.
70.	Мигулин	Николай Коновалов	Отилди.
71.	Михайловск	Дмитрий Коновалов	Отилди.
72.	Краснокутск	Петр Лисиков	Отилди.

№№	Станицалар	Исми ва фамилияси	Хукм
73	Мигулин	Василий Мирошников	Отилди.
74	Мигулин	Иван Волохов	Отилди.
75	Мигулин	Яков Гордеев	Отилди.

Булардан уч киши ўзининг кимлигини айтмади.

Котиб маҳкум қилингандарнинг рўйхатини ёзиб тамомлагандан кейин қарорнинг охирига остин-устун икки нуқта қўйди-да, қаламни ёнидаги кишинин қўлига тутқизди:

— Кўл қўй!

Ново-Земцев қишлоғининг вакили, немисларнинг кул ранг мовутидан тикилган, ёқаси қизил ҳошияли кителдаги Коновалов гуноҳкор кишидек кулимсираб, қоғоз устига энгашди. У йўғон, қадоқ босган, кўмирдек қоп-қора букилмас қўллари билан учи чайналган калта қаламни тутамлаб фамилиясининг бош ҳарфи бўлган «К» ҳарфини яхши ёзишга тиришиб:

— Жудаям саводхон эмасман, — деди.

Унинг кетидан Родин имзо чекди, у ҳам терлаб-пишиб инқилаб-синқиллаб қовоғини солган ҳолда қалам юргизар эди. Бошқа бири эса олдин ручкани силкитди-да, бир оз очиқ жой қолдириб имзо чекди, ёзаётганда осилиб кетган тилини тортиб олди. Попов катта-катта қилиб ўз фамилиясини ёзди-ю, ўрнидан турди, терлаб кетган юзини дастрўмоли билан артаёттиб:

— Рўйхатни қарорга тиркаш керак, — деди эсанаб.

Котиб сиёҳни қуритиш учун қоғозни деворга босаётганда диққат билан қараб турган Сенин шўх кулиб:

— Қаледин у дунёда бизга раҳмат дейди, — деди.

Унинг ҳазил-мутойибасига ҳеч ким жавоб қилмади. Ҳамма жимжит, уйдан чиқиб кетди.

Қоронғи даҳлизнинг эшигидан чиқиб кетаётганда кимдир, хўрсиниб:

— Ё Исойи масиҳ! — леб қўйди.

Нурсиз, сарғиш юлдузларнинг сутдек ёғдусига чўмган бу кечада, тиқилиб кетган дўкон ичидагим мижжа қоқмай тонг оттирди. Гап-гапга қовушмас, бир ёқдан димиққан ҳаво, иккинчи ёқдан фам ва ташвиш юракларни эзар эди.

Кечқурун қизил гвардиячилардан бири ташқарига чиқишга рухсат сўради:

— Эшикни оч, ўртоқ! Ташқарига чиқиб ёзилиб келай.

У бўз кўйлагининг этагини чалворидан чиқарган, ёқаси очиқ, яланг оёқ ҳолда қаққайиб турар ва бўриқиб кетган юзини қулф тешигига тираб:

— Эшикни очсанг-чи, ўртоқ, — дер эди.

Қоровул турганлардан бири:

— Сенинг оғайнинг ит, — деб жавоб қилди.

— Оча қол, оғайни,— деди қизил гвардиячи ялиниб.

Қоровул милтиғини ерга қўйди, қоронғи тушгач, тунайдиган жойларига учиб ўтаётган ёввойи ўрдакларнинг қанот товушларига қулоқ солиб турди-да, папиросини чекиб бўлиб лабларини қулф тешигига тираб:

— Иштонингга сиявер, аплаҳ. Бир кечада чалвординг титилиб кетмайди, каллаи сахарда ҳўл чалвординг билан нариги дунёга жўнатадилар, — деди.

Қизил гвардиячи эшикдан нари кетиб, алам билан:

— Бизга бу ҳам оз!.. — деб қўйди.

Ичкаридагилар ғуж бўлиб ўтиришарди. Подтелков бир бурчакда ўтириб, чўнтақларини бўшатди ва онадан сўкиб, бирталай қоғоз пулни йиртди. Пулларни бурда-бурда қилиб ташлагандан кейин этигини ечди ва ёнида ётган Кривошликовнинг елкасига қўл тегизиб деди.

— Бизни тузоққа илинтиридилар, тоза лақиллатдилар. Одамга алам қилас экан, Михайло! Бир вақтлар, болалик чоғимда отамнинг эски милтиғини олиб, Доннинг нарёғига ов қилгани борар эдим, ўрмон ичи яшил гумбазга ўхшайди... Кўл бўйига келсанг ўрдак-

лар сузиб юрганини кўрасан. Баъзан отиб тегизолмас эдим, шундай алам қилиб кетардики, додлаб юборгим келарди. Ҳозир ҳам ўшандай алам қиласпти, ўқим хато кетди: агар Ростовдан уч кун илгари чиқсан, бў ерда ажал домига илинмас эдик. Бутун контрапарнинг оёғини осмондан келтирадик.

Кривошликов тишларини фирчиллатиб, қоронгидикда кулимсираб деди:

— Падарларига лаънат, майли, ўлдиришсин! Улим — жудаям даҳшатли нарса эмас... «Мен бир нарсадан, у дунёда бир-бириизни таниёлмай қоламиз деб қўрқаман...» Биз, Федя, бегона кишилардек учрашамиз... Даҳшат!

Подтелков йирик ва иссиқ кафтини ўртоғининг елкасига қўйди-да, ўпка қилиб:

— Қўйсанг-чи! Масала бошқа ёқда,— деди.

Лагутин аллакимга ўз қишлоғи тўғрисида ҳикоя қилар, боши узун бўлгани учун бобоси унга «Қилич» деб лақаб қўйганини. бир марта бирорнинг полизига тушгани учун бобоси уни қамчилаганини сўзлар эди.

Ўша кеча у ёқдан-бу ёқдан гаплашиб ўтириши, сұҳбат бир-бирига қовушмас, узилиб-узилиб қолар эди.

Бунчук эшик олдига жойлашиб олиб, тирқишдан кириб турган ҳавони чанқоқлик билан ютиб нафас оларди. У бошидан ўтган нарсаларни хотирлади, бирданига онаси эсига тушди-ю, юраги жазиллаб кетди, онаси ҳақидаги эсдаликларини унтишга ҳаракат қилди, Аннани ва яқиндагина ўтган кунларни эсига туширди... Бу хотиралар унга саодатманд бир осойишталик багищлади. Улим ҳақидаги фикр уни кўп чўчитмас эди. Уни ҳаётдан маҳрум этишлари тўғрисидаги фикр, илгаригидек, уни ваҳимага солмас, қўрқитмас эди. У аччиқ ва машаққатли сафардан кейин нашъасиз бир истироҳатга тайёрланадигандай, ўлишга тайёрланарди: шу қадар чарчаган эди, аъзойи бадани шу қадар зирқираб оғирдики, хеч бир нарса уни ҳаяжонлантиrolмасди.

Ундан сал нарироқда казаклар: хотинлар, муҳаббат, аёл кишининг эркак қалбига бағишилайдиган

катта-кичик эҳтиюслари тўғрисида гоҳ чақчақлашиб, гоҳ маъюсланиб ҳикоя қилишарди.

Оидалари, қавм-қариндошлари, яқинлари тўғрисида гаплашишарди. Ғалланинг яхши бўлгани: буёдой ичига зағча кирса кўринмайдиган бўлиб қолгани тўғрисида гаплашишарди. Ароқ ва озодликни қўмсашар, Подтелковни сўкишарди. Аммо уйқу кўплар устида қора қанотини керган, жисман ва маънан чарчаб, ҳориган одамлар ётган, ўтирган, турган жойларида ухлаб қолишган эди.

Тонг отар пайтида аллаким тушдами ёки ўнгдами, ҳўнграб йиғлаб юборди. Ёшлик чоғидан бери шўртсанг, кўз ёшларининг тамини унуган катта ёщдаги тўпори кишиларнинг йигиси даҳшатли бўлади.

- Овозингни ўчир-э, лаънати!
- Вой, хотинга ўхшамай ўл!
- Товушингни ўчир, йўмаса кекирдагингни суғуриб оламан.
- Бола-чақали бўп туриб, кўзининг сийдигини оқизади-я!
- Бу ерда одамлар ухлаб ётиди, у бўлса... уялмайдиям!

Йиғлаган одам бурнини тортиб, кейин қоқиб ташлadi-да, жимиб қолди.

Яна орага жимжитлик чўкди. Ҳар тарафдан папироc чўфи йилгиллаб кўринар, бироқ одамлар мумтишлагандек жим ётар эдилар. Ҳаводан ғуж бўлиб ётган эркакларнинг тер ҳиди, тутун иси ва кечаси тушган шабнамнинг хушбўй ҳиди келар эди.

Қишлоқдаги бир хўроз қичқириб, тонг отғанини маъдум қилди. Оёқ товушлари ва темирларнинг шақир-шуқури эшитилди.

Коровуллардан бири паст овоз билан:

— Келаётган ким?— деб бақирди.

Ёш бир йигит йўталиб, қувноқ овоз билан узоқдан:

— Ўзимизникилар. Подтелковнинг шерикларига мозор қазигани кетяпмиз,— деб жавоб берди.

Дўкон ичидагиларнинг ҳаммаси бирдан ғимирлаб қолди.

XXX

Татарек казак отряди хорунжий Петро Мелехов командаси остида 11 майда тонг отар пайтида Пономарев қишлоғига етиб келди.

Қишлоқда Чир казаклари ғимирлаб юришар, отларини сүғоргани боришар, тўда-тўда бўлиб, қишлоқнинг бир чеккасига кетишар эди. Петро отрядини қишлоқнинг ўртасида тўхтатди-да, отлардан тушишга буйруқ берди. Бир неча киши буларнинг өлдига келди.

— Қаёқдан келяпсизлар, казаклар? — деб сўради улардан бири.

— Татарскдан.

— Сал кечикиб келдиларинг... Сизсиз ҳам Подтелковни қўлга туширдик.

— Қаерда улар? Ҳайдаб олиб кетгунларича йўқми?

— Ҳов анави ерда... — деди казак томи нишабли дўконни қўли билан кўрсатиб.

Христоня, Григорий Мелехов яна бир неча одам яқинроқ келишди.

— Энди уларни қаёққа юборишар экан? — деб қизиқсиниб сўради Христоня.

— У дунёга.

— У дунёга? Нима деб акилляпсан? — деб Григорий казакнинг шинели этагидан ушлади.

— Сенам акиллайверма, жаноб офицер! — деб ўдағайлаб жавоб берди казак, сўнгра Григорийнинг чангалидан этагини секин чиқариб олди. — Қара, ҳов анави ерда уларга дор қуриб қўйибдилар. — Казак иккита қуруқ тол орасига қурилган дорни кўрсатди;

— Отларни ҳовлиларга опкириб боғла! — деб буйруқ берди Петро.

* * *

Осмон юзини булут қоплаб олди. Ёмғир томчилаб ёга бошлади. Казаклар ва аёллар тўп-тўп бўлиб қишлоқнинг чеккасига йўл олдилар. Соат 6 да ҳукм ижро этилади деган хабарни эшитган Пономарев

қишлоқ аҳолиси худди қизиқ бир томошага кетаёт-гандек, дор томон қетмоқда эди. Казак аёллар байрам вақтидагидек ясанган-тусанган, кўплари болаларини етаклаб олган эди. Оломон дор атрофида ва чуқурлиги икки газча келадиган гўр устида ғуж бўлиб турар эди. Болалар хандақнинг бир четига уйилиб қўйилган тупроқни босиб юришар; казаклар тўдаланишиб, ижро этиладиган ҳукмни қизгин муҳокама қилишарди; аёллар қайғуриб шивирлашар эди.

Ухлайвериб юзи шишиб кетган Попов етиб келдиди, жиддий қиёфада оғзидаги папиросини айлантириб, қоровулда турган казакларга хириллаб буйруқ берди:

— Халойиқни хандақдан нари ҳайданг! Спиридоновга айтинг, биринчи гуруҳни олиб келсин! — Попов соатига қаради-ю, бир чеккага чиқиб турди ва қоровуллар томонидан орқага сурилган ранг-баранг кийимдаги одамларнинг дор тагидан нари кетиб, уни ярим доира шаклида ўраб олаётганини томоша қилди.

Спиридонов бир неча нафар казак билан тез-тез ёриб дўкон томон жўнади. Йўлда унга Петро Мелехов дуч келди.

— Сизнинг қишлоқдан талабкорлар борми?

— Қанақа талабкорлар?

— Ҳукмни ижро этишни истаганлар.

— Бунақалар йўқ ва топилмайди ҳам! — деб кескин жавоб берди Петро сўнгра йўлини тўсган Спиридоновни четлаб ўтиб кетди.

Лекин талабкорлар топилиб қолди. Митъка Коршунов фурожкаси остидан диккайиб чиқиб турган сочларини кафти билан текислаб, лапанглаганича Петро олдига келди-да, яшил кўзларини қисиб туриб:

— Мен отаман... Нега «йўқ» дейсан. Мен розиман,— деди-ю, кулимсираб ерга қаради:— Менга ўқ бер. Бир обоймагина ўқим бор.

Митъка Коршунов, юзи қаҳри-ғазабдан тиришиб кетган, ранги докадек Андрей Кашулин билан қалмоқ башара Федот Бодовсков талабкор эканликларини билдирилар.

Ўлимга маҳкум қилинганларнинг биринчи гуруҳи соқчи казаклар қуршовида дўкон томондан келаверди, ғуж бўлиб турган оломон орасида гуриллаган овозлар, шов-шув кўтарилиди.

Яланг оёқ, қора мовутдан кенг галифе кийган, чарм камзулининг олди очиқ Подтелков олдинда келарди. У катта оқ оёқларини лойга қаттиқ-қаттиқ босиб дадил юриб келарди, бир пайт сирғаниб кетиб, чап қўлини кўтарди-да, мувозанатини сақлаб қолди. Ранги мурдадек оқариб кетган Кривошликов унинг ёнида аранг юриб борарди. Унинг кўзлари ёнар, азоб чекаётгандек, лаблари учиб туради. У елкасига ташланган шинелини тўғрилаб қўйиб, гўё совқотгандек жунжикеб елкаларини қисиб олган эди. Уларни негадир ечинтиришмаган, аммо қолганлар ички кўйлак-иштонда эдилар. Оёқларини қаттиқ-қаттиқ босиб келаётган Бунчукнинг ёнида майда қадам ташлаб Лагутин келарди. Уларнинг икковлари ҳам оёқ яланг эдилар. Лагутиннинг иштони йиртилган, сийрак жун ўсан сап-сариқ болдири кўриниб турар эди. У уялганидан йиртиқ иштонини ушлаб борар, лаблари титради. Бунчук эса соқчиларнинг боши устидан кул ранг булат чулғаб олган уфқа қарапарди. У бир нарсани пойлаб тургандек, ўткир, тетик кўзларини зўр бериб очиб-юмар, кенг кафтини очиқ ёқаси ичига суқиб, жун босиб кетган кўкрагини ишқаларди. У гўё эришиб бўлмайдиган, хурсанд қиласидиган бир ҳодисани кутаётгандек эди... Баъзилар ўзларини бепарволикка солар, юзлари лоқайд кўринарди: Соч-соқоли оқарган большевик Орлов фурур билан қўлларини силкитиб борар, казакларнинг оёқлари остига тупурар эди; лекин икки-уч кишининг кўзларига шу қадар ғам чўқкан, бир ҳолатдаги юзларида шу қадар даҳшат ифодаси бор эдики, ҳатто соқчилар ҳам улардан кўзларини опқочар, тасодифан кўзлари тушиб қолса, юзларини тескари ўғирадар эдилар.

Улар тез-тез юриб кетдилар. Подтелков тайғаниб кетаётган Кривошликовни суяб олган. Оқ рўмол ўраган аёллар, қизил-кўк тусли фуражка кийган казаклар яқинлашиб келмоқда. Подтелков ер ости-

дан оломонга қараб; беҳаё сўзлар билан овоз чиқариб сўкинади ва ўзига кўз қирини ташлаб турган Лагутиндан сўрайди.

— Ҳа, нима гап?

— Бир неча кун ичida соч-соқолинг оқариб қобди... Қиров тушганга ўхшайди.

— Оқармай нима қилсин,— лейди Подтелков чуқур хўрсениаб; сўнгра энсииз пешонасининг терини артиб гапини такрорлайди:— Бундай яхши кунларни кўрган кишининг албатта соч-соқоли оқаради да... Бўри ҳам қафасга тушиб қолса, қариб-қартайиб қолади, мен — инсонман-ку!

Улар жимиб қоладилар. Оломон яқин келиб уларни ўраб олди. Ўнг томонда соз тупроқли узун қабр кўзга ташланиб турибди. Спиридонов:

— Тўхта!— деб буйрўқ беради.

Подтелков бир қадам олға чиқиб, оломоннинг биринчи қаторида турган одамларга ҳорғин кўзларини югуртириди: уларнинг кўпчилиги соқоллари оқарған ёки оқ оралаган кишилар. Фронтдан қайтганлар қаердадир орқада туришиб, виждан азобини чекардилар. Подтелков салқи мўйловларини қимирлатиб қўйиб, паст овозда дона-дона қилиб гапирди:

— Қариялар! Кривошликов билан менга шерикларимизнинг ўлимни қандай қарши олганларини кўришга ижозат беринг. Бизни кейин осарсан, ҳозир эса дўстларимиз, ўртоқларимизга қараб туриб, руҳан заиф бўлғанларга далда беришни истаймиз.

Ўртага шундай бир сукунат чўкдики, фуражка устига тушаётган ёмғирнинг чиртиллагани эшитиларди...

Ясовул Попов қаердадир орқада, тамакидан сарғайиб кетган тишларини иржайтириб кулиб турарди; у эътиroz билдирамди; чоллар эса пойма-пой бақиришиб:

— Изн берамиз!

— Майли, томоша қилсинлар!

— Уларни ҳандақдан нарироққа оборинг!— дедилар.

Кривошликов билан Подтелков оломон турган

жойга қараб юрди, халойиқ уларга йўл очиб кўчанинг икки четига чиқиб турди. Кривошликов билан Подтелков нарироққа бориб туришди, оломон уларни ўраб олди, юзларча мароқли кўзлар уларга тикилди: улар орқалари қабрга ўгирилган қизил гвардиячиларни казаклар нўноқлик билан сафга ти-заётганларини томоша қилишди. Подтелковга улар яхши кўриниб турибди. Кривошликов эса гардан қирилмаган бўйини чўзиб, оёқ учига босиб қарайди.

Бунчук чап томондан учинчи ўринда. У бир оз букчайиб, кўзларини ердан олмай, оғир хўрсинади. Унинг нариёғидаги Лагутин букчайиб кўйлагининг этагини тортиб, иштонининг йиртилган жойини беркитишга уринади, учинчиси — тамбовлик Ванька Болдирев. У таниб бўлмаслик даражада ўзгарган, ҳеч бўлмаса йигирма йиллик қартайган. Подтелков бешинчисининг кимлигини билишга уринади: у Каменскдан шу ерга келгунча ўзи билан мусибатларга ҳам, хурсандчиликларга ҳам шерик бўлиб келган Казанск станицалик казак Матвей Сакматовни зўрга таниди. Яна икки киши келиб, хандаққа орқа қилиб турди. Петро Лисиков казакларнинг жирига тегиб кулади, онадан сўқади, жимиб қолган оломонга қараб маҳкам қисган муштларини дўлайтиради. Корецков миқ этмай туради. Сўнгги кишини қўлда кўтарниб келишади. У орқасига эгилиб, ўликникидек осилиб қолган оёқлари билан ер чизиб келади ва ўзини судраб келаётган казакларга ёпишиб, кўз ёши билан ювилган юзини у ён-бу ён буриб типирчилайди:

— Қўйиб юборинг, биродарлар! Худо ҳурмати учун қўйиб юборинг! Оғайнилар! Азиз биродарлар!.. Нима қиляпсиз?! Мен герман урушида хизматларим учун тўртта крест олганман!.. Бола-чақам бор!.. Ё худо, мен бегуноҳман!.. Вой, нега унақа қиляпсизлар?

Новча атаманли казак тиззаси билан унинг кўкрагига тутиб қабр ёнига турғизиб қўйди. Қаршилик кўрсатаётган бу кишини Подтелков энди таниди. Таниди-ю, даҳшатга тушди. Бу ахир жасоратли қизил

гвардиячи , 1910 йилда ҳарбий хизматга кирган мигулинлик казак, георгий крестининг тўрттала даржасиниям олган, кўркам, сариқ мўйловли йигит эди. Уни оёқса турғизиб қўйдилар, бироқ яна йиқилиб тушди; у казакларнинг оёғи остида судралиб, қовжираган лаблари билан уларнинг этикларини, юзига тепган этикларини ўпид, жон-жаҳди билан:

— Үлдирманглар! Раҳм этинглар!.. Учта болам бор... қизим бор... садағанг кетайлар!— деб хириллади ва атаманили казакнинг тиззасини қучоқлади, аммо казак сапчиб, ўзини четга олди, нағалли этиги билан ўхшатиб унинг қулоғига тепди, қулоғидан тизиллаб қон чиқиб оппоқ ёқаси ичига оқиб туша бошлади.

— Турғизиб қўйсанг-чи!— деб бақирди Спиридов фазаб билан,

Уни бир амаллаб кўтариб турғизиб қўйишида-да, ёнидан қочишиди. Хандақнинг нариги томонида талабкорлар милтиқларини қўлга олиб шайланиб туришиди. Халойиқ «үҳ» деб юборди-ю, жимиб қолди. Аёллардан бири хунук овоз билан чинқириб юборди.

Бунчук бўз рангли туман билан қопланган осмонга, устида йигирма тўққиз йил саргардон бўлиб юрган маъюс ерга яна бир марта қарагиси келарди. Бошини кўтариб, ўн беш қадам нарида зич бўлиб саф тортган казакларни кўрди: улардан бири, энсиз оқ пешонасига фуражкасининг остидан соchlари тушиб турган казак, каита яшил кўзларини қисиб, олдинга бир оз эгилиб, лабларини қимтиб, Бунчукнинг кўкрагини мўлжалга олган эди. Ўқ узилмасдан бурун Бунчукнинг қулоғини чинқириқ овози тешиб ўтгудек бўлди, бошини ўгириб қаради: юзига сепкил тошган ёшгина жувон, халойиқ ичидан чиқиб, қишлоққа қараб чопиб кетди, у бир қўлидаги болани бағрига маҳкам босиб олган, иккинчи қўли билан зўр бериб унинг кўзини беркитар эди.

Олдинма-кейин ўт очилгандан кейин, чуқур устидага турган саккиз киши қулаб тушгач, ўқ отганлар чуқур тепасига чопиб келишди.

Митъка Коршунов ўзи отган қизил гвардиячининг

сапчиб-сапчиб, ўз елкасини тишилаётганини кўрди-ю; унга қарата яна ўқ узди, сўнгра Андрей Кашулинга қараб:

— Манови шайтоннинг қилган ишини қара, елкасини қон чиққунча тишлаб, худди бўридек товушчи қармай ўлди-я,— деди.

Шундан кейин маҳкум этилганлардан ўн кишини қўндоқлар билан ўриб, чуқур ёқасига ҳайдаб келтиридилар...

Иккинчи марта бараварига ўқ узилганидан кейин хотинлар фарёд кўтаришди-ю, халойиқ орасидан чиқиб, туртнишиб, болаларини етаклаб қочишиди. Кейин казаклар ҳам тарқала бошлишди. Бу даҳшатли хунрёзлик, жен берадиганларнинг бақириши, хисриллаши, ўз навбатини кутиб турганларнинг йиғи-сифиси — одамларни қочишига мажбур қилди. Фақат ўлаётганларни кўравериб кўзлари пишиб қолган фрончилар билан қаҳру ғазабга тўлган чоллардан бир нечтасигина қолди.

Кийим-бошлари ёчиб олинган, яланг оёқ қизил гвардиячиларни кетма-кет олиб келиб турдилар; одам отишга талабкор бўлганлар ўзгариб турар, бараварига ўт очилар, гоҳ-гоҳда яккам-дуккам ўқ овози эшитиларди. Чала ўликларни бир ўқ билан жо-бажо қилишарди. Танаффус вақтида биринчи навбатда отилганлар устига наридан-бери тупроқ тортиб қўйишишарди.

Подтелков билан Кривошликов навбат кутиб турган шерикларининг олдига келиб, уларга далда беришга уринар, лекин айтилган сўзлар таъсир қилмас — бир минутдан кейин ҳаётлари банди қирқилган олмадек узилиб кетадиган бу одамларнинг онгини бошқа ҳис-тўйғулар қамраб олган эди.

Григорий Мелехов сийраклашиб қолган оломоннинг орасини ёриб ўтиб, қишлоқ томон кетар экан, Подтелковга юзма-юз келиб қолди. Подтелков тисарилиб, кўзларини қисиб қаради:

— Мелехов, сен ҳам шу ердамисан?

Григорийнинг юзи бўзариб кетди-да, тўхтаб:

— Ҳа, шу ердаман, кўриб турибсан-ку,— деди.

— Кўриб турибман...— деб оғзини қийшайтириб

кулди Подтелков. Нафрати қўзғаб, Григорийнинг бўзарган башарасига тикилди.— Нима, ўз биродарларингни отиб ўлдиряпсанми? Айнидингми?.. Вой, сени қара-ю...— шуни деб Григорийга яқин келиб шипшиди:— Демак, сен бизникиларга ҳам, уларга ҳам хизмат этаркансан-да? Қайси бири дурустроқ тўлайди? Улганинг яхши-я!..

— Григорий унинг енгидан ушлаб, бўғилиб сўради:

— Глубокая яқинидаги жанг эсингдами? Офицерларни стганлари эсингдадир... Сен оттирган эдинг! Тўғрими? Энди сенга навбат келди. Кўп дикқат, бўлма! Сендан бошқа ҳам бирорларнинг терисига сомон тиқадиганлар йўқ эмас! Дон совнаркомининг раиси, кунинг битган! Сен ҳароми, казакларни жуҳудларга сотдинг! Тушундингми? Яна бир гап айтами?

— Христоня ғазаби қайнаб кетган Григорийни қулоқлаб, бир чеккага олиб чиқди.

— Юр, отларнинг олдига борайлик. Кетдик. Бизнинг бу ерда қиладиган ишимиз йўқ. Ё худо, одамларга нима бўлди-я?

Улар жўнаб кетишиди, бироқ Подтелковнинг овозини эщтиб тўхташди. Фронтчилар ва чоллар қуршовида қолган Подтелков эҳтиросли овоз билан бақириб гапиравди:

— Сизлар жоҳил ва кўзи очилмаган одамсизлар! Кўрсизлар! Офицерлар сизларни лақиллатиб, қон қардошларингизни ўлдиришга мажбур қиляпти! Буларни ўлдириш билан қутулиб қоламиз деб ўйлайсизларми? Ҳозир қўлингиз баланд, лекин эртага эса сизларни отиб ўлдиришади! Совет ҳокимияти Бутун Россияда барпо бўлади. Менинг гапларим эсингизда турсин! Сизлар ноҳақ қон тўқяпсизлар! Аҳмоқ одамсизлар!

Бир чол ҳалойиқ орасидан сакраб чиқиб:

— Биз уларни ҳам бир ёқлик қиласиз!— деди.

— Бобо, сиз ҳаммани отиб ўлдиролмайсизлар,— деб кулди Подтелков.— Бутун Россияни дорга тортолмайсизлар. Уз каллангизга эҳтиёт бўлинг! Қейин аттанг деб юрманг!

— Сен бизга дўқ ураверма!

— Мен дўқ ураётганим йўқ. Мен сизларга йўл-йўриқ кўрсатялман.

— Сен ўзинг кўрсан, Подтелков! Москва кўзингга шарда тутиб қўйган!

Григорий унинг сўзини охиригача эшиштади, оти-ни боғлаб қўйган қўрага қараб чопди. От ўқ товуш-ларини эшишиб безовталаниб турарди. Григорий билан Христоня айилни тортиб, қишлоқдан от чопти-риб чиқиб кетдилар, қайрилиб орқаларига ҳам қа-рамай, тепаликдан ошиб ўтдилар.

Пономарёвда эса ҳамон ўқлар тутун чиқариб варанглар: Вёшенская, Каргин, Боков, Краснокутск, Милютин казаклари Казанск, Мигулин, Раздорск, Кумшатск, Бакланов казакларини отиб ўлдирмоқда эдилар.

Хандақ ўликларга тўлди, унинг устига тупроқ тортиб, тепкилаб шиббаладилар. Қора маска кийган икки офицер Подтелков билан Кривошливони етак-лаб, дор тагига олиб келди.

Подтелков мардлик билан мағур бошини кўта-риб, курси устига чиқди, қорача йўғон бўйнидаги ёқа-сини ечди ва тап тортмай совунланган сиртмоқни бўйнига солди. Кривошливони ҳам олиб келдилар, офицерлардан бири ёрдамлашиб уни курси устига чиқариб қўйди ва бўйнига сиртмоқ солди.

— Улишдан олдин сўнгги сўзимни айтишга рух-сат этинг,— деб илтимос қилди Подтелков.

— Айт!

— Сўраймиз!— деб қичқиришди фронтчилар.

Подтелков сийраклашиб қолган халойиқни қўли билан кўрсатиб деди:

— Қаранг, бизнинг ўлишимизни томоша қилишни истаганлар нақадар оз қолди. Виждон азобига учрадилар! Биз меҳнаткаш халқ тарафида туриб, унинг манфаати учун генерал кўпакларга қарши жонимизни аямай жанг қилдик, мана энди келиб-келиб, сиз-нинг қўлингизда ҳалок бўлдимиз! Аммо биз сиздан гина қилмаймиз!.. Сизлар қаттиқ алдангансизлар! Ахир революцион ҳокимият ўрнатилади, ўшанда ҳақ кимнинг томонида эканини тушуниб оласизлар. Бугун

сиз Тинч Доннинг энг яхши фарзандларини мана шу чоҳга жо қилдингизлар...

Фовур-фувур кўтарилиб, Подтелковнинг овози аниқ эшитилмай қолди. Офицерлардан бири бундан фойдаланиб, эпчиллик билан Подтелковнинг оёғи остидаги курсини уриб йиқитди, унинг оғир барваста гавдаси силкиниб кетиб осилиб қолди, оёғи ерга тегди. Сиртмоқ бўйнидан бўғиб, уни юқорига чўзилишга мажбур қилди. У оёғининг учига босиб, бошмалдогини шиббаланган нам ерга тиради-да, ўпкасига ҳаво олди ва қинидан чиқиб кетаётган қўзларини жимиб қолган халойиққа тикиб аста деди:

— Одамни осишни ҳам билмайсизлар... Агар сенинг ўрнингда бўлсан, Спиридонов, оёғинг ерга тегмас эди...

Унинг оғзидан тупук кела бошлади. Маскали офицерлар ва улар ёнида турган казаклар шошиб қолишиди, унинг кучсизланган оғир, гавдасини курси устига кўтариб қўйишиди.

Кривошликовга сўзини тугатишга имкон бермадилар: курси оёғи остидан учиб кетиб, кимдир ташлаб кетган белга тегиб кетди. Қотмадан келган чайир Кривошликов анчагача чайқалиб турди; у гоҳ оёқларини йиғиб ғужанак бўлиб олар, букилган тиззала-ри ияигига тегар, гоҳ оёқларини чўзиб типирчиларди. Подтелковнинг оёғи остидан иккинчи марта курсини олиб ташлаганларида ҳам Кривошликовнинг жони узилмаган, ўлим талvasасида, оғзидан қийшайиб чиқиб қолган қора тилини қимирлатарди. Подтелковнинг оғир гавдаси яна осилиб, чарм камзулининг елкасидаги чоки сўқилиб кетди, яна оёқларининг учи ерга тегиб қолди. Оломон «уҳ» деб юборди. Баъзилар чўқиниб, тарқала бошладилар. Одамлар шу қадар шошиб қолган эдиларки, бир минутгача ҳамма сеҳрлангандек, қўрқа-писа, Подтелковнинг қорайиб кетган юзига қараб қотиб қолди.

Лекин Подтелков тилсиз бўлиб қолгањ, сиртмоқ томоғидан хиппа бўғиб олган эди. У фақат қўзларини айлантирас, қўзларидан селдек ёш оқарди, оғзини қийшайтириб, азобини енгиллаштириш учун изтироб билан зўр бериб юқорига чўзиларди.

Кимдир! белкурак билан ерни қазиши көраклигини ўйлаб топди. Подтелковнинг оёғи остидаги тупроқи шошиб-пишиб олиб ташлай бошлади, борган сари маҳкумнинг гавдаси пастга тушиб, бўйни борган сари узая борди. Подтелковнинг сочи жингалак боши шилқ этиб орқасига тушиб кетди. Арқон олти пудли оғирлиқни зўрга кўтариб турарди. Арқон дорга боғланган ерида ғижирлаб, лапанглай бошлади, Подтелков ҳам унинг чайқалишига монанд силкинарди. У гўё қотилларга қорайиб кетган юзини ва қайноқ сўлакайи ва кўзёши оқиб тушиб турған кўкрагини кўрсатиш учун ҳар тарафга айланарди.

XXXI

Мишка Кошевой билан Валет икки кечадан кейингина Каргиндан чиқиб йўлга тушишди. Даشتни кўпикдек оппоқ туман қоплаган, дараларда туман паға-паға бўлиб сузиб юрар, жарларда чўкиб ётар, тепаликлар ён бағридан пастга сирғилиб тушар эди. Устларини туман қоплаган тепалар ой нурига чўмган. Кўрпа бўлган майсазорда беданалар сайдарди. Осмондаги ой қамиш, қиёқ ўт босиб кетган ҳовузда очилган нибуфар сингари сузиб юрарди.

Мишка Кошевой билан Валет тонг отгунча йўл юришди. Ҳулкар ўлдузининг ранги ўчди. Шудринг туша бошлади. Улар Нижне-Яблоновск хуторига яқинлашдилар. Шу ерда хуторга уч чақирим қолганда тепалик устида казаклар уларни қувиб етди. Олтига отлиқ казак изма-из келаётган эди. Мишка билан Валет ўзларини четга олиб бекинмоқчи бўлишди-ю, лекин ҳали ўт ўсмаган, атроф сутдек ойдин эди. Улар қўлга тушиб қолишли... Икковини изларига ҳайдаб кетишли. Юз саржин жойгача индамай боришли. Кейин бирдан ўқ чиқди. Валетнинг оёғи налишиб, ўз соясидан ҳуркиб кетган отек ён томонга қараб юриб кетди. У бирдан йиқилиб тушмади, секин ерга ётиб, кўм-кўк шувоқ ўт устига юзини қўйди.

Мишка эс-ҳушидан айрилиб, беш минутча индамай борди, унинг қулоғи шанғиллар, оёқлари майишар эди. Кейин:

— Нега отмайсизлар, итваччалар? Нега одамни хуноб қиласизлар? — деб сўради.

— Казаклардан бири мулойимлик билан:

— Индамай кетаверсанг-чи,— деди.— Мужикни ўлдирдик, аммо сенга раҳмимиз келди. Сен Герман урушида ўн иккинчи полкдамидинг?

— Ҳа, ўн иккинчи полкда.

— Яна ўн иккинчи полкда хизмат қиласан. Ҳали ёш йигитсан, аммо бир оз йўлдан адашдинг, майли ҳечқиси йўқ. Сенга даво топамиз.

Мишканни уч кундан кейин Каргин станицасидаги ҳарбий-дала суди «даволади». Ўша кунлари суд икки турли жазо чорасини қўлларди: отиш ва савалаш. Ўлимга ҳукм қилинганларни кечаси станица ташқарисига олиб чиқиб, Қум қўрғон орқасида гумдан қиласар эдилар, тузалишига кўзи етганларни эса майдонда, ҳалойиқнинг кўз ўнгида хипчин билан савар эдилар.

Якшанба куни майдон ўртасига скамейка қўйиши билан ҳалойиқ йифила бошлади. Бутун майдон саҳни, дўконларнинг пештахталари, омборхоналар, уйлар, дўконларнинг томлари одамга тўлди. Биринчи бўлиб, Грачёв қишлоқ попининг ўғли Александровни калтаклашди. Уни ўтакетган большевик дер эдилар, ишига қараганда отилиши керак эди-ю, лекин отаси яхши ва обрўли поп эди, шу сабабдан, судда попнинг ўғлини йигирма таёқ билан жазолашга қарор қилишди. Александровнинг шимини пастга тушириб, яланғоч ҳолда скамейкага ётқизиши, казаклардан бири оёғи устига ўтириди (қўлларини тахта тагидан ўтказиб боғлаб қўйишган эди), икки казак бир дастадан тол новдасини ушлаб икки томонда туришди. Александровни роса савалашди. У ўрнидан туриб, бир силкинди-да, шимини кўтариб, тўрт томонга таъзим қилди. Отмаганларига у жуда курсанд эди, шунинг учун таъзим қилиб, ташаккур билдириди:

— Раҳмат, ҳурматли қариялар!

— Ҳечқиси йўқ, соғ бўл!— деб жавоб қилди аллаким.

Майдондагилар бараварига хохолаб кулиб юбо-

ришди, ҳатто сал нарироқдаги омборхонада ўтирган маҳбуслар ҳам жилмайиб қўйишди.

Суд ҳукмига мувофиқ Мишкани ҳам хипчин билан йигирма марта саваладилар. Аммо уят — калтак ейишдан ҳам ёмонроқ эди. Бутун станица — етти яшардан тортиб етмиш ёшигача — ҳамма томоша қилиб турарди. Мишка ҷалворини кўтарар экан, йиғламоқдан бери бўлиб, ўзини савалаган казакка:

— Бемаънигарчилик,— деди.

— Нега энди?

— Бош ўйлайди, к... жавоб беради. Умр бўйи кишининг боши хижолатдан чиқмайди.

— Ҳечқиси йўқ, уят эсдан чиқиб кетади,— деб уни юпатди казак. Сўнгра жазоланган йигитнинг кўнглини олиш учун:— Аммо мард экансан: икки марта қаттиқ туширдим, додлармикинсан деб ўйлаган эдим, қарасам... йўқ, сени додлатиш мумкин эмас экан. Тунови куни биттасини савалаган эдилар, боёқиш иштонини булғатди. Мазаси йўқ йигит экан,— деди.

Суд ҳукмига мувофиқ Мишкани эртасига ёқ фронтга жўнатдилар.

Валетнинг ўлигини икки кундан кейин топиши: хутор атамани юборган яблоновсклик икки казак саёзгина гўр қазиди-да, анчагача оёқларини осилтириб, папирос чекиб гўр ёқасида ўтиришди.

— Бу томоннинг ери заранг экан, деди улардан бири.

— Тош-метин!

— Сира ҳайдалмаганидан заранг бўб кетган.

— Ҳа-да... йигит яхши ерда, тепаликда ётади...

Бу ерда шамол ўйнаб туради, ери қуруқ кунгай экан... Тезда чиримайди.

Улар ўт устида ётган Валетга қараб қўйиб ўринларидан туришди.

— Этигини ечиб оламизми?

— Бўлмаса-чи? Этиги ҳали бут-бутун.

Валетни қабрга христиан қоидасига мувофиқ: юзини кун ботар томонга қаратиб ётқизиб, кейинн устига қалин қилиб тупроқ тортиб юборишиди.

Қабр тупроққа тұлғандан кейин казакларнинг ёшроби:

— Тепкилаб текислаймизми?— деб сүради.

— Қераги йүқ, шундайлигича қолаверсін,— деб хұрсинди бошқаси.— Тонгла қиёматда Исерофил сурини тортганда гүридан туриш үнғайроқ бўлади...

Ярим ойдан кейин кичкина гўр устида баргизуб, шувоқ ўт ўсиб чиқди, ёввойи сули бошоқ чиқарди, гўрнинг ёнгинасида сариқ гулли ёввойи ўт, қашқабеда кўкариб, попук чиқарди, жамбил, ихрож ва бошқа ўтлар кўкарди. Кўп ўтмай яқин орадаги қишлоқдан бир чол келиб, қабрнинг бош томонини қазиб, яхшилаб рандаланган эман устун ўрнатди, устунга биби Маръям суратини қоқиб қўйди. Уч бурчакли тахтадан қоронги кечада биби Маръяминг маъюс чеҳраси парпираб кўринар, иконанинг остидаги раҳига славян ёзуви билан қора сиёҳда қўйидагилар ёзилган эди:

Замона нотинч бўлса, бузилса агар.
Дўстингни ёмонлама, азиз биродар.

Чол кетиб қолди, чўлдаги бу зиёратгоҳ ўзининг мунгли манзараси билан ўтган-кетганларнинг дилларини сиёҳ қиласди.

Май ойида қабр ёнида базғалдоқлар бир-бири билан уришди, ўтларни топтаб «қўнарға» ясашди, теваракдаги кўм-кўк бўлиб ўсиб кетган буғдойиқларни оёқ ости қилиб, макиён, ҳаёт севги ва палапон қолдириш учун жанг қилишди. Орадан кўп вақт ўтмай, қабр ёнида шохлаб кетган шувоқ ўт тагида макиён базғалдоқ тўққизта кул ранг хол-хол тухум қўйди, тухумларини ялтироқ қанотлари остига олиб, баданинг ҳарорати билан иситиб ётди.

ЭСЛАТМА

«Тинч Дон» романининг иккинчи китоби асосан февраль буржуа-демократик революцияси, генерал Корниловнинг монархияни тиклаш йўлида қилган фитнаси, Улур Октябрь социалистик революциясининг биринчи кунларида рўй берган тарихий воқиаларга бағишиланган, ёзувчи бу китобида 1917 йилнинг охири, 1918 йил бошларида Донда рўй берган контрреволюцион чиқишиларга қарши олиб бориленган курашини тасвирлайди.

Бу ҳодисаларни бадинӣ шаклда тасвирлаш ғоят мушкул эди, чунки роман ёзилаётган маҳалда конкрет тарихий материал ҳали ҳеч ўрганилмаган, кўлгина муҳим ҳужжатлар эълон қилинмаган, ўша даврни етарли даражада чуқур ойдинлаштирадигаи илмий асарлар йўқ эди. Баъзи бир тарихий воқеалар тўғрисида маълумот берувчи тарихий манбалар орасида В. Владимирова-нинг «1917 йилда контрреволюция» («Корнилов фитнаси») деган китобини (М. 1924), «Корнилов қўшини қаерда» деган мақолани кўрсатиб ўтиш мумкин («Известия Ростово-Нахичеванского Совета рабочих и солдатских депутатов» газетасининг 1917 йил 2/15 сентябрь сонида).

Буржуа вақтли матбуотида босишлиб чиқсан хабарлар ҳам диққатга сазовордир, чунончи: «Генерал Л. Г. Корниловнинг Москвада бўлиши» «Русское слово» газетасининг 1917 йил 15/28 (августдаги сони), «Генерал Корнилов, Деникин ва бошқаларнинг қочиши «Русское слово» газетасининг 1917 йил 21 ноябрь (4 декабрь сони), шунингдек контрреволюцион ҳараратнинг собиқ йўлбошлилари бўлган оқ эмигрантларнинг хотираларини кўрсатиш мумкин. Лекин бу хотираларда тарихий холослик йўқ.

Ёзувчи ўз романни устида ишилаётган маҳалда бир-бираға қарама-қарши бўлган бу хилма-хил материалларни танқид кўзи билан кўриб чиқиб, улардан усталик билан фойдаланган.

Езид тугатилмаган «Донишчина» повестининг айрим парчалари, (ушбу асарлар тўвламининг 2-ни томига ёзилган эслатмага қаранг) романнинг тўртинчи қисмидаги Корнилов исёни баён қилинган бобларнинг асосий мазмунини ташкил этади, бу боблар сюжет жиҳатидан Григорий Мелеховнинг бошидан кечирган воқеалар билан боғланмайди. Илгари ёзилган парчалар романга узвий равишда киритилган — романнинг композицияси ва услубини сақлаб қолиш ва асарнинг бутунлиги ҳамда изчиллигини бузмаслик учун ёзувчи илгари ёзган парчаларни қунт билан қайтадан ишлаб чиқдан.

Романнинг тексти, ҳар ҳолда М. А. Шолоховнинг архив манбалари ҳамда мемуарлар билан танишлигини кўрсатади. Баъзи бир ҳужжатлар китоб текстининг муҳим қисмини ташкил этади. Айрим воқеаларнинг тафсилотини, хусусан кенг ҳалқ оммасининг кайфияти, турли ижтимоий гуруҳ ва сиёсий ташкилотларнинг бир-бири билан тўқнаши тўғрисидаги маълумотларни ёзувчи ўша воқеаларда қатнашган кишилар оғиздан эшишиб ёзган.

«Тинч Дон» романнинг иккинчи китобида тарихий шахсларга кўп ўрин берилган, булар орасида биз революция томонидан ағдарилилган подшолик арбоблари, турли сиёсий партия раҳбарлари, казак қўшин атаманлари, оқгвардиячи генераллар, Дон Қўшин кенгашининг раҳбарлари ва бошқаларни кўрамиз.

Революцион ҳалқ вакиллари бўлган Подтелков, Кривошликов, Шчаденко, Головачев, Минаев, Лагутинларнинг образи ҳам романдаги воқеалар билан чамбарчас боғланган. Романнинг бешинчи қисми асосан бу ҳалқ вакилларининг қаҳрамонликларини тасвирлашга бағишиланган.

Маълумки, Донда совет тузумини ўрнатиш учун курашган Федор Григорьевич Подтелков (1886—1918), Михаил Васильевич Кривошликов (1894—1918), Иван Лагутин революциянинг биринчи кунидан бошлиб оғишмай революция томонига ўтган эдилар бу истебодли одамлар Донда контреволюцияга қарши курашга жуда зўр таъсир кўрсатдилар.

Бу шахслардан Подтелковга романда кўпроқ ўрин берилган Федор Григорьевич Подтелков Усть-хопер станицасига қарашли Крутовск хуторида камбагал казак оиласида дунёга келди. Уч ёшга кирганда отадан етим қолиб, бобосининг қарамонигда яшади.

1912 йили Подтелков армия сафига хизматга чақирилди ва гвардия батареясига тайин этилди. Гвардия батареясига энг бўйдор ва бақувват казакларни танлаб олар эдилар. Табиатан

серфаҳм, кескин ва матонатли одам бўлган Подтелков хизмат кўрсатиб взвод урядниги даражасига кўтарилди, батареяни фронтга жўнатиш вақтида эса у вахмистр эди. Жангда кўрсатган қаҳрамонлиги учун икки георгий крести ва «жасорати учун» медали билан мукофотланди.

Подтелковнинг бутун ҳәёти революцияни қабул қилишга уни тайёрлаб қўйган эди. Улуг Октябрь революциясида бўлгач, бу фавқулодда қобилиятли одам бутун куч-ғайрати билан меҳнаткаш ҳалқа хизмат қилишга кириши. Подтелков ўз истеъоди соясида Донда Совет ҳокимиётини ўрнатиш ва мустаҳкамлашда жонбозлик кўрсатган курашчиларнинг биринчи қаторидан ўрин олган. Ҷунончи, қирқ олти полкдан вакил бўлиб келган фронтчи казакларнинг 1918 йил 10(23) январда Каменскда чақирилган қурултойида Ф. Г. Подтелков ва унинг сафдоши М. В. Кривошликов Дон Ҳарбий-революцион комитети составига кирдилар, Подтелков — бу комитетнинг раиси, Кривошликов — секретари қилиб сайланди.

Подтелков раис бўлиб сайланган куннинг эртасига, бирталай казаклар йигилган митингда шундай деган эди: «Оталар, ака-укалар, мен ҳеч бир партияга аъзо бўлиб ёзилган эмасман, большевик эмасман. Менинг мақсадим адолат ва бутун меҳнаткашларнинг баҳти-саодати ҳамда қардошлик иттилоғидир, тоиники, ҳеч қандай зулм, ҳеч қандай қулоқлар, буржуйлар, боёнлар қолмасин, ҳамма эркин ва тўғри ҳаёт кечирсин... Большевиклар мана шу нарсаларни амалга ошириш учун курашаётгэн бўлсалар мен айбдорми? Большевиклар — ишчилардир, яъни биз казаклар сингариг меҳнаткашлардир. Фақат ишчи-большевиклар биздан кўра онглироқ ва инокроқдирлар; бизни жаҳолатда асраб келганилар, улар эса шаҳарларда яшаб, ҳаётни бизга қараганда яхшироқ тушуниб олганлар. Бундан чиқди, мен большевикман, аммо большевиклар партиясига ёзилган эмасман». Ёзувчи романнинг 5-нчи қисмидаги IX бобда Подтелковнинг нутқини келтирган, бу нутқ М. Корчиннинг «Донда Советлар учун кураш» деган китобида келтирган Подтелков нутқининг айнан ўзидир. (Ростов Н/Д, 1947, 54 с.)

Дон социалистик республикаси Советларининг 1918 йил 13 апрелда Ростов-на-Донуда чақирилган биринчи съезди Подтелковни Дон республикаси Халқ Комиссарлар Советининг раиси қилиб сайлади. Дон республикасининг Марказий Ижроия комитети Г. К. Оржоникидзе бошлиқ фавқулодда мудофаа штаби тузган эди. Подтелков шу штабнинг қарори билан Усь-Медве-

дица билан Усть-Хопер округларига юборилган экспедицияга бошчилик қилди. Романда бу экспедициянинг фожиали ҳалокати тасвирланган.

Подтелков бошчилигидаги экспедиция фожиасини тасвирлашда М. А. Шолохов бу воқеани ўз кўзи билан кўрган кишиларнинг оғзидан эшитган ҳикоялардан ташқари бир қатор китоб ва мақолалар ҳамда архив материалларидан фойдаланган. Экспедиция аъзоси бўлган, Подтелков отрядини қуролсизлантиришда тасодифан қутулиб қолган сиёсий ходим А. Френкель ўзининг «Подтелков экспедициясининг ҳалокати» деган мақоласида (Известия ЦИК Донской Советской республики и Царицинского штаба Красной Армии» газетаси. 1918 йил 8 июнь №5) ҳамда «Революция бургутлари» деган китобида (Ростов Н/Д, 1920) да бирталай фактларни келтирган. 1927 йили, М. А. Шолохов ўз романи устида ишлаётган паллада Дан-Делертнинг «Дон ўт ичидা» деган китоби босилиб чиқди. Подтелков билан Кривошликовга багишланган бу асар асосан А. Френкель томонидан келтирилган фактларни баён этади. Аммо бу материаллар етарфли эмас эди, ёзувчи Ростов ва Москва архивларida ишлаб, амалдорларнинг ёзишмалари, турли мажлисларнинг протоколлари, ўша паллада тарқатилган революцион хитобномалар билан танишиб чиқди. Романинг бешинчи қисмидаги XXVII бобда келтирилган Подтелков билан Лагутин ўртасидаги суҳбат ҳам М. Корчиннинг «Дон казаклари» деган китобидаги (Ростов-на-Дону, 1949, 112 бет) ҳужжатга жуда мосдир.

Подтелков экспедициясининг иштирокчиларидан Михаил Васильевич Кривошликов Юқори Дон округидаги Ушаков хуторидаги бир темирчи оиласида дунёга келди. У Еландаги икки синифли мактабни «аълочи» бўлиб тутатди. Отаси кўп машаққатлар билан уни «хазина ҳисобига» ўрта қишлоқ хўжалиги ўқув юртига жойлаштирди. (Бу мактаб Новочеркасск яқинидаги Персиановкадан эди). Кривошликов аъло баҳо билан ўқиди, ўқувчиликарнинг «Дастлабки қадамлар» деган қўйл ёзма журналига муҳаррирлик қилди. Ўқув юртини битиргандан сўнг уни Сальск округига агроном қилиб юбордилар. М. Кривошликов маълумотини ошириш учун Киев савдо-тижорат институтига сиртқи ўқишга кирди, аммо шу орада уруш бошланиб қолди-ю, уни армия сафига чақирдилар. М. Кривошликов Новочеркасскдаги ҳарбий мактаб қошидаги қисқа муддатли курсларни битириб, 1917 йил июнь ойида фронтга жўнади. Отасининг оти сотиб олиб беришга қурби етмади (казак армияда ўз оти билан хизмат

қилиши керак эди), шу сабабдан Кривошликов 28-нчи Дон казак полкидаги пиёда разведкачилар командири қилиб белгиланди. У фронтдан отасига юборган хатида: «...Дада, офицерлар мендан куляптилар, ростдан ҳам пиёда аскар бўлиб хизмат этиш жуда оғир. Ҳеч бўлмаса хазинадан қарз сўрагин-у от сотиб ол...» деб ёзган эди. Отаси от харид қилиб, фронтга жўнатди. Шундан кейин Кривошликов сотия командири вазифасига белгиланди. Февраль революциясидан сўнг у полк комитети раиси қилиб сайланди. Қўзғолон кўтарган 5-нчи казак дивизияси (28-нчи полк ҳам шу дивизия составида эди) олдиндаги позицияларни ташлаб, Донга жўнади, Каменск станцияси районида жойлашди. Кривошликовнинг Подтелков билан биргаликда олиб борган революцион фаолияти ана шу ерда бошланди.

Улеми олдида ёзган хати Кривошликовнинг революцион курашчи, матонатли ва мард одам эканлигини яна бир марта тасдиқлади. У ўз хатида шундай деб ёзган эди: «Дадам, ойим, бобом, бувижоним, Наташа, Ваня ва бошқа қавм-қариндошларга маълум бўлсинки, мен охиригача курашишга жазм қилдим. Бизни алдаб асир қилиб олдилар, энди қуролсизлантириб ўлдиряптилар. Аммо сизлар қайғурманг, кўз ёши қилманг. Мен ўляпман, лекин ишонаманки, улар ҳақиқатни ўлдиролмайдилар ва бизнинг чеккан азобларимиз қон билан ювилади... Алвидо. Меҳрибон ўғлингиз Миша. Р. С. Адажон! Ҳамма тиниб-тинчиганидаң кейин, менинг қаллиғимга хат ёзиб юборинг: Полтава губерниясидаги «Волки» қишлоғида турувчи Степанида Степановна Самойленкога, у билан учрашиш тўғрисидаги ваъдамга вафо қилолмаганимни ёзинг» (И. Горелов. «Подтелков ва Кривошликов» Ростов на-Дону, 1937).

Ёзувчи бир неча илиқ сўз билан бу мураккаб, нозик шоир табиатли илғор революционер образини яратади билган.

Подтелков билан Кривошликовнинг энг яқин жанговар дўстларидан бири 14-нчи Дон казак полкининг урядниги Иван Лагутин эди.

Петрограддаги Октябрь қўзғолонининг иштирокчиси бўлган ва у ерда жангларда чиниқдан бу одам иккинчи чақириқ Советлар Марказий Ижроия Комитети қошидаги казак комитетининг биринчи раиси қилиб сайланди. У Петрограддан Донга келгандан кейин тап тортмай революцион ишни кучайтириб юборди. «Тинч Дон»да Лагутин образи кўп ўрин ишғол қилмайди, аммо революцион ҳаракатнинг иштирокчиси бўлган бу одамнинг образи кишини ишонтиради ва ҳаққоний суратда тасвиранган.

* * *

«Тинч Дон» романнинг иккинчи китоби — «Октябрь» журналиниг 1928 йилда чиққан сонларида (бунинг «Иккинчи китоб» эканлиги кўрсатилмай), бевосита биринчи китобдан кейин босилган (романнинг тўртинчи қисми — журналнинг 5 ва 6-нчи сонларида, бешинчи қисми эса — 7,8 ва 9—10 сонларида босилган). ўша йил, яъни 1928 йилда «Тинч Дон»нинг тўртинчи қисми «Роман — газета» (17-нчи сони)да босилиб чиққан, лекин бу асар романнинг иккинчи китоби эканлиги кўрсатилмаган, «Октябрь арафасида» сарлавҳаси остида нашр этилган. Романнинг бешинчи қисми ҳам «Роман газета»нинг 1929 йилги (7-нчи сони)да нашр этилган. Яна аввалидек унинг «Иккинчи китоб» эканлиги кўрсатилмай, «Түёқ остидаги қон» сарлавҳа остида босилган. «Роман-газета»да эълон этилган «Тинч Дон» романнинг бобларига тартиб рақами қўйилмаган, аммо, ҳар бобганим қўйилган (чунончи: «Офицерлар ертўласида», «Фронт барбод бўлмоқда», «Ҳамкорлар», «Урушиб бўлдилар!», «Ҳалокатли замон», «Ун еттинчи путевка» ва шу кабилар).

Романнинг тўртинчи ва бешинчи қисмлари «Московский рабочий» нашриёти томонидан босиб чиқарилди, М. Л. 1929. (Бу асар романнинг иккинчи китоби» эканлиги кўрсатилган эди). Ушандан бери у биринчи китоб билан бирга қайта қайта нашр этилди.

«Тинч Дон» романни биринчи, иккинчи китобининг бадиҷи жиҳатдан юксаклиги А. М. Горькийнинг диққатини ўзига жалб этиди. 1929 йил ёзида босилиб чиққан «Ишчилар синфи ўз маданияти усталарини тарбиялаб етиширишлари зарур» деган мақоласида А. М. Горький шундай деб ёзган эди: «Фадеев, Шолохов сингари талантлар камдан-кам учрайди. Аммо кўриб турибмизки, ишчилар синфи уларнинг бадијий маҳоратларига жуда тўғри баҳо берди (М. Горький, ўттиз томлик асарлар тўплами, 25 т. М. 1953, 44 бет).

МУНДАРИЖА

ИККИНЧИ КИТОБ

Тўртингчи қисм	5
Бешинчи қисм	220
Эслатма	454

На узбекском языке

Михаил Александрович
ШОЛОХОВ

СОБРАНИЕ СОЧИНЕНИЙ, т. 3

Гослитиздат УзССР — Ташкент — 1951

М. Шолоховнинг 1956—1960 йилларда
Гослитиздат нашр қилган 8 томлик асарлар тўпламидаи таржима

Редактор *М. Мирзоидов*

Рассом *А. Ошайко*

Расмлар редактори *Г. Остапенко*

Техн. редактор *Н. Курилова*

Корректорлар *И. Кобилов, Н. Ахророва*

* * *

Босмахонага берилди 18/VIII 1961 й. Босишга руҳсат этилди 17/IX 1961 й.
Формати 84×108/32. Босма л. 14,375. Шартли-босма л. 23,57. Нашр л. 22,9.

Индекс: н/а. Тиражи 30000.

ЎзССР Давлат бадий адабиёт нашриёти Тошкент, Навоний кўчаси, 30.
Шартнома № 124/60.

* * *

ЎзССР Маданият министрлиги Ўзглавиздатининг І-босмахонаси, Тошкент.
Хамза кўчаси, 21. 1961 й. Заказ № 1206. Баҳоси 89 т.